


H. H. 10.



AC

13

.C756





HERMANNI CONRINGII  
*Viri Summi* 1606-1681

Regum quondam pluriumq; Imperii  
Principum Consiliarii & in Acad. Jul. Me-  
dicinæ ac Politices Profefs. longè  
celeberrimi

# EPISTOLARVM SYNTAGMATA Duo

una cum

*RESPONSIS.*

Præmissa

Conringii Vita, Scriptorum  
Index, & de his Doctorum Viro-  
rum Judicia,

*Cum Privilegijs perpetuis.*



HELMSTADII.



Typis & Sumpt. GEORG-WOLFGANGI HAMMII, Acad. Typogr.  
Anno clō Idc xciv.

HERMANNI CORNINGII

VIRI SUMMI

Regiam antiquam plurimum Imperii

Principum Consilium & in Acad. Sol. Me-

dicum ac Politicis Profect. longè

celeberrimi

ERISTOTELIS

SYNTAGMATA DUO

PRIMUM

RESPONSA

AD

Corningii Viri, Scriptorum

Indes & de his Doctorum Viri

non Indes

non Indes

non Indes

VEL UTROQUE







Nat. Gonda Tru.  
1607.

Mortus Helmsladi  
1608. xxiij.

*Hic tuus est, tuus est, ingens Germania Phoenix,  
 Consiliis gratus Regibus et Ducibus.  
 Masculus assertor veri, seu sacra novaret,  
 Seu pacem nollet lubrica Roma, datam.  
 Sive nova Narveius post glandes fruge bearet,  
 Vastaret medical seu Paracelsus agros.  
 Teutonia decus et priscos defendit honores.  
 Et fines sacro reddidit Imperio.  
 Frisia ei vitam, dein munia Quisphig tollus.  
 Famam orbis doctus, qua patet ille, dedit.*

A. C. Bickler sc.

HERMANNVS MEISSBOMIUS



*Viro Nobilissimo, Amplissimo  
atque Consultissimo*

Librarian  
Bocca  
7-16-27  
15090

DOMINO

HERMANNO JOHANNI  
CONRINGIO

Hæreditario Domino in Ziwilsstedt/

Ser<sup>mi</sup> ac Potentissimi Electoris Brandenburgici

[in Ducatu Magdeburgico Consiliario Camerae, &

Dicafterii Provincialis Guelpherbitani Asses-  
sori Primario &c.

*Domino, Fautori & Amico suo Magno*

*S. P. D.*

CASPAR CORBERVS.

**H**mmortalis memoriæ parens tuus, *Vir  
Nobilissime*, cum ingentibus sibi me-  
ritis in Rep. literaria locum quæsit,  
ut flos eruditorum non solum per Germaniam,

\*

sed



# PRÆFATIO.

sed & Italiam, Galliam, Belgium, Daniam, Sveciam, certatim illi cultum & studia sua deferrent, literisque ultro citroque missis amicitiam cum eo contraherent sancteque colerent. Nihil vel augendi vel assentandi gratia scribo, cujus & causas procul habeo, nec apud Te, *Virorum Optime*, locus est. Nihil affero, cui non fidem abundè faciant clarissimorum toto orbe Virorum literæ, quorum *ἀντὶ ὄψεα* magno numero eâ, qua merentur, religione apud Te asservantur. Exilui sanè præ gaudio, cum ad illa sacraria tuo beneficio admissus tot virtute & doctrina præstantium dexterarum opera & vestigia conspicerer: cum (ut è multis paucos nominem) *Grotii, Vosii, Naudai, Blondelli, Dallai, Patini, Bignonii, Bigotii, Capellani, Justelli, Baluzii, Liceti, Severini, Castellii, Veslingii, Cottunii, Rhodii, Magliabekii, Spanheimii, Marefii, Schockii, Bartholini, Wormii, Pauli, Forstneri, Schefferi, Bæcleri, Strauchii, Lambecii, Reinesii, Sennerti, Hofmanni, Meibomii, Sebizii,*  
*Hot.*

# PRÆFATIO.

*Leibnizii, Hottingeri, Wagenfeilii, Bosii, Arnoldi,* pluriumque his similium consecrata æternitati nomina in illo literarum fasciculo velut in eruditi orbis panegyri convenisse cernerem. Postquam verò & ea, quæ literis illis de omni re literaria & civili gravissimè simul atque elegantissimè hinc & illinc acta atque disputata erant, cognovi: non epistolas, sed thesaurum mihi reperisse visus sum: cui tamen, quod tua beniginitate licuisset, nolui solus incumbere, sed, ut cum pluribus communicaretur, publicique juris fieret, optavi, auguratus fore, ut summis eruditorum studiis exciperetur, rei quæ literariæ non parum lucis fructusque afferret. Quam quidem non tam de meo sensu conjecturam feci, quam certissimis & rerum argumentis ductus & temporum. Neque enim ex omni eruditionis ambitu quicquam avidius legi, magisque seculi genio arridere videbam, quam Clarorum Virorum epistolas: nec illas, quæ scriniis bibliothecæ Tuæ pa-

PRÆFATIO.

ternæ continebantur, ullis, quæ hætenus prodierunt, concedere judicabam; sive claritatem illorum spectes, à quibus & ad quos scriptæ sunt, sive numerum & copiam, quæ non unum volumen grandioris formæ implere posset; sive denique rerum & argumentorum cum varietatem tum præstantiam. Quin & industria nonnulla videbam juvari posse operis hujus Epistolici usum, ut non paucis ejus generis præstaret palmamque præriperet. Quod enim ad manum essent epistolæ mutuò sibi respondentes, atque ex plerisque integra series rebus temporibusque connexa texi posset: res ipsa subiciebat, singula sic commodissimè disponi edique posse, ut conjungerentur, quæ ex argumentorum temporumque ordine sibi lucem fœnerari, plenamque veluti rerum his epistolis actarum historiam referre possent. Quam in rem cum operæ meæ fidem studiumque Tibi, *Vir Amplissime*, cui per



PRÆFATIO.

per Reip. negotia huic curæ superesse non licebat, offerrem : annuisti facilis meo , quod publicum esse intelligebas, desiderio , atq; ut , quod temporis & typographi ratio hac vice permisit, duo syntagmata epistolarum , publicarentur, permisisti : quorum alterum literas ad Reverendissimum Celissimumque gloriosæ memoriæ Principem & Episcopum Monasteriensem ac Paderbornensem *Ferdinandum , liberum Baronem de Furstenberg*, Musarum quondam delictum & præsidium, alterum ad *Stephanum Baluzium V. Cl. Gallia suæ*, imò orbis eruditi decus & ornamentum , & ab his ad illustrem parentem tuum scriptas complectitur. Quas quidem, cum velut in gustum futuri operis sint præmissæ, ejusmodi esse affirmare possum, ut nec reliquarum quasi his inferiorum desiderium extinguere debeant , neque tamen non reliqui operis expectationem præclare sustinere possint. Ut enim , quæ deinceps fortè prodibunt , suis quæque dotibus placere poterunt ,

PRÆFATIO.

nec, alienis ne obscurentur luminibus, verendum  
 erit : ita quas nunc emittimus, iis doctrinæ o-  
 pibus instructæ, eâ morum gratia conditæ, tam  
 pura dictionis venustate sunt exornatæ, ut non  
 aliunde auspiciatius procedere Epistolarum editio,  
 nec acrius reliquarum desiderium accendi potuis-  
 se videatur. Quare, nisi omnia me fallunt, non  
 dubito, quin quicquid in orbe erudito est elegan-  
 tiorum ingeniorum, magnam de literis hisce in  
 publicum editis Tibi gratiam habeat, & ardenti-  
 bus votis reliquarum editionem non tam expetat  
 quàm flagitet. Patieris verò Te, *Nobilissime Con-  
 ringi*, pro tuo in bonum publicum studio & in  
 paternum nomen pietate haud difficulter exorari,  
 siquidem me haud vanum fuisse augurem, vel  
 falsum publicorum votorum interpretem cogno-  
 veris. Atque adeò ausim jam tum bonitatis Tuæ  
 fiducia polliceri publico epistolas inter Perillustrem  
*Baronem de Boineburg* Parentemque tuum per a-  
 liquot annos frequentissimè missas, quæ itidem in  
 peculiare volumen hoc multò spissius proximè  
 colligantur. Qui meminerunt (quis verò erudi-  
 torum non meminit?) Excellentissimum istum  
 Emi-

*PRÆFATIO.*

Eminentissimi Electoris Moguntini Admini-  
strum fuisse Germaniæ nostræ Mæcenatem,  
seu recentior placet comparatio, Peirescium,  
qui cura, provisu, opé, & præsidio rei literariæ  
salutem & incrementa complexus eruditos  
passim excitaverit foveritque : jam sine vate  
divinabunt, quid ex his literis sibi polliceri de-  
beant. Qui verò norunt eximium istum Heroa  
literarumque fugientium statorem uno omni-  
um Conringio usum esse familiarissimè, inque  
ejus sinum intima pectoris sui sensa & judicia  
effudisse : fieri non poterit, quin harum litera-  
rum ingenti exspectatione teneantur: quas sa-  
nè qui legerit, non multum Historiam illorum  
temporum literariam desiderabit. Adderem  
& civilem: siquidem tempora ferrent, ut sine  
periculo publicari possent, quæ de summis  
Reipubl. negotiis in hoc literarum commer-  
cio subinde reperimus annotata. Sed de his  
pro tua prudentia videbis: quæque sine cujus-  
quam offensione bono publico edi poterunt,  
haud gravatim Conringiani nominis, hoc est,  
variæ

PRÆFATIO.

variæ solidæque doctrinæ studiosis imperties.  
Quo pacto & de re literaria bene mereberis.  
& paternæ famæ rectissimè consules. Quæ  
ut non solùm literarum monumentis (quod  
quamdiu suus literis constabit honos, aliter  
futurum non est) sed & felicissima gene-  
ris nominisque Conringiani propagatione in  
omnem usque posteritatem incolumis florens  
que transmittatur, ex animo precor. Salve

& vale *Vir Amplissime*. Dab. Helmsf.

X. Kal. Maji in Acad. Julia.

clō lōc xciv.

VITA

VITA  
HERMANNI CONRINGII

EXCERPTA

&

PROGRAMMATE FVNEBRI

ab

ACADEMIÆ JULIÆ

tum temporis Pro-Rectore

MELCHIORE SMIDIO V. C. P. P.

conscrip̃to.

\*\*



VITA

HERMANNI CONRINGII

PROFESSORIS HISTORIAE

ACADEMIAE JULIAE

IN URBE PRAGA

ALICHOVS ZWINGI P. C. P.

MDCLXXII



# V I T A

## HERMANNI CONRINGII.

**H**ERMANNUS CONRINGIUS natus est  
 Annocii 106 VI. Nov. d. 9. Nordæ, Frisio-  
 rum urbe, parente HERMANNO CON-  
 RINGIO, Ecclesiæ ibidem Antistite, avo  
 autem JOHANNE CONRINGIO ob religionis per-  
 sequutionem ex Transsylvania eò profecto; Matre vero  
 GALATEA, RUDOLPHI COPINI primùm in Ostria, po-  
 stea vero in Hollandia Delphensis Ecclesiæ parochi, fi-  
 liâ, sceminâ pietatis & prudentiæ singularis, cujus HER-  
 MANNUS noster fuit proles nona.

Quintum ætatis cum ageret annum, pestilente  
 morbo, illic locorum grassante, quâ sorores ejus omnes  
 extinctæ, fratre in hac Academia jam tum vivente,  
 correptus est, ita ut sub dextra mamilla anthrax ei  
 fuerit exurendus. Doloribus illis territus puer, bu-  
 bones duos ad inguen postea exortos occultavit, quo-  
 rum quidem venenum naturæ bonitas & ineuntis æta-  
 tis vigor superavit, sed valetudinem tamen misere af-  
 flixit, in scædam & malignam scabiem mali reliquiis  
 desinentibus, usque adeo, ut aliquot a morbo mensi-  
 bus, vix pedibus potuerit incedere, & longo tempore  
 vires recolligere nequirit. Hinc factum, ut non ante  
 sextum ætatis annum elementa primæ & literarum cha-

## V I T A

rañeres in ludo addidicerit, ubi statim ingenii & memoriae felicitas, atque indoles liberalium artium doctrinis apta emicuit. Quippe paucorum dierum spatium legere, & pietatis, Christianaeque religionis potiora capita pueris ediscenda proponi consuevit, memoriae mandauit. Sed mox & corpusculi teneritudo, quod cum variis adhuc conflictabatur morbis, & malitia condiscipulorum effecit, ut illa hyemaludum non frequentans, domi a matre sit edoctus. Septimo itaque tandem ætatis anno in Latinitatis, cujus quædam primordia delibaverat, scholam missus est.

Septennium in hoc ludo literario peregit, ubi pleraque sua sponte, non Præceptorum industria, ita assequutus est, ut alii ætate ipsum & corporis proceritate multum superantes, cum subinde eos in certamine uicisset & superiore loco sedere meruisset, odio eum prosequuti sint, ideoque integrorum mensium ferias ille agere coactus sit. Jam tum infinitæ illius Historiarum notitiæ initia a *Bucholzeri Indice Chronologico* fecit, & futuri magnificentissimi quasi ædificii fundamenta altissima jecit. Annum agens decimum quartum lusu satyra quadam in *poëtas coronatos*, quæ cum forte fortuna in manus Cornelii Martini, hujus Academiae tunc temporis philosophiæ doctoris longe celeberrimi, uenisset, adeo ejus lepore & elegantia captus est, ut & sibi transmitti hunc Hermannum desiderauerit, & literas ea de re ad ejus parentem dederit, quibus ei persuasum iuit, ut ingenii magis magisque in hac studiorum Uniuersitate excolendi gratia filium sibi crederet. Venit igitur in hoc Musarum domicilium Anno cto dcc xx.

& no-



## CONRINGII.

& nomen dedit civitati Academicæ d. 25. Octobris, ædibus & convictu Cornelii Martini usque ad beatum viri ex hac vita discessum. Tunc enim ad Clariss. Virum Rudolphum Diepholdium, Græcæ Linguæ Professore, Geographiæ & Historiarum oppido peritum magistrum, se contulit, apud quem biennium commoratus est, donec parentes, calamitatibus publicis non parum attriti, eum ex Academia revocandum duxerunt. Quanquam anno sequente, qui hujus seculi xxiv. reversus erat: tamen peste grassante & bello hîc quoq; irruente non multo post remeare fuit coactus. Sicut itaque à divino Cornelii, Academiæ hujus immortalis decoris, ore solida ingenii nutrimenta primum acceperat, ita porro per ejus successorem & collegas Aristotelicæ imprimis, tanquam melioris doctrinæ, præceptis est imbutus. Neq; interea Lingvarum tam Græcæ quam Latinæ cognitionem accuratorem aut cultum politiorem sprexit, sed exemplo horum Magistrorum utrumq; studium, suo commodo & magno emolumento, conjunxit. Non eo solum felix, quod in optimos inciderit utilissimarum scientiarum doctores, sed etiam, quod procul a vanitatibus ac deliciis aliis, ab omnibus studiorum avocamentis remotus, summa discendi cupidine ductus, divinoque ingenii vigore per quodlibet honestarum doctrinarum genus fuerit grassatus. Anno igitur 1625. Lugdunum, Athenas illas Belgicas, petiit, ibiq; & per totam Hollandiam, varietatem opinionum de Deo, ejusque cultu, tam vulgi quam à vulgo secretorum hominum miratus, temperare sibi non potuit, quin Theologicis controversiis,

veritatis divinae perspicendiæ ergo, aliquid temporis tribueret. Interim tamen etiam Medicinæ operam dedit indefessam, ut praxeos & medendi tyrocinium ibi quoddam posuerit. Quinquennio peracto, etsi Lute-  
tiam Parisiorum invitaretur, tamen Juliam Academi-  
am, ex qua spes obtinendæ Professionis Naturalis Phi-  
losophiæ allucebat, aliis omnibus longè prætulit, &  
nullis belli incommotis deterritus, licet cuncta hinc  
milite hostili obsessa & infesta essent, reversus est. An-  
no igitur trigesimo secundo commendatione illorum,  
qui ipsum propius noverant, Professorum, Sereniss. Dn.  
Frider. Ulrico D. Br. & Luneb. innotuit, inde statim  
desideratam publice in hac Academia docendi Spartam  
obtinuit. Erat autem tunc Martis furore misera Ger-  
maniæ facies, & hæc Julia desolata, oppidumque in-  
frequentia civium & incolarum inopia graminosas ha-  
bebat plateas, & nusquam tutæ peregrinationes, imò  
exercitu Papenheimico territi, alius alio, ipse cum mul-  
tis aliis Brunsvigam discessit. Anno seculi 34. Disputa-  
tione de Scorbuto publice habita, summorum in Medi-  
cina honorum petendorum licentiam impetravit, &  
biennio post tam Philosophiæ quam Medicinæ Docto-  
ris insignibus fuit ornatus, simulq; eodem die 21. Apri-  
lis Johann. Stuckii Viri, ut ingenio & judicio maximi,  
ita inter excellentissimos hujus seculi Juris Consultos  
numerandi, tunc hujus Academiæ Antecessoris prima-  
rii, filiam secundo genitam, ANNAM MARIAM, jam  
mæstissimam viduam, matrimonio sibi junxit. Du-  
rante matrimonio auspiciatissimo per quadraginta an-  
nos & 7. menses auctus est non liberis minus quam opi-  
bus;

## CONRINGII.

bus: Nempe undecim liberorum ex ea pater factus, ex quibus quatuor, binos filios, binasque filias amisit teneros, reliquos superstites sibi reliquit, filium nim. Virum Nobilissimum Consultissimumque HERMANNUM JOHANNEM Sereniss. ac Potentiss. Electoris Brandeb. Consiliarium, & Dicasterii Aulici Gvelferbytani Assefforem Gravissimum, nobilis Conringiani nominis ut hæredem unicum, ita felicem in filiis procreatis propagatorem: tum filias sex fausto omine elocatas omnes. & dignis genere virtutibusque suis matrimoniis illigatas.

Cæterum, ut ad ipsum Conringium nostrum revertar, quantopere â Deo fuerit ornatus, quam capacissimum ipsi fuerit ingenium, quam acré judicium, & omnibus gratisima morum suavitas, quâ facile cujusvis favorem, Principum gratiam & clementiam, inferiorum observantiam sibi conciliaverit, inter omnes, qui eum noverunt, constat. Accessit indefessum quidvis addiscendi & assequendi studium, non labore, non vigiliis fractus aut dejectus fuit a proposito, ut propterea honore & auctoritate undique partâ, immortale & æternum limpidumq; Germaniæ, imprimis autem hujus Academiæ sit decus. Et primo quidem Naturalis Philosophiæ professio, non multo post quam hic conjugio inito domicilium fixit, Serenissimi Principis & Domini Dn. Georgii Ducis Brunsvic. & Luneburg. clementissimo jussu cum Medicinæ docendæ munere publico permutata est; atque cum Viri undique emineret excellens planè doctrina, stipendium non vulgare aut ordinarium tantum, sed cum quartæ partis augmento

ei

ei statim est numeratum. Hac ratione tam docendo quam faciendo medicinam aliaque πο.υμαθία suā gloriam non exiguam hominis excitavit. Utur verò antiquorum amator & venerator esset singularis: ad novorum tamen dogmatum in Medica arte prolatorum examen eo accedebat iudicio, quod ipsi naturalis discernendi verum à falso dexteritas, & inquirendæ veritatis indefessum studium suppeditabat. Quemadmodum igitur Harvejanum de motu sanguinis circuli inventum approbavit, & in hac Academia primus asseruit atque docuit; ita Paracelsicas nugas oppugnavit & disiecit. Ex Anatome corporis humani frequenter publice instituta observationes suas cum venerandæ antiquitatis placitis diligenter contulit, & ubique solertiam suam omnibus luculenter demonstravit. Neq; Medicis illis curis laboribusque ita totus occupari poterat, quin rerum civilium & Imperii Germanici accuratorem doctrinam & juventuti Academicæ instillaret, & scriptis orbi erudito approbaret. Hinc factum ut patria terra Frisiorum quasi invidere cœperit huic Ducatui & Academicæ suæ popularem. Namque accersitus est Ann. 1649. atq; ab Illustrissima Principe tunc regente, honorificentissimo Archiatri & Consilarii intimi munere ornatus, rediit. Anno verò insequente a Serenissima Christina, Sueciæ Regina, præstantium virorum ut æstimatrice ita etiam singulari tunc patronâ, per illustrem Virum Joann. Adlerum Salvium Legationes Regias obeuntem, in Sveciam, amplissimis conditionibus propositis, evocatus est. Etsi vero nihil quicquam in sua Julia desideraret, tamen magis fama Reginæ, quæ  
ex



## CONRINGII.

ex tota Germania plerosque extantes eruditionis gloria Viros colligere inter potiores curas regiminis sui habuisse videbatur, videndæ & alloquendæ, quàm majoris stipendii aut salarii gratia, iter in Sveciam 20. Maji 1650. Serenissimorum Ducum nostrorum permissiōne impetrata, ingressus est. Postquam Holmiam appulit, a Regina & omnibus regni proceribus summa quidem clementia & favore exceptus est, tamen quæ offerebantur conditiones, ipse suscipere detrectavit, & post trimestre tempus, non sine opulentissimis donis & regii munerationibus, imo Consiliarii & Archiatri regii dignitate affectus, reversus est. Nec cessavit Regina Christina Majestas, clementiam suam & magnificentiam etiam erga absentem exponere, cui non ita multo post literis salarium annuum mille sexcentorum thalerorum promisit. Cumque postea iterum sollicitaretur ejus in Sveciam reversio, Serenissimis Principibus & Ducibus Brunsv. & Luneb. hâc re humiliter significata, clementissimum obtinuit responsum, cui acquiescens, hic commorari, quam in Sveciam abire maluit. Tanto quippe favore & amore Academiam suam Serenissimi Duces nostri semper foverunt, ut ex eâ præclaros viros dimittere noluerint. Conringii autem singulares ingenii dotes tanti æstimaverunt, ut salario aucto, alteram ei Civilis scilicet Prudentiæ, Professionem ipsi contulerint. Ex eo tempore firmum habuit propositum nusquam hinc migrandi, sive in aulam, sive ad alias Academicas vocaretur. Et quidem licet semper Politicarum rerum fuerit avidus & curiosus, tamen cum jam hanc liberaliōris eruditionis partem,

\*\*\*

tem, non sane ultimam, publico stipendio docendi Spartam esset nactus, de novo ad hæc studia diligentius excolenda summo opere est incitatus. Quid vero & in hac parte & ei cognata Imperii nostri interiore notitia, ingenio & vigiliis suis sit assequutus, Germania universa non modo, sed vicina quoque regna & totus, qua Latina Lingva intelligitur, terrarum orbis dudum perspexit.

Et jam nusquam non per Germaniam innotuerat ejus incomparabilis historiæ & antiquitatum Germanicarum cognitio & peritia, cum in rebus ad Rempubl. pertinentibus, ad controversias inter Principes, & Urbes, Cœnobia & regalia spectantibus, consilia ejus passim expeticeperunt. Anno 1652. ad Ducatûs Brementis Archivum inspiciendum & ordinandum tanquam interioris Consilii particeps fuit a Svecis adhibitus; Autumno verò in Frisiam de rebus summis vocatus, utrumque negotium feliciter peregit. Similique in labore anno insequente perrexerat, quo homagium a nonnullis Frisus nomine Illustrissimæ Principis viduæ recepit. Ulterius emicuit ejus rerum Germanicarum singularis cognitio, cum Eminentissimi Electoris Moguntini, cui jus coronandi Imperatorem eruditissimo edito scripto asseruerat, gratiam atque clementiam meruit. Cum ann. 1658. ut aliàs antea sapius, in Frisia ageret, ibique rebus maximis deliberandis adhiberetur, Sereniss. & Potentiss. Carolus Gustavus Rex Sveciæ in Holsatiam accersitum Conringium sibi Consiliarium atque Archiatrum, mille quingentorum Joachimorum annuo salarii promisso, creavit; ea condi-

## CONRINGII.

ditione, ut, si ipse in Sveciam se suamque familiam transferre vellet, alterum tantum quotannis ei numeraretur. Sed tam hoc, quam alia maximæ dignitatis munia oblata recusavit, & semper Academicam vitam, tranquillitatem & honestissimum otium aulicis conditionibus vitæque actuosæ præferens, in dulci Musarum sinu placide quiescere, quam fortunæ inconstantis strepitum terroremque alibi metuere, maluit. Eodem anno, scriptus de *Vicariatu Imperii* libellus Serenissimò Electori Palatino Carolo Ludovico, quæ erat prudentiâ & æstimandorum doctrinæ singularis librorum sagacitate, usque adeò sese probavit, ut suam erga Conringium liberalitatem & clementiam donario egregio testaretur. Cum subinde negotiis Ostfrisis occupatus teneretur, accidit ut Anno 1660. Legato Regis Galliæ Domino Gravellano, in aula Serenissimi Dn. Domini AUGUSTI, Duc. Br. & Luneb. agente, ipse gloriosæ memoriæ Princeps Conringii præsentiam requireret: quæ occasione, perspectâ Principis laudatissimo beati nunc Viri, incomparabili rerum non ad Germaniam tantum ejusque regimen spectantium, sed etiam ad vicina regna pertinentium eorumque statum & conditionem penitiorum respicientium notitiâ & peritiâ, in Consiliariorum suorum numerum eum adoptavit, quam etiam retinuit dignitatem usque ad beatissimum illius Principis obitum. Is enim tanquam eruditorum æstimator & Patronus maximus ob variam eruditionem & reconditarum rerum notitiam Conringium amabat, cumque illam Augustam, nulli in toto terrarum orbe secundam Bibliothecam condi-

disset, ipse eleganti editâ Epistola inter externos eam celebrem, ut meretur, effecit. Interea cum maximum per omnem Europam cum viris eruditione excellentibus literarum haberet commercium, inter illos etiam cum Illustri Viro Joanne Capellano Galliarum Regis Consiliario aliquod ei intercescit, qui ipsum Illustriſſ. Domino Colbertoejusdem Regis Ministro Status, tanquam inter Germaniæ Viros doctrinâ excellentes præcipuum commendavit.

Anno itaque 1664. Ludovicus Rex Galliæ doctissimis aliquot in Germania & Belgio Viris stipendia annua mille librarum numerare jubens, tantum abfuit, ut hunc in illo excellentissimorum virorum numero præterierit, ut potius non simplum, sed cum singulari augmento, usque ad initia belli cum Belgis suscepti, continuata Regia liberalitate, illud numerari fecerit.

Anno 1667. Colonienſis ad Rhenum liberæ Civitatis Senatus de controversiis, quas habet illa urbs cum suo Archi-Episcopo & Electore, consilium expetivit Conringii, cumque ipsius præsentia requireretur, accessitum honorificentissimèque ibi tractatum amplissimis munerationibus ornatum remisit.

Anno 1669. Serenissimus Rex Daniæ eum Consiliarium status sibi esse clementissimè voluit, quam dignitatem permittentibus Serenissimis Ducibus Brunsv. & Luneburg. accepit.

Acres illæ inter Lindaviensem ad lacum Brigantium sitam rempubl. & Cœnobium illius loci, passim notæ lites & controversiæ, inter alia niti videbantur diplomate à Ludovico Imperatore Cœnobio illi dato;

Se-



## CONRINGII.

Senatus igitur Urbis Conringii nostri, tanquam earum rerum gnarissimi sententiam requisivit, qui edita *Censura* sua Anno 1672. toti erudito orbi falsitatem ejus *diplomatis* demonstravit.

Denique & ipsa Imperialis aula de opere æterno de *Finibus Imperii* tam sensit magnifice, ut sua interesse summopere existimaverit illius libri secundam editionem, suoque modo auctiorem prodire; jussit igitur ante biennium hunc laborem ut resumeret, quod quidem ille agere cœpit, sed hisce difficillimis temporibus & dubiis rebus, non sine animi quadam ægritudine, donec extremus vitæ dies finem labori attulit. Quid præterea summus vir in totius Germaniæ commodum scripserit & laboraverit, quia in omnium recentissimâ versatur memoria, hic recensere superfedemus. Unicum tantum est, quod præteriri non potest. Cum Anno 1648. librum sub nomine *Irenæi Eubulii* edidisset, pacis faciendæ rationes ita proposuit, ut Legatis & Deputatis ad Germaniæ tranquillitatem restaurandam congregatis magni æstimatus & quantivis pretii habitus, & ad Germaniæ tranquillitatem reducendam non parum effecisse existimatus sit. Quid in aliis ardui negotii & ad summam Germaniæ Imperii pertinentibus rebus consulendo & scribendo effecerit, silentio hic involvitur. Tandem in Academiæ hujus Juliæ non solum defensionem, contra calumnias malevolorum, quoties necessitas flagitavit, calamum strinxit, sed etiam, ad totius Ecclesiæ nostræ & veritatis defensionem *Vitum Erbermannum Apostatam, Fratres Wallenburchios* aliosque purioris doctrinæ Christianæ hostes

oppugnavit. Quæ omnia pietatem & prudentiam, di-  
 vinam cum humana sapientia conjunctam in uno hujus  
 animo fuisse manifesto ostendunt. Inter hæc omnia  
 quæ scripsit & edidit opera luculentissima nec pauca,  
 non destitit voce studiosam Juventutem sedulo infor-  
 mare, & ut primis publici muneris annis in Naturalium  
 rerum inquisitione, postea in re medica, ita ultimo in  
 Politicis & ad Notitiam Imperii atq; publicum statum,  
 fidelissimam manuductionem præstitit. Quantam  
 enim ille sustulit confusionem, Romanarum rerum  
 cum Imperii hodiernis mixtarum? ut scilicet solidâ &  
 perspicua doctrinâ, non per ambages & aniles fabulas  
 Juventus ad ipsam reipubl. nostræ formam certius co-  
 gnoscendam, felicius aliquando gubernandam, dedu-  
 eeretur. Cum enim omnia ordine justo, non ex alienis  
 sed propriis suis fundamentis & principiis per demon-  
 strationes, quantum rei proponendæ natura patieba-  
 tur, traderet, mirum non est applausum publicum  
 omnium auditorum fuisse subsequutum. Ita publicum  
 & geminum docendi munus cum operoso ad commu-  
 nem utilitatem scribendi labore conjunxit. Qui enim  
 summi illius philosophorum Principis Aristotelis inde  
 ab ineunte ætate non lector modo sed admirator & as-  
 siduus fuerat sectator, quid mirum si illius vestigia pre-  
 mens, gloriam non dissimilem est consequutus? Acce-  
 debat ad Veterum Philosophorum, Medicorum, Histo-  
 ricorum, tam sacrorum quam exterorum lectionem,  
 etiam recentiorum scriptorum infinita fere notitia, ut  
 de quacunque re, sive differendi sive scribendi animus  
 ipsi esset, memoria, quam felicissimam nactus erat, co-  
 rum

## CONRINGII.

tum de eadem re consignatorum operum chorum ei suggereret, ita ut sine exaggeratione *Bibliotheca vivens, & Museum ambulans* ex re & vero dici meruerit. Sed non hic locus est ejus laudandi aut elogium scribendi, cujus vitæ nudam historiam hæc pagina capere non potuit. Corporis fuit in juventute quasi morbidi, postea vero sic satis firmi, nisi quod calculo subinde tentaretur. Sensus, auditum & visum imprimis, vegetos & firmos usque ad extremum retinuit vitæ diem, ut minutum characterem, cui scribendo insueverat, legere semper potuerit. Staturam vix mediocrem benignissima natura vastissimo ingenio, memoria fidissima, judicio limpidissimo compensaverat. Et sane, ut tenue corpusculum ferendis majoribus laboribus non erat aptum natum, ita illis quæ studia requirunt liberalia, vigiliis, lucubrationibus & assiduitati scribendi satis robustum videbatur, ut, nisi quædam domestica ægritudo, nisi animus subinde turbatus, nisi denique ex publica totius Germaniæ non adeo læta facie aliquid traxisset molestiarum, forsan beati parentis sui qui xcii<sup>to</sup> ætatis anno decessit, longævitatē haud difficulter consequi potuisset. Verum Deo Opt. Max. aliter visum. Cum enim Natalem suum septuagesimum quintum non sine mœrore animi & lachrymis peregisset: ipse virium indies lapsantium infirmitatem sentiens & observans, non procul abesse vitæ finem, auguratus est, quod eventus comprobavit. Die enim mensis Decembris tertio cum decumbere cœpisset, ejusd. mens. d. 12. Anni clō lōc LXXXI. pie placidissimeq; acquievit Vir immortalitate dignissimus.

EPL.

**EPITAPHIUM**

**HOC TVMVLO**

**CLAVDITVR**

**REGVM PRINCIPVMQVE**

**CONSILIARIVS**

**JURIS NATURALIS GENTIUM**

**PVBLCI DOCTOR**

**PHILOSOPHIÆ**

**OMNIS PERITISSIMVS**

**PRACTICÆ ET THEORETICÆ**

**PHILOLOGVS INSIGNIS**

**ORATOR**

**POETA**

**HISTORICVS**

**MEDICVS**

**THEOLOGVS**

**MULTOS PUTAS HIC CONDITOS?**

**UNVS EST.**

**HERMANNVS CONRINGIVS**


**SECVLI MIRACVLVM.**

*posuit*

**HENRICVS MEIBOMIVS.**

**SCRI-**





# SCRIPTA CONRINGII. THEOLOGICA

1. *Animadversiones in Muhlmannum de Purgatorio. Adjecta sunt Conringii Programmata sacra, & Muhlmanni ipsius assertiones. Helmst. 1651. in 4to.*
2. *Defensio Ecclesie Protestantium adversum duo Pontificiorum argumenta, petita à successione Episcoporum ac Presbyterorum ab Apostolis usq; derivata. ib. 1654.*
3. *Concussio fundamentorum fidei Pontificiæ ib. 1654.*
4. *Responsio ad Valerianum Magnum pro sua concussione. Adjectus est ipse Valeriani libellus. ib. 1654.*
5. *Animadversiones in Christophori Haunoldi libellum Concussion. fidei Pontificiæ oppositum. Adjectus est libellus ipse ibid. 1654.*
6. *Responsio altera pro sua Concussione ad Valeriani Magni epistolam nuperrimam, quæ calci opusculi subjungitur. ibid. 1654.*
7. *Epistola de Electione Alexandri VII. Papæ, opposita appendici Examinis Erbermanniani. Accesit appendix ipsa. Helmst. 1655.*
8. *Animadversiones in fratrum Walenburgiorum Conringii laudati & correcti partem priorem de vocatione extraordinaria primorum Ecclesie Reformatorum. Quibus etiam sua Concussio Fundam. fid. Pont. ab iniquo contra Evangelicos abusu vindicatur. ib. 1663.*

\*\*\*\*

9. An-

SCRIPTA CONRINGII.

9. *Animadversio in Novenam Sancti Antonii de Padua.*  
*ibid.* 1675.

10. *Discussio eorum, quæ opposuit suæ animadversioni in*  
*Novenam Antonianam Dionysius Werlensis.* *ib.* 1677.

Alieno nomine aut ab aliis edita

*Pietas Academiae Juliae programme publico adversus*  
*calumnias eum aliorum tum Ægid. Strauchii asserta.* *Helmst.*  
1668.

*Dissertationes de sudore Christi sanguineo & aliis passio-*  
*nem Christi illustrantibus editæ, ab Job. Albrechts in fine der*  
*Passions Andachten.* *Hildesf.* 1674. in 12.

MEDICA, PHYSICA ET PHILOSOPHICA

1. *DE Origine Formarum Disput.* *Lugd. Batav.* 1629.

2. *Laudatio Aristotelis orationes duæ.* *Helmst.* 1633.

3. *Introductio in Naturalem Philosophiam, ac Naturalium*  
*Institutionum liber unus.* *Helmst.* 1638.

4. *Exercitationes de Fermentatione ad Billichii Anato-*  
*men Fermentationis Platonice.* *Francf.* 1643. & *Lugd. Bat.*  
1646. in 8. ad calcem libri de generatione & motu sanguinis.

5. *De sanguinis generatione & motu naturali.* *Helmst.*  
1643. in 4t. & *Lugd. Bat.* 1646. in 8.

6. *De Germanicorum corporum habitu antiquo & novo.*  
*Helmst.* 1646. edit. II. aucta. *ibid.* 1652. & *tertia auctior.* *ib.*  
1666. in 4t.

7. *De calido innato sive igne animali liber unus.* *Helmst.*  
1647. in 4t.

8. *De Hermetica Ægyptiorum vetere & nova Paracelsi-*  
*corum Medicina.* *Helmst.* 1648. Edit. II. infinitis locis emen-

*datior & auctior.* *Helmst.* 1669.

9. In-

9. *Introductio in Artem Medicam.* Helmst. 1654. Et altero tanto auctior cura Et studio Gunth. Christ. Schelhammeri. Helmstadi 1687.

## HISTORICA, POLITICA ET JURIS PUBLICI

1. *DE Origine Juris Germanici.* Helmst. 1643. Editio altera cum opusculis hactenus non editis ib. 1649. Editio III. prioribus auctior, cum opusculis quibusdam novis. ibid. 1665. in 4t.
2. *De Imperio Germanorum Romano liber unus.* Helmst. 1644. Propediem nova bujus libelli editio prodibit, è MSto Auctoris auctior.
3. *De Asia Et Aegypti antiquissimis dynastiis adversaria Chronologica.* Helmst. 1648.
4. *De finibus Imperii Germanici libr. duo.* Helmst. 1654. edit. altera libro 3tio aucta. Lips. 1680. in 4t.
5. *Affertio juris Moguntini in coronandis Regibus Romanorum.* Prodiit (1) sine nomine auctoris Moguntiae 1655. Et statim eod. anno cum nomine Auctoris Francof. sed (2) auctior Et emendatior. Helmst. 1656. Et (3) ibid. 1664.
6. *Iterata dissertatio de jure coronandi pro Electore Moguntino contra Colonieneses vindicias ἀπορρήτως.* Mogunt. 1656.
7. *Iteratarum vindiciarum juris coronandi pro Archiduce cæsi Coloniensi Examen.* ἀπορρήτως Francof. 1656. Et præfixo Auctoris nomine emendat. Helmst. 1664.
8. *Castigatio libelli; cui titulus; Anti-Conringiana defensio juris Coloniensis in coronandis Romanorum Regibus.* ἀπορρ. Francof. 1656. Et cum Auctoris nomine emendatior auctiorque. Helmst. 1664.

## SCRIPTA CONRINGII

9. *De Pace perpetua inter Imperii Germanici ordines religione dissidentes servanda libri duo, quorum prior fisco Irenæi Eubuli nomine cura Lampadii prodierat 1648. Helmst. 1657. Edit. II altero tanto auctior prodiit. Lips. 1677. in 4t.*
10. *De civili prudentia liber unus. Helmst. 1662.*
11. *Propolitica seu brevis introductio in civilem Philosophiam cum adjunct. nonnullis ejusdem & Hopperi de varia & vera Juris prudentia. Helmst. 1663.*
12. *De antiquissimo statu Helmstadii & viciniae. ibid. 1665.*
13. *Censura diplomatis, quod Ludovico Imp. fert acceptum Cœnobium Lindaviense, qua simul res imperii & Regni Francorum, seculi cum primis Carolingici, illustrantur. Helmst. 1672.*
14. *Exercitationes Academicæ de Rep. Imperii Germanici, infinitis locis mutata & aucta, inque unum volumen redacta. Helmst. 1674. Ed. II. cui accessit dissert. de capitulatione Casarea. Lips. 1677.*

## SCRIPTA POLITICA ANONYMA VEL PSEUDONYMA

15. *Gründlicher Bericht von der Erh-Bischöflichen Be-  
rechtigung über die Stadt Bremen. 1652. in 4t.*
16. *Cyriaci Thrasymachi Epistola de justitia armorum Sueci-  
corum in Polonos. Helmst. 1655.*
17. *Vicariatus Imperii Palatinus defensus. 1658.*

NB. Consulto hic omissæ sunt editiones & scripta,  
quæ Auctor pro suis non agnovit, nec hæ-  
redes agnoscunt.

*Veluti Discursus novi de Imperatore Romano Germanico.  
1642. de finibus Imperii & Imperio Romano Germanico in 8t.  
quæ Lugduni & Floridi Martini nomen mentitur, & quæ nu-  
per*



# SCRIPTA CONRINGII.

per Lipsiæ prodiit a. 1692. in 4t. De Imperii Romano Germanici Rep. Acroamata sex bistorico-politica cum tractatu ejusd. de Imperio Romano Germanico. Ebroduni 1654. Thesaurus Rerumpubl. Genevensis in 8. contra quem extat Admonitio Conringii 1675. in 4t. aut si qui alii inscio Autore sunt editi, aut in posterum insciis hæredibus, quibus perpetuo S. R. I. Vicariorum privilegio cautum est, excudentur.

## PHILOLOGICA ET VARII ARGUMENTI

1. *I*essus seu Carmen Heroicum funebre in obitum Dorotheæ Principis. Helmst. 1635.

2. De Antiquitatibus Academicis dissertationes sex. Helmstad. 1651. Eadem plurimis locis emendatæ & insigni supplemento auctæ. ibid. 1674.

3. Dissertatio ad leg. 1. Cod. Theod. de studiis liberalibus urbis Romæ & Constantinopoleos. Helmst. 1655. Edit. II. aucta dissertatione de iis, quæ in studioso quovis requiruntur, qui in Academia velit studiorum fructum capere. ibid. 1674.

4. De Bibliotheca Augusta, quæ est in arce Wolffenbuttelensi Epistola, qua simul de omni re bibliothecaria disseritur. Helmst. 1661. Edit. II. cura filii è MSto paterno auctior. ibid. 1684.

5. Epistolæ hætenus sparsim editæ, nunc uno volumine comprehensæ, de varia doctrina. Helmst. 1666.

6. Epistola Gratulatoria ad Ducem Augustum, qua simul pium Principis institutum de nova S. Scripturæ versione à sinistris suspicionibus ac susurris vindicatur. Helmst. 1666.

7. Vindicatio suorum in Epist. Gratulatoria ad Augustum Ducem Brunsvic. d. S. Ebræo Codice dictorum, ab iniquissimis calumniis Matthiæ Wasmuthi. Helmst. 1667.

SCRIPTA CONRINGII.

8. *Paradoxa de nummis Hebræorum Exercit. Academi-  
ca de Republica Hebræorum, & commentariolus de initio  
anni Sabbatici & mensis Ebræorum. 1675.*

LIBRI ALIENI

à

CONRINGIO

editi, recensiti & præfatione aut notis  
illustrati

1. *Jacobus Berengarius Carpius de fractura Cranii cum præ-  
fatione Conringii, sed nomine ipsius dissimulato. Lugdun.  
Batauv. 1629.*

2. *Tacitus de moribus Germanorum, cum ampla Conrin-  
gii præfatione de usu historiæ & Reipubl. Germanicæ notitia  
Helmst. 1635. Edit. II. cum notis criticis & excerptis monumen-  
torum priscorum de rebus Germaniæ antiquæ. ib. 1652. Edit.  
III. multo audior. ibid. 1678.*

3. *Aristotelis Politica latinè ex interpretatione Giphanii,  
cum præfat. Conringii. Helmst. 1637. in 8t. Eadem Græcè &  
latinè cum ejusdem introductione. ibid. 1657. in 4t.*

4. *Leonis III. Papæ Epistolæ ad Carolum M. primum editæ  
& notis illustratæ ab H. Conringio. Helmst. 1647. Edit. II.  
audior & emendatior. ibid. 1655.*

5. *Philippi Salmuthi observationes medicæ cum H. Conrin-  
gii præfatione de doctrina pathologica. Accedit Rolandi Capel-  
luti libellus de peste. Brunsv. 1648.*

5. Tho-

SCRIPTA CONRINGII.

5. *Thomæ Fieni Chirurgici libr. XII. primum editi cura H. Conringii. Francf. 1649.*

6. *Georgii Wicelii Via Regia. Accessere varia, quibus cum alia multa docentur, tum necessitas Reformationis Ecclesiæ Romanæ simulque Concilii Tridentini iniquitas ostenditur. H. Conringius in unum volumen redegit, & in singula præfatus est. Helmst. 1650.*

8. *Cassandri & Wicelii de sacris nostri temporis controversiis libri duo. Editio emendatior & auctior additis simul eo pertinentibus aliis cura H. Conringii. Helmst. 1659.*

9. *De Electione Urbani VIII. & Innocentii X. Pontificum commentarii Historici. Adj. sunt nonnulla alia ejusd. argumenti cura H. Conringii præmio. Helmst. 1651.*

10. *Historia Electionis Alexandri VII. Papæ. Adj. sunt opuscula varia ejusdem argumenti cura Hermannii Conringii. Helmst. 1657.*

11. *Naamanis Bensenii Exercitatio Politica de summæ potestatis subiecto vindicata à Job. Fiplovii aliorumque ineptiis & calumniis, quas parturit liber de imperio absolute & relate considerato, oppositus V. Cl. Hermannio Conringio. Præmissa est ejusdem Conringii Epistola de hoc ipso negotio. Helmsstadi 1651.*

12. *Archiep. Mechliniensis Rationes, cur abstinerit à promulgatione Bullæ Papalis in Jansenium, recusæ cum præfatione Conringii. Helmst. 1654.*

13. *Starowolski Polonia, cum præf. Conring. Wolfenb. 1656.*

14. *Hopperi Seduardus, seu de vera Jurisprudentia lib. 12. cura Herm. Conringii. Brunsv. 1656.*

15. *Machiavelli Princeps cum aliis nonnullis ex Italico partim nunc demum versis partim castigatis, curante Herm. Conringio. Helmst. 1660.*

16. *Ant-*

SCRIPTA CONRINGII.

16. *Animadversiones in Machiavelli Principem. ibid.*  
1661. Utraque, curante filio, nonnullis locis auctiora prodire. 1686.

17. *Scioppii Pædia Politices & Naudæi Bibliographia Politica, ut & ejusdem argumenti alia, cura Hermannii Conringii.* Helmst. 1663.

18. *De bello contra Turcas gerendo libri varii selecti & uno volumine editi cura Hermannii Conringii.* Helmestadi 1664.

19. *Scipionis Claramontii de conjectandis cujusque moribus & latitantibus animi affectibus libri X. cura H. Conringii.* Helmst. 1665.

20. *Lampadius de Republ. Romano-Germanica cum annotatis Herm. Conringii ad partes priores duas ac tertiæ capita VII.* Helmst. 1671.

21. *Joh. Bodini responsio ad paradoxa Malestretti de caritate rerum ejusque remediis. Acc. ejusd. dissertationes de erario & re nummaria, ut & quæ Hopperus docuit de bonorum Cesareorum secundum LL. Justinian. curatione.* Helmst. 1671.

22. *Jani Dubravii de Piscinis libri 5. cum excerptis ejusd. argumenti aliis, cura H. Conringii & cum ejusd. præfationibus.* Helmst. 1671.

*Mittimus disputationes longè plurimas quæ Medicas quæ Politicas, ex quibus octo volumina conscribi possunt: partim ne justo prolixiores simus, partim quod multe illarum*

*Respondentes auctores  
habeant.*

DE HER-



D E  
HERMANNO CONRINGIO

Ejusque Scriptis

*Doctorum Virorum*

JUDICIA & TESTIMONIA.

*HUGO GROTIUS Ep. ad Conring. script. an. 1634.  
quæ est in opere Epist. Grotian. Amstel. 1687.  
edito 358.*

*Clarissimo eruditissimoq; Viro*

HERMANNO CONRINGIO

Philosophiam profitenti

**O** Ratorem te præstitisti egregium, Conringi doctissime, cum in Sapientum Principis laudes vim eloquentiæ intendisti : nec minus Philosophum, cum ita temperasti laudes Aristotelis, ut posteris non adimeres spem quædam ipsi ignota discendi, aut temporis magisterio immutandi in melius, si quid felicissimi ingenii, humani tamen, conjectura à vero deflexerat. Planè ita est, ut dicis : *ἡ παιδεία* propria Aristotelis dos est, quæ in omnibus quidem ejus operibus eximia est, sed quod ejus legem sequi potuerit in tradenda animalium natura ac partibus, re tam varia, tum verò & in Poësi, quam furoris quoddam genus alii dixere, ad miraculum accedit. Tum verò syllogismos abstraxisse à materia, & sic Mathematicis disciplinis hanc addidisse partem in certitudine nihil cedentem cæteris, unius est Aristotelis munus. Quas ob causas aliasque multas, eos qui ex tanti nominis ruina famam sibi ædificare conati sunt, contemtu puniendos censeo : illos vero faciendos plurimi, qui juventutem à rivis partim arentibus, partim limo turbidis ad limpidissimum illum simul uberrimumque fontem revocant. Quare

Judicium  
de  
laudatione  
Aristotelis

\*\*\*\*\*

fcho-

# JUDICIA DE CONRINGIO.

scholam vestram Helmstadiensem cum semper amavi, tum nunc hoc amo magis, quod fœtus inde tam humano generi utiles video enasci. Me certe non tantum operis istius hic approbatorem, sed & eruditionis prædicatorem semper habebis &c.

*Id. ad eund. Ep. 670. data Lutetia 22. Octobr. 1636.*

De Lessio  
in obitum  
Principis  
Dorotheæ,  
& thesibus  
medicis

Quantum poëtica facundia valeas, Conringi doctissime, ostendit Lessus, felix Claudiani imitatio: quanta autem in te sit cognitio rerum naturalium, ac præcipuè excellentissimi inter corpora humani, & eorum, quæ id perpeti natum est, docent thesēs Medicæ, quas ad me misisti, præter ea, quæ antehac tua mihi videre summa cum voluptate atque utilitate mea mihi contigit. Ego verò sicut omnium eruditorum amicitiam feci semper maximi; ita expetivi imprimis illos nosse, illis nosci, quos generosi animi impetus ad scandenda artium culmina, unde vulgus longè despiciatur, impellit. Quare dubitare noli, quin tuo merito tuus sim &c.

*Idem Ep. 1572. ad Gerardum Bode Respondentem  
Exercitationis de Urbibus Germanicis, quæ in opere  
Exercit. de Republ. Imp. Germ.  
est tertia.*

VIR DOCTISSIME

de Exercitatione  
de urbibus  
Germanicis

- - - Gratias tibi ago ac debere me profiteor summas, de quod exactæ diligentia limatissimique judicii opus de Germanicis urbibus meo inscripseris nomine. Pro quo honore mihi habito, si quid vicissim possum facere, quod tibi sit svave, id facturum sim & libenter & tuo merito. Legi libellum: planeque censeo, quæ ibi scribuntur, esse vera, & historiciis, tum illis, quæ ibi nominantur, tum minus cognitis aliis, quas vidi, congruentia &c.

JOH.

JOH. HENR. BOECLERUS in S. R. Imperio edit.

Argent. 1663. p. 14.

Id jus (in urbem Romam) cum adhuc hodie durare ostenderit doctissimus Conringius libro, quem in hoc argumento excellenter laudatum volumus, *de Germanorum Imperio Romano*, & in opere *de finibus Imperii* c. ix. & x. Romani imperii titulum non absurdè sibi vindicat, cui Roma subest,

de Germanorum Imperio Romano

*Idem Ibid. p. 34.*

Verum nec potuisse vel Rudolphi vel Alberti vel Caroli IV. aut ullorum Cæsarum donationibus alienari ea, quæ sunt imperii, neque non reservatum esse summum jus Imperii in Romanos ostendit, & nobis disputationem ampliorum lucrifecit doctissimus Conringius in præcellenti *de Finibus opere* c. xx. & xxi.

de opere de finibus Imperii

*Id. in histor. sec. IX. & X. p. ii.*

Addatur de legibus Caroli M. & constitutionibus civilibus & Ecclesiasticis Melchior Goldastus in tomis constitutionum, & Cl. Hermannus Conringius, *de Origine Juris Germanici* c. 7. 10. 12. 13. & 14.

de origine juris Germanici

*Id. Ibid. p. 12. & 13.*

Qualia fuerint sub Carolo M. judicia, idem Conringius de rebus Germanicis præclare meritis singulari dissertatione *de judiciis Reip. Germanicæ* disquisivit.

De judiciis Reipubl. Germanicæ

*Idem Ibid. p. 282.*

Variatum est in sequentibus temporibus, creditumq; vulgò, hoc jus coronandi ad Coloniensem non consuetudine tantum sed lege prorsus transivisse. Sed exorta nuper controversia Moguntinus iterum vicit. Quæ occasio fuit con-

De Assertionem juris Moguntinæ

## JUDICIA DE CONRINGIO

quirendi momenta rationum ab utraque parte, venitque ad manus meas, dum hæc scribo, Francofurti excusa *Affertio juris Moguntini in coronandis Regibus Romanorum* à Clar. Conringio scripta.

*Id. Ibid. p. 286.*

Fridericus I. Aquisgranensibus privilegium à Carolo M. concessum, ut aiebant (vel ut fingeant, quod Cl. Conringius in assertione juris Moguntini monuit) super hoc negotio confirmavit.

*Idem Ibid. p. 295.*

De Germanorum Imperio Romano

Imperii Romani & Imperatoris Romani nomen, qui restrinxerunt ad urbem Romam, quæque ejus ditionis sunt, exclusis omnibus aliis, ipsoque Regno Longobardico, ceu, ut postea dici cœpit, Italiæ; satis magna ratione motos dixeris, ad distinguendum, quæ in hac disputatione plerumque confusius agitantur. Id quod incomparabili dexteritate præstitit Cl. Conringius in libro *de Germanorum Imperio Romano*. Sed ea diligentia in Historicis frustra fortè quæritur.

*Idem in dissert. de eo, quod civitas egit.*

De introductione in Aristotelis Politicam

Laudat Conringii ista verba ex introductione in Aristotelis Politicam: *Civitate significari totum quid, sicut anima significat totam substantiam animatam, & addit: Libenter utor verbis doctissimi Conringii: quorum veritas tum ex infinitis Aristotelis locis, tum ex hac ipsa disputatione, quæ primum libri 3<sup>ii</sup> caput constituit, demonstrari potest.*

*JOH. LIMNÆUS not. ad Capitulum p. 136.*

De origine juris Germanici

Creditum hæcenus vulgò fuit, Lotharium Imperatorem Romanas leges in Germaniam introduxisse: at quam longè



EJUSQUE SCRIPTIS.

gè à verò hæc abeat opinio, non ita pridem docuit Herm. Conring. de origine juris Germ.

*STEPHANUS BALUZIUS præfat. ad Capitul.*

*Francorum n. 1.*

Ita sensisse reperio virum inter Germanos doctissimum De eodem  
libro  
Hermannum Conringium in libro de origine juris Germanici c. 19. ubi & verba quædam Conringii ex eo libro laudantur.

*Idem Ibid. n. 44.*

Verum recte admonuit Herman. Conringius, falsam esse eorum sententiam, qui collectionem jussu Concilii Meldensis factam putant. *In margine citatur* lib. de origine juris German. c. 15. & 17.

*Autor vindic. Anbaltinarum qui est MARTINUS  
MILAGIUS, Cancellarius Anbaltinus in re-  
futatione Eclipseos p. 42.*

Hic tamen Eclipsis erroneam illam relationem perstringi de eodem  
à Conringio. Eruditus certè est viri hujus rerum Germanicarum periti tractatus, quem nobis de Origine juris exhibuit.

*MONZAMBANUS de Statu Imperii c. 5.*

Ad potestatem legislatariam pergimus. Ea cui compete- De eodem  
tat, planius adparebit, si intelligamus, quali jure & unde introducto Germania utatur. Ubi facem nobis prætulit Hermannus Conringius erud. tractatu de origine juris Germanici, quem hic fere sequimur.

*Idem in præfat.*

Berolino me digressum aula Ducis Brunsvicensis excep- De scriptis  
juris publ.  
pit. Ubi præter cætera gratisimum fuit miscere sermones  
\*\*\*\*\* 3 cum

# JUDICIA DE CONRINGIO.

cum Professore ex vicina Academia, quem jam tum Ratisbonæ à rerum patriarum notitia insigniter commendari audieram. Nam & in plerisque circa statum Germaniæ mecum consentiebat, & sua scripta longe diversum à reliqua turba genium præ se ferentia, promptè communicabat. In quibus etsi multa sat liberè posita erant, non obscurè tamen apparebat, non parum ipsum dissimulasse declinantis potentiorum offensis, aut ne insulforum hominum clamores in se irritaret.

*ERICUS MAURITIUS de Principiis juris publ. cap. 2. §. 3. edit. Tubing. 1665.*

De notis in  
Lampadiis

Singulæ gentes suum habent idque peculiare jus publicum &c. Quod & more suo accuratè observat H. Conringius in *MStis notis ad Lampadium* in præfatione.

*Idem ibid. §. 6.*

De præfatione in  
Tactum  
de moribus  
Germanorum

Qua de re operæ pretium est asserre integrum & elegantem H. Conringii locum, excerptum ex *præfatione*, quam *Cornelii Taciti de Moribus Germanorum* libello prolixam præmisit, cujus postrema se nobis valde probant. *Apparet*, (verba ipsius sunt) *cui vis vel leviter in banc juris publici scientiam intuenti &c.*

*Idem in dissert. jur. publ. de origine Elect. & comitiis Electoral. c. 2. th. 3.*

De Vicariatu Imperii  
Palatino  
defenso

Altera de Vicariatu controversia hodieq; durat, dum illam ad se pertinere utraque domus, abnuente altera, perhibet. Palatinus causæ suæ patronos inter alios esse voluit Viros celeberrimos Hermannum Conringium (is enim autor est libri anonymi, qui inscribitur *Vicariatus Imperii Palatinus defensus*) Joh. Freinsheimium &c.

JOH.

EJUSQUE SCRIPTIS

**JOH. STRAUCHIUS** *Jctus, in disput. priore ad T ac. de moribus Germanorum habita Lipsiæ an. 1650. cum ibi historias profiteretur.*

De causis habitus corporum Germanorum, non est meæ professionis agere. Videant & videantur Medicorum filii, & qui peculiarem huic rei dedit non ita pridem tractatum H. Conringius Medicus & Historico-Politicus Excellentissimus.

De habitu  
corporum  
Germani-  
corum

**JOH. HENR. MEIBOMIUS** *libro posthumo de cervisiis C. 3. §. 25.*

Ab hac sicera sequior ætas siceratores dixit, non siceræ tantum sed aliorum potuum confectores. Carolus M. Imp. in capitulari de villis, edito à Clariss. & amicissimo nobis Hermanno Conringio &c.

*Idem ibid. C. 25. §. 15.*

Quibus (scriptoribus cervisiæ usum & commoda prædicantibus) adde eruditissimum H. Conringium, amicum nostrum singulari libro *de Germanicorum corporum habitu antiquo* &c.

De habitu  
corporum  
Germani-  
corum

**DAVID BLONDELLUS** *Geneal. Franciæ plen. assert. tom. 1. XLIX. fol. 46.*

Leonis III. ad Carolum M. decem epistolas ex membranis Helmstadii ante aliquot annos reconditoris eruditionis vir Hermannus Conringius edidit.

De Episto-  
lis Leonis  
III, Papæ

**BRIANUS WALTONUS** *in Prolegomenis ad Biblia Polyglotta proleg. II. n. 3.*

Imò non desunt viri docti magnique judicii, qui Hermetem istum Mercurium Ægyptium, & omnia quæ de ipso feruntur, esse fabulosè conficta asserunt: ut videre est apud Conringium virum doctissimum lib. de Hermetica Medicina c. 7.

De Herme-  
tica Medi-  
cina

**THE-**

JUDICIA DE CONRINGIO  
**THEOPH. SPIZELIUS** *de re literaria*  
*Sinenfium p. 66.*

De eodem opere      Omnem hunc literarum hieroglyphicarum thesaurum, speciosam illam Bembinam tabulam, & quicquid præterea passim superest, ne per Oedipum solidæ quicquam suppeditare doctrinæ judicat incomparabilis Conringius lib. 1. de Hermet. Medic. c. 14.

**ATHAN. KIRCHERUS** *Mundi subterr. lib. XI.*  
*sect. 2. C. 7.*

Unde eruditus Conringius in suo *de Hermetica Medicina* insigni sanè libro recte refert: Paracelsus, quantumvis acuti fuerit ingenii &c.

**DANIEL GEORG MORHOFFIUS** *de metallorum transmutat. p. 101.*

De eodem      Venio ad alteram dissertationis meæ partem de Antiquitate hujus artis & autoribus, per quos illa tradita est & propagata. Quo in argumento cum dudum summo ingenio ac industria versati fuerint Viri præclarissimi: Conringius libro de Medicina Hermetica, Reinesius in defensione Chymiatricæ Borrichius libro de ortu & progressu Chymiæ, quid opus est cramben illam à nobis recoqui?

**M. AURELIUS SEVERINUS** *Neapol. in vipera*  
*Pythia id. Patav. 1651. p. 345.*

De Generatione & motu sanguinis      Quod advertit naturæ consultissimus Hermannus Conringius in Academia Julia Professor & scriptor absolutissimus in libro de generatione & motu sanguinis. c. 17.

**JOH. RIOLANUS** *de motu circulat. sanguinis in grandi opere Anthropographiæ edit. Par.*  
*1649. p. 554.*

De eodem libro      Post Leidenfes Medicos nuper in lucem prodiit liber Hermanni Conringii Professoris in Academia Julia doctissimi,



fimi, qui strenuè defendit circulationem sanguinis per cor & pulmones.

PAULUS MARQ. SLEGELIUS in comment. de motu sanguinis  
contra RIOLANUM, in prefat.

Ab hoc (Caspare Hoffmanno) si quis inter Germanos antiquitati est deditus & veterum gnarus: certè est Hermannus Conringius Phil. & Medicus Excellens. Hic verò in epistola an. 1640. ad me scripta fatetur, venerari se τὰ παλαιά, si quem alium: at sensibus magis fidere. Item vel invitum se rapi in castra Harveji & manus dare. Inquisivit autem studiosissime in totam hanc doctrinam, & ipse egregio opere illustriorem reddidit.

THOM. BARTHOLINUS pref. ad Lectorem libri de luce hominum & bruti, edit. secunda. 1669.

Post prima prioris editionis lineamenta, alii non inglorii in hac luce se exercuerunt Hermannus Conringius seculi ornamentum in igne animali &c.

VINCENT. PLACCIUS catal. Pseudon. p. 190.

Irenæi Eubuli Theologi Austriaci de pace perpetua Protestantibus danda Consultatio Catholica Frideb. 1648. publicata, doctissima ac omnibus à rerum usu publico juxtaque religionis ac eruditionis cura non omnino remotis innotuit non minus ac Illustris & Excellentissimus egregii hujus scripti auctor HERMANNUS CONRINGIUS, postquam in suis de pace perpetua libellis Helmst. an. 1657. in 4. excusis publicè partum suum quasi postliminio genuinum ipse agnovit ac probavit. Atque utinam omnes alii Pseudonymi tam consultè feliciterque nominis occultationem adhibuissent. Hoc siquidem scriptum, non modicum ad promovendam inestimabilem pacem Osnabrugensem momenti

\*\*\*\*\*

# JUDICIA DE CONRINGIO

menti tum attulisse noverunt ii, quibus temporis illius res gestæ & consilia vel aliqua ex parte innotuerunt.

JOH. SCHILTERUS *JCms Exerc. XX. ad Pand. p. 406.*

De Pace  
civilis

Sed quorsum me abripit agonizantis patriæ amor? Vos qui mox rebus & consiliis interesse laboratis, Commilitones, de his unicum civilis prudentiæ superstitem Auctorem Hermannum Conringium, cujus scripta omnia meritò admiremini, in aureo de Pace civili libro differentem auscultate.

De Concussione  
fundament  
fidei

SAMUEL MARESIUS *igne fatuo Valeriani Magni p. 160.*

Sed circa hæc sufficiat amandasse Monachum ad Amplissimi & doctissimi Viri D. Hermanni Conringii Concussionem fundamentorum Fidei Pontificiæ, cui Valerianus solidam responsionem debet, & debebit æternum.

*Idem ibid. p. 214.*

Conclusiones ejusd. concussionis vocat invincibiles.

ELIAS VEZELIUS *SS. Theol. D. Prof. & Eccles. Ulmensis Exerc.*

*Hist. Theol. de Ecclesia Græcica hodierna p. 32. & seqq.*

De Purgatorio

Contendantur modo invicem ea, quæ ó παύ Conringius scripserat, cum iis quæ Allatus reposuit &c. ubi adversus Leonem Allatum defensionem suscipit eorum, quæ Conringius de Purgatorio contra Muhlmannum scripserat.

Domnus JOH. MABILLON *de re diplomatica lib. 1. c. 1. § 2.*

Censura  
Diploma-  
tis Linda-  
viensis

Multi varias sparsim regulas, ubi de singulari instrumento agebatur, tradiderunt; inprimis Leo Allatus in animadversionibus ad fragmenta Antiquitatum Etruscarum, & Hermannus Conringius in *Censura Diplomatis Ludoviciani* pro cœnobio Lipdaviensi: at nullus ad hoc usque tempus peculiari tractatione rem aggressus &c.

\*\*\*\*\*

J. G.

# EJUSQUE SCRIPTIS.

J. G. SULPICIUS (Culpicius) *Dissert. de studio juris publici.*

Illis tamen, ac in universum cæteræ tractationi Lampad-  
dianæ imperfectiori egregiè subvenerunt *Annotata* ab  
*Hermanno Conringio* V. Cl. aliquando addita, quorum pars  
publicè extat, reliqua manu scripta in Eruditorum mani-  
bus versatur.

De notis in  
Lampadi-  
um

*Idem ead. Dissert.*

De civilis prudentiæ studio hic professa opera nihil tra-  
ditur, --- cujus alias solidior cognitio unde & quomodo  
comparari possit ac debeat, præter eos, qui *consilia* hanc  
in rem fecerunt, qualia in Belgio conjunctim edita, ac de-  
nuo cura *Hermanni Conringii* Helmsstadii recusa extant,  
hujus libellus *de prudentia civili & Propolitica* per partes  
demonstraverunt. Addenda est ejusd. *introduc-tio in Ari-*  
*stotel. Politica.*

De Pruden-  
tia Civili,  
Propoliti-  
cis, intro-  
ductione in  
Aristotelis  
Politica

*Idem in Dissert. de studiis Academicis.*

Omnino autem prætereunda non sunt jam laudati *Con-*  
*ringii* duo opuscula quorum unum de *prudentia Civili*,  
alterum *Propoliticorum* indice præfixo, in publicum vul-  
gavit, à quorum lectione studium hoc felicissimè auspica-  
mur. Sunt enim *Conringii* in hoc disciplinæ genere labo-  
res ferè incomparabiles.

MORHOE, *Polyhist. lib. 1. c. 10.*

Ad historiam literariam pertinent & illi, qui de Acade-  
miis scripsere. Hic primo loco meritò poni debet HER-  
MANNUS CONRINGIUS Vir *παλυμαδίστατος*, qui de *An-*  
*tiquitatibus Academicis* librum singularem scripsit. Ejus  
postrema editio multa habet additamenta, quæ pene alte-  
ro tanto superant editionem priorem. Liber est doctus,  
& in hoc argumento ferè unicus.

De Anti-  
quitatibus  
Academi-  
cis

\*\*\*\*\* 2

GVI-



JUDICIA DE CONRINGIO EJUSQUE SCRIPTIS.

GVT PATIN. *letr.* 330.

*Martinus Schoockius* à écrit beaucoup de livres ---  
Il est aussi sçavant, que ces anciens Sophistes, qui dispo-  
toient & escrivoient, de tout ce, qui se pouvoit sçavoir.  
Lui & *Conringius* en Allemagne sont en cette façon de sci-  
ence & d' écrire le plus sçavans hommes de l' Europe.

---

Coronidem his judiciis imponat Epigramma Græcum,  
quod exornando huic operi insigne ἀγαλμα suspendit No-  
bilissimus Senator & Ædilis Lipsiensis FRID. BENEDI-  
CTUS CARPZOVIVS Jctus, Vir demerendis litera-  
tis literisque promovendis  
totus natus.

INEFFIGIEM  
VIRI CELEBERRIMI  
HERMANNI CONRINGII  
ut ingenio & doctrina maximi, sic cor-  
pore & statura parvi.

Ὁ ὦ νόον, ἔ σοφίαν γλύπτης ἐν οἷδ' ἐ κολάπτειν,  
Βαίον ἀριπρεπέος δέικελον ἀνδρὸς ὄρα.  
Δεύτερον ἀν φαίης μὴν Τυδέα θῆρον ὑπάρχειν,  
Ἐν δαῖ Καδμείων ὃς περιέσκη κόρων.  
Αὐτὰρ ὄγ' ἔ Τυδεὺς ὁ μέγας ΚΟΝΡΙΓΓΙΟΣ ἐστὶ,  
Τῷ μέγα καὶ μεγάλη γαῖα τέθηπε κλέος.

FRID. BENEDICTUS CARPZOVIVS.

HER-



HERMANNI CONRINGII  
*AD*

FERDINANDUM  
Episcopum Monasterien.  
sem ac Paderbornensem,

S. R. I. PRINCIPEM  
L. B. de FURSTENBERG.

*ET*  
Hujus ad Illum  
EPISTOLÆ.

THE FIRST PART OF THE  
AND

HERBERTIAN

Episcopum

Item in Episcopum

ET  
L. B. BURSTNER

ET  
Hujusmodi

EPISTOLAE

FERDINANDUS  
EPISCOPUS AC PRINCEPS PADER-  
BORNENSIS

S. P. D.

HERMANNO CONRINGIO

Medicinæ Doctori.

**Q**uod in literis Tuis ad Franciscum Ottonem de Borgh consiliarium nostrum non ita pridem datis nostri mentionem feceris, perquam nobis gratum accidit, qui ingenii tui monumenta non solum magni aestimamus, sed etiam olim valde a videri perlegimus: cum enim in obsequio summi Pontificis Alexandri VII. Romæ versaremur, & Lucæ Holstenii consuetudine & Bibliotheca familiariter uteremur, frequentes de ingenii tui præstantia ac doctrina inter nos sunt habiti sermones, quibus Julius Blumius non semel interfuit: summopere autem tuam patriæ historiæ & rerum Imperii nostri cognitionem in defendendo jure Moguntino coronandi Regem Romanorum sum admiratus. Quare ingenio tuo ex animo gratulamur, & quandoquidem nostram erga bonas literas ac literatos viros propensionem ex nonnullis epistolis nostris colligisse te scribis, hunc ad te Poematum libellum mittimus, benevolentia in te nostræ & juvenilis otii Musis olim in Italiâ impensi testem. Tu quicquid hoc est muneris æqui bonig,

a

con-

*consulas, ac persuasissimum insuper habeas velimus, nihil nobis acceptius fore, quam si occasionem tibi tuisq; aliqua in re gratificandi nobis suppeditaveris. Vale.*

Paderbornæ Non. Decemb. 1663.

P. S. *His adjicimus insigne antiquitatis patriæ monumentum ex antiquissimo MS. codice palatino Bibliothecæ Vaticanæ bona fide erutum, à me diligenter inspectum, descriptum & evulgatum, cujus postrema pars seu Indiculus superstitionum ac paganiarum judicium ac interpretationem tuam desiderat. Iterum vale.*

## II.

FERDINANDO EPISCOPO ET PRINCIPI PADERBORNENSI.

*Eminentissime Princeps, Domine Clementissime.*

**N**ihil minus cogitavi, quàm fore ut in manus tuas inciderent, quæ ad Nobilissimum Borchium exaravi; itaq; planè ex sententia scripsi nihil dans auribus: jam a multis annis suspicere me & colere eximiam tuam eruditionem, eoq; merito me amico gratulari, quod nactus Principem ac Dominum, qualem neminem hætenus in sacro Principum ordine Germania nostra habuit. Jam scilicet annos decem est & quod excurrit, cum in opere *Συμμίχων* Allatianorum admiratus sum unum alterumq; carmen tuum, mole quidem exiguum, ast elegantia & venustate cum antiquitate comparandum. Ex eo vidi & literas ad Baronem Boineburgium scriptas: quarum ille me pro amicitia participem fecerat, plenas itidem præstantis humaniorum literarum peritiæ. Quare nec  
apud



apud illum potui dissimulare lætitiā quam percepi, auditō in Ecclesiasticorum Principum Germaniæ numerum Terelatum esse: Cujus mei animi indices literas fortassis adhuc possit ostendere decus illud alterum Germaniæ, & Germanicæ Nobilitatis. Planè superatam verò etiam meam exspectationem, & neutiquam hætenus judicio me affectum magnitudinem Eminentissimæ Celsitud. Tuæ, nunc sentio. Solet scilicet Magistratus demum virum ostendere: plerumque cum dignitate priscis mutatis moribus. At verò crevisse humanitatem dixerim, doctrinæ verò melioris amorem nihil perdidisse, illo quod ascendisti fastigio. Quantus enim ille, qui isto positus loco, dignetur me hominem sortis tenuioris, nunquam visum vel auditum, non rogatus, nullaq; præbita iusta gratiæ causa, sacræ manus Epistolæ simul & libro! Et Epistolæ quidem, refertâ plane iis moribus, quibus sese vulgus eruditorum excipit, nihil sapiente Principalis Eminentiæ: imò & mearum laudum plenâ, quales solet amicitia exprimere, eaqve inter pares. Enimverò haud equidem verba invenio, quibus pro merito tantam virtutem prædicem, vel pro inusitato honore mihi exhibito agam gratias. Carminum ille additus liber plurimum me profecto affectit: quoniam omnia visa sunt Augusti aureum seculum referre. Laudabit omnis erudita ætas felicem vim Poëticam septem Plejadum illius voluminis, & aget gratias impensæ in editionem curæ, quæ indubiè Eminentiss. Tuæ Celsitudini debetur. Cum non invenerim verò inter illa, quæ Eminentissimum Tuum nomen referunt, illud rotundum *συμμίστων* operi subjunctum Epigramma, vereor ut editor omnium voluerit nos participes reddere: quod equidem doleo. Ego non potui me continere simulatq; librum ac-

cepi, quin illum mitterem Nestori Germaniæ, optimo Principi ac Domino meo, qui unus Augusti sui nominis mensuram implet: Quandoquidem in Serenissimo illo ordine nemo temere & amantior & intelligentior omnigenæ doctrinæ, nemo studiosior thesauri librarii, quamvis omnes ante se natos inusitata congesta librorum vi jam superaverit. Exemplum Capitularis vetustissimi illius jam ante quadriennium Illustris Boineburgius mihi curaverat. Tantiqve â me semper factum est illud Carolini ævi monumentum, ut constituerim addere tertiæ editioni libri mei de Origine J. Germanici, in Germania nusquam illius exemplis comparentibus, & Romæ fortassis haud satis ex æquo æstimatis. Gaudeo me jam intellexisse cujus curæ editio illius libelli debeatur. Neque verò id abs me reticebitur ad Lectorem: in cujus gratiam nonnulla forte & subjungam de antiquis Saxonum superstitionibus: quamquam earum ut memoriam ita & intellectum longa ætas & felix Christianæ religionis propagatio ferè obliteravit. Simulac tertia editio viderit lucem, mittam. Imo prope diem & alia quædam mea transmittam; animum mihi faciente id uti audeam, quandoquidem reapse jam didici Eminentissimam Tuam Celsitudinem, *meas esse aliquid putare nugas*. Deum veneror uti Reip. (quæ sane in gravissimo versatur discrimine) bono Eminentiss. Celsitud. Vestram & hoc & secuturis annis plurimis sospitem incolu- memq; conservet.

Helmst. Kal. Jan.  
Anno 1664.

*Eminentiss. Celsitudini  
omni obsequio  
deditissimus*

*H. Conringius.*

## III.

FERDINANDO EPISCOPO  
PADERBORNENSI.*Eminentissime Princeps, Domine Clementissime.*

**S**erius quam initio institueram & parerat, mitto quidem librum meum de Origine Juris Germanici: quandoquidem tamen mora omnis nata est mihi invito ex sinistro de valetudine, imo vita Tua, rumore, non dubito à benevolentia Tua commissæ fortassis culpæ veniam mihi polliceri. Inprimis quoniam & quod mittere aliquid audeam, sola effecit quam scripta pridem Epistola testatus es, inexpectata erga me & libellos meos benignitas. Deprehendere autem in hoc volumine fuerit, cum bis in laudem Tuam, quamvis infra meritum (quæ enim ego verbis ex æquem virtutes tuas) nonnihil dictum, in præfatione scilicet ad Lectorem & capite tertio decimo; tum illa antiquissima Capitularia, quæ Tuo dono possideo. Utinam vero tantum sit Tibi à negotiis Reip. otii, uti possis saltim cursim per-lustrare etiam libri illius mei reliqua omnia! Quod si tamen id sperare haud liceat, rogo quam possum maximè, uti digneris saltim, quæ capitibus duobus ultimis disputavi, acerrimo quo vales iudicio expendere. Enimverò, est quidem argumentum libri omne curâ Principum haud fortassis indignum: isthæc postrema tamen præ aliis illam quasi exigunt. Tui autem unius iudicio equidem fuerim contentus, id si nancisci mihi contigerit: quoniam qui æque æstimare talia possit, in Principum ordine noverim neminem.

Wolfenbütteli in Aula  
13. April Anno 1665.

*Eminentissima Celsitudini Tue  
atque omnem devotissimus*

a 3

*Herman Conringius.*

## IV.

EMINENTISSIME & ILLUSTRIS-  
SIME PRINCEPS,*Domine Clementissime.*

**H** Esterno die Serenissimus Princeps ac herus meus, verè Augustus seculi hujus Nestor, non misit duntaxat nonnulla literarum tuarum, sed etiam desiderio Tuo satis me facere iussit. Ego vero visis illis Tuis non in levem sum dolorem conjectus. Etenim non tantum jam ante biennium & quod excurrit, Clementissimis literis tuis, quibus & Poematum librum, & insigne illud Saxonicarum rerum monumentum Romæ ex Palatino Codice erutum junxeras, statim respondi: sed cum illud ipsum monumentum una cum libro meo de Origine Germanici juris anno proximo edidissem, illico exemplum operis Eminentissimæ Celsitudini Tuæ misi; saltem in signum prompti obsequii pariter & ejus quo prosequor præclaram eruditionem ac humanitatem Tuam cum Principali fastigio rarissimè conjunctam (quarum virtutum nomine ipso in libro non semel Te laudaveram) affectus & admirationis. Illa omnia pridem tradita esse, nullus equidem dubitavi: nunc vero sinistra quæq; non possum non suspicari. Misi autem ante hosce septem menses circiter etiam libri mei quem de Antiquissimo statu Helmstadii ac vicinæ conscripsi, exemplar: quod proinde itidem periiisse non possum non vereri. Quæ res ægerrime abs me jam fertur: non quod jacturam fecerim librorum, sed quod Te, tantum Principem, non ex merito coluisse, & defuisse officio meo, queam videri. Nec verò dolore illo liberabor, nisi fortassis meliora mihi nunciari feceris. Jam  
tum



tum autem neutiquam dissimulavi, sed aperte prodidi, veterum superstitionum & idololatrici cultus Saxonicae Gentis ignorantiam: ac proinde quæ in isthoc absteruto monumento recensentur, illustrari à me haud posse. Quemadmodum scilicet pleraque Sacrorum Græcorum Romanorumque, Mysteria præsertim, nos hodie fugiunt: aliorum populorum Sacra illa profana ferè omnia ignorantur; ita non est mirum periisse tandem memoriam rituum priscae *δαίμονολατρίας* nostræ. Præsertim quia omnia ejusmodi ex antiquis libris accipi duntaxat possunt: quales de Græcis & Romanis rebus superant quidem, non autem de Germanicis, nisi perquam rari. Eadem sanè de causâ ignoramus hodie dæmonolatricas ceremonias pleraque; Cananiticorum populorum, quos internecione deleri Deus jussit. Quod sanè nonnulla Mosaicæ Legis illis opposita esse hodie censent eruditi, id non tam testimoniis antiquis nititur quam sagace conjecturâ primi (quantum equidem novi) Moysis Maimonidæ; quem non dubitavit ea in re sequi jam olim ipse Thomas Aquinas. Cæterum & quæ recitantur ineptiæ impiæ Indiculo illo, utrum sint Saxonicae Gentis; equidem multum dubito. Imo non esse, ausim certò asseverare; si sane in Liptinensi Concilio Anni DCCXLIII. Indiculus ille est confectus: Liquidò enim apparet, quæ recitantur superstitiones non nisi reliquias esse veteris paganismi, sed in gente quæ jam Christianâ religione erat imbuta. Quod vel illud unum ostenderit, *de petendo quod boni vocant S. Mariæ: item illud, de eo quod sibi sanctos fingunt quoslibet mortuos*. At vero quo tempore habitum illud Concilium fuit, nondum vel facula in Saxonibus accensa fuit Christianæ lucis: etsi isthoc ipso anno Carolomannus Caroli Magni Patruus expeditione in Saxoniam facta,

8 CONRING. EPIST. AD FERDIN. EPISC. &c.  
 facta, ut in Annalibus quidem Francicis, qui appellantur,  
 legitur, Hochsiburch castrum (quod in Reginone tamen  
 rectius fortè dicitur Ochsenburg) ceperit. Notum sanè,  
 Caroli demum Magni auspiciis cœpisse in Saxonibus pri-  
 mordia Christianismi, & quidem ab anno seculi illius  
 octavi septuagesimo quinto. Sed & quæ Indiculo præmis-  
 sa est Fidei professio, vel illâ quâ scripta est dialecto, facile  
 indicat, non in Saxonicæ Gentis usum quidquam ejus esse  
 compositum. Ut nunc taceam, primos Evangelii in Sa-  
 xonibus prædicatores non ex superiore Germaniâ sed ex  
 Britannia aut Frisiâ adventasse. Etiam si possem igitur non-  
 nihil adferre lucis Indiculo illi, res Saxonie tamen priscae  
 isthoc ipso haud illustrarentur. Nihil cœteroquin mihi  
 prius foret, quàm Eminentissimæ Celsitudinis Tuæ desi-  
 derio obsequi: præsertim quia intelligo, meditari Te Hi-  
 storiam Paderbornensis *immonichs*, quod argumentum hacten-  
 us, quod sciam, nemo ex dignitate tractaverit, etsi ex  
 regione illâ ipsi Nihemii & Reineccii, omnis antiquitatis  
 curiosissimi scrutatores, prodiissent. Libentissime equi-  
 dem juverim tantos conatus si possum. Quod si Celsitudo  
 Tua Serenissimum Herum meum inviserit, quod deside-  
 rari scio ab illo sapientissimo Nestore, dabitur fortassis oc-  
 casio coràm explicandi animum inserviendicupidissimum.  
 Nunc Deum veneror, uti bono Germaniæ publico, Te  
 Principem, pacis & tranquillitatis tot inter Martios furo-  
 res studiosum, diu conservet.

Helmstadii 3. April.  
 1666.

*Eminentissima Celsitudinis tuæ  
 devotissimus*

*Hermannus Conringius.*

V.

FERDINANDUS EPISCOPUS  
ET PRINCEPS PADERBORNENSIS.

Coadjutor Monasteriensis

S. P. D.

HERMANNO CONRINGIO

Viro eruditissimo.

*M*ONumenta Paderbornensia ex historia Romana, Francica, Saxonica eruta & notis illustrata, quæ in lucem publicam nunc prodeunt, tecum communico, mi Conringi, ut censeas & emendes, pro singulari tua eruditione & patriæ antiquitatis notitia. Quare majorem in modum te rogo, ut censuram liberrime exerceas, meq; admoneas erroris ubi ubi deprehensi, quo suo tempore emendatius hocce opusculum possit recudi. Gratis sum etiam nobis accidet, si quibus argumentis & autorum testimoniis sententiam nostram confirmabis, eaq; nobis suggeras, secundæ editioni inferenda. Quicquid autem operæ hac in re collocabis, uti nobis perquam erit acceptum, ita non omittemus debitis officiis remunerari. Auctoris notarum titulus non est operi præfixus, qui latere mavult, quam laureolam in mustaceo quærere, ea præcipue de causa, quod per negocia publica baud illi licuit limæ immorari & mensuram nominis sui implere. Unum ex his exemplum Bibliothecæ Wulfenbutelianæ donatum velim, cætera tua sunt. Vale.

Paderbornæ vii. Kal. April.

MDCLXX.

b

VI.

## VI.

EMINENTISSIME ET SERENISSIME  
PRINCEPS*Domine Clementissime.*

**Q**uo magis præter expectationem advenit munus, ut inusitatæ in Principum ordine eruditionis, ita simul immeritæ Clementiæ certum testimonium, eo impensius non possum non gaudere. Eminentissimam Celsitudinem vestram isthoc in argumento occupari, non adeo pridem narraverat mihi in Wolfenbutteleni aula tum degenti Hervordiensis satrapa Arnoldus Ludovicus de Post: quem quia itidem Germaniæ nostræ antiquitatum studio duci intellexi, simulq; Eminentissimæ Celsitudini vestræ brevi coram servitutum rogavi, ut quidem ante omnia humillima obsequia mea offerret, simul vero, cum de sedibus Francorum illorum, qui Germaniâ relicta in solum Gallicum commigravêre, incidisset sermo, conjecturas meas præbitâ occasione Eminentissimæ Celsitudinis vestræ limatissimæ censuræ subjiceret, omnino vero calcar adderet in tam nobili stadio currenti. Id num ille jam tum fecerit nescio, facturum non equidem dubito. Nec ille autem mihi narravit necegocredidi, jam eo usq; argumentum hoc fuisse elaboratum, ut lucem haud defugere posset: haud ignarus scilicet, quæ soleant esse Principum occupationes, quantumve illæ animum à literariis prior curis seducant. Erit sane libelli lectio mihi omnibus prior negotiis hoc etiam ipso die; quantum per valetudinem quidem licuerit, quæ ut semper vernali tempestate solet esse nonnihil infirmior, præsertim ætati jam in senium vergenti, & Regum Prin-  
ci-



cupumq; rebus propemodum defatigatæ. Censuram ex voto Eminentissimæ Celsitudinis Vestræ scio à me præstari non posse: non deero tamen expectationi saltem pro virili, simulatq; cum iusta cura librum volvere licuerit: quod spero statim à feriis Paschalibus, quas solis sacris impendere jubet religiosa pietas, mihi permissum iri. Exemplar libri unum Augustæ Bibliothecæ Eminentissimæ Celsitudinis Vestræ nomine, prout sum iussus, dedicabo, & quidem perendie statim literis ad Principem meum datis. Alterum dare Antonio Ulrico regentis Principis fratri, literato item & literarum literatorumqve magno æstimatori, animus est. Tertium die statim crastini Juliæ Bibliothecæ Academicæ consecrabo, addito autoris elogio. De reliquis cogitabo. Absit enim ut indignis horum quidquā offeratur.

Deum veneror, Eminentissime & Serenissime Princeps, uti possit & integra valetudine & rebus prosperè ceu hæten<sup>9</sup> succedentibus, Eminentissima Vestræ Celsitudo otio literario interdum frui, animumq; ad magna quæq; componere.

*Eminentissimæ & Serenissimæ*

*Celsitudinis Vestræ*

Helmstadii 23. Martii 1670.

*ætatem*

*devotissimus servus*

*H. Conringius.*

VII.

FERDINANDUS EPISCOPUS

ET PRINCEPS PADERBORNENSIS

Coadjutor Monasteriensis

S. P. D.

Cl. Viro HERMANNO CONRINGIO.

*EX quo responsum tuum de redditis tibi monumentis Paderbornensibus accepi, cessavit cœptum literarum nostrarum*

*commercium: ea enim interea, ut nosſi, inciderunt tempora, quæ potius juſtitium Muſis noſtris indicerent, quàm otium facerent. Nunc itaq; rebus iterum quietis reſumo calamum, & hanc Rot-tendorffii noſtri præſationem novæ Monumentorum editioni, quam priori longè auſtiorẽ ornatioremq; Daniel Elzevirius Amſtelodami adornat, præmittendam tecum communico, unaq; judicii tui facio, quæ in monumentis Viſurgis & Remæ de Fran-corum & Saxonum origine ſumus harioſati. Tuæ erit humani-tatis eacẽſere & ſententiã hac ſuper re tuam nobis ſignificare, quam tanti ſaduri ſumus, quanta eſt ingenii & eruditionis tuæ apud omnes & nos cumprimis exiſtimatio. In monumentis porrò noſtris ad te miſis non ſemel adverteris Henricum de Hervordia à nobis citari, cujus hiſtoriæ binæ priores partes MSſ. apud me ſunt, ſed poſtremam ejus partem, in quã ſui tem-poris res geſtas pertractat, bætenus deſidero. Quare majorem in modum terogo, ut certiorẽ me facias, utrum in Bibliothecã Julia, aut alibi apud vos hic Theſaurus lateat, de quo vix aut ne vix quidem dubitare me patitur Meibomius veſter, qui hujus Autoris teſtimonium in ſuis editis libris paſſim adducit. Quo itaq; citius hac ſuper re reſponſum nobis dederis, eo erit gratius acceptiusq;. Vale*

*Neuhulii xv. Julii 1671.*

# VIII.

## EMINENTISSIME ET ILLUSTRIS-SIME PRINCEPS

*Domine Clementiſſime.*

**C**Um nuper turbaretur ad Viſurgim, dolui equidem, Eminentiaẽ Veſtræ litteraria ſtudia non poſſe non ſimul turbari; cumprimis autem metui ne & ipſa involveretur. Eo majore gaudiõ me affecerunt clemen-tis-

tissimæ litteræ Eminentiae Vestrae cum adjectis plagulis. Vidi enim rediisse in pristinum otium Musas Vestras, neq; per Martias turbas jacturam aliquam me fecisse pristinae gratiae. Cum primis magnâ cum voluptate intellexi iteratum illud patriæ monumenta excolendi illustrandiq; studium: rem & piam & utilem & ingenuo cuivis per jucundam. Et si enim alibi splendidiora & sumtuosiora passim supersint; rerum tamen gestarum magnitudine illis aliis Paderbornensia vestra monumenta neutiquam in quam multis concedunt, quædam & superant. Fuit sanè ille Rhenum inter & Visurgim terrarum tractus à Julii Cæsaris usque ævo aliquot seculis Romanæ Germanæq; virtutis palæstra. Et vero ipsos etiam Marcomannos, Harudes, & Sedusios antiquissimas sedes non alibi habuisse, ipsa earum nomina significare mihi videntur, ab oppidis scil. suæ cujusq; gentis ita dictos quorum vocabula etiamnum superant. Quemadmodum videlicet à Marca hodie comitatui Marcano, ita olim Marcomannis fuisse nomen: ab eo quod hodie Dusbürgum audit, olim Sedusios fuisse appellatos; & Harudum oppidum illud quod nunc vulgo dicitur Rüden an der Har fuisse, mihi sanè perfit verisimile. Illos autem tres populos in unum deniq; Marcomannorum nomen coaluisse, & Maraboduo iuclyto Duce occupasse Bojohemiam, pulsos trans Danubium Bojis, aut in servitutem redactis, notum est ex Historiâ Romana: nisi fortè Sedusii & Harudes Quadorum sibi cognomentum adsciverint propriâ conditâ Republ. Non cedit verò illis interamnatis terris exigua gloriæ, si fortissimis illis tribus populis primos natales dedit; id quod ego suspicor, non vanâ fortè conjecturâ. Idq; etiam ideo, quoniam ipsi illi Marcomanni à Sarmatis Czechis licet Bojohemo suo pulsideniq; videntur illi esse, qui occupa-

to Norico Bojoarii post dicti sunt à Bojicis suis priscis sedibus. Francorum partem potissimam iisdem terris originem suam debere, omnino Eminentiae Vestrae assentior. Utiq; enim & Bructeri, nobilis Francorum populus, etsi quo tempore Francum cognomentum coepit, ad ripam Rheni ferè circa Vangiones sederit, olim circa Luppian & Amniam habitaverunt: quin imo dicti, nisi fallor, sunt ab oppido Brock aut Bruck, quod nunc Comitatus Brocano dat appellationem. Citra controversiam autem Chamavi, & Ampsivarii illas quondam terras tenuerunt. Imo illorum oppidum fuisse id, quod nunc Camen dicitur; & Ampsivarios à fluvio quem accoluerunt *Muser* vel *Emser* / ut ab Ambroamne itidem cognominatos Ambrivarios, imo fortassis & Sicambros, dictos; opinor. Utrumque autem populum Francicum esse certum est & notum. Nescio an Eminentia Vestra à Francico cognomento velit exclusos Angrivarios Tacito usque adeo celebratos & Chamavis vicinos. Illos diversos esse ab Angris aut Angariis populo Saxonico, in Francicum autem nomen fuisse cooptatos, origine nominis accepto ab Angro fluvio, qui in Ducatu Bergenfi Rheno mergitur, post à sese cognominata loca illa *Angern* / *Angerhausen* / *zum Angern*: forte non inutilibus argumentis probari potest. Utrum & Frisii mei, & qui Visurgim inter & Albim degunt, Franci unquam audierint, mulum equidem dubito. Catts verò constat nomen Francicum induisse; nec fortè difficile probatu, non tam Hassos, quam illos ipsos qui post orientales Franci, nunc simpliciter nobis *Franken* vocantur, Catts olim nuncupatos. Omnes porro Francos in Germaniâ TransRhenanâ olim vixisse, & eorum solos illos, qui inter Rhenum & Visurgim floruerunt, relictis patriis sedibus, Rhenoque tra-

jecto



jectio in Galliam commigrâsse, pridem judicavi, ac proinde  
 Eminentia Vestra hæc etiam in re non possum non applau-  
 dere. Utinam non displiceant vicissim Eminentia Vestra  
 quæ à me libro de origine Juris Germanici de Francis illis  
 priscis, eorumq; legibus cum primis cap. VII. sunt dissertata;  
 nec enim vel nunc eorum quicquam muto: nisi quod legem  
 Salicam in Ripuariis, non autem in TransRhenanis nostris  
 terris esse latam, fecerint me postea suspicari nomina vil-  
 larum istarum ubi lex illa fertur condita, reperta parum di-  
 stantibus spatiis in Germaniâ secunda circa Moguntiacum  
 & Oppenheimium. Cum ante quinquennium miserim  
 librum illum, fortassis adhuc in Eminentia Vestra latet Bi-  
 bliotheca. De Saxonum originibus & in vestram *μικρολογίαν*  
*μίας* adventu sententiam Eminentia Vestra itidem appro-  
 bo. Et quoniam libro de antiquissimo Helmeftadii statu  
 eandem prolixius proposui, mitto nunc illum: etsi ne mo-  
 rer Eminentia Vestra jussu & desideria, cogar illum incom-  
 ptum tradere. Quæ magis propria sunt Paderbornensia,  
 merentur sanè singularem aliquam laudationem, quoniam  
 & natura ipsa quædam sua miracula illis oris largita est, &  
 humanarum rerum multa per eximia ibi acciderunt. Cum  
 ab Agrippinensibus redux & non multò ante terras istas  
 peragrarem, magnâ etiam ipsemet cum animi voluptate  
 in memoriam mihi revocavi, de Romanorum & Caroli M.  
 gestis antehac studiosè mihi lecta. Per item oculos affecit  
 mirus Padraë fluminis ortus. Longe maximum proinde  
 gaudium mihi pepererunt Eminentia Vestra Poëtico &  
 Historico calamo illustrata Paderbornensia monumenta.  
 Quo Illustrissimæ manus dono annus me superior ditavit.  
 Enim verò ex eo quæ jam tum noveram longe visâ sunt so-  
 litò splendidiora & certiora; alia quam plurima primùm di-

didici. Omnia coram quasi spectata animo apparuerunt. Usque adeo illa exemplo nunc carens Epigrammatum rotunda suavitas eorumque longè eruditissima ex Historicis deprompta illustratio, me delectavit. Cum ex transmissis pagellis itaque intellexerim, non tantum illius libri novam editionem in Batavis institui, sed multa etiam hætenus intacta secundis curis ornatiores proditura, incensum in me est grande omnium istorum desiderium. Proindeque acceptis Eminentiae Vestrae literis, nihil mihi fuit prius, quam in Henrici de Herfordia libros inquirere; sicubi fortè illi apud nos reperiantur manuscripti (typis enim nunquam sunt editi) quo justae expectationi quantum in me est, satisfaciam. Nec verò non etiam ipsemet auguror, hominis illius in viciniâ nati labores Paderbornensibus illustrandis posse inservire. Verum in Juliâ nostrâ Bibliotheca Henricus ille non comparuit. Quid super eâ re consultus Meibomius noster responderit, mitto: nec memini ejus libri aliquod visum in thesauro Augustae Bibliothecae exemplum. Inquiram tamen & ibi diligenter. Videtur autem & inventu rarior esse, ac proinde nec *πρὸ πάλυ* Vossio inter Latinos historicos memoratus, imo per errorem creditus idem cum Henrico de Erfordia, homine nihil minus quam Historico. Verum quid in Augusta Bibliotheca si reperturus docebit tempus. Mitto autem hâc vice, qui recentissima hic cura prodiit in lucem, Engelhusium: quandoquidem & ille in vicina est genitus & diligenter satis res patrias persequitur pro captu ævi: & hætenus Typographum non invenit. Utinam possit ille Hervordiensis locum explere Vestraeque Eminentiae expectationem! Quod si porrò aliud quid demandatum mihi fuerit, curabo illâ quæ par est sedulitate. Nec enim magis temerè quid in votis, quam inservire præ-

cla-

claris studiis Principis, cui eruditione parem aliquam multis seculis non vidit Germania, imo cui in vulgo eruditorum nemo hodie antecellit, cum Poëtica facundiâ tum Germaniæ antiquitatum exactâ peritiâ. Non dubito autem in nova istac monumentorum editione actum iri & de Piermontanis; eoqve posse me tandem intelligere, verumne sit quod credidi hactenus; nomen Comitatus illius esse merè Gallicum Piermont signans lapideum aut petrosum montem: ac proinde illos, qui antiquis chartis Comites audiunt de monte Lapideo, Piermontanos Dominos veteres esse. Fortè quodeorum conditor ex Galliâ istuc venerit, & locis illis fuerit donatus à Ludovico Pio, quo tempore ex Aurea Gallorum Corbeia nostram Saxonicam construxit. Quin & docebit me spero illa monumentorum *ἔκδοσις*, quid sentiendum de Irmenburgo Comitatus illius; ab Arminione acceperit nomen, quod hodie nonnulli opinantur, an ab Irmin Saxonum Deastro, quod mihi est verisimilius. Nec vero Arminii aut Harminii vox non est diversa ab Irmin, etsi sono affines. Nec ipse Arminius vel ausus fuisset arcem condere sui nominis; nisi trahere huc velis quod Tacitus memorat: *Arminium pulso Marabō duo & abscedentibus Romanis Regnum affectasse, ac libertatem popularium habuisse adversam*, ut arx in libertatis frenum exstructa fuerit, mox à popularibus eversa; quorum & dolo peremptus est Arminius. Nec deniqve Cheruscorum vis fortassis adeo longè extra proprias sedes fuit diffusa, ut arce fuerit opus ad vicinos populos intra ordinem coërcendos. Ex adverso Irmini cultum Saxonice in terris imprimis fuisse familiarem, certissimâ constat Historiarum fide. Non dixerim tamen à Carolo M. hic perinde ut Eresburgi sanum aliquod Idoli illius fuisse destructum: quoniam nihil tale ævi illius annales

memorant, ut nec castrum alicujus ullam faciant memoriam, ac proinde jam ante Carolum destructum forte fuerit. Cæterum illa omnia luculente docebit me, scio, V. Eminentia nova ista monumentorum editio, ut alia quam multa hæcenus mihi ignorata. Quapropter etiam illa atque etiam à me desideratur. Hæc autem ubi Diœcesi suæ Eminentia V. contulerit beneficia, speraverim daturam eandem luci publicæ, & illud Epistolarum Innocentii tertii Papæ volumen, quod ex Vaticana Bibliotheca descriptum & Sereniss. sanctæ memoriæ Duci Augusto communicatum aliquot ante annos cum curâ perlustravi. Expectare illud jussi virum & multiplici doctrinâ & scriptis editis longe clarissimum Stephanum Baluzium Remensem Canonicum, qui jam à Bibliothecis est Lutetiæ Parisiorum magno illi Regio Ministro Colberto. Idque quoniam & ipse proposuit, sex libris Epistolarum Pontificis illius jam editis, alios quatuor nondum emissos in lucem, sibi autem à Francisco Busæveto Episcopo Monspelienfi ex veteri Codice mss. Bibliothecæ suæ suppeditatos, adjungere. Quod si Eminentia V. maturare suam illam editionem voluerit, forte poterit Baluzius quiescere: sui illi libri præsertim si nihil habeant novi. Si tamen defuerit otium ipsimet Eminentia V. in curandam hanc editionem, fortassis hand fuerit abs re optimi illius & doctissimi Viri consilium adjuvare. Innotuit ille indubiè jam tum Eminentia V. variorum librorum publicatione: multa alia præclara meditatur, eaque inter Conciliorum *ἑξελκύματα*. In quibus omnibus ex Academicâ nostrâ Bibliothecâ ut & aliunde soleo pereximio illi Viro meam operam commodare. Ubi Eminentia etiam V. placuerit, magnos & utiles conatus tanti Viri suis, quibus abundat, literariis divitiis adjuvare, poterit mea in id opera uti. DEUS, Eminentissime



FERDIN. EPISC. & C. EPISTOLA AD CONRING. 19  
sime Princeps & vitam & quietem à turbis prolixam bono  
publico largiatur. Eminentia V.

Helmeſtadii 24. Julii. Anno 1671.

*humillimè devotus*  
*Hermannus Conringius.*

P. S. Edidi hoc anno quædam de Piscinis, ut anno præce-  
dente Hermetica mea secundis curis aucta: si & talia  
non aspernetur Eminentia V. mittentur proximè,

---

IX.

FERDINANDUS EPISCOPUS  
ET PRINCEPS PADERBORNENSIS

Coadjutor Monasteriensis.

S. P. D.

Cl. Viro HERMANNO CONRINGIO.

*P*rolixius responsum ad literas tuas, mi Conringi, XXIV.  
Julii datas in aliud tempus magis vacuum curis rejicio,  
nunc gratisimo librorum tuorum dono poemata mea recens e-  
dita & hodie Amstelodamo allata rependo, adjedis aliquot  
aureis nummis, ut sine incommodo tuo unum eorum exem-  
plum Bibliothecæ Augustæ, alterum Juliæ inferendum & ter-  
tium Henrico Meibomio offerendum cures compingi, cætera  
tibi reserves. Ubi monumenta Paderbornensia, quæ jam sub  
prælo Amstelodamensi gemunt, in lucem prodierint, non etiam  
indonatus abibis. Si Henricus Meibomius in animum indu-  
ceret, ut quæ ex libro pergameno apud eum descripta Henrici  
de Hervordia monumenta extant, nobiscum communicaren-  
tur, ut in rem nostram nonnulla ex iis exciperemus, non so-  
lum hæc opera nobis grata & instituto nostro fructuosa accide-  
ret, sed etiam gratitudinem nostram Meibomio maxime de-

vinciret. Quare unicè te rogo, ut per nuncium, qui has ad te perferet, Hervordiensis illius reliquias huc mittendas cures, & de fide restitutionis apud Meibomium caveas. Cæterum tantum de benignitate Principis Wolffenbutelensis mihi polliceor, ut non invitum fore confidam, ut si Hervordiensis integer in Augusta Bibliotheca supersit, ejus nobis fiat copia. Vale & Henricum Meibomium, cujus avo, utpote Lemgovienti, diœcesis mea gloriatur, plurimum meis verbis jube salvere. Quæ de piscinis nuper edidisti, ut omnia ingenii tui monumenta maximi facio, a videri desidero una cum Hermeticis tuis. Vale iterum iterumque. Neubusii ad confluentes Luppiæ & Alifonis. III. Aug. MDCLXXI.

## X.

EMINENTISSIME ET ILLUSTRIS  
PRINCEPS.

Domine Clementissime.

**N**on inacceptas fuisse literas meas, iisque Eminentiam Vestram vacuo à curis tempore aliquid reposituram, plurimum gaudeo. Et verò eorum, quæ attuli, accuratam censuram unicè desidero: à sola autem Eminentia V. poterit illa institui; à nemine profectò rectius; quia in isthoc Antiquitatum Patriæ studio nemo par sit, nemo secundus, plerisque talia fastidientibus. Interea mirificè exhilaravit me nuperrimus fasciculus, Eminentiae V. manu exaratis literis imaginibusque, quibus nihil mihi pretiosius, ut & aliquor Poëmatum novæ editionis exemplis, nec non aureo denique munere opulentus. Ideoque pro isthac mihi exhibita Principali beneficentia gratias ago immortales. Poëmatum libellos, (fateor) præ multis negotiis, hætenus tantum licuit currente ut sic dicam oculo perlustra-

re

re: etiam sic verò suavitas carminum potuit tædium omne molestiarum discutere. Simul accepi autem, statim libellos omnes Bibliopegicis operis excolendos commisi: ab iisque jam jam expecto. Sequar verò in iis distribuendis ante omnia Eminentiae V. iussa: adeoque quantocyus unum Augustae, alterum Juliae nostrae Bibliothecae, tertium Meibomio reddam, mihi quartum reservabo. Reliquos tres in Galliam destinavi: unum Regiae, alterum Colbertinae, tertium Cappellanae Bibliothecae consecrandum. Quibus addam duo exempla imaginis; tertio mihi retento, magnorum Regum & Principum, qui me patrocinio sunt dignati, aliis addendo. Quam rem viris in Galliâ præclaris scio quidem futuram acceptissimam (nec enim in Principum aut Episcoporum ordine qui paria possit præstare, quisquam vel ibi, quantumvis præ Germania nostra Episcopis doctis abundet Gallia, invenitur) spero autem nec Eminentiam V. consilium meum improbaturam. A Meibomio nostro facile impetravi, quæ Eminentia V. desiderat; igitur ille non Hervordiensem duntaxat, sed quædam avita ac sua pariter cum Epistola jam me curante exhibet. Cum novissimè Wolfenbutteli expedienda mihi negocia essent, quæsi vi quidem in Augusto illo longè locupletissimo librario thesauro Hervordiensem istum; sed frustra fui. Adeo inventu rarusest. Quid autem? An Eminentia V. splendido luo aureo dono devincire me amplius sibi tentavit? Ego verò sanctè juro, inusitatâ vestra virtute & doctrinâ motum, pridem me sponte in Eminentiae V. servitutem concessisse, neque illi affectui quidquam addi posse. Apud me ergo illud quidem multo quamvis auri effici nequit: quoniam indicio tamen est singularis cujusdam Principalis gratiæ in literarum cultorem, crevit Eminentiae V. virtutum

admiratio, ut in posterum liceat majore animi confidentia debitum præstare obsequium. Id quod factum iri, uti certò sibi persuadere etiam V. Eminentia dignetur, omnem in modum oro & obtestor. Mea Hermetica & Piscinaria mitto. Non quod sint tanti, sed quia intelligo non inaccepta futura. Utinam simul usum aliquem saltem aquis vestris afferre sint idonea illa Piscinaria; cum præsertim per Visurgim fortasse liceat pisces marinos nonnullos in lacus aut stagna vestra more Romano antiquo transferre! Quæ de Ægyptiorum sapientia lib. Hermeticorum primo disserui, si non displiceant limatissimo Vestro judicio, dabo propediem libellum alium de sapientia veterum Chaldæorum: etsi hodie nullum talia Reip. adferant commodum. Chemicarum dissertationum secundi libri examen Rottendorfsius Vester V. C. possit quam optimè instituere si grave non fuerit. Nostræ Juliæ schola Medica gloriatur adhuc isthoc alumno: ipsi ego mollem precor & vegetam senectutem. Eminentia V. etiam atq; etiam opto consimilem valetudinē & felicia quæq;

*Eminentiss. & Illustriss. V. nomini*

Helmstadii 13. August.

Anno 1671,

*atatem omnem*

*devotissimus*

*Hermannus Conringius.*

XI.

FERDINANDUS EPISCOPUS

ET PRINCEPS PADERBORNENSIS

Coadjutor Monasteriensis.

S. P. D.

HERMANNO CONRINGIO

*Viro eruditissimo.*

*Libellum poematum meorum cum imagine acceptum tibi fuisse, ejusque tria exempla in Gallias à te missa unice gaudeo,*



deo, nec minus me libelli tui nobis donati, quam *Analeſta Her-  
vordienſis* ab *Henrico Meibomio* impetrata exhibararunt,  
quæ Germanâ fide hero ſuo reſtituam. Interea tria poemat-  
um exempla, ne humanitas tua tibi ſit damnoſa, reddimus tibi,  
dum aliam optamus occaſionem officio & amorî erga me tuore-  
ſpondendi. *Piſcinaria* primo ſtatim aſpectu valde me oblecta-  
runt. *Uſtinam Rottendorffius* olim noſter, qui ante paucos  
menſes octuagenario proximus, aſperrimis, ut ait *Plinius*,  
cruciatibus calculorum à ſtillicidio veſicæ extinctus, magno  
meo luctu & literarum detrimento diem obiit. *Hermetica* tua  
perlegere & de *Chemicis diſſertationibus* tuis judicare poſſet!  
magnopere certè eruditionem & intimam *Medicinæ* peritiâ  
tuam deprædicaret. Vale mi *Conringi* & me ut facis ama. In  
*Collino meo. XXI. Aug. MDCLXXI.*

## XII.

EMINENTISSIME ATq; ILLUSTRIS-  
SIME PRINCEPS.

*Domine Clementiſſime.*

**O**bfecutus Eminentiaſe Tuæ mandato librum unum  
Poëmatum Tuorum *Auguſtæ Bibliothecæ* inferen-  
dum obtuli *Sereniſſimo Principi* ac Domino meo  
*Rudolpho Auguſto*; alterum noſtræ *Juliaſe Bibliothecæ* E-  
minentiaſe Tuæ nomine conſecravi; tertium *Meibomio*  
dedi; tres ceu promiſi, meo in id uſus conſilio, in *Galli-*  
*am* curavi; uno mihi retento. Quo animo donum exce-  
perit *Sereniſſimus Princeps*, indicant literæ. Quarum ἀν-  
τίγραφον mittere, judicavi non abs re futurum: uti nem-  
pe etiam Eminentia Tua certò ſibi queat polliceri *Optimi*  
*illius Principis* in cultum ſinceræ amicitiaſe propenſionem.  
Quod ſi placuerit, etiam alterum, qui expetitur in familia-  
rio-

riorem usum libellum, aut etiam Principalium literarum aliquid meæ curæ committere, Eminentiaæ Tuæ in id promptum ministerium & obsequium meum offero. Felicem prædicaturus me, si ad intimiorem Tantorum Principum amicitiam quidquam contulerim. Academia nostra pro honore sibi exhibito ipsamet gratias ager propediem: interea illius nomine Eminentiaæ Tuæ habeo maximas. Idem mihi injunctum iri ex Gallia, equidem non dubito. Etsi enim illud Regnum multis Episcopis eruditis floreat, qui paria tamen Eminentiaæ Tuæ bonarum literarum peritia fecerit, scio reperiri neminem. Is quem jam antehac laudavi Stephanus Baluzius Remensis Canonicus misit mihi libros aliquot ab se editos, interque eos novam *ἑκδοσιν* operis Illustrissimi quondam Archiepiscopi Parisiensis Petri de Marca de Concordia Sacerdotii & Imperii: jamque parat editionem Capitularium Francorum Regum secundæ familiæ. Optaverim, esse illud Marcæ opus & Baluziana reliqua in Eminentiaæ Tuæ manibus. Cumprimis posse ex librario Thesauro Tuæ Eminentiaæ adjuvari egregium novum illum conatum, perinde atque ex nostræ Juliæ Bibliothecæ mss. quædam propediem abs me mittentur. Capitularia illa de rebus Saxonice Romæ edita jam tum habet Baluzius, eaque addet reliquis.

*Eminentiaæ Tuæ*

Helmestadii 21. Augusti

-1671.

*atatem omnem*

*Servus devotissimus*

*Hermannus Conringius.*

XIII.  
*EMINENTISSIME AC ILLUSTRIS-  
SIME*  
*PRINCEPS*

*DOMINE CLEMENTISSIME.*

**N**on displicuisse institutum meum tres libros Poematum in Gallias mittendi, equidem gaudeo. Quin imo non dubito, æque illos acceptos futuros atque fuerunt, quos Serenissimo Hero meo Rudolpho Augusto in usum Bibliothecæ Augustæ, & Academiæ Juliæ Pro-Rectori ac Senatui jussu Eminentiae V. obtuli. Et verò jam tum spero traditum Serenissimi Ducis responsum ante quatuor dies missum, nunc verò mitto & Academiæ nostræ literas. Trium illorum librorum qui in supplementum redditi sunt, unum Serenissimo Antonio Ulrico Duci, alterum Filio ejus primogenito Augusto Friderico, tertium Bibliothecario Academico destinavi. Idque quandoquidem iste non tantum magni æstimat doctrinam virtutemque V. Eminentiae, sed ipse etiam Germanicæ nostræ Poëticæ felicissimus est in omni genere cultor. Ille Paternis insistit vestigiis; Hic verò Eminentiae V. inusitatam eruditionem justo novit pretio venerari. Ut proinde confidam, hanc distributionem non futuram V. Eminentiae ingratam. Piscinaria mea utinam non lectione duntaxat, sed usu etiam aliquando oblectent! Ita sanè memoria illorum possit esse justæ diuturnitatis. Rottendorffium ereptum mihi censorem Paracelsicorum meorum, multum profecto ceu pare est, doleo. Pridem enim etiam ipsemet Viri eximiam cum aliorum tum Medicæ Artis peritiam feci maximi: simul verò haud ignoro, quàm hodie rarus sit numerus eorum, qui ad illud laudis fastigium attingunt.

d

Ad-

26 FERDINAND. EPISC. &C. EPIST. AD CONRING.  
Addat DEUS Eminentiaē Vestraē illos quos optimus Senex  
non peregit duntaxat, sed etiam longè plures annos me-  
ritus fuit.

Helmstadii 27. August.  
Anno 1671.

*Eminentiaē Vestraē  
atatem omnem  
servus obsequentiissimus  
Hermann. Conringius.*

XIV.

FERDINANDUS EPISCOPUS  
ET PRINCEPS PADERBORNENSIS  
Coadjutor Monasteriensis  
S. P. D.

Cl. Viro HERMANNO CONRINGIO suo.

*B*inis epistolis tuis diverso tempore mihi redditis responsum  
debeo. Et primæ quidem magnam mihi attulerunt volu-  
ptatem, allato nuncio, quo nos exhilararunt, de Sermi Du-  
cis Rudolphi Augusti judicio nostras esse aliquid nugas putan-  
tis. Quare tuo obsecutus consilio præsentem libellum ejus no-  
mini inscripsi, Teque majorem in modum rogo, ut de nostro  
erga Principem optimum obsequio fidejubeas, ubi fuerit neces-  
sarium. Ex alteris literis tuis quando nunc iterum intelligo,  
meis Musis, te interprete, tam magnos conciliari patronos,  
ut porro de nostris studiis bene mereri possis, nonnulla insuper  
poematum exempla ad te mitto aliis donanda, quibus adjicio  
hunc libellum, qui etsi Parisiis sit recusus, prima tamen incu-  
nabula debet Romæ, ubi in lucem prodiit, & mihi est nuncu-  
patus. Accepi etiam ex Urbe inter alios libellos inde ad me  
missos Codicem Regularum quas Sancti Patres Monachis &  
Virginibus Sanctimonialibus servandas præscribere & Lucas  
Holstenius digessit in tres partes ediditque, opus vicinis ve-  
stris



*stis Cœnobitis, quam vestræ Academiæ utilius. His adjecit Emmus Cardis Franciscus Barberinus, singularis literarum & literatorum Virorum fautor, Collectionem Romanam bipartitam, veterum aliquot historiæ Ecclesiasticæ monumentorum ab eodem Luca Holstenio concinnatam & notis illustratam, cujus unicum mihi superest exemplar, alterius vero de Codicis regularum complura suppetunt. Vale mi Conringi, & Academico vestro Senatui redditis hisce literis, etiam tuis verbis meam gratiarum actionem proseguere. Neubusii XV. Septemb. MDCLXXI.*

## XV.

EMINENTISSIME ATq; ILLUSTRISSIME  
PRINCEPS.

*Domine Clementissime.*

**S**imulatque redditæ sunt Eminentiaæ T. clementissimæ Literæ, nihil mihi fuit prius, quàm exemplum Duci Rudolpho Augusto destinatum per tabellarium curare: neque dubito, munus illud fore à tam amica manu longe gratissimum. Reliquorum exemplorum duo in Daniam, commodâ sese perquam tempestive offerente occasione, statim eidem misi, alterum Regiæ Bibliothecæ, alterum Griffenfeldii, Excellentissimi cum dignitate tum eruditione Regii Ministri armariis consecrans. Tertium dedi genero meo, summo Eminentiaæ Tuæ incomparabilis atque inusitatae eruditionis admiratori: cujus musteum librum argumenti rarissimi vicissim jam mitto. Spero autem in horum quoque trium exemplorum distributione nihil quod Eminentiaæ Tuæ displiceat à me commissum. Senatui nostro Academico gratissimus fui, oblatione literarum Eminentiaæ Tuæ, utpote singularis Clementiaæ & favoris Principi-

palis locupletissimorum testium. Eoque, ceu fui iussus, eâ, qua par est reverentia, Senatus illius nomine ago gratias, utque Eminëntia T. affectum illum velit perpetuum esse, etiam atque etiam rogo.

Muneri mihi destinatus liber plurimum me delectavit, non tantum quod a tanto Principe venisset, sed & si quidem licet dicere quod resest, suo cum primis argumento. Quoniam Parasceve Dominicæ diei, ut alias, me invitaret (særa enim vespera mihi est traditus libellus) ad sacros labores, confestim illum quo potui studio volvi: & meo ingenio longè acceptissimum magna cum animi voluptate deprehendi. Pridem scilicet suspexi eruditionem eximiam Holstenii: quæ & in opere hoc posthumo certè splendet: cujus vestigiis cum inhæreat Possinus non infeliciter, etsi fortè non pari passu, non potuit non & ille mihi multum placere. Cæterum quàm maximè gratum fuit sacrum libri totius argumentum, primæ & verè aureæ Ecclesiæ, atque ad cujus mores meritò omnis etiam hæc nostra ætas est componenda. Acta moresq; haut parùm illustrans. Frastidii libellus dudum mihi fuit observatus inter spuria S. Augustini: suo auctori illum Holstenii curâ esse redditum gaudeo. Acta passionis Sanctarum Martyrum Perpetuæ & Felicitatis planè mihi nova sunt: etsi pridem sint lecta, quæ ad Martyrologium de iis commentatus est Barronius, & narravit Petrus de Natalibus. Hæc ipsa Acta esse lecta in Ecclesiis Africæ saltim S. Augustini ætate, per etiam mihi est verisimile. An & Tertullianus illis fuerit usus, dubium me reddit ipsum illud quod pag. 38. ex libro de Anima laudatur testimonium, referens, *Perpetuam sub die passionis in revelatione Paradisi solos illic Commartyres suos vidisse*: quale quid in hisce Actis non reperio. Imò in visione Saturi, qua Paradisus

est

est oblatum pag. 24. disertè sic legitur: *Et capimus illic multos fratres cognoscere, sed & Martyres.* Non temerè etiam Tertullianus passus fuisset elabi sibi, quæ de vulnere & cicatrice faciei Dinocratis hic narrantur pag. 14. & 16. ad probandam suam, de animæ corpori conformi substantiâ, sententiam: nec enim ab aliis hæc esse neglecta, apparet vel ex iis, quæ ex l. 4. de Anima S. Augustini adducuntur pag. 53. & 54. Alia igitur esse hæc Acta ab iis quæ Tertulliano fuerunt in manibus, per est simile vero: atque adeò, ut recentiora, minus certam mereantur fidem. Sed & hæc ipsa Acta jam S. Augustinus à Canonica Scripturæ auctoritate multum differre, nec in eo esse ordine ut inde in quæstionibus fidei testimonia proferri queant, disertè docuit. Quod Sancti illius Doctoris iudicium in hoc libello pag. 50. & 52. legens, haud injuria improbabit fortassis, quæ Holstenius pag. 131. & 136. Possinus pag. 183. ausi sunt asseverare. Me verò etiam illud de Dinocrate sollicitum habet, quomodo ille pœnis fuerit per preces sanctissimæ Martyris liberatus, cum videatur sacro lavacro non ablatus. Habuit enim utique ille cum viveret parentem utrumque idololatram. Imò & soror Perpetua cum utroque fratre hæsit tum adhuc in illo luto: alter enim fratrum demum Martyrium subeunte Perpetuâ fuit catechūmenus, & Perpetua baptizata paulò ante quàm caperetur, quod legitur pag. 6. Puerum itaque illum Dinocratem ante obitum fuisse baptizatum, non est verisimile. Nec S. Augustinum de Baptismo illius fuisse certum, liquet ex pag. 51. & 52. &c. Vincentium pariter ac Renatum, aurosex illa Dinocratis historia, promittere etiam in Paganismo defunctorum animabus aliquam per Sanctorum preces ex infernalibus cruciatibus redemptionem, manifestum est. Quod equidem non miror, cum illa ætate, S. Augu-

stino in Enchiridio ad Laurentium teste, nonnulli imò quàm plurimi aternam damnatorum pœnam, & cruciatus sine intermissione perpetuos, humanomiserati sint affectu, atq; ita futurum esse non crediderint: ipsemet etiam S. Augustinus permittat credi, pœnas damnatorum certis temporum inter vallis mitigari. Non possum non Eminentiæ Tuæ hîc recitare quæ Vir doctissimus Dionysius Petavius l. 3. de Angelis c. 7. §. 7. scribit: cum appareat, non satis in errore constantem fuisse Origenem, ac trifariam omnino eum exposuisse, ut aut diabolos ac dæmones pariter ac damnatos homines saluos aliquando fore diceret: aut solo excepto principe dæmonum diabolo, cæteros omnes: aut deniq; solos homines, diabolo & Angelis eius in perpetuum rejectis. Priores opiniones duas pauci Catholicorum amplexi sunt. Paragrapho octavo ait: de diaboli ac dæmonum pœnis terminandis futurag; liberatione pauci assensi sunt Origeni: de damnatis hominibus plures imitatores habuerunt opinionis suæ, nondum per illa tempora heresis iniustæ notis. Quam quidem non eadem firmitate omnes adsciuerunt: quidam enim plenius, leuius alii & quasi cunctanter assensi sunt. Primo ordini accenset mox Gregorium Nyssenum & auctorem commentariorum in Epistolas Pauli qui Ambrosio tribuuntur, quem esse Hilarium Romanum Damasi Pontificis Diaconum constat jam eruditis: alteri Hieronymum, Ambrosium, Gregorium Nazianzenum & Arnobium. Jam tum porro multis fuisse persuasum, precibus sanctorum ab inferni cruciatibus posse animas etiam paganorum liberari, indicant utiq; passim illa, quæ in ore vulgi fuisse ex Damasceno constat, de liberatis per S. Theclam Falconillæ & per S. Gregorium Trajani animabus: idem scilicet attestante vita B. Theclæ, & quam Basilius Seleuciensis Isauriæ Episcopus conscripsit à Petro Pantino edita, & quam



Sophronius habet. Si ergo & suis precibus fratri defuncto, quamvis non Christianum in ordinem per Baptismum recepto, ex inferno liberationem aliquam impetrari posse crediderit Sanctissima Perpetua, non profecto vitio hoc verti illipoterit, in illa communitum adeo quamvis optimorum sententia: æquumq; fuerit, condonare sceminæ, hætenus catechumenæ, & sororio tenero erga defunctum puerum fratrem affectui. Verum ita non fuerit divina revelatione Sanctissimæ Perpetuæ patefactum, quod de Dinocrate pœnis liberato in Actis istis commemoratur: Sed fortè in somnio, respondenti pio vigilantis de liberando fratre sibi quondam tenerè adamato voto, imputandum; quod tamen visionis cœlestis loco habuerit sanctissima scemina per errorem. Qualequid & tunc frequentissimè factum, & contingere hodieqve, notum est prudentioribus. Hoc sane, malim dicere, quàm fictionis & falsi accusare notis insertam illam Sanctissimæ Martyris de suis in somniis narrationem. Absit enim, ut de tam antiquo monumento Ecclesiæ, lectionibus publicis alicubi recepto, sequiora suspicer. Nisi fallor tamen, ob illa de Dinocrate suspecta narrata, ab Ecclesia Romana nunquam in sacros usus Acta illa sunt recepta. Nec enim illa aliàs delituisse hætenus in unius Casinensis Monasterii tenebrosis loculis. Quantumvis autem, me quidem iudice, illa sint qualia dixi, perquam tamen grata sunt; quandoquidem salrim illud, quo fervore martyres olim sacrum illum agonem peregerint, docere, atqve adeo ad parem constantiam me quoque roborare tam illustribus exemplis, apta sunt. Ac proinde pro libello isto Eminentiae Vestrae ago gratias quas possum maximas. Eorum quæ ex Urbe accepta memorantur, hætenus itidem vidi nihil. De Codice Regularum Holste-

nia-

niano accepi tamen aliquid jam tum ex Ephemeridibus Gallicanis rei literariæ, atque ex doctissimo Commentario Steph. Baluzii ad Reginonis libros de disciplina Ecclesiastica, novissime Parisiis editos. Unde mihi illius operis comparandi magnum est desiderium incensum. Cœnobitis nostris Ludgerianis vereor ut possit esse usui illius lectio: etsi enim non male segerant, sintque mihi isthoc nomine peraccepti, ad veteres tamen istas rigidas regulas illos velle componere, neque patiuntur tot Pontificum quas vocant dispensationes, & pridem usu probatæ diversæ vivendi consuetudines; neque æquum nunc fuerit. Mihi vetera illa saltem novisse per est jucundum. Atque adeo hoc ipso tempore, in Baluzii, meditantis accuratam novam Capitularium Caroli Magni filiorumque editionem, amici mei petentis gratiam, quæ de vita Canonorum sanxit Ludovicus Pius, per utique severa & à nostris moribus toto cœlo diversa, qualia habentur in Tomo secundo Conciliorum Galliarum à Sirmondo edito & in Academiæ Juliæ Mss. membranaceis, magna cum voluptate conféro. De reliquis ex Holsteniana Bibliotheca ab Eminentissimo Cardinale Fr. Barberino depromptis Ecclesiasticæ Historiæ monumentis, nihil vel fando hætenus accepi. Utriusque operis non mihi duntaxat sed Academicæ etiam Bibliothecæ cura erit comparandi. Utinam verò Tuo illi mihi longè acceptissimo dono possim aliquid non minus dignum Eminentiae Tuæ oculis reponere! Nunc tamen nihil mihi tale ad manum cum sit, majorem in modum obsecro, ne ferat ægrè sibi offerri vilia ista quæ mitto: quæque adeo à typographicis operis adhuc madent ut bibliopegorum prælum non ferant. Quod si haut displicuerint, sequentur fortassis mox alia notæ melioris. Deum obsecro, ut  
bono

AD FERDIN. EPISC. & PRINCIP. PADERBORN. 33  
ut bono publico Eminentiam Tuam in seram usque senectutem felicem conservet.

*Eminentiae Tuæ*

Helmestadii 26. Sept.

Anno 1671.

*atatem omnem  
devotissimus*

*Hermannus Conringius.*

P. S. Jam jam ob signaturo hæc Litteras offertur Epistola N. N. optimi sanè & doctissimi. Partem à me excerptam mitto: quo Eminentiae Tuæ liqueat, quanto illa etiam apud hunc sit in pretio. Operam dabo ut & hujus Germanica, dramatici etiam generis, opuscula Eminentiae Tuæ reddantur, & major solita amicitia Vos inter in bonum publicum coalescat.

XVI.

FERDINANDUS EPISCOPUS

ET PRINCEPS PADERBORNENSIS

Coadjutor Monasteriensis

S. P. D.

Cl. Viro HERMANNO CONRINGIO suo.

*Tabellarius vester, mihi ad Visurgim Beverungæ animi remittendi causa commoranti, literas tuas 26. Septemb. datas reddidit, quibus citius dedissem responsum, nisi Neubusum reversus Codicem Regularum ab Holstenio editum una ad Te mittere decrevissem, quem bis adjundum ac Bibliothecæ tuæ donatum tuis cymeliis literariis accenseas velim. Adjungo collectionem Romanam, cujus cum unicum hoc exemplum ad me pervenerit: mihi, ubi commodum fuerit & lectum, cupio remitti. De poematibus meis, quæ in Daniam destinasti &*  
e *alia*

*alia in loca misisti, plurimum tibi debeo, ac summopere Tero-  
go, ut data occasione hocce exemplar Vito Beringio Regis Da-  
niæ Historico, siquidem adhuc æthereæ vescitur aura, traden-  
dum cures, qui si ad plures abiit, Tuum esto hoc donum. Cæ-  
terum animadversiones in notas Holstenianas passionis SS.  
martyrum Perpetuæ & Felicitatis valde sunt eruditæ, ac di-  
gnæ quæ cum Posfino communicentur. Certè ipsarum SS. Mar-  
tyrum memoria in Ecclesia Romana jam olim fuerit in primis  
celebris, utpote quæ Canonis Missæ, quod paucis sanctis obti-  
git, nominatim fuit inserta, & hodie dum recolitur. De bo-  
nore, quem Sermus Princeps N. N. musis meis habere dignatus,  
plurimum etiam Tibi me debere profiteor. Ejus Principis poesin sa-  
cræ mibi nuper dono dedit Hardenbergius Cellensis olim Mi-  
nister primarius. Cætera dramatici generis adhuc desidero.  
Ut primum monumenta mea Paderbornensia prodierint, non  
negligam occasionem eadem cum hoc Principe communicandi;  
ut, qui meas esse aliquid putat Camænas, historica etiam no-  
stra recognoscat. Interim majorem in modum opto, ut de be-  
nigno judicio eidem Principi meis verbis in antecessum grati-  
as agas, ac significes, me illius amicitia percupidum nullam  
omissurum oportunitatem mea eidem officia probandi. Vale  
meque, ut facis, ama.*

*Neubusi XXX. Octobr. MDCLXXI. De libris,  
quod pæne exciderat, ad me misis gratias itidem tibi ago.  
Vale iterum iterumque & Henrico Meibomio nostro di-  
cito, ejus etiam libellos, perquam mibi acceptos & gratos  
accidisse.*



## XVII.

*Clarissimis & doctissimis Viris*VICE-RECTORI & PROFESSORI-  
BUS ACADEMIÆ JULIÆ  
HELMESTADII.

## CLARISSIMI ET DOCTISSIMI VIRI

*R*editæ sunt nobis vestrae literæ humanitatis & immerita  
 laudis plena, quibus nomine totius Academiæ significatis li-  
 bellum poematum nostrorum traditum vobis esse, & quod multò  
 gratius accidit, admissum benevole inter Lycei vestri armarium  
 interq; tot eruditos & præstantes nostrâ ætate scriptores ve-  
 stros invenisse etiam locum aliquem, ex quo aliquando in ma-  
 nus legentium nostra sumantur. Non id quidem partus inge-  
 nii nostri meretur, tenui ac juvenili antebac venâ Romæ  
 maximam partem effusus parumq; exinde per succisivas horas  
 animi gratia formatus: ut tamen ad vos aditum haberet, se-  
 cit clarissimus & eruditissimus sæculi nostri scriptor, HER-  
 MANNUS CONRINGIUS, decus ac splendor Academiæ  
 vestrae, mihiq; hætenus ex his ipsis humanioribus studiis fa-  
 miliaris. Tum vel maximè si quid ex meis lucubrationibus sit  
 dignum oculis vestris, id cumprimis, ut vestris judiciis defer-  
 retur, poscebat à me jure suo æstimatio florentissimæ apud vos  
 Academiæ Juliæ, quæ à primis statim exordiis suis omnium ex-  
 inde disciplinarum & liberalium artium viris mirificè exculta  
 floruit, ut dubium mihi nunquam fecerim fore inter vos, qui  
 hæc mansuetiora literarum studia ac commercia ex æquo bo-  
 nosq; probaturi essent, ut quantum gentis Saxonice affinitate &  
 locorum vicinitate, tantum amore quoq; honestarum artium  
 conjungeremur: præsertim cum optima pars vitæ inter amce-

*nitates studiorum quærat, beatosq; censeat Plinius, quibus Deorum munere datum est aut facere scribenda, aut scribere legenda, beatissimos verò quibus utrumq; obtigit. Nobis in postremo, etiam quantum publicæ Principis curæ patiuntur, consilere satis erit. Monumenta, quæ maturiori aliquo scriptio-  
nis genere, & patriæ illustrandæ bono dedimus, à vobis pari benevolentie significatione recepta esse, haud minus nos oblectavit. Prodibunt illa brevi audâ lucubrationibus quibusdam, & si denuo vobis offerantur alia veste induta, prorsus confidimus accepta fore, quando cum his simul debita vobis benevolentia defertur. Neubusi ex arce nostrâ XV. Septemb. M DCLXXI.*

Vestri

*Studiofissimus*

FERDINANDUS EPISCOPUS

ac Princeps Paderbornensis, Coad-  
jutor Monasteriensis.

XVIII.

EMINENTISSIME atq; ILLUSTRISIME

PRINCEPS

DOMINE CLEMENTISSIME

**J**Am constitueram die craftini ordinario uti tabellariorū officio, eaque occasione Tibi Eminentissime Princeps mittere, quæ nudius quartus ante Lutetia acceperam à Stephano Baluzio, non semel jam laudato, nunquam autem satis laudando viro. Nec verò Viri optimi & longè eruditissimi desiderium morari velim, nec à quoquam tamen alio, quam ab Eminentia Tua, expleri illud posse sum  
cer-

certus. Hinc plurimum me exhilaravit nuncius hic: neque ego non statim illum dimitto, simul ille advenit. At principio quidem officii mei esset, omnibus eloquentiæ artibus uti in agendis submissi obsequii gratiis, cum pro novo illo Principali munere, tum inprimis pro continuatione Principalis erga me benevolentiae. Sed quia verba me deficiunt, & fortassis abs me nihil tale exigitur amplius, post satis exploratum ad omnia iusta servitia paratum animum, nolo illud nunc agere. Plurimum verò me delectavit saltem inspectio instituta (nec enim ultrà illam hætenus quidem mihi quid licuit) utriusque libri. Legam autem utrumq; diligenter, ubi quid otii fuero nactus, & reddam alterum, additâ quæ decet gratiarum actione. Beringius, nisi vehementer fallor, adhuc est in vivis. Certior factus, primâ quaque occasione mittam Viro Principale munus; quod indubiè erit acceptissimum, quoniam, quantum ex libro Adoptivorum Carminum intelligo, jam ille dudum æstimavit Eminentiae Tuæ rarissimas virtutes, in ejusque se dedit patrocinium. Expectanda verò mihi erit comoda mittendi occasio: quæ brumali hoc tempore solet esse infrequentior. Ea sanè obstitit hætenus, quare neque ex Gallia, neque ex Dania acceperim quidquam de jam redditis, quos transmissi Eminentiae Tuæ libellis. Simul autem aliquid significatum fuerit, statim, prout par est, communicabo. Interea verò Sereniss. Antonio Ulrico indicabo Eminentiae Tuæ propensum ad mutuam Principalem amicitiam animum: non dubitans, fore brevi, ut inter vos Tantos Principes propinquior quædam intercedat quasi necessitudo. Monumentorum Paderbornensium novam illam editionem jam ad finem propere equidem gaudeo. Si fortassis autem & huic adjicientur

tabulæ illæ Osnabrugenses & Paderbornenses, quæ in calce primæ editionis reperiuntur, vel aliæ quæ fuerint addendæ, optaverim justam diligentiam in iis exhibendis præstari. Nequid enim dissimulem, is qui expressit p. 262. Caroli Magni effigiem, perquam oscitanter videtur se gessisse; cum constet Carolum mento fuisse glabro, & barbara genis adnata. Nec Ludovico Pio debuit laurea à pictore dari, sed fortassis diadema gemmis ornatum, ex more à Constantino M. introducto; quali usum esse & Chlodovæum Magnum scio, de aliis Francorum Regibus non habeo compertum. Ut ad hæc attendam nunc solitò diligentius, facit mihi propositum diploma aliquod, ex seculo nono isthoc quod alii depromunt, alii ὑποβολιμαῖον censent. Qua de re singulari libro fortasse sententiam brevi feram. Non dubito, omnibus cum justâ cura inspectis, si qui fuerint commissi errores, emendari tempestivè posse: ne quæ sinistris suspicionibus præbeatur ansa. Ut autem ad initium Epistolæ redeam, mitto partem Epistolæ, quam illustris Baluzius ad me dedit: rogoque, nisi grave quid obstet, desiderio justo Viri perquam eximii satisfieri. Atque de Innocentii Epistolis scio, esse illas in manibus Eminentiae Tuæ & optima fide spondeo, cum æterna Eminentiae Tuæ laude, illam sibi fortè factam gratiam, Baluzium compensaturum. Num Capitularium Carolinorum apud vos supersint mss. exemplaria, nescio. Quod si tamen etiam huic pio Viri optimi desiderio queat responderi, Eminentiae Tuæ auctoritate, illud ne negligatur, rogo itidem obsecroque. Juvì ego hætenus Virum quantum potui collatione nostrorum mssorum: neque dubito, Tuæ quoque Eminentiae judicio illi æquisimò desiderio nefas esse non obsequi,

Deus



Deus servet in seram senectutem Reipublicæ comodo  
Eminentiam Tuam, cujus ego sum

Helmstadii propriidie Kalend.

Novembris, Juliani

Ao. 1671.

*etatem*

*devotissimus servus*

*H. Conringius.*

XIX.

EMINENTISSIME ATQ; ILLUSTRISSIME  
PRINCEPS,

*Domine Clementissime.*

**C**Um à Serenissimo Principe mihi mitteretur Epistola ad Eminent. Tuam curanda, officii mei, quod utrique Vestrum debeo, esse duxi, sine mora, quod iussus sum, agere. Eoque non expectandum Mercurii vestri reditum existimans, committo hasce Postæ, quam vocant, fidei atque industriæ. Non dubito autem acceptam fore Epistolam illam, non minus atque Serenissimo hero meo gratissimus fuit poematum liber; & in posterum frequentiore literarum commercio confirmatum iri amicitiam, quam vicinitas, & communis Reipub. salus exigit. Iussus equidem & ego sum, dare operam, ne quid illa capiat detrimenti: sed, quantum arbitror, non opus est ad id mea aliqua opella; Idque mandatum profectum est à Serenissimi Principis tenero erga Eminentiam Tuam studio. Quod ut magis magisque pateat, addo exemplar literarum Optimi Principis ad me exaratarum. Gaudeo tamen, præbitam abs me occasionem solito frequentius amicitiam mutuo in posterum exercendi Vos inter Principes; quin imo, si fas fuerit, addam ego calcar agentibus negotium verè sacrum & longè utilissimum.

Mitto

Mitto simul partem literarum quas ad me Lutetia dedit Stephanus Baluzius, jam tum sæpius à me Eminentia T. laudatus. Illi tum temporis nondum fuerat traditus, quem Colbertina Bibliotheca cum aliis nonnullis consecravi, poematum vestrorum aureus libellus: quoniam verò indies pene jam tum ab Illustrissimo Colberto fuit expectatus, non dubito, pridem & illum rectè curatum proximè mihi significatum iri. Quum sentiat verò Eminentia Tua, quam incensum sit in Baluzii animo Innocentianarum Epistolarum desiderium, spero illi tandem satisfactum iri. Plurimum equidem etiam mihi gratulabor, id ubi evenerit; quoniam non Baluzius duntaxat, sed ipse etiam Illustrissimus Colbertus intelligent, rectè à me Eminentiam Tuam laudatam, non doctrinæ tantum partæ sed studiose promovendæ etiam, nomine, meamque non nihil valere existimationem apud Principem tantæ dignitatis, pariter & eruditionis ac virtutis. In non immemorem beneficii & optimè intelligentem talium, summæque industriæ Virum, vestram benignitatem iri collatum, ausim sancta fide polliceri. Quod si juverit Eminentia Tua etiam illud Baluzianum de Capitularibus Francorum denuo edendis institutum, factura etiam isthac in re fuerit insigne pretium operæ. Qui Fuldenses Codices consulat, neminem novi: forte etiam nemo ibi reperitur ad exemplum Rhabani Mauri compositus, ut mores à prisco illo ævo degeneraverint. Contuli ipse nostræ Bibliothecæ Academicæ Capitularia MSS. si quæ ad manum etiam Vestram fuerint, eorum varias mittam Baluzio itidem ubi accepero.

Quod nuper monui de errore commisso à pictore circa Caroli Magni imaginem, illo pertinet, quod optem illum in nova vestrà Monumentorum Paderbornensium edi-

AD FERDINAND. EPISC. & PRINC. PADERB. 41  
editione correctum, quò fides constet diplomati, me judice, genuino. Imago quæ subsequitur Ludovici Pii possit quidem itidem videri justo juvenilior, memini autem & alibi illam videre planè similem. Utinam possit addi etiam Ludovici nostri Germanici effigies integra! nec enim illam hætenus conspexi.

De missis nuper libris scribam plenius proximè, fortassis per vestrum Mercurium. Interea legam omnia cum cura, etsi plæraque jamtum volverim. Beringium intellexi vivere: itaq; mittendi librum primam quamque commoditatem captabo.

*Eminentia Tue*

Helmsstadii 30. Novembr.

Anno 1671.

*atatem*

*devotissimus servus*

*H. Conringius.*

XX.

EMINENTISSIME ATQ; ILLUSTRIS-  
SIME PRINCEPS.

*Domine Clementissime.*

**M**agna me sollicitudine liberavit Huxariensis V. Mercurius. Cùm enim jam pridem à Principali manu Vestrà nihil acceperim, de minus prospera valetudine graves me curæ invaserunt, vel ne quid publica detrimenti fecerit, metui. Cùm acceperim jam ergo, omnia esse salva, plurimum equidem gaudeo: gratias agens immortales Deo sospitatori. Dedi verò ego prid. Kalendar. Decembr. ultimas meas, easque Postæ quam vocant commisi: quoniam, quas addideram literas manu Serenissimi Principis mei Rudolphi Augusti ad Vestram Eminentiam exaratas, celerem curationem exigebant. Dubius tamen  
f adhuc

adhuc sum, num sint illæ rectè traditæ: spero autem meliora, idque me propediem intellecturum. Ego, si fas est adjicere, jam in duobus libris edendis occupor. Alter est de Antiquitatibus Academicis, atque adeò de propagatione studiorum: quem Eminentissimo Nomini Vestro consecrare consilium quidem est, dubito tamen num liceat. Altero censuram instituo Diplomatis quod attribuitur Ludovico Germanico Pii Imperatoris filio, me autem iudice est supposititium. Eam in rem perquam utilia mihi fuerunt, quæ habentur sine Monumentorum Paderbornensium, utriusque Ludovici genuina diplomata: cumprimis illud Pii Imperatoris, quoniam & sigillum sive imaginem Cæsaris exprimit, qualia perquam rara hæcenus prodierunt in lucem. Utrumque in librum meum transtuli, addito encomio præclari Monumentorum operis ejusque Autoris. Hoc ipso autem vehementer in me accensum est desiderium Novæ editionis: nec enim dubito accessuras ex veteris ævi thesauro Tabulas etiam alias. Deum veneror, ut rebus integris, & procul bellicisturbis, quæ nunc sollicitam habent cum omnem Germaniam, tum maximè Viciniam Vestram, liceat Eminentiae Vestræ frui ceu antehac otio literario, quo nihil est dulcius.

*Illustriss. Celsitudini Vestræ*

Helmstadii 21 Martii

Anno 1672.

*atque  
devotissimus*

*Hermannus Conringius.*



## XXI.

FERDINANDUS EPISCOPUS  
ET PRINCEPS PADERBORNENSIS

Coadjutor Monasteriensis

S. P. D.

Cl. Viro HERMANNO CONRINGIO.

*Q*uas ad me propriè Kalendas & XXX. Novembris superioris anno dedisti literas, accepi quidem unà cum exemplo epistolæ Stephani Baluzii, sed nullum iis reddidi responsum, quod eo tempore gravissimis dentium doloribus confictabar. Interim Illustrissimus Vir Ludovicus Verjusius Christianissimi Regis Legatus hic me convenit, cui petium epistolarum Innocentii III. P. M. exemplar de dissidio Ottonis IV. & Philippi Cesarum de Imperio decertantium, ad Baluzium prima quaq; occasione deferendum commisi, qui etiam hoc se libenter curaturum pollicitus est. De volumine Dramatico ad me misso plurimum tibi debeo, & serenissimo N. N. ex animo gratulor tam uberem in pœsi vernacula ingenii venam, gratiasq; ago quam possum maximas de dono hocce mihi acceptissimo. Magno mihi ducam bonori, si librum de antiquitatibus Academicis nobis dedica-veris, qui bonas literas tanti æstimamus & tantopere viros literatos diligimus. Censuram diplomatis Ludovici Pii, quam meditaris, magnopere adjuvabunt monumenta nostra aliquot novis ejusdem Cesaris diplomatibus in hac novâ editione illustrata, quæ propediem in publicam lucem emissa tecum communicabimus. Vicini belli metus in apertam fœderati Belgii & consinium provinciarum ruinam erupturi, hac æstate animum à Musarum consuetudine pro dolor! utiq; avocabit. Parcat iis Deus, qui tanto incendi materiam præbuere. Vale mi Conringi, meq; in ære tuo cense. Neuhusii præpropere. XI. April 1672. f 2

XXII.

## XXII.

EMINENTISSIME Atq; ILLUSTRIS-  
SIME PRINCEPS

DOMINE CLEMENTISSIME.

**P**Ræcedentem hebdomadem agente me in aula N. N. commodum accidit, ut cum alia quædam bona tum etiam libri piæ nuper defunctæ Principis inter heredes dividerentur, volumenq; hoc Dramaticum auctori ipsi cederet. Rogavi itaque optimum Principem, permetteret mihi, librum illum Bibliothecæ Vestræ consecrare. Ægre quidem ille passus est sese exorari: indigna sua judicans, quæ legantur ab eo, qui nec Maroni ipsi Poëtica facundia sit secundus. Quum impetraverim vero tandem id quod volui, jam adeo librum hunc mitto. Continet autem uno aut altero excepto, Dramata omnia eximii illius Principis, plæraque hodie reperta rara, ac proinde vix etiam mihi antehac visa. Quantumvis autem, non sint exacta ad limam Sophoclis vel Euripidis, vel Latinorum quoque cum Comicorum tum Tragicorum amissim: non dubito tamen haud displicituram Principis hanc operam. Quod ubi accepero, mittam & alia ejusdem manus sacra pariter & profana. Nunc quod jussus fui, opto Eminentia V. illius Principis nomine felicissima quæq; ac sanctè testor, Eminentia Vestra raram virtutem atqve eruditionem justo pretio in aulâ N. N. æstimari. Deum etiam ego veneror, ut bono publico felicitas vestra si non immortalis, saltem in plurimos annos sit diuturna.

*Eminentia Vestra*

Helmestadii 27. Martii  
Anno 1672.

*atatem devotissimus**H. Conringius.*

P. S.

P. S. Addo & alios duos libellos ab eodem Principe confectos: etsi præ festinatione tabellarii non potuerunt à Bibliopego formari in aliquam elegantiam. Confido scilicet, rem ipsam potius æstimatum iri. Ne etiam hoc nesciatur, modi musici debentur N. N. jam viduæ, sæminæ itidem longe sanctissimis moribus & eruditæ.

## XXIII.

*EMINENTISSIME Atq; ILLUSTRIS-  
SIME PRINCEPS*

*DOMINE CLEMENTISSIME.*

**L**Iteræ Eminentiæ Tuæ quo magis desideratæ irà longè fuerunt gratissimæ: quoniam uberissime significarunt pristinæ gratiæ nihil decessisse mihi, nec languere curam rei literariæ: etsi Mars Palladi perquam sit infestus & tantum non extrema minitetur. Baluzio missum esse exemplar literarum Innocentii III. Papæ per Excellentissimum Verjusium, atq; ita preces meas habuisse suum pondus, impense gaudeo. Laboravit Vir optimus & de Ecclesiastica literatura veteri præclare meritus, aliquamdiu gravissimo oculorum affectu: eoq; aliquot mensibus nihil ab eo accepi literarum, donec nudius quartus traderentur, quas tamen jam XI. Kalend. Aprilis exaravit. Partem earum descripsi, jamq; remitto. Inde dolens didici, libros quos arcæ inclusos exeunte jam Augusto Hamburgum misi, ne nunc quidem Parisiis traditos Colbertinæ Bibliothecæ. Erant autem inter illos & Eminentæ Tuæ Poematum libri, Regiæ & Colbertinæ & Baluziana Bibliothecis consecrati. Arcam illam librariam pridem venisse in manus magni mercatoris Parisiensis cum aliis nonnullis, nunciavit su-

periore hebdomade Christianissimi Regis Hamburgensis, ceu appellant, Residens. Id proximè Baluzio indicabo: vereor tamen omnia sequiora. Auctor Baluzio fui, ut quia novam Capitularium editionem molitur, iis addat Capitularia duo de rebus Saxonice, Eminentia Vestrae industria in iis eruderandis iusto praconio laudatâ: perinde atq; â me est factum libro de origine Juris. Hoc facturum sese promisit: nec minus fideliter, scio praestabit. Quod si variae lectiones pridem editorum Capitularium possint Eminentiae Tuae iussu colligi & Baluzio mitti, cederet hoc ipsum ut in gloriam Tuam Eminentiae ita in commodum publicum. Quo animo acceperit Baluzius carmen in Regiam Lupparram, probat Epistola. Qui cum abunde hinc pateat, non opus arbitror, pro dono illo uti & ego hîc agam gratias. Incendit autem (fateor) Baluzius sua illa laudatione etiam in me illorum versuum acre desiderium. Fortassis verò & hujus votiero propediem particeps, una cum nova Monumentorum Paderbornensium editione. Quam avidius etiam solito nunc exspecto, postquam intellexi Ludoviciana varia diplomata iri additum. Utinam accedant illa, quorum meminit eruditissimus Mallinckrotius l. de Archicancellariis Imperii pag. 23. Hervordiae impetrari posse non equidem dubito: modo Eminentiae Tuae non fuerit grave illa petere. Jam tum in libromeo laudavi fide iteratae editionis Paderbornensium monumentorum diploma Hervordienfe memoratum ad monumentum Ramon. 2. non sine iusto praconio. Nuper Tiguro nactus sum Ludoviciana diplomata duo optimae notae, & suis sigillis ac monogrammis, quae appellabant, instructa.

Illâ censura Ludoviciani Diplomatis aliquamdiu abruptit curam operis de Antiquitatibus Academicis: nunc intel-



telleſto Eminentię Tuę etiam in hoc meum volumen gra-  
tuloſo affectu , propediem redibo ad illos mihi quondam gra-  
tiſſimos labores , in monumentum meę erga Eminentiam  
Tuam obſequentiſſimę reverentię & venerationis. Inte-  
rea mitto hac vice libellos duos, neutrum licet meum: niſi  
quod alterum recenſuerim ediderimque, alterum meo con-  
ſilio non niſi juerim.

Martem turbaturum literariam rem omnem, non equi-  
dem dubito. Vereor autem , illud incendium non iis ſta-  
turum ſinibus quibus apertę nunc imminet: ſed univerſam  
ſimul rem publicam Imperii correpturum, daturumque  
nobis novam faciem: utinam noſtra hac meliorem! Quid  
fiet verò, ſi & Turca alterum latus infeſtaverit? O miſeras  
hominum mentes! o pectora cęca! Deum veneror, uti  
ſaltim non involvantur regiones Eminentię Tuę ſævo hoc  
bello, ſed liceat illi inter turbas frui otio & firma valetudine.

*Eminentię Tuę*

Helmſtadii 20. Maji

Anno 1672.

*atatem  
devotiſſimus*

*Hermannus Conringius.*

XXIV.

FERDINANDUS EPISCOPUS  
ET PRINCEPS PADERBORNENSIS

Coadjutor Monasterienſis

S. P. D.

Cl. Viro HERMANNO CONRINGIO.

*I* libellis tuis ad me miſſis rependimus ſeptem monumentorum  
Paderbornenſium exempla, quorum majus Bibliothecę  
Auguſtę, reliqua Rudolpho Auguſto, Antonio Ulrico, fratri-  
bus

*bus & Ducibus Brunsvicensibus, Præposito Helmstadiensis, tibi & Meibomio, & postremum Bibliothecæ Academicæ vestræ donamus. His adjicimus septem Illustrum virorum poemata, quorum grandius exemplar Bibliothecæ Augustæ debetur, cætera ad modum monumentorum distribuenda, quæ bibliopecto illic compingenda tradas velim, quam in rem latori harum literarum sex daleros dedi tibi reddendos. In his omnibus æque vi bonique facias ingenii nostri fiduciam, & solum fortasse probabitis intentum nostrum de Republica literaria bene merendi studium. Quæ ducibus Brunsvicensibus destinata: per hunc nuncium eò possent perferri. Baluzius Epistolas Innocentianas de diffidio imperii nostri accepit animo perquam leto & grato, quem binæ ejus ad me datæ literæ abunde testantur, si qua præterea in re ipsius studiis gratificari potero, non desiderabit certe operam meam amplissimis verbis ei promissam. Ipsarum epistolarum exempla, quod in iis de studiis suis agit, alias tecum communicabo, ubi hic nuncius redierit, & plus otii nactus fuero, quod præsentis temporis motus prope absumunt. Rex Christianissimus, paucos intra dies potitus Wesalia, Rhinoberga, Orsavia, Burica, munitis oppidis, jam toti Batavia subjugandæ minatur. Grolla & Breuvorda à fœderato milite obsessa, non diu obsidionem toleratura videntur, desperata Hollandici exercitus ope, qui jam campo excessisse, & munitis ac oppidis se continere fertur, ut magna & fatalis rerum conversio illi florentissimæ Reipubl. imminere videatur. Ego neutri parti obnoxius liberrimum mihi in omnem successione Monasteriensis eventum servo arbitrium. Interim copiis Colonensibus è vicino Westphaliæ ducatu deductis, & cessante propterea armorum hic metu & periculo, tres veteranorum Equitum meorum turmas haud ita pridem exaudoravi, quæ licet ad signa Monasteriensia postea transierint, nullo ta-*

men

*men modo animum meum ab his turbis alienum mutarunt. Vallemi Conringi & juxta mecum Deum precare ut brevi redeat Pax una triumphis innumeris potior. Ubi collectionem Romanam Holstenii satis degusta veris, mihi remittas velim & Meibomio dicas, me eadem occasione illi anale&ta Henrici de Herwardia optima fide restitutum. Vale iterum meq; ut facis ama. Neubusii XII. Junii. MDCLXXII.*

## XXV.

## EMINENTISSIME PRINCEPS

*Domine Clementissime.*

**N**on minus literæ quam libri Tui summo me gaudio affecerunt. Intellexi enim ex illis statum prosperum Principatus & simul constantem erga me gratiam. Libri tamen doctrina & elegantia superarunt etiam, fateor, meam expectationem. Quid enim splendidius & multa eruditione illustrius vel optari possit, novâ isthac Monumentorum Paderbornensium editione? Quanta amœnissimorum poematum non Eminentia duntaxat Tuæ, sed aliorum quoque, quæ inter Torckii placent maximè, in altero libro facta est accessio! Habuerunt me omnia, simulac inciderunt in manus, lectorem admirabundum. Deum autem veneratus sum, ut, cum ab aliis Illustrissimi aut Reverendissimi Ordinis simile nihil sperare liceat, saltem Eminentiam Tuam Germaniæ nostræ, in salutem & ornamentum servet incolumem. Pro mihi donatis libris gratias ago immortales. Reliquorum curam, prout sum jussus, habui. Libros sex poematum & ære vestro (quod tamen in rem tantulam nimis fuit liberale) curavi â bibliopego compingi, & suis locis jam tum ex parte reddi. Duos cum aliis, Principum Bibliothecis obferet nuncius, cui & literas

meas in aulis curandas commisi. Non dubito, etiam illic gratissima fore eximia illa Eminentiae Tuæ munera. Quod si placuerit per me etiam alibi, in Daniâ nempe aut Berolini (in Galliam enim jam proximior Eminentiae Tuæ per Baluzium & Verjusium patet aditus) aut hîc etiam, tantis donis quenquam honorare, non patiar in opera mea quidquam desiderari. Et verò gener meus, cujus varias lectiones in Matthæi Evangelium alias misi, impensè utrumque librum desiderat, quoniam hîc non facile prostabit venalis; eoque, si fas est, aliquod utriusque libri exemplum ego petierim. Reddo opuscula postumæ collectionis Holstenianæ, cum justâ gratiarum actione. Legi diligenter: quædam etiam curavi describi. Omnia esse genuina, non dubito. Fortassis etiam non fallor, si dixerim, præfationem & hujus libri & operis grandioris de Regulis Monasticis esse à manu Tuæ Eminentiae. Baluzium esse jam in patrocínio V. Eminentiae equidem gaudeo. Res docebit, Virum esse non duntaxat doctum sed etiam bonum, quod rarius. Scripta illius sanè ostendunt etiam æquum Judicem multarum hujus seculi sacrarum litium: ut equidem tales Nestores decem cum Agamemnone optaverim, componendis Ecclesiæ rebus. Scio idem judicaturam V. Eminentiam, ubi legerit. Nisi fallor autem, facilè curabit omnia Illustriss. Verjusius. Quod causam Petri de Marca tueri non dubitaverit, secunda editione operis de Concordiâ Sacerdotii & Imperii curatâ, multum quidem illi molestiæ peperit Indicis congregatio: Sed Cleri Gallicani & Regiâ fretus autoritate, animo imperterrita curavit & tertiam editionem locupletiolem; quæ utinam sit in T. Eminentiae manibus!

Chri-



Christianissimi Regis armorum felicitas hactenus sanè inusitata est. Ego qui tanti Regis ab aliquot jam annis sum beneficiarius (quod fortassis Eminentiam quoque Tuam pridem docuit meorum Hermeticorum præfatio ad Illustrissimum Colbertum) dum optimè cupio incomparabilis illius Mönarchæ felicitati, tamen vereor aleæ vicissitudinem. Eminentiam Tuam minime latent res Romanæ belli Punici secundi, & Veneræ post fœdus Cameracense; similiaque infinita. Deum castigandis fœderatis Belgis misisse maximum Ludovicum, clarissimum est. Modus autem divinæ indignationis fugit mortales. Non disimulo apud ipsos magnates Regios, orare me omnipotentem DEUM, saltem ne quid adversi, quod in Regni damnum possit vergere, accidat. Si Deo placuerit plenam Ludovico victoriam concedere, certus sum destinatum eidem saltim totius Europæ imperium, & Germaniam quoque eundem brevi habiturum Cæsarem, etsi sine applausu Romanæ Curiaë. Eminentiaë Tuæ consilium & institutum laudo, non dubitans huc quoque pertinere illud Servatoris: *Beati mites quia hereditatem accipient terræ*, ac proinde majorem accepturam fructum quam antecessorem, magnum licet bellatorem. Faxit Deus, ut maneat ille animus Tuæ Eminentiaë, utque hæc tranquillitas reipublicæ sit perpetua.

*Eminentiaë Tuæ*

Helmestadii 27. Junii  
1672.

*quoad vixero  
obsequentissimus servus*

*Hermannus Conringius,*

## XXVI.

FERDINANDUS EPISCOPUS  
ET PRINCEPS PADERBORNENSIS

Coadjutor Monasteriensis

S. P. D.

Cl. Viro HERMANNO CONRINGIO suo.

*H*umanitas tua, quâ donum monumentorum meorum accepisti, mi Conringi, nos excitat, ut non solum genero tuo unum monumentorum atq; alterum poematum septem Illustr. Virorum, te ita optante, impertiamus, sed etiam te oremus, ut majoris formæ exemplar Bibliothecæ Regis Daniæ inserendum, & reliqua tria Reinesio Lipsiæ, Bœclero Argentinae & Madero primâ datâ occasione reddenda cures. Quicquid impensæ in banc rem feceris, grato animo restituemus. Binæ Baluzii doctissimi viri ad nos datæ Epistolæ, non solum commercium nostrum literarium, sed etiam editionis variorum operum consilium ejus facile te docebunt, quod certe omni opæ foret adjuvandum. Remissam collectionem Romanam Labbæus & Cosartius societatis Jesu sacerdotes novæ Conciliorum editioni, Regi Christianissimo dicatæ, & ante quam Bata vos aggressurus viæ se commisit, Parisiis oblatæ, haud dubiè inseruerint. Opus perquam insigne & multis sacræ antiquitatis monumentis auctum, mihiq; ab Auctore donatum propediem me spero accepturum, cujus dedicationem nunc ad te mitto magnificam sane & eruditam. Ceterum Christianissimi Regis de Batavis triumphis quotidie reportati, qui plerosq; omnes sua felicitate tenent attonitos, me excitarunt, ut Majestati ejus his versiculis gratularer, quos tecum solo communes facio ut censeas, ut emendes. De incrementis Diœcesis Monasteriensis mihi

mibi, si vita suppetet, aliquando obventuris italætor, ut illud Virgilii mihi maxime placeat: Laudato ingentia rura, Exiguum colito. Partitione prædæ jam inter fœderatos facta, Regi Christianissimo TransIsalam Monasteriensibus armis occupata cesserunt oppida Campen, Hattum, Elburg & Hardevrick. Colonienſi obvenit Daventria cum dimidiâ parte Swollæ, cujus altera pars Episcopo Monasterienſi cum Grol-la Bre-vorda, aliisq; compluribus oppidis & municipiis pagisq; Twentia & Trentia concessa. Rebus ita compositis miles Colonienſis cum Francis auxiliis ad regias copias recessit. Monasterienſi Principe, suis auspiciis, ductuq; bellum administrante; quare obsessa si nondum capta Covordia Frisia & Groninga nunc prædæ destinatur. Qua de re nihil adhuc certi habeo affirmare: contrabrevi & sorte ante exitum huius mensis pacem inter Reges eorumq; belli socios, & superstites fœderati Belgii provincias coituram, minime est ambigendum, quæ si Batavos universos Gallico Imperio nunc subdet, plurimum profecto eorum opes accidet, potentiam infringet & exislimationem gloriamq; antiquam labefactabit. Verum de his propediem certiores nuncios ad me mittet Legatus & nepos meus Plettenbergius, quem ante odidum ad castra misi Majestati Regis Christianissimi de victoria & novo Regni herede baud ita pridem nato, meis verbis gratulaturum. Vale meq; ut facis ama. In Collino nostro X Julii MDC LXXII. Quos elegos meo epigrammati inter septem Illustr. Virorum poemata edito reposuit Dux Montauserus, his adjicto, oppido elegantes & tam antiquis pares, quam nostris versiculis superiores. Vale iterum iterumq;.

## XXVII.

## EMINENTISSIME PRINCEPS,

*Domine Clementissime.*

**Q**UAS X Julii exarastis, recte quidem, sed justo atque expectato serius XXVII. mensis Augusti demum mihi sunt redditæ. Usque adeo testudineum fecit nescio quid Mercurium Vestrum, nec aliàs alipedem. Cum plurimis autem de causis longe gratissima fuerint omnia quæ missa sunt, tum præcipue me exhilaravit constans erga me meaquæ Principalis gratia. Munus Monumentorum atque illustrium Poëmatum genero meo jam est thesauri loco: eoquæ immortales Eminentia V. agit gratias juxta mecum.

Bibliothecæ Regiæ destinatum grandius exemplum intra paucos dies Hamburgum atque inde Hafniam curabitur. Faxo ut in ipsius Majestatis Regiæ manus perveniat per illum, cui Bodiniana mea inscripti; utpote qui Regi est familiarissimus, & hætenus à Bibliothecâ ut nunc à sanctioribus consiliis, meus amicus summus. Is cum sit literatissimus, nec minus Poeta & Historicus haud è vulgo, mittam illi & Monumentorum & Poëmatum libros Reinesio destinatos: quoniam hic pridem ad plures abiit. Id spero Eminentia V. haud inacceptum futurum, etsi injussum. Böeclero & Madero propediem sua curabo. Exemplum Monumentorum auro ornatum habuit me sollicitum, quia ejus nulla fuit facta mentio. Quandoquidem autem ego suassem offerri aliquod libri illius pereximii atque elegantissimi exemplum Electorali Brandenburgicæ Bibliothecæ, quæ Berolini magnis impensis instruitur à φιλοβιβλα Princepe; hoc meum consilium nec Eminentia V. displicuisse suspi-



ipicatus, nisi illud ad Excellentissimum Kansteinium, primum Consiliorum Electoralium Ministrum & summum ærarii curatorem, nunc adeo Electoris Legatum ad Conventum illum magnum, qui jam Brunsvici instituitur. Quibus verbis ad Generos. Dn. Kansteinium fuerim usus, indicat (schedula adjecta. Docebit illa, metuere me non nihil mali regionibus etiam Vestris ab adventante milite Cæsareo atque Electorali: eoque studuisse me conciliandæ, si fieri possit, amicitia inter Electorem, exercitus universi supremum Ducem, & Vestram Eminentiam. Quod si peccaverim, non denegabitur tamen spero venia, studio averruncandi omnis mali à terris Vestris delinquenti. Utinam modò voti & consilii fiam compos! Certe omnibus Transvisurganis terris ingens videtur detrimentum imminere: quæcunque etiam pars vicerit. Ostfrisiâ patriam meam hyberna concessuram militi, cujuscunque ille fuerit partis, ne dubitem, facit egestas Monasteriensis ditionis universæ, imo totius Westphaliæ & Transisulaniæ. Eoq; mihi quidem fuerit utilissimum, si per Eminentia Vestra intercessionem à Monasteriensi Principe, meis & generi, Principalis Consilarii, bonis Frisicis salvæ quam vocant guardiæ literæ in omnem eventum queant impetrari. Etiam sane atque etiam rogo obsecroque, velit Eminentia Vestra hoc etiam patrocinio me fidelem clientem beate.

Novam Conciliorum editionem à Labbæo pridem cœptam, nunc tandem curante Cossutio prodiisse in lucem, equidem gaudeo: si non lector saltim perlustrator eorum diligens futurus, ubi huc advenerint pretiosa illa volumina. Præfatio editionis Cossutiana multum placet: etsi plusculum habeat fortassis adulationis, quàm sacrum argumentum patiatur. Indubie autem ne illa quidem volumina ex-  
hau-

hauriunt omnem Conciliorum thesaurum: quum Baluzius jam tum congegisset aliquot ~~τομὰς~~ <sup>ὑπομνήματα</sup> tomos, quibus etiam ego adjeci Symbolam ex manuscriptis codicibus Juliæ nostræ Bibliothecæ. Multa ex Actis & Canonibus Conciliorum omnis ævi possunt accipi, bona malaque Ecclesiæ. Quod copiam mihi fecerit Eminentia Vestra literarum Baluzianarum, in beneficiis acceptis numero. Cum primis autem gaudeo, me parario commercium hoc literarium cœpisse. Poterit Baluzius à nemine perinde, in Germania quidem nostra, adjuvari quàm à Vestra benevolentia. Et verò incubant nostri homines suis thesauris draconum iustar; plerumque tamen præ inscitia & socordia, in tanto licet hominum literatos sese profitentium numero. Epigrammata bina illa perquam placent suo acumine & elegantia, ut omnia Vestræ Eminentia. Ne quid autem dissimilem, vix crediderim, Cæsari aut Hispano, aut ipsi Pontifici, victorias Gallicas acceptas esse Religionis propagatæ causa. Felicitas Ludovici excitat invidiam & æmulationem quàmvis maximè religiosorum: ut non dubitent illi jam tum cum Protestantibus pro Bataviâ conspirare. Quod si solito modo perrexerit Ludovicus: haud tamen, quantum arbitror, in Religionis causam impinget; monitus infelici exemplo Philippi & Ferdinandi nostri, qui ad illum lapidem offendentes tantum non maxima quæque sua perdiderunt. De partitione eorum quæ Monasteriensibus auspiciis occupata sunt, stupendo sane successu, jam tum acceperam. Mihi in animo est illud Flori: *Difficilius est Provinciam retinere quàm facere.* Sed & mirum, si ærarium Principis suffecerit alendo militi præsidario in tot urbibus: ubi animi civium domiti quidem sunt non nihil ut pareant, neutiquam verò ut serviant. Mihi etiam tuta quæque viden-

dentur timenda, hoc præsertim novo rerum statu. *Pax optima rerum.* Quotidianæ frequentissimæ meæ preces sunt: *Da pacem Domine in diebus nostris.* Nec dubito eadem esse & Vestræ Eminentiae vota. Nisi sane Deus pacem conciliaverit, illa quæ nunc ineuntur fœdera & parantur arma in summum discrimen & Galliae & Germaniæ res brevi adducant, ut nostrum tamen periculum videatur altero futurum majus. Sed quid hisce tristibus chartas hæc impleo? Elegi Montauserii Ducis suaves sanè sunt, & quales a Ducum aliquo non temere confecti. Nisi fallor tamen non assequuntur gloriam sex illustrium Virorum. Septimum enim Virginium jam non moror, ut cujus Poëmata videantur aliquid contraxisse ex lue, qua ipse laboravit. Cum nihil habeam ejus argumenti, quod reponam, mitto Lindaviana mea, recentissimæ fætura. In iis conficiendis usum me Eminentiae V. Monumentis Paderbornensibus primæ ac secundæ ἐνδύσσω, non dissimulavi, pag. 12. 26. 83. & 334. alibi-que. Quod si vestro judicio probabuntur, aliorum finistras censuras non pertimescam. Sunt jam sub prælo quæ de Antiquitatibus Academicis commentatus fui, V. Eminentiae nomini consecranda: sed sperato lentius procedunt operæ, ob multitudinem alienorum negotiorum, quæ me occupatum ex officiis aulicis habent. Ubi paulum otii nactus fuero, & faverit valetudo, & hæc & alia σὺν Θεῷ prodibunt in lucem. Non desinam interea Deum venerari, ut pace publica constituta, Te patrono liceat mihi frui in annos quamplurimos.

*Eminentiae Vestræ*

Helmstadii 31. Augusti, 1672.

*devotissimus*

*Hermannus Conringius.*  
h P. S.

P. S. Hisce jam scriptis mittit Illustriss. Verjusius literas cū  
 alias Parisiis acceptas, tum etiam Baluzii, sed jam ve-  
 tustiores, III. Kal. Julii nempe exaratas. Earum par-  
 tem illam, quæ Eminentiam V. attinet, adjicio. Tum  
 primū nactus fuerat ille superioris anni autumnō mis-  
 sam Rotomagum Hamburgo arcam meam librariam,  
 cui aliquot exempla Poëmatum Vestrorum addideram,  
 interque ea unum Bibliothecæ Colbertinæ & alterum  
 Baluzio destinatum. Videtur Eminentia V. nondum  
 Parisios misisse Monumenta sua Paderbornensia. Si ita  
 est, rogaverim ne gravemini etiam illud facere.

*Illustrissimo & Excellentissimo*

**FERDINANDO FUR-  
 STENBERGIO**

**EPISCOPO PADERBORNENSI,  
 COADJUTORI MONASTERIENSI**

*S. R. I. Principi.*

**CAROLVS SANCTA-MAYREVS  
 DUX MONTAUSERIUS**

*S. P. D.*

**D**um meritas memori meditor sub pectore grates,  
 Et voco Pierias in mea vota Deas.

**FERDINANDE**, negant viresque, animosque, nec ipsæ

Carminibus referant carmina digna tuis.

**Dum caneres cultos Capitoli in culmine Divos**

Indecores illæ deferuere lyras.

An-



Angariæ invidit Latium, teque incluta Roma  
Audiit, & civem credidit esse suum.  
Insonuere tuis Tarpejæ cantibus Arces,  
Et Tyberis lætas plaudere jussit aquas.  
Romuleusque licet magnarum pondera rerum  
Ferret Alexander, non grave sensit onus.  
O si quis Superum præscos mihi suscitaret ignes  
Et reddat nostris laurea festa comis!  
Sed nec Apollineum meminit me Gallia vatem,  
Nec mihi defuetam Musa ministrat opem.  
At te frondenti præcinctum tempora lauro  
Jam resonat totis Sequana littoribus.  
Dum gravidum bellis sæclum fremit undiq; , & orbi  
Vindictam, læsi Numinis ira, parat.  
Tot strepitus inter, duriqve minacia Martis  
Classica, mansuetis Artibus ipse vacas.  
Seu præscos Superum ritus, arasque tueris  
Qua surgens nitido Luppia fonte fluit.  
Pacatosque regis populos, animasque sequaces  
Exempli sanctâ religionem trahis.  
Seu Lodoicum armis, animisque opibusq; potentem,  
Et pace & bello prospera regna canis.  
Sive altam Lupaæ votivo carmine molem  
Laudas magnifici nobile Regis opus.  
Credita seu nostris memorans sacra pignora curis  
Augusti pueri fata futura refers.  
Vincat avos utinam meritis, & Regibus olim  
Imperet, & solo sit Genitore minor.  
Te Duce, nunc placidas sectetur Apollinis artes,  
Et durum post hac sub patre Martis opus.  
Et qui jam laudare tuum, jam discere carmen  
Incipit, ille tuo carmine digna gerat.

## XXVIII.

## EMINENTISSIME PRINCEPS

DOMINE CLEMENTISSIME.

**O**Portunè præter sententiam hîc commoratus est te-  
studineus Mercurius. Hesternâ enim demum ve-  
spera nactus sum quatuor hosce libros, quibus  
suas fabulas complexus est, ingenio & virtute opti-  
mus Princeps. Jusfit illos cum plurima salute & of-  
ficioꝝ amicitiaẽ prompta oblatione, suo nomine  
consecrare Ferdinandinaẽ V. Bibliothecaẽ; Id quod cum fa-  
cio, non equidem dubito præstare merem haud ingratam.  
Idem Princeps, ut & Serenissimus Dominus meus,  
Eminentiaẽ V. nuperrima dona exceperunt singulari cum  
indicio eximia lætitiã. Eoq; , ceu fui jussus, utriusqve  
nomine ago gratias. Quod si visum fuerit alia quædam  
Monumentorum & Carminum exempla per me Viris do-  
ctis (hi enim valde quidem illa desiderant, sed cùm non pro-  
stent venalia, frustra) impertiri, curabo ea, qua par est  
diligentiã. Rogo vero iterum precorqve, si fieri possit,  
me generumqve meum in Ostfrisiã, facias adversus omnem  
injuriam literis tutelã sive Salvæ Guardiaẽ quam vocant  
muniri. Divinaẽ tutelã Vestra omnia vicissim commendo.

*Eminentiaẽ Vestrã*

Mitto responsũ Generosi  
Kanstelnii quod jam  
redditur.

*devotissimus*

Helmestadii 5. Sept. 1672.

*Hermannus Conringius.*

XXIX.

## XXIX.

FERDINANDUS EPISCOPUS  
ET PRINCEPS PADERBORNENSIS

Coadjutor Monasteriensis

S. P. D.

Cl. Viro HERMANNO CONRINGIO suo.

**G**ratias tibi ago, mi Conringi, quam possum maximas de egregia censura falsi diplomatis Ludoviciani, & de honore nobis insuper attributo, tamque magnificâ faciâ mentione. Quæ de antiquitatibus Academicis parâs nobis dedicare, erunt gratissima, modo absit titulus Eminentia & Eminentissimi solis Ecclesiasticis Electoribus & Cardinalibus conveniens. Ego eo sum contentus, quem septem Illustr. Virorum poemata mihi inscripta præferunt. N. N. multum me debere profiteor, de insigni munere, bibliothecæ meæ donato; quare etiam terogo, ut ei propterea meis verbis amplissimas agas gratias, persvadeasque me ipsius amicitiam, conciliantibus musis initam maximi semper facturum & quibusvis officiis conservaturum. De prædiorum tuorum securitate curam geram, ubi necesse fuerit: nondum enim mihi possum persuadere, Episcopum & Principem Monasteriensem Frisîæ orientali gravem fore, utpote Galliarum Regi propter amicitiam & obsequium Ducis Wirtenbergici singulariter ut mihi constat, commendatæ. Plus periculi imminere videtur à Cæsareis & Brandenburgicis copiis, isthic Bataviâ laboranti fortasse opitulaturis, & hiberna capturis. Inde illic vigilandum. Quoad me, sum eroque neutri parti obnoxius, hoc enim expedit hoc tempore ditioni meæ. Exercitus quidem ultro citroque commeantes magnam vastitatem agro inferent, nullam tamen hostilitatem metuo, Cæsari

*ac Regi Christianissimo aequè carus & estimatus ob spem successionis Monasteriensis. Plura scribere vetant curæ publicæ, quæ me circumstant. Vale meque in ære tuo cense. Neubusii XVI. Septembr. MDCLXXII.*

---

XXX.

## EMINENTISSIME PRINCEPS

*Domine Clementissime.*

**E**T literas & quinque Monumentorum totidemque Poematum libros rectè quidem accepi, nudius tamen denique tertius. Conqueritur tabellarius, se in via vestibus ab infesto milite in Hildesheimensi dirione exutum, domum reverti compulsus, atque ita secunda jam vice iter instituisse. Eo factum, ut ex illo de insolentia Auxiliarii qui audit exercitus, in vestris etiam terris patrata, multa potuerim accipere, fœda dictu & factu improba: quorum in literis nulla facta mentio. Indubie verò longe terriora successissent, nisi nescio quæ spes nova consilium atque iter cœptum turbasset, & à Visurgie vocasset infestas illas copias ad Rhenum. Ubi tamen æque frustatur illas successus: miserâ Germaniâ pereunte in gratiam pecuniæ Hollandicæ, nullo tamen ipsiusmet etiam Hollandiæ commodo. Infelicem verò Imperii rempublicam, ubi tantum non omnia licent omnibus potentioribus! Nisi infaustum aliquod prælium repulerit, non spero, vel Saxoniam vel Westphaliæ graves futuros illos Auxiliatores hybernis. Ac proinde & patriæ meæ minus ab illis jam metuo, perinde atque à Monasteriens. securum me reddit Vestra Eminentia. Cui tamen nihil minus mea Ostfrisica etiam atque etiam commendo: gratias agens maximas benignissimi pro-



promissi ergò. Lindaviana mea haud displicuisse, plurimum gaudeo. Academicas antiquitates brevi iterum aggre-  
dientur Typographicae operæ, sepositis iis quæ jam præ-  
lum fatigant. Eminentia titulus in quantum sit ex Urbani  
IIX. constitutione receptus, haud me fugit: eoqve in pu-  
blico ejus usu temperabo calamum ad illum morem: ante  
tamen octingentos annos Episcopis quam multis solere tri-  
bui id nomen, certum est. Celsissimo Principi N. N.  
scribam illa quæ sum jussus. Indubie verò peracce-  
pta ipsi erit Eminentia Tuæ amicitia. Librorum quos an-  
te hac accepi, nihil penes me superat, præter illum Bœcle-  
rianis manibus destinatum. Pridem illum curassem nisi  
inopinatus magni Viri obitus mutare consilium jussisset.  
Faxo autem ut haud indigne collocetur & liber ille & qui  
nunc misi sunt. Deum veneror, uti pace publica constitu-  
tâ, liceat Eminentia Tuæ plusculum otii etiam imposte-  
rum rei literariæ impendere, non minus atqve tranquil-  
lo ditionum regimini.

*Eminentia Tuæ*

Helmstadii 19. Octobr.  
Anno 1672.

*atatem omnem  
servus devotissimus*

*H. Conringius.*

P. S. Quum desit securamittendi literas ad Illustr. Verju-  
sium commoditas, non dubitem autem, sub vestra,  
Princeps Eminentissime, tutela Coloniam facile posse  
curari, ausus fui illas addere. Submissee autem rogo,  
ne feras hoc ægrè, imo deferri illas jubeas ad suum lo-  
cum. Jam clausuroliterarium hunc fasciculum offer-  
tur Epistola Berolini scripta & edita: quam mittere  
jubet argumentum.

## XXXI.

FERDINANDUS EPISCOPUS  
ET PRINCEPS PADERBORNENSIS

Coadjutor Monasteriensis

S. P. D.

Cl. Viro HERMANNO CONRINGIO suo.

*Commendatas mihi literas tuas, mi Conringi, ad Verjusum misi, qui Hannoveræ jam præsens, & illac fortasse trans-  
iturus eas se accepisse tibi poterit testari. Postquam Elector  
Brandenburgicus in vasa jam Diœcesi Coloniensi & Mona-  
steriensi utriq; Principi hostilia denunciauit, propediem maxi-  
mas turbas his in oris formidamus, eò periculosiores, quò certior  
fama circumfertur de copiis Brandenburgicis relicto Rheno hic  
redituris & in vicinia biberna capturis, quæ Gallorum vires  
ad tutelam Coloniensis & Monasteriensis ditionis utiq; hic sunt  
attrahuræ, cum extremo viciniae excidio. Tantum potest  
pecunia Hollandica, cui omnia videntur obedire. Interim  
pacis componendæ spes nondum decollauit, cujus arbitri no-  
minati sunt à Svecis Elector Moguntinus, Bavarus, Pala-  
tinus & Dux Wirtembergicus, Rege Christianissimo ab ho-  
nestis pacis conditionibus non alieno, quas solæ Hispanorum  
rationes poterunt præpedire, quò minus accipiantur. Ita in-  
nocens Patria externæ cupiditatis pœnas luet, Cæsare Hispano-  
rum rationibus illigato, quod non semel Germaniæ nostræ  
damnosum fuit. Vale meq; ut facis ama. Neubusii Kal. De-  
cemb. M DCLXXII.*

XXXII.

## XXXII.

## EMINENTISSIME PRINCEPS

*Domine Clementissime.*

**Q**Uæ Kalendis sunt exaratae literæ, illæ quidem decimum vicesimo quinto hujus Decembris sunt traditæ, per tamen fuerunt acceptæ, constantiam Principalis Tuæ gratiæ dum confirmarunt. Verjusio curatas meas, in non levi colloco beneficio. Hannoverâ ille huc vicinæ non venit, sed & si venisset, abstinendum mihi fuisset ab ejus conversatione, quô evitarentur malevolorum calumniæ, quægrè ferunt sua abs me consilia improbari. Colonienſi & Monasterienſi denunciata hostilia, non tam miror, quàm adeo serò factum esse. Statim initio enim expeditionis ad Visurgim tales minæ spargebantur, & Batavi id futurum jam tunc certò expectabant, imò in id miles Hollandicâ pecuniâ fuit auctoratus: nec poterant alia promtiora Hollandis auxilia expectari. Ex eo versa ad Rhenum arma, nullo Batavorum bono; imò interim in summum discrimen conjectis Frisiorum saltim & Gröningensium rebus, & ab Hollandis ne vico quidem aliquo recuperato: quasi à Coloniensē & Monasteriensē non haberent Batavi quod metuerent, aut verò opituloribus adversus Principes illos non indigerent. Et tamen contra quosvis hostes grandi ære conducti sunt auxilarii. Nunc cū hyberna quærantur in Westphalia, per sanè intempestivè ibi mota sunt hostilia: utpote quia hybernare soleat & debeat miles in locis tutioribus, procul ab hostili periculo, nec hætenus quidem eæ fuerint ibi Brandenburgicæ vires, quæ hostem impunè aut securè possint lacessere. Id quod proba-

i

ba-

bavit infelix armorum illorum qui proximis fuit hebdomadibus successus. Nisi fallor, ille à Rheno redux miles jam penetravit in Westphaliâ. Nec dubito, illum æquè ibi grassaturum, atque factum in Wetteravia, & illa quæ ad Lonam, Mœnum, Rhenumque est Hassia; nec sine insigni damno etiam Tua, Princeps Optime, evasura, nisi quæ Caesaris prævaleat intercessio. Simulac tamen Rheno trajecto ad opem ferendam ostentaverit sese vel eminus Regius miles, equidem arbitror Auxiliares istos Westphaliâ relictâ cis Visurgim ad nos redituros: perindè atque hæctenus Galli vocem Leones isti horruerunt. Ita hæc ipsa hyems etiam nobis jam extrema quæque minitatur. Utrum brevi pax sit secutura & qualis, hâriolari nondum licet fortassis. Utrique illa parti expedit, quantum intelligo: parti victæ aut malè pugnantietiam necessaria est. Satiùs fortè fuisset, si nemo Germaniæ Principum hisce turbis sese miscuisset: adeo potentem autem victorem in Germaniam parvâ manu & alienis nervis provocare, cum longè securius liceat publico consulere, vereor ut prudens aliquis laudaverit. Ne quid apud Te, Sapientissime Princeps, dissimulem, videor mihi observare in omni hoc negotio perpetuam consiliorum labem: idque fato aliquo fieri, ac proinde Germaniæ fortunam lapsui esse proximam, quale quid jam tum olim gentiles deprehenderunt, & monuere Paterculus pariter & Ammianus. Idem quid in Batavorum rebus etiam nunc haud difficile repertum est: Itaque non illis minus malè equidem metuo. Si propius abessem, de omnibus hisce tecum, Princeps, iusta agerem & libertate & prolixitate. Nunc multa me jubent silere. Pergam autem precibus Deum venerari, uti saltem Te, Princeps Optime, tuaque clementiore dextrâ à gravibus quibusque calamitatibus ben-

ni-



AD FERDINAND. EPISCOP. ET PRINCIP. PADERB. 67  
nignè defendat: ut omninò enim maneat illæsus, sperare  
non audeo. Tuus

*Eminentissime Princeps*

Helmstadii 27. Decembris,

Anno 1672.

*atatem  
servus devotissimus*

*H. Conringius.*

P. S. Ante hoscè dies tresex Dania accepi, Monumentorum  
Paderbornensium donum à S. R. Majestate benignissi-  
mè exceptum, & in Regia Bibliotheca dignum locum  
invenisse. Quæ ego istuc Tua misi, laudibus magnis  
docti prosequuntur & admirantur. Mihi verò curam  
rei litterariæ penè expectorant curæ reipublicæ.

XXXIII.

EMINENTISSIME PRINCEPS,

*Domine Clementissime.*

**Q**uartus jam mensis agitur quum ultimas exara-  
rem. Interea nunquam non calidis votis & pre-  
cibus pacem tranquillitatemque ditionum vestra-  
rum simulque integram corporis animique felicitatem Deo  
commendavi; & indolui vestra etiam, id quod pridem me-  
tui, mali aliquid perpeffa esse. Non licuit tamen hunc ani-  
mi affectum epistolâ aliqua testari, præ malignitate eorum  
qui omnibus viis obsessis etiam literis insidiabantur. Quo-  
niam verò nunc omnia sunt securiora, saltim gratulari non  
possum non Eminentia Tuæ, recuperatam pristinam for-  
tunam, quodque mitiorem non nihil experta sit aliis vicinis  
nonnullis Bellonæ insolentiam.

Mirum verò si inter illos strepitus & graves ditionis  
calamitates potuerit interdum ad suas Musas Eminentia T.

flectere oculos! Non sanè nisi paucas horas succisivas, præ animi ægritudine, ego quamvis ab ærumnis remotior, potui literis impendere: præsertim quoniam Aulicæ occupationes simulqve valetudo minus prospera subinde impedimenta varia injecerunt. Ne nihil videar egisse, mitto plagulas aliquot ejus operis quod Eminentia Tuæ nomini pridem animus consecravit in perpetuum obsequii testimonium. Utinam liceat etiam Tibi, Princeps eruditissime, vovere illas & nonnunquam inspicere! quo Tuo judicio instructus vel pergam alacrior, vel desinam ineptire. Cis paucos dies Illustr. Verjusius me reddidit certior de literis meis, cura Eminentia Tuæ sub medium Februarium sibi missis; ideoqve hoc nomine gratias ago submissæ quantas possum maximas. Accepi tunc & a Baluzio literas xv. Kal. Decembr. Lutetiæ exaratas: quarum partem excerptam Eminentia Tuæ jam vicissim reddo. Fecit in iis mentionem & editi ab sese operis Antonii Augustini emendationum Gratiani: jussitqve ab Eminentia Tua ejus exemplum cum imagine Illustrissimi Petri de Marca expectari: fortassis autem illa nondum advenerunt. Ego desidero lectionem præfationis Baluzianæ: non dubitans deprehensurum me Viri præclaram *παρρησίαν*, ut quam ipse profitetur justa libertate Gallicisqve auribus grata esse conscriptam. Sed quid hisce moror Tua negocia, quæ res publica jam unice expetit, Princeps Optime? Ignosce quæso & favete Tui admiratori. Manebo autem simul

*Eminentissime Princeps*

Helmestadii 24. April.

Anno. 1673.

*Tuus*

*atatem*

*servus devotissimus*

*Hermann. Conringius.*

XXXIV.

## XXXIV.

## EMINENTISSIME PRINCEPS

*Domine Clementissime.*

**E**Xhibebunt Ludgeriani nostri, amici mei, fasciculum, quem ante sex amplius hebdomades curandum susceperat Bonnensis quidam Academiæ hujus Juliæ aliquamdiu civis, sed territus periculo viarum Hildesheimio huc remisit. Interea temporis defuit secunda mittendi commoditas; ut proinde mihi gratuler de ea quæ nunc offertur occasione. Et verò tamdiu abs me nihil est missum literarum, ut neglecti officii haud immerito possim accusari: quamquam haud dubitem apud Te æqvissimum judicem, Princeps Optime, etiam culpæ commissæ, si qua sit, veniam mihi polliceri. Oportunè verò accidit hesterno die, ut debeam quoque gratias agere pro beneficio abs Te, Eminentissime Princeps, iterum mihi præstito. Obtulit scilicet Serenissimi Ducis Joannis Friderici Legatus hac Berolinum transiens & fasciculum Principali sigillo Tuo munitum sinuque suo comprehendentem cum literas Illustr. Verjusii tum bina elegantissima epigrammata, qualia solent ex Tua, Princeps, venâ promanare (sane saltim brevius illud Tuum esse haud dubito,) & librum à Baluzio pridem mihi destinatum ac cum imagine Illustrissimi Archiepiscopi Petri de Marca, quam tamen videtur non misisse, ex aula Paderbornensi expectari jussum. Quo nomine plurimum sanè Tibi, Eminentissime Princeps, debeo. Verjusio statim denuo aliquid jam redderem, nisi ejus ad comitia Brunsvicensia adventum plæriqve Legatorum certò polliceantur. Baluzium in suis ad A. Augustinum Præfatione ac Notis jam tum deprehendi qualem antehac semper; Petri

70 FERDINANDI EPISC. &C. EPISTOLA  
nempe de Marca genuinum discipulum atque æmulatorem,  
σι ἀποστολῆς spectes & Ecclesiastici regiminis accuratissimam  
peritiam. Non dubito, quo vales iudicii acumne, etiam  
Tibi, Princeps, studium viri placiturum. Saxonici no-  
stri jam deliberant de pace Imperii publicâ servanda statu-  
minandaque. Utinam cum felice successu! DEUS Te  
quoque sospitet in quam multos annos & publico, & meo  
etiam (si fas est adjicere) bono. Ita voveo & obsecro

*Eminentissime Princeps*

Helmestadii 12. Junii  
Anno 1673.

*Tuus  
a'atem  
servus devotissimus*

*H. Conringius.*

P. S. Nisi grave fuerit, submissè rogo, commodâ occasio-  
ne quem Baluzio destinavi fasciculum Luretiam defer-  
ri. Quod si placuerit addere, Princeps Optime, Monu-  
menta Paderbornensia, laudatum abs me ideoque jam  
desiderarum opus, multum sibi Baluzius gratulabitur.

XXXV.

FERDINANDUS EPISCOPUS  
ET PRINCEPS PADERBORNENSIS

Coadjutor Monasteriensis

S. P. D.

Cl. Viro HERMANNO CONRINGIO suo,

*IN* ea, mi Conringi, tempora incideramus, ut necessario omit-  
tenda nobis literarum commercia tecum & cum aliis doctis Vi-  
ris tantisper fuerint, & de salute propria magis quam de literis  
cogitandum. Reddita verò nunc pristina tranquillitate & pace  
Electori Brandenburgico concessa, reflorescunt studia nostra.

*At*



*At Patria metu ultimæ calamitatis liberata plurimum debet Regi Christianissimo, qui per Turenianum exercitum harpyas illas hinc fugavit. Quæ fuga etsi mihi & multis perquam utilis acciderit, quia tamen ad ignominiam & dedecus Germanicæ nationis nostræ pertinet, valde mihi displicuit. Ita vis consilii expers moleruit suâ. Jam Cæsarei etiam sine suppetiis Brandenburgici se in Germaniam propediem redituros minantur. Contra Turenius composita pace Brandenburgica ditionibus quidem Electoris excessit, attamen cum insigni exercitu æstiva habet in proximocomitatu Waldecensi, ut Cæsareis consiliis & foederatorum Principum securitati invigilet, tam exacta disciplina, ut proximus miles diœcesi meæ nullum afferat incommodum, imo hanc ditionem nemo Gallorum ingressus fuerit, aut ingrediatur, nisi præsentî pecunia coemendi necessariam annonam causâ. Interim capto jam Trajecto ad Mosam magis ad pacem res videntur inclinare, quæ tam victis necessaria, quam victoribus expedit. Illustris. Verjusius tui perquam cupidus cras hinc Berlinum abibit, & ex itinere fortasse Wulsenbutelam divertet. Legi cum voluptate transmissas mihi paginas antiquitatum Academicarum, & per eum, qui binas mihi epistolas tuas reddidit, mitto ad te imaginem Archiepiscopi de Marca à Baluzio promissam, ad quem etiam fasciculum tuum propediem destinabo. Is Monumenta mea jam possidet, & pluris merito mea videtur æstimare. De ejus epistolii parte mecum communicata gratias tibi habeo, optoq; ut porro ejus viri amicitiam ac memoriam mihi conserves atq; custodias. Vale Neubusii Nonis Julii. M DC LXXIII.*

*P. S. Inclusas ad Maderum datas, ubi legeris, ad eum mittas velim.*

## XXXVI.

FERDINANDUS EPISCOPUS  
ET PRINCEPS PADERBORNENSIS

Coadjutor Monasteriensis

S. P. D.

Cl. Viro JOACHIMO JOHANNI MADERO.

*J*am ante, mi Madere, virtute & eruditione tuâ mihi eras  
notus, quam Epistolam tuam superiori anno & mense Sep-  
tembri datam paucis adhinc diebus accepi, una cum Dithmaro  
Mersburgensi tuo ad me misso, de quo dono gratias tibi habeo  
plurimas & tantum debeo, quantum res publica literaria uni-  
versa tibi propterea se debere fatetur. Perge itaq; hoc præ-  
claro antiquitatis illustrandæ studio, de patriâ, de literis, & de  
posteritate bene mereri. Meum patrocinium, mea opera  
nunquam tibi deerit: etsi enim parum otii nobis supersit à Rei-  
publ. curis, quod bonis literis consecremus, amamus tamen  
ejusmodi studia & eorum cultores tui persimiles. Ita nunc  
historia Paderbornensis ductu nostro & auspiciis conscribitur.  
Cujus primus tomus ab Augusto usq; ad excessum Caroli M.  
jam tum est absolutus, & alter nunc componitur de Episcopis  
Paderbornensibus, cui facile centum & triginta antiqua Cæ-  
sarum primorum diplomata nunquam hæcenus visa nec edita  
inserentur, præter centum & viginti Bullas Pontificias & in-  
numera aliarum literarum publicarum monumenta. Quare  
rem nobis gratissimam feceris, si quid in schedis tuis repperis &  
nobiscum communicaveris, quod ad historiam Paderbornensem  
facere videatur, præsertim de Episcopis nostris Antecessori-  
bus. Monumenta nostra tibi cum poematibus meis non displi-  
cuisse, magnopere nobis placuit, & quoniam Typographus no-  
vam

*nam urget editionem, exemplis primis facile diuenditis, majorem in modum à te peto, ut si quid in iis emendandum, delendum aut addendum censueris, nos tempestiue moneas. Vale Neubusii Non. Julii. M DC LXXIII.*

## XXXVII.

## EMINENTISSIME PRINCEPS

DOMINE CLEMENTISSIME.

**Q**Uas per Ludgerianos nostros unà cum aliis misisti jam tum mense Julio, ad eas pridem respondissem addito illo libro quem Bibliothecæ Tuæ, Princeps Optime, destinavit Antonius Ulricus Dux, nisi commoditas hæcenus defuisset fidei meæ concreditum donum offerendi. Non scilicet Mercurius ille Huxuariensis prout solebat, ad nos aliquamdiu excurrit: nec quamvis studiose indaganti obviam factus quisquam, qui in terras vestras vellet proficisci. Eoque plurimum me profecto exhilaravit hic homo: cui, cum commodam quæreret rationem tuto Tureniano exercitui sese jungendi, utpote gente Gallus, auctor fui Agrippinates petendi itinere per Paderbornenses facto. Mitto igitur jam tandem Optimi Ducis Antonii Ulrici munus, simulque ejus nomine plurimam Tibi, Princeps, salutem opto dicoque: haud dubitans librum haud fore inacceptum, idque cum primis quia venit ab illa manu benevolâ & amicitiam Tuam in magno pretio æstimante. Utinam possim jam tum addere à memetipso consecrata Eminentissimo Patrocinio Tuo! quoniam intelligo partem eorum placuisse. Verum ea me occupationum moles aliquamdiu exercuit, ut de Antiquitatibus Academicis vix cogitare licuerit. Si quid porro subcisivi fuit otii, id impendendum fuit, ex consilio, ne dicam jussu, Legati Cæ-

k

fa-



sarei Comititis de Windischgratz, operi alteri de Republicâ Imperii Germanici, quia & in Cæsareâ Aulâ dicitur expectari imo desiderari. Spero tamen propediem saltim illo me onere levatum iri; ubi nempe prodierit favente Lucina: atque ita posse me reverti ad Academica. Nihil sane fuerit mihi prius, nisi nova jussa Cæsaris me turbaverint ad Fines Imperii iteratâ curâ tutandos, argumentum & difficile & obnoxium odiis hâc præsertim tempestate, qua Germania nostra passim in Galliam aliaque vicina regna commigrat, Republica ipsa Imperii nec vitia sua ferepte nec vitiorum remedia. Conficiunt me sanè quamvis extra armorum strepitum positum, loco hætenus tranquillo, communis patriæ aliæ ex aliis emergentes adversitates. Tantum pro solatio est pacis propinquitas quædam major, vel saltim illa ejus quam mihi feci promissio. Ne quid nempe dissimulem, existimo equidem omnibus belligerantibus partibus brevi defuturos gerendarum rerum nervos, si fas est hac voce pecuniam appellare: atque ita fessos languidosque non multum iniquis conditionibus redituros in concordiam. Quod meum augurium utinam Tuæ etiam, sapientissime Princeps, sententiæ sit consentaneum. Illustrissimum Verjusium & Brunsvigæ durante adhuc Saxoniæ nostræ Procerum conventu, & hic cum Berolinum peteret, salutavi, ut & fratrem ejus Abbatem, utrumque virtutum Tuarum ex merito laudatores. Et verò jam non Italos solos & Germanos nostros sed etiam Gallos tenet Tui admiratio. Quid in novissimis suis Baluzius de te retulerit, significabit injecta schedula: aliorum sententias magnâ cum voluptate intellexi ego ex libellis Poëmatum, pro quorum communicatione gratias ago maximas. Sed & Cæsareum Legatum usque adeo raræ eruditionis Tuæ  
ce-



AD FERDINAND. EPISC. & PRINC. PADERB. 75

cepit veneratio, ut, quo non nihil explerem ejus desiderium ego ipsi miserim Monumentorum Paderbornensium primæ editionis exemplum quod reliquum erat; alia nimirum ex sacrario meo promere vetuit religiosior Tui cultus, etsi impense ille desideraret. Vir sanè est egregius, nec indignus Tuis etiam inuneribus: & vero eorum non equidem dubitavi, fiducia Tuæ erga bonos quosque benevolentia, illi spem facere, gavisurus si ex Daniâ reduci liceat illa offerre. Baluzio si fasciculus meus fuerit transmissus, multum lætabor: quoniam omnis penè commoditas aliquid Lute-tiam curandi præter nudas epistolas hodie intercepta est. Sed & literæ quoque nunc solito rarius inter nos commeant præ novis hisce Germaniæ motibus. Faxit DEUS, ut brevi redeat pax aurea, idque ex voto & augurio meo. Idem verò Te longum sospitet & Reipubl. & doctrinæ melioris bono. Hoc equidem Deum obsecro

*Eminentissime Princeps*

Helmstadii 8. Novemb.  
Anno 1673.

*Tuus  
etatem  
servus devotissimus  
Hermannus Conringius.*

XXXVIII.

FERDINANDUS EPISCOPUS  
ET PRINCEPS PADERBORNENSIS

Coadjutor Monasteriensis

S. P. D.

Cl. Viro HERMANNO CONRINGIO suo.

*Securam natius occasionem literis tuis 8. Novemb. ad me da-  
tis & serò mihi nunc redditis respondeo, & binos hos fascicu-  
los Monumentis Paderbornensibus graves ad te mitto, ex  
qui-*

76 FERDINAND. EPISC. & C. EPIST. AD CONRING.  
quibus unum Illustrissimo Comiti Windesgratio, Hafnia re-  
vertenti poteris largiri, eiq; meis verbis testari, illius præcla-  
ras ingenii dotes & doctrinam, ut toti Germaniæ nostræ cogni-  
tas, ita nec mihi esse ignotas. meq; esus amicitiam magnopere  
expetere, te interprete nobis comparandam. Plurimum debeo  
Optimo Principi Antonio Ulrico de literario dono ad nos misso,  
gratiis insuper actis de perpetuâ nostri memoria, quâ conservat.

Jam diu nihil literarum è Galliis à Baluzio nostro ad me  
est allatum præsentis belli motu infestis itineribus: expecto  
tamen cistam inde insigni librorum supellectile refertam, quam  
Parisiis emi jussi. Utinam tandem pax redeat optima rerum  
& Musis nostris amica! Gallicus exercitus Duce Luxenbur-  
gico, jam Hispanis & Batavis copiis, trajecto Mosa ad hi-  
berna deductis, recta in Cæsareos movet, ut propediem de ma-  
gno prælio quid simus audituri, quod DEUS Optim. Max.  
meliori causæ jubeat bene evenire. Huxaria nunc à Gallis  
relicta & destructo funditus ponte illic Visurgi instrato, ve-  
stris ditionibus in omnem casum melius quam nobis est cautum:  
timeo enim ne superioris anni hospites has regiones sint in-  
visuri denuo: ita quicquid delirant Reges, plebuntur Achivi.  
Vale meq; de studiis & laboribus tuis porro redde certio-  
rem. Neubusii Non. Decemb. MDC LXXIII.

---

XXXIX.

EMINENTISSIME PRINCEPS

Domine Clementissime.

**S**pectatâ manu Tua equidem plurimo sum gaudio per-  
fusus: cum primis verò ubi ex literis ipsis intellexi, &  
Tua hætenus omnia salva & mei patrocinium inte-  
grum superesse. Legato Cæsareo, simulac ex Daniâ, ubi  
præ-

præter expectationem diu detinetur, redierit, reddam quæ jussisti additis verbis tuis. Quæ indubie per illi erunt grata, & cum aliis Cæsareæ Aulæ Ministris communicabuntur, in nominis Tui, Princeps Optime, cultum præcipuum. Antonio Ulrico Duci proximâ hebdomade reddam itidem Epistolæ Tuæ verba: quo amicitia vestra magis magisque confirmetur in Reipublicæ bonum. Pontem Huxuariensem ab ipsismet Gallis esse destructum, benè est; alioquin is labor à nostris debuisset suscipi. Vestris terris hac quidem hyëme nihil adversi metuo, præsertim si modestè sese gesserit Monasteriensis; idque quoniam ad Rhenum excubans Luxenburgicus non patitur Cæsareum militem copias suas dividere. Prælii aleam ancipitem ne Gallos quidem ausuros subire, equidem arbitror; quoniam Turenianus exercitus perquam est debilis, & si Luxenburgico res haud successerint, tota Gallia in magnum discrimen perveniat, multis de causis. Utinam moderatis consiliis auris in tempore fuisset præbita! A Baluzio pridem nihil accepi, ipsum innoxium literarum commercium novis hisce periculi plenis motibus, ut Galliam omnem, multum turbantibus. Eoque ignoro adhuc num mea nactus sit nec ne. Ego per Legatum à S. C. Majestate jussus sum edere denuo & quibus licet accessionibus perficere meum de Finibus Imperii opus. Quod onus mihi erit molestum: ferendum tamen, quantum video. Indubie verò facilius ego calamo Imperii fines tutabor, quam Cæsar gladio. Nisi valde fallor, est prima operis editio jam pridem in tuis, Princeps Optime, manibus: ideoque submisso rogo, quia non mea sed Imperii causa agitur, cujus tu, Princeps, nobile es membrum, ne graveris eruditis tuis auxiliis me adjuvare. Quas in Academia hac nostra habui olim de Republ. Imperii Exercita-

tionem, unum in volumen coactæ propediem ultimam manum meam consequentur. Quicquid ejus est editum, hâc vice mitto: reliqua commode brevi sequentur. Opus hoc & meum & non meum est: permisi scilicet bonam curæ partem auditoribus pro ætatis & ingenii modulo. Hâc novâ autem recensione plurima mutavi auxique. Etiam in hisce observabis indubie pro eâ quâ vales doctrina, literatissime Princeps, haud pauca non bene dicta: ignosces tamen cespitanti, imo docebis meretiora: quia in Principum saltem ordine unus tu id potes. Non tantum sane de me, sed etiam de Imperio hoc ipso haud parum mereberis. Deus & novum imminens & plurimos alios secuturos annos addat constanti tuæ felicitati. Ego manebo

*Eminentissime Princeps*

Helmstadii 15. Decembr.

Anno 1673.

*atatem*

*Tuus*

*fidelissimus servus*

*Hermannus Conringius.*

P.S. Prodiit nuper *ἀνώνυμος* scriptoris libellus vernacula nostra lingua conscriptus titulo: *Größnete Französische geheime Rathesstube*. Is, si quis hujus argumenti alius, me iudice, dignissimus est quem etiam Tu, prudentissime Princeps, cum curâ legas. Nisi fallit conjectura, editus est libellus Francofurti. Fortassis jam est in manibus. Sin, faxo ut nanciscaris, si etiam Tibi, Princeps, ita videatur,



## XL.

## EMINENTISSIME PRINCEPS,

*DOMINE CLEMENTISSIME.*

**C**Um xv. Decembris Tuæ cum sex Monumentorum Paderbornensium exemplis mihi traderentur, confestim respondi. Ex eo autem a Clementissima Tua manu nihil accepi. Ego quoque filui: non alia tamen de causâ præcipuè, quam quod defuerit meorum libellorum mittendorum commoda occasio; imo, ne quid dissimulem, quod sine dudum promisso & debito libro Antiquitatum Academicarum in conspectum Tuum prodire erubescerem; illi autem absolvendo vacare, neque mihi partim præ valetudinis vitio partim præ infinitis negotiis, neque operis typographicis, permetteretur. Et vero demum hisce proximis sex hebdomadibus ultimam manum licuit admoveere, nec impositus est finis nisi die hesterno. Remoto igitur tandem aliquando isthoc quasi obice, qui scribendi officium, integrum semestre spacium est remoratus, nihil jam quidem decens magis esse arbitror quàm redire ad pristinam scribendarum literarum diligentiam. Non enim speraverim decessisse aliquid isthoc temporis intervallo Tuæ in me gratiæ; Quod si autem offensam aliquam commerui, submisisse veniam mihi concedi peto atque obsecro: neque Tu, Princeps Optime, mihi roganti eam, scio, denegabis. Enimverò eisi liber meus nondum eâ qua par est ratione sit politus, atque adeò indignus qui in manus Tuas veniat (nec enim recentissimæ plagulæ patiuntur compressionem vimque illam quam bibliopegi munus exigat) ità tamen cupide revertor ad solitum obsequium, ut hac quidem vice malim peccare in rudi libello offerendo, quam

quam longiore literarum scribendarum intermissione. Non dubito aurem, Eminentissime Princeps, hoc quoque haud futurum Tibi ingratum: præsertim quia, simulac adornare librum licuerit, novâ missione ille Bibliothecæ Tuæ consecrabitur, jûste expolitus.

Interim quod in Epistola dedicatoria pariter & supplementorum sine supplex rogavi, id nunc etiam repeto eodem animo: nempe ne dedigneris clemente oculo excipere leve hoc munusculum, donec majore testimonio ad posteritatem referri abs me possit quate prosequor pia reverentia.

Illustris. Legatus Cæsareus Windischgratius & legit Epistolam Tuam & Monumenta Paderbornensia accepit cum summa voluptate & Tui nominis laudatione. Jussit suo nomine gratias agere pro habito hoc honore, & obsequia sua quovis tempore paratissima polliceri. Dedi verò eidem & alia bina Monumentorum exempla; & quidem alterum Comiti de Lamberg Cæsareorum Ministrorum tantum non potissimo offerendum, quia hujus eruditionem multum laudavit Windischgratius, alterum destinavit ipse eidem Aulico cuidam literato. Quartum exemplum a me nactus est Joannes Andreas Bosius, perquam doctus Jenensis Academiæ Professor: quia constituerat Tuo, Princeps, nomini consecrare Cornelium suum Nepotem simulque jussu Te laude prosequi. - Etsi autem fefellerit me isthæc expectatio, præmatura enim morte vir doctissimus est ereptus; non improbabis tamen, scio, consilium meum. Quinto donavi virum & genere & dignitate & doctrina perillustrem Gebhardum de Alvensleben, generosæ illius familia hodie principem: idque quoniam Tua jam tum magni aestimabat primæ editionis diligens lector, & simul studiosissimus est rei genealogicæ indagator. Mitto quæ mihi respon-

respondit vir Illustriſtis etiam de origine ſuæ familiæ; quo expendi poſſit rectius, eorum quæ abſte ſunt eodem de argumento narrata, veritas. Si ſane & hunc annumeraveris Tui admiratoribus, non fallêris Princeps Optime. Sextum exemplum cui donem, nondum invenifatis dignum: faxo tamen ut & hujus lectorem reperiſ, doctrinæ Tuæ juſtum æſtimatorem.

Cum illi quod ultima vice miſi Exercitationum Academicarum volumini nonnulla deſint, plagulas aliquot jam addo in ſupplementum. Magna libertate in iis diſſerui, fateor, de plæriſque Imperii Germanici negotiis: quoniam omnino mihi perſuaſum eſt, communi reipublicæ vinculo conſiſtere adhuc quicquid ſupereſt, nec quidquam etiam ſingulis magis eſſe noxium quam nimiam libertatem, ad quam tamen multi nimis adſpirant. Proindeque exegi tantum non omnia ad ſalutem communis illius corporis: atque adeo non potui diſſimulare, quantum, me judice quidem, hic ſit aberratum hætenus ab Imperatoribus pariter atque Ordinibus Imperii, quidque cavendum ſit impoſterum ne reſpublica tota corruat. Fortaſſis meorum quam multa paradoxa cenſebuntur, & audientur ægris auribus: Saltem plæraque tamen confido haud improbatum iri iis qui & prudentia valent, & ſerio amant Imperii conſervationem. Quicquid ſanè eorum tu probaveris, Princeps ſapientiſſime, id probè ab me dictum arbitror, ſpretis aliorum vocaliſ. Si diſpliceant nonnulla etiam Tibi, ſaltem rogo veniam mihi indulgeas amore boni publici aberranti, nullius autem privati commodi exſpectatione.

De præſente Imperii ſtatu quidquam adjicere, horret animus luctuque refugit. Uſque adeo ferè nihil eſt quod omnino placeat. Pax optima rerum. Utinam brevi nos reſpi-

spiciat benigno vultu, idque in diuturnitatem! Saltim Tua omnia, optime Princeps, vigeant floreantque!

Ita Deum obsecro

*Tuum*

*Eminentissime Princeps*

Helmstadii 23. August.

*devotus servus*

Anno 1674.

*Hermannus Conringius.*

P. S. A Baluzio pridem nihil accepi literarum: ego etiam cogor a scribendis literis quamvis innoxii manus abstinere, ne animos suspicaces irriterem. Verjusium Berolino aut jam discesse, aut decedere cum Sereniss. Electore, quem ajunt die crastini Magdeburgi expectari, non equidem dubito. Rogo etiam atque etiam, Princeps Optime, ne graveris, per aliquem tuum mihi significari, num is Fasciculus, quem Neuhusium destinavi ante annum præter propter, Lutetiam fuerit curatus & Baluzio traditus.

Hoc monumento vagatur hic fama de atrocissimo prælio Fæderatorum & Condæi: quod tandem illorum ingens victoria exceperit. O rerum vicissitudines! ô fructus ambitionis & infinitæ imperandi cupidinis!

XLI.

EMINENTISSIME PRINCEPS

*Domine Clementissime.*

**E**T literæ & quæ iis adjunxi, quæ inter & Verjusii fuit epistola, quoniam Augusto jam tum mense Cancellariæ vestræ tabellioni curanda sunt tradita, haud dubie pridem in Celsitudinis Tuæ manus recte pervenerunt. Jam mitto exemplum consecrati Nomini Tuo eminentissimo



mo libri, expolitum nonnihil ut in Bibliothecam recondi possit. Submisit autem rogo obsecroque, ut digneris huic locum aliquem inter reliquos Tuos concedere. Etsi enim honorem illum & gratiam haud mereatur mea in conficiendo illo adhibita opera; confido tamen, nec argumentum, nec quod voluerim publicum aliquod meæ in Celsitudinem Tuam devotæ pietatis indicium & monumentum exhibere, ingratum futurum.

Quod si quâ parte, sive in hoc libello sive in aliis chartis, videar peccasse, veniam mihi clementer indulgeri, iterum iterumque obsecro. Et verò non prius erit animus de pristina gratia tua securus, quam solito more a manu Tua literarium beneficium fuerim consecutus. Utpote qui studeam & esse & haberi

*Tuus*

*Eminentissime Princeps*

Helmstedii in Acad. Juliâ

13. Novembr. 1674.

*servus fidelissimus*

*Hermannus Conringius.*

XLII.

FERDINANDUS EPISCOPUS  
ET PRINCEPS PADERBORNENSIS

Coadjutor Monasteriensis

S. P. D.

Cl. Viro HERMANNO CONRINGIO suo.

*E* Pistolam tuam XXIII. ad me datam cum dono Antiquitatum Academicarum, quas mihi inscripsisti ac dedicasti, accepi quidem, sed debitum ei responsum distuli, usq; dum alterum promissum exemplar mitteres, quod nunc una cum literis tuis XIII. Nov. exaratis mihi est redditum. Quare ut hanc qua-

lemcung, moram excusatam babeas rogo, & nunc gratias tibi ago amplissimas de hoc erudito opere nobis dedicato, quod Bibliotheca nostrae, præter cætera tui ingenii monumenta non minus erit ornamentum, quam tuæ erga nos voluntatis apud se-ram posteritatem testimonium sempiternum. Munusculum quod tuis licet meritis impar rependo, queso æqui boniq; consulas nostri erga te amoris pignus. Cæterum plurimum etiam tibi debeo de conciliata mihi amicitia Nobilissimi Gebhardi de Alvensleben, cujus judicium de re genealogica non parvi facio, gaudeoq; non infirmiora illi quam nostræ genealogiæ Autori fortasse argumenta suppetere illustrandi stemmatis. Ut hoc etiam scias, Epistolam Verjusii, quam te primis literis adjunxisse scribis, non accepi, non parum mirato Verjusii fratre qui ante discessum hic me salutavit. Vale meq; ut facis ama. Neuhusii 4. Dec. 1674.

## XLIII.

## EMINENTISSIME PRINCEPS

DOMINE CLEMENTISSIME.

**Q**Uæ quarto Decembris mihi destinasti, rectè quidem, sed serò admodum, nempe demum secundo Februarii, reddita sunt. Etiam sic tamen plurimum me exhilaraverunt; cum primis quod luculentum præbuerint testimonium gratiæ tuæ erga me integræ. Nec verò opus fuerat in id probandum splendido quod addidisti munere: neq; ego quidquam aliud quam epistolam manu tuâ scriptam in signum pristinæ benevolentiæ expectabam. Quia autem Tibi placuit vincere meam expectationem, non equidem invenio verba quibus & me vicissim expectorem, & justas tibi agam gratias. Patere igitur, Domine, nunc quidem sacro silentio id præstare quod verbis nequeo: non minus tamen sanctè promitto, in hominem memorem & gratum beneficium abste esse collatum. Librum ipsum haud displicere, gaudeo plurimum. Cum enim eximia multum doctrinâ valeas & acerrimo polleas judicio, potest mihi isthæc tua approbatio esse pro aliis

aliis omnibus: nisi fortè exuberans graciosus affectus dictaverit tam bona verba. Mitto nunc ejusdem prope argumenti & alium libellum, impolitum tamen, quia nondum aptus est tolerare violentiam bibliopegi. Quo excuso typis, convertere me jam cogor ad perficienda nonnulla πολιμῶντες. Et quidem jam penè constitui, initium laborum istorum facere à re Nummariâ, quæ hodie, summo Imperii detrimento, est perquam turbata. Quæ de Finibus Imperii ex aula Cæsareâ perficere sum jussus, illa hoc rerum statu vix tangere audeo. Ultimam maneat nobis integri saltim illi Fines, qui pace Monasteriensis fuerunt constituti! sed vereor pejora. Quum literas suas Verjusius mihi concrederet, jam clauseram fasciculum tibi, Princeps, destinatum. Intra extimum tamen operculum illas protrusi; sic satis tuto eas ibi recondi arbitratus. Nec verò inde potuerunt eripi, nisi manus iniqua accesserit. Quid factum nec ne, poterit Cancellariæ vestræ tabellarius narrare, qui ex manu mea fasciculum curandum accepit. Nolim equidem fidem meam in suspensionem adduci. Cum Gebhardo Alvenslevio colloquendi dabitur proximâ hebdomade Wolfenbutteli in aulâ commoditas. Haud dubie lætabitur, etiam abs Te, Princeps Optime, non improbari videns suam stemmatis illustrandi operam: ut est præstans omnigena virtute & agendarum rerum dexteritate, gentis suæ magnum decum. Deum veneror, ut non tantum hunc sed multos etiam secuturos in seram senectutem annos feliciter tibi decurrere jubeat. Hoc opto, hoc Deum precor.

Tuus

*Eminentissime Princeps*

Helmstadii 6. Febr. 1675.

*devotus servus*

*Hermannus Conringius.*

XLIV.

EMINENTISSIME PRINCEPS

*Domine Clementissime.*

**Q**uas sexto Februarii exaravi, spero unâ cum libello pridem esse curatas. In iis significaveram, fore propediem ut in aula cum generoso Domino Alvenslevio possim agere de Tuo, Princeps,

ceps, iudicio super ejus studio circa illustrationem illustri illius stem-  
matis. Fefellit autem expectationem incommoda magni illius viri  
valetudo Itaque partem illam literarum tuarum descriptam, per  
epistolam illi communicavi. Usque adeo autem Tua, Princeps, sen-  
tentia, virum optimum excitavit, ut haud dubitaverit, quem mit-  
to fasciculum, Tibi destinare; veneratus tamen simul ita est Princi-  
pale Tuum fastigium, ut non nisi per me voluerit aditum sibi parari.  
Ego vero, conscius inusitatae Tuae cum tanta dignitate conjunctae be-  
nignitatis erga quosvis, me parario non esse opus existimo, sed omni-  
no fasciculum hunc benevolâ manu acceptum iri, cum ejus quo Te,  
Princeps, prosequitur Alvenslevius noster devoti cultus, tum etiam  
argumenti ipsiusmet nomine. Addo autem non etiam jussus, ab eo-  
dem Nobilissimo Alvenslevio mihi nunc missam etiam alteram char-  
tam, qua consignavit eos qui eundem Tecum natalem annum habent:  
quoniam hæc etiam curiosa opera significat animum, Eminentiae Tuae  
omni studio deditum. De proprio meo addere nihil nunc possum.  
Veneror autem Deum, uti pace iterum constituta, liceat Tibi, Prin-  
ceps Optime, frui, juxta Reipublicae curas, suavi tranquillitate lite-  
raria; & mihi perpetua Tua gratia, quia sum

*Tuus*

*Eminentissime Princeps*

Helmeſtadii d. 8. Martii

Anno 1675.

*asatem*

*devotum servus*

*Hermann. Conringius.*

XLV.

EMINENTISSIME PRINCEPS

*Domine Clementissime.*

**H**Aud me fugit, quæ hodie intemperies rempublicam Imperii ex-  
agitet, quæq; proinde etiam Tibi ut Principi creentur mole-  
stiae: eoqve vix audeo curas tuas interpellare; quoniam tamen  
Serenissimus Princeps Antonius Ulricus Tibi mittere jussit, quæ in  
sacris nuptialibus primogenitæ filiae nuper in Orchestra sunt ad sal-  
tū cantata, non possum illa non offerre. Addo autem & partem  
Epi-



Epistolæ manu Principis ad me datæ; non quo commendem ejus erga te affectum, utpote quem esse summum jam tum Tibi constet; sed in id, quo magis magisq; inter vos Principes crescat mutua benevolentia; Persuasus scilicet, absq; concordibus Principum studiis rem publicam saluam esse non posse. Quæ rei literariæ usui nunc paro, simul viderint lucem, ea qua par est humili observantia offeram censenda; Deus te servet, Princeps Optime, in seram senectutem reipublicæ commodo, simulq; reddat Germaniæ pacem saltem in multos annos. Ita precor; quia perpetuam pacem ne sperare quidem ausim.

*Eminentissime Princeps*

Helmestadii 25. Martii

Anno. 1675.

*Tuum ero fidelis servus*

*quamdix vixero*

*Herman. Conringius.*

XLVI.

EMINENTISSIME PRINCEPS

*Domine Clementissime.*

**Q**Uæ mitto, madent adhuc aliqua sui parte à prælo: quum occasio tamen mihi offeratur mittendi non nihil, judico officii mei esse illam haud negligere. Non quod illæ meæ chartæ sint tanti, sed ut conservem mihi munusculo aliquod Tuam Principalem gratiam. Forte etiam poterunt hæc levare aliquantulum molestas reipubl. curas, tantum si perlustraveris: præsertim quia haud dubito, etiam ad hæc argumenta capax ingenium tuum solere se demittere. Ego sane multum gaudebo, ubi ne hæc quidem inaccepta fuisse intellexero. Proxime mihi denuo agendum esse de Finibus Imperii Germanici, etiam publicè non dissimulare fui coactus. Spero quoq;, posse jam meos illos conatus saltim excusari, quia præter expectationem res Imperii restitutæ non nihil sunt in integrum hæc æstate, ut liceat meliora quæque ominari. Rogo autem, etiam atq; etiam, Principum Imperii literatissime, uti ne graveris suppeditare ea quæ ad tam nobile argumentum excolendum facere videbuntur. Nec verò mea sed Imperii res agitur: & haud dubie plurima supersunt vel intacta mihi hæcenus vel perperam tradita. Quæ mense Martio bis misi, spero re-

etè curata & manu benigna esse accepta. Alvenslevius noster avidè desiderat sententiam Tuam, Princeps, de lui, per me transmissis: verentem offensam Tuam securum esse jussi ego, gnarus Principalis tuæ benevolentiae, etsi solito diuturnius fuerit silentium tuum. Deus te servet, Princeps Optime, bono publico.

*Eminentiae Tuæ*

Helmstedtii 7. Octobr.

Anno 1675.

*fidei obsequio*

*atatem*

*devotissimus*

*H. Conringius.*

XLVII.

CELSISSIME PRINCEPS

*Domine Clementissime.*

**A**dventus Nobilissimi Buschii nulla ratione mihi magis est acceptus, quam quod offerat, sese librum meum ultimæ tæturæ Cel-  
situdini Vestræ curaturum. Illum itaque nunc mitto, debita  
summissione animi rogans, etsi ille sit fortassis non ex Cel-  
situdine V. sententia omni ex parte confectus, ne grave-  
tur tamen Cel-  
situd. V. saltim ea quæ mihi imputavit adversarius, factâ cum defensione  
mea contentione, æquo judicio arbitrari. Habeo nunc sub mani-  
bus novam Editionem operis de Finibus Imperii, idque jussu S. Cæ-  
sareæ Majestatis: vereor autem intempestivam hanc operam esse Im-  
perio ad finem ultimum ruente. Utinam liceat si non coram saltim  
per literas querelas libere in sinum Cel-  
situdinis V. super his aliisque  
Reipubl. malis effundere! Sed Deum potius veneror, uti Cel-  
situdinem V. in seram usque senectutem conservare, vel saltim hunc an-  
num feliciter decurri, faciat, jubeat.

*Celsitudinis Vestræ*

Helmstedtii 3. Jan. 1678.

*atatem omnem*

*devotissimus servus*

*Hermann. Conringius. D.*

XLVIII.

## XLVIII.

REVERENDISSIME AC CELSISSIME  
PRINCEPS*Domine Clementissime.*

**Q**Uum fama publicâ acciperem, Celsitudini Vestræ Monasteriensem quoque sacrum Principatum obtigisse, graviter quidem decumbēbam; egi tamen Deo Optimo Maximo gratias, simulque summum illud Numen sum veneratus, uti felicitatem hanc velit jubeat in seram usque senectutem, & publico & privato comodo, constantem ac perpetuam esse. Non dubitavi etiam preces illas meas rati habiturum clementissimum Deum: dolui vero, præ morbi sævitia non posse me Celsitudini Vestræ, quo par erat modo, gratulari, meumque illum affectum calamo significare. Et verò nunc demum mihi per valetudinem permittitur, exponere cum gaudium, tùm vota isthæc mea. Serò quidem, fateor: haud dubito tamen mihi polliceri, hoc serum judicium serii humilis animi clementissimâ gratiâ exceptum iri. Nunc itaque tantum opto, ut cum primis hic proximus annus Celsitudini Vestræ feliciter decurrat: idque quoniam res publica quasi stat in præcipiti, hoc ipso temporis momento, uti nisi sapientibus consiliis imminens malum caveatur, tantum non *παραστέλεια* meritò sit metuenda. Si sanè hic annus pacem reddiderit, licebit impofterum optima quævis expectare: quapropter equidem pergam Deum precari, ut saltem hic annus voto meo respondeat.

*Celsitudinis Vestræ*

Helmestadii 29. Decembr.

Anno 1678.

*quoad vixero  
fidelissimus servus**H. Conringius.*

# INDEX RERVM PRÆCIPUARUM.

## A.

- A**cta SS. Martyrum Perpetuæ & Felicitatis: an Tertul-  
 liano fuerint in manibus. 28. notarum in ea Holstenia-  
 narum animadversio Conringii. 29. seqq.  
 Alvensleuii iudicium de re Genealogica. 80. f. 84. f.  
 Amicitiam inter Duces Brunsvicenses & Fürstenbergium con-  
 ciliare & confirmare jubetur Conringius 23. f. 26. 39. 77. 87. & c.  
 Ampsivarii quas olim terras tenuerint. 14  
 Angriarii an sint populus Francicus. 14  
 de Antiquitatibus Academicis librum Fürstenbergio dedicare  
 voluntas est Conringio. 42. q. quam ille libenter accipit. 43.  
 ipse liber transmittitur primum impolitus. 79. f. dein poli-  
 tus. 82. f. dedicationem Princeps remuneratur. 84  
 Arminius an condiderit Irmenburgum. 17  
 Auxiliarii militis insolentia. 62

## B.

- B**aluzii encomium. 50. 69. f. ei opem à Fürstenbergio petit  
 Conringius. 18. 38. 40. 46. & impetrat. 48  
 Batavia toti subjugandæ minatur Rex Gallia. 48  
 Brandenburgici Electoris amicitiam Fürstenbergio conciliare  
 studet Conringius 54. f. ejus copia Belgarum partes tuen-  
 tur. 64. f. pax cum Gallo. 70. f.  
 Bruderorum antiqua sedes. 14

## C.

- C**æsareis prælium minantur Galli. 76. de quo Conringio ali-  
 ter videtur. 77  
 Ca-



# I N D E X.

<i>Capitulare Carolinum à Furstenbergio erutum. 2. edit Conringius</i>	4
<i>Catti olim qvi fuerint.</i>	14
<i>de Chaldaeorum veterum sapientia libellum daturus est Conringius.</i>	22
<i>Chamavi ubi quondam habitavint.</i>	14
<i>Chemicæ dissertationes Conringii censorem Rottendorffium desiderant.</i>	22. f.
<i>Cherusci an condiderint Irmenburgum.</i>	17
<i>Christianismi in Saxonibus primordia.</i>	8
<i>Codex Regularum Holstenianus.</i>	26. 31. f.
<i>Cænobitæ Ludgeriani cur non patiantur se componi ad rigidas veterum regulas.</i>	32
<i>Collectio Romana Holstenii.</i>	27
<i>Comites de monte lapideo quinam &amp; cur ita dicti.</i>	17
<i>Conciliorum nova editio Labbei &amp; Cosartii. 52. 54. f. de ejus præfatione judicia.</i>	52. 55

## D.

<i>DæmonolatRIA priscorum Saxonum.</i>	7
<i>Damnatorum pœnas non fore perpetuas multi olim crediderunt.</i>	30
<i>Diploma quoddam seculi IX. editurus est Conringius.</i>	38
<i>Diplomatis Ludoviciani censuram idem edit.</i>	42

## E.

<i>Eminentissimi titulum recusat Fürstenbergius.</i>	61
<i>Engelbusius primum editus.</i>	16

## F.

<i>Ferdinandi Furstenbergii humanitas. 3. poëtica facultas, ib. epistola ad Senatum Acad. Juliæ 27. 35. f. ad Maderum. 72. ej. æstimatio apud alios.</i>	74
m 2	de

# INDEX.

*de Finibus Imperii opus denuo edere à Caesar. Majest. jubetur*  
*Conringius.* 77. 88  
*Franci veteres populi eorumq; origo & sedes. 14. qvi ex iis in*  
*Galliam commigrarint.* 14. f.

## G.

*G*allia Regis contra Batavos armorum felicitas. 48. non pu-  
*tatur fore constans. 51. invidiam excitat: an is pugnet re-*  
*ligionis causa.* 56  
*Gallorum exacta disciplina.* 71

## H.

*H*arudum antiquissima sedes. 13  
*Henricus de Hervordia non est idem cum Henrico de Er-*  
*fordia. 16. Hervordiensem sibi mitti a vidè cupit Fur-*  
*stenbergius. 12. 19. 20.*  
*Hollandica pecunia Germaniæ damnosa est.* 62. 64. seqq.  
*Holstenii liber qvidam posthumus valde placet Conringio. 28.*

## I.

*I*nnocentii III. epistolarum quarundam editionem à Fursten-  
*bergio flagitat Conringius.* 18  
*Irmenburgum Comitatus Purmontani unde nomen acceperit. 17*  
*an à Carolo M. fuerit destructum.* 17. f.  
*de Juris Germanici origine librum tertium edit Conringius. 4. f.*

## M

*M*arcomannorum antiquissima sedes. 13. cur iidem Bojoarii  
*post disti sint.* 14  
*Mon-*

# I N D E X.

*Montauserii elegi ad Furstenbergium.* 58. seq. de iis iudicia.  
53. 57.

*Monumentorum Paderbornensium prima editio.* 9. ej. censu-  
ram à Conringio petit Autor. ib. ej. laudatio Conringii 15. f.

*Monumentorum Paderbornensium editio II.* 12. quid in ea e-  
mendandum putet Conringius. 38. 40. f. distribuenda Au-  
tor mittit Conringio. 4. f. 52. 75. f. 80.

## N.

*De Nummaria re aliquid edere statuit Conringius.* 85

## O.

*Ostfriscis suis bonis salvam Gvardiam petit Conringius.* 55. 60

## P.

*Paderbornensis imperatoris historia.* 8

*Paderbornensis terræ singularis conditio.* 15

*Paderbornensem historiam edit Furstenbergius.* 72

*Paganiarum indiculus Capitulari Saxonico subiunctus an res*

*Saxonie priscæ illustret.* 7. f.

*Paganorum animas posse ex inferno, sanctorum precibus libera-  
ri, multi olim crediderunt.* 29. f.

*Pax inter Gallum & Belgas speratur.* 53. 64. 71. 74

*Piermontani unde dicti.* 17

*Pœmata sua distribuenda Conringio mittit Furstenbergius.* 19.

26. 34. eorundem distributio Conringii. 21. 23. 25. 27.

*Pœmata septem Illustr. virorum Furstenbergius distribuenda*

*mittit Conringio.* 48. 52. de iis bujus iudicia. 49. 57.

*Prædæ inter fœderatos partitio.* 53

De

# INDEX.

## R.

- De Republica Imp. Germ. librum jussu Casarei legati conficit*  
*Conringius.* 74  
*De Republ. Imperii exercitationes uno volumine edit* *Conringius.* 77. f. 81

## S.

- S**Alica lex ubi sit condita.* 15  
*Sedusiorum antiquissima sedes.* 13

## T.

- Turenus Casareos & fœderatos observat.* 71

## W.

- Windischgratii Comitum amicitiam expetit Furstenbergius.* 76

# FINIS.





HERMANNI CONRINGII

*AD*

STEPHANVM

BALVZIVM

Tutelensem,

*ET*

Hujus ad Illum

EPISTOLÆ.

HERMANN CONRING

NO

STEPHANVM

BALVIVM

Tucloclen

ET

Epist ad Illm

EPISTOLAE

I.

*Clarissimo & eruditissimo*

V I R O

HERMANNO CONRINGIO

STEPHANUS BALUZIUS

Tutelenfis

S. P. D.

**N**ter familiares sermones, quos invicem miscemus ego & Johannes Capellanus Vir excellens in omni genere laudis, incidit persæpe mentio de te, Vir Clarissime; eaque mentio semper fuit honorifica, ut de Viro, quem omnes plurimum amare & revereri debeant ob egregias animi dotes & summam eruditionem. Cum autem ante hos dies illi aperuissem consilium, quod ceperam, scribendi ad Clarissimum Virum Joachimum Hildebrandum, ut is ad me mittere vellet variantes lectiones ex codice Concilii Remensis adversus Arnulphum, cujus vetus exemplar, illud ipsum nimirum, ex quo prima editio prodit, extare in Bibliotheca Academiæ Juliæ affirmat Vir doctissimus in præfatione, ad libros Reginonis de ecclesiasticis disciplinis, obtulit se mihi Capellanus, effecturum se omnino confidens, ut tua mihi opera ad eam rem usui esset, neque dubitare se, quin tu pro eximia tua in homines bonarum literarum studiosos inclinatione lubentissimè faceres. Quoniam verò jam pridem optaveram

ut se mihi aliqua daret occasio intrandi in familiaritatem tuam, propter variam ac multiplicem eruditionem, quam deprehendi in lucubrationibus tuis: facile istam amplexus sum, ut qui semper valde amavi literas & literarum studiosos, & memet in eorum amicitiam, non improbanda, uti reor, ambitione, insinuare curavi à primis adolescentiæ meæ annis usque ad banc ætatem. Quo loco continere me non possum, quin mentionem faciam Illustrissimi ac celeberrimi Viri Petri de Marca Archiepiscopi Parisiensis, qui me admodum juvenem ad se vocavit, in domo sua per multos annos habuit, mecum studia sua liberalissimè communicavit, denique, ut sui in me amoris abundantiam mihi ostenderet etiam moriens, cum supremis suis consuleret, omnium schedarum ac lucubrationum suarum curam & sollicitudinem mihi uni reliquit: quo nihil mihi præclarius aut honorificentius contingere poterat. Deinde affirmare possum, quotquot sunt in Gallia & in hac præsertim urbe, qui famam aliquam habent inter literatos, eos homines mihi amicos esse, & studia mea adjuvare pro suo quemque virili. Idem à Te mihi polliceri ausim, Vir eruditissime, postquam à Capellano tuo meoque intellexeris quàm magnificè sentiam de tuis virtutibus, & quantus sit meus erga bonas literas amor. In præsentiarum autem indigeo auctoritate tua, qua plurimum, uti opinor, vales apud Clarissimum illum Virum quem supra nominavi, Joachimum Hildebrandum, uti eum borteris, quod illum sponte sua lubenter facturum puto, sed tamen borteris, ut ad me transmittat variantes lectiones ex codice illo Concilii Remensis. & si quæ alia venerandæ antiquitatis monumenta hætenus inedita illic extant. Multi sunt anni, Vir Clarissime, ex quo in gravissimum & pulcherrimum opus incubui, nimirum in collectionem eorum Conciliorum, quæ fugerunt diligentiam R. P. Philippi Labbei Presbyteri è Societate Jesu, qui aggres-

sus



*sus erat amplissimam omnium Conciliorum editionem. Ea nunc curatur ab alio ejusdem instituti Viro, & jam pene per-  
 ventum est ad finem operis. Institui autem, post peractam illam  
 editionem, e vulgare duos aut tres tomos eorum Conciliorum,  
 ut dixi, qui collectorum istorum diligentiam fugerunt. Itaq;  
 cum illi, Severinum Biniū secuti, omiserint in hac sua editi-  
 one acta Remensis illius Synodi, nescio quam ob causam, edi-  
 tioque illius quæ olim prodiit, nunc venerit in raritatem, exi-  
 stimavi esse officii mei, ut tam illustre Gallicanæ Ecclesiæ monu-  
 mentum meæ collectioni insererem: quod meum consilium lau-  
 dant, approbant, & sua auctoritate incitant multi viri docti,  
 & inter hos nonnulli etiam Episcopi. Fuere qui acta illa fal-  
 sitatis arguerent, interpolataque esse pronunciarent fraude &  
 ambitione Gerberti, qui per calcatum Arnulphum pergebat  
 ad Cathedram Remensem. Sed ista gratis, ut opinor, dicen-  
 tur. Et necessarium fortassis erit istas hominum de Gerberto  
 malè sentientium cogitationes seriò & graviter excutere. Qua  
 in re magno nobis adjumento erit vetus ille codex Academiæ  
 Juliæ, si modo ad me mittantur, uti spero, variantes illæ lecti-  
 ones quas à vobis efflagito. Adnotanda porrò erit antiquitas  
 libri manuscripti, ne quid editorem bonæ fidei latere possit.  
 Quod sitū, Vir eruditissime, aliquid habes, quod buic meo in-  
 stituto conducere possit, veluti Concilia aliqua provincialia  
 hæcenus inedita, aut veterum Pontificum Romanorum epi-  
 stolas, præsertim si quas habes similes epistolis Leonis III. à te  
 vulgatis, si istiusmodi monumenta habes, & mecum communi-  
 care velis, erit unde testatam facere possim universis bonita-  
 tem & humanitatem erga me tuam. Ego vicissim, si quid tibi  
 mea industria efficere poterit, tibi non deero. Vale, Vir Cla-  
 rissime & eruditissime. Lutetiæ Parisiorum III. Nonas Julii  
 MDCLXX.*

## II.

## STEPHANO BALUZIO

*Viro Illustri**S. P. D.*

**E**Go verò, Clarissime Baluzi, ab aliquot jam annis & magni æstimavi eruditionem tuam, & studium veri rectique dilexi. Simulac enim intellexi parte alterâ auctius prodiisse immortale Illustrimi Petri de Marcâ opus, quod prior editio desiderium excitaret, curavi illud ex Gallia mihi adferri; ibi verò statim deprehensum abs me est, eximiam illam indolem hospitis quondam tui quasi in te commigrasse. Ex eo usque magni te feci merito tuo: crevit verò tui amor, ubi accepi Romanæ censuræ iniquitate non moverite ab instituto, imò fortiori hoc fulmen animo abs te acceptum atque olim sit factum ab ipsomet Marca. Plurimum itaque exhilaraverunt me literæ tuæ inexpectatò oblatae: præsertim quia certo mihi illæ testantur, me quoque apud Te non in nullo esse pretio, & jam tum aperta mihi omnia ad sanctiorem tecum amicitiam imposterum colendam. Et verò non equidem agnosco in me illam doctrinæ vim, quam tua tribuit laudatio, nec quænam scripta mea hunc affectum tuum expresserint novi: amicitiam tamen posthac justâ me pietate culturum, audeo bonâ fide polliceri. Ut proinde possis jam operam meam tuo etiam jure imposterum flagitare, si visum fuerit commodum. Hildebrando literæ tuæ erunt indubiè acceptissimæ. Non poterit autem ille expectationi satisfacere, quia jam multos annos hinc abest, ἐπισκοπῇ Ecclesiarum integri amplissimi Ducatus Lyneburgici administrans, nec quod equidem sciam hic variantes lectiones quas expetis olim collegit,

legit, codice autem illò mss. nostro nunc destituitur. Igitur quo desiderio tuo satisfiat, ipsemet ego laborem hunc suscepi: contulique adeo codicem illum nostræ Juliæ Bibliothecæ membranaceum, quem scribendi ratio significat, minimum esse quingentorum annorum & notæ optimæ; cum Synodici libelli editione Wechelianâ, quæ post Flacianam, Centuriæ Ecclesiasticæ Historiæ Magdeburgensis quam appellant Decimæ cap. IX. insertam, altera & forte ultima est. Nec enim illa quam Chesnæus quarto tomo Francicorum scriptorum p. 101. collocavit, cum pessimo exemplo sit mutilata, non indigna est, quæ reliquis annumeretur. In conferendo notandisque variis adhibitam abs me justam industriam, sancte testor. Sed & jam tum utraque editio adeò est sibi similis, ut suspicioni sequiori non sit locus. Et sanè quod Baronius scribit Tomo X Annal. ad ann. 991. primæ editioni *intextas esse alias blasphemias & annexa mendacia*, mera est ærugo animi Curiae Romanæ amore nimio infecti. Flacii verò bonam in edendo fidem abunde utrique testari potest, adhuc etiam, qui nobis superest mss. codex, *κτῆμα* olim ipsius Flacii. Nec enim quod omiserit capitulum LVI, quod in codice nostro additum, à mala ejus fide est, sed errore; quia videtur credidisse Africanam illam alienam esse à Gerberti libello, & à librario perperam assuta, quodq; jam tùm Centuriæ quintæ fuerint inserta. Verè tamen partem ultimam libelli constare Africanis illis, potuisset discere ex indiculo capitulorum, & sine capituli vicesimi septimi. Sed & ceu ante dixi, in nostro codice Africanis illis titulus apertè est inditus *Capituli LVI*, quamvis à Flacio deletus. Ego cùm observaverim, à Gerberto passim illa Africana laudari tanquam normam, ad quam Romani Papæ potestas circa Episcopalia judi-



judicia sit exigenda, & ab illo esse libello conjuncta, nostrumque codicem hac etiam parte esse eximium; quo justa integritas libello possit per te reddi, etiam illorum varias lectiones notare, duxi pretium operæ. Quoniam verò & Wecheliana editio destituitur illis Africanis, imo & codex MSS. unde expressa est, desit in Capitulo LV; institui collationem manuscripti nostri cum illo Codice Canonum Dionysii Exigui, qui prodiit Lutetiæ curâ Christophori Justelli anno seculi hujus quadragesimo tertio. Nisi quod Canones Concilii Nicæni Africanis nostris inserti non potuerint à me commodè cum Dionysiano illo codice conferri, quia in Canonum illo codice Nicæni canones reperiuntur, quales illos vertit Dionysius, in Gerbertiani autem libelli Africanis, quales ex Græco transtulerunt bini illi interpretes Africani; quæ versiones nimis multum differunt. Poterit autem illa versio vetus facili negotio promi ex Conciliorum collectione Suriana: quæ indubiè ad manum tibi est. Omnes verò illas abs me notatas mitto: & quidem primâ chartæ facie, primorum quinquaginta quinque capitum, subjuncto indiculo eorum quæ continentur capitulo LVI: alterâ Africanorum quæ dixi. Longè gratissimum fuerit, libellum illum tandem aliquando reliquis Conciliis nullâ mutilatum parte videre adjunctum. Optimè profectò mereberis, doctissime Baluzi, isthac curâ de Sacerdotio pariter ac Imperio: & quo magis in odio est libellus Curialium, eò major erit apud intelligentes, bonos, & veri studiosos, nominis tui gloria. Et verò Romanæ communionis nemo hæctenus præ Curiae metu ausus fuit libellum illum publicare (nam & altera editio, nisi fallor, Bongarsio debetur, perinde atque Synodi Parisiensis de Imaginibus) imò nemo ausus fuit ejus omne argumentum vel recitare; ipso-

met



met Marcâ l. 7. cap. 25 dissimulante, cùm ea quæ ab Arnulpho Aurelianensi cap. 28. acerrimè dicta sunt adversus iniquos conatus Romanenses fictâ Damasi Epistolâ subnixos, tùm illud Gerberti studium intra cancellos ab Africanis quondam Patribus positos Romanam jam tùm gliscentem *μοναρχίαν* coërcendi. Nusquam Baronius commotior est quàm in confutando libello isthoc. De bono illo Gerberto non dubitavit apertè affirmare in historia anni 999. *Nullum hætenus in Petri sedem fuisse promotum, qui eandem sedem ita prosciderit ut Gerbertus.* Tantum abest, ausum quenquam vel laudare vel defendere ab Aurelianensi Arnolpho vel Gerberto dicta. Nec enim cùm scriberet Archiepiscopus Spalatensis illa Baronio opposita, l. 4. num. 46. usque ad 62, Romanarum amplius erat partium, non certè cùm ederet. Nescio an ferat tuum institutum, adjici Synodo illa quæ in Francofurtenſi editione annexa sunt Gerbertiana ad Walderodum Argentoratensem & Siguinum Seronensem. Si visum fuerit addere, ex re fuerit adjungere etiam orationem illam Gerberti, quam, ceu habitam in Concilio Mosomensi, Centuriatores ex nescio quo veteri codice (nec enim in nostro legitur) pag. 517. ediderunt; cum ejusdem sit argumenti. Interest sanè veritatis, non perire etiam illa, imò cum cura legi. Cæterum perplacet profectò tuum præclarum propositum de evulgandis Conciliorum hætenus prætervisorum tomis. Libentissimè sanè symbolam conferam, si quam potero. Vereor autem ut possim, cum parum instructi simus à manuscriptis, & in Germania rarissimæ fuerint habitæ Synodi, saltim ab ævo Gregorii septimi: Episcopis ad seculares curas Principalibus dignitatibus, quas sunt consecuti, protractis, & Papis Episcopalem auctoritatem sua nova monarchia

narchia è medio tollentibus. Excutienti tamen nunc adeo mihi Centuriam decimam, occurrit pag. 442. Synodus Romana à Joanne XII. contra Leonem habita. Expres-  
sit illam Flacius ex mss. veteri libro, quem legere me me-  
mini in Bibliothecâ nostrâ Juliâ. Illius editionem si pa-  
rare placuerit, mittam quas reperero Varias. Quod si  
quæ alia hujus argumenti inciderint in manus, signifi-  
cabo. Papalium literarum monumenta memini in nostris  
mss. complura mihi lecta olim: sed forte jam alibi illa  
sunt edita, jamque dudum non sunt inspecta. Ut proin-  
de hac vice nihil possim promittere. Quoniam tamen in  
Codice isthoc mss. qui Reginonem & Synodum Remen-  
sem comprehendit, præter Apologiam, qua causam su-  
am Ebbo Remensis defendere est conatus, comparet Pa-  
schalis Papæ illud Breve, quo Christianæ doctrinæ per  
Septentrionalia regna propagatio Ebboni est commissâ,  
illud indicare Tibi, officii mei esse duxi. Nec enim mo-  
rari te amplius hac vice quidem decet. Tu verò, erudi-  
tissime Baluzi, vale bono literario; & certò Tibi per-  
svade, fore semper Tui studiosissimum

Helmstadii 24 Julii 1670.

*Hermannum Conringium.*

III.

*Clarissimo & eruditissimo Viro*

HERMANNO CONRINGIO  
STEPHANUS BALUZIUS

*Tutelenfis*

S. P. D.

*SVavissima litera tuæ mihi reddita fuerunt his diebus à  
Clarissimo Viro Joanne Capellano amico meo tuoque, Con-  
ringi*

ringi Vir Clarissime. Dictu autem difficile est, quanta me lætitia affecerint, qua voluptate perfuderint. Non solum enim humanissime ad meas respondisti, sed admodum erudite, ut decebat Virum eruditissimum, ac præterea ad me misisti variantes lectiones Concilii Remensis adversus Arnulphum, denique mihi tuam omnem operam amantissime polliceris. Ad quæ singula tibi respondebo pro tenuitate ingenii & eruditionis meæ.

Primum gratias ago quod de me ita judicas ut in me putes esse aliquam bonarum rerum cognitionem ac studium recti: deinde quod laudas fidem ac reverentiam meam erga memoriam magni Viri Petri de Marca Archiepiscopi Parisiensis, optimi Patroni ac Mæcenatis quondam mei. Ingratissimum enim verò me esse oportuit, si pro summis ejus in me beneficiis, præsertim pro eximio illo & non vulgari amore, quod me prosequebatur, non rependissem saltem gratias quas poteram. Poteram autem aliquas rependere occasione editionis librorum de Concordia Sacerdoti & imperii; ad quam insuper obstrictus eram supremo morientis mandato, qui paulo ante abitionem ex hac vita suam, mihi curam editionemque lucubrationum suarum commiserat. Feci itaque, quod imperaverat, ea fide & ea diligentia quæ à Viro bono expectari poterat. Viderint illi qui adversum me propter hanc editionem clamitant, quas justas conquerendi causas habeant. Mea mihi conscientia pluris est quàm hominum sermo, ut Tullianis verbis utar. Neque enim est cur me pœnitere debeat istius editionis, tametsi adversum me propter hoc facinus excitata sit gravis illa tempestas, cujus rumorem etiam ad vos usque pervenisse intelligo ex literis tuis. Laudarunt interim quotquot bonas literas amant, quotquot veri ac recti amantes sunt. Adeo autem acceptus fuit hic liber iis qui bonarum literarum studio ducuntur, ut altera illius libri editio procuranda fuerit, sic absorpta priore,

B

ut ne



ut ne unum quidem exemplar venale remanserit apud Typographum, Hanc porro postremam editionem variis observationibus illustravi ex antiquitate petitis, editis etiam illis aliquot veterum temporum monumentis, quæ nondum in lucem prodierant, & inter alia, quod ad vestram Germaniam spectat, alligatione, ut tum vocabant, sive oratione Bonifacii VIII. pro confirmando Rege Romanorum Alberto, quæ extat in Veteri Codice Bibliothecæ Colbertinæ. Cum vero liber quintus, in quo agitur de dignitate & auctoritate Legatorum sedis apostolicæ, imperfectus esset, illum supplavi, additis nimirum integris quadraginta capitibus. Quo loco vides, eruditissime Vir, incidisse me necessario in vexatissimam controversiam de Vicariatu Episcoporum Thessalonicensium per Illyricum, necessumque etiam præterea fuisse, ut excuterem Vicariatum Episcoporum Arelatensium per Gallias & septem provincias. De sequentium seculorum malis exemplis, quæ à Baronio ipso & aliis nostrarum partium scriptoribus damnantur, de rapacitate nimirum & ambitione fastuque Legatorum posteriorum temporum, admodum multa dixi, sed necessitate potius suscepti argumenti quàm libidine detrahendi, tantum ne viderer deseruisse vadimonium. In fine verò libri septimi, in quo agitur de judiciis canonicis Episcoporum, addidi ex meo nonnullas observationes circa depositionem Arnulphi Archiepiscopi Remensis; quam nonnulli tum putabant nullam esse ipso jure, quia facta fuerat, ut agebant, præter Romani Pontificis auctoritatem. Redeo nunc ad Concilium Remense, illud nimirum in quo illa Arnulphi dejectio decreta est; cujus variantes lectiones cum tu ipse adnotaveris, tum manu propria descripseris ex Veteri codice Academiæ Juliæ, duplicatum beneficium tribuisti. Prima illius editio debetur Matthiæ Flacio Illyrico, secunda Jacobo Bongarsio, uti tu quoque scribis,



scribis, id quod apud nos est constantissimum. Editionem Ducheſnii, utpote mutilam, superioribus duabus annumerandam non esse tecum omnino sentio. Vir ille doctus satis se consilio suo facere existimavit, si ea tantum exciperet quæ ad historiam pertinebant. Mibi animus est Synodum illam rursum edere integram, & emendatissimam, quantum fieri poterit. Adjungam autem epistolas Gerberti ad Wilderodum & Siguinum, tum etiam orationem ejus in Concilio Mosomenſi habitam, quam compertum habebam editam fuisse à Centuriatoribus. Multam profectò voluptatem percepi cum ad eam literarum tuarum partem ventum est, in qua me admones extare in codice MS. Academiæ Juliæ caput LV. ejusmodi Synodi, quod deest in editionibus, illo autem contineri canones Africanos qui de judicandis intra provinciam Episcopis decreverunt. Nam canones Africani per diu viguere ac vim legum obtinere in Gallia, nimirum, opinor, usque ad tempora Gerberti. Nam quis illos posthac laudare ausus esset, quando pro sanctissimis legibus irrepsit acre Legatorum imperium & seua libido dominandi? Itaque omiſſa vetere disciplina, & exuta priscorum canonum, tanquam obſoletorum, reverentia, sola deinde per multum ævi valuit inter nos auctoritas epistolarum pontificiarum quæ editæ sunt in collectione Isidori, præcipuè verò postquam Decretum Gratiani, quod ex istiusmodi decretis ut plurimum constat, publicæ legis vim roburque obtinuit in Occidente. Sola, inquam. Nam quis tum meminisse poterat veterum regularum in tanta antiquitatis oblivione, quæ omnium mentes excæcaverat per eas tempeſtates? Accesſit poſtea immenſa illa decretalium epistolarum farrago, quæ poſt Nicolaum & Alexandrum ſecundum emerſit. Sunt ſane multa in his decretalibus, quæ ſi fuiſſent bono ſeculo nata, poterant & ipſa inter bonas merces numerari. Omnino

enim qui illas condidere, magni ut plurimum Viri fuerunt. Quis enim Innocentio tertio, ut istum exempli causa sumamus, doctior unquam fuit inter eos qui Romanam cathedram tenuerunt? Occasio postulat ut, quoniam Innocentii III. mentionem feci, tecum, Vir clarissime, communicem consilium & institutum meum. Institui itaque nova editione donare epistolas ejusdem Pontificis, additis interim ad sex libros jam editos aliis quatuor qui nondum emissi sunt in lucem; quorum tres ultimos mihi ex veteri codice MS. suae Bibliothecae suppeditavit Vir illustrissimus & eruditissimus Franciscus Bosquetus Episcopus Mompeliensis. Ad ambue editioni novam collectionem Decretalium ejusdem Pontificis, hactenus ineditam, ex regestis trium priorum annorum pontificatus Innocentii confectam à Raynero monacho Pomposiano, agente tum Innocentio quartum pontificatus annum. Et quia Gesta Innocentii, quae cum quatuor ultimis libris epistolarum ejus edita jamdiu fuerunt ab illustrissimo Episcopo, quem paulò ante nominavi, navis ac mendis scatent ultra quam dici potest, dabo rursum illa emendatissima ope duorum veterum codicum manuscriptorum, quorum unus extat in bibliotheca Regia, alter in bibliotheca illustrissimi Viri Caroli Mauricii Tellierii Archiepiscopi Nazianzeni & Coadjutoris Remensis. Hæc tecum, Vir clarissime, de editione illa, cujus magna pars jam confecta est. Puto Synodum Romanam à Joanne XII. contra Leonem IX. habitam bona fide editam fuisse. Si quid tamen in codice MS. repereris diversum ab editione, & ad me miseris, erit unde in nova mea Conciliorum collectione testatum publicè non semel faciam amorem & affectum erga me tuum. Ebbonis Archiepiscopi Remensis Apologeticum ex codice MS. Eminentissimi Cardinalis Barberini edidit Dominus Lucas Dacherius monachus Benedictinus in tomo septimo Spicilegii veterum Scriptorum, sed aliquot in locis mutilum, ac valdè depravatam.

Quare

Quare magnam à me gratiam inibis, si variantes lectiones ad memiseris. Si totum illum apud vos non habetis, aliquam Apologetici illius partem reperiēs in tomo secundo Duchesnii pag. 342. linea 15 usque ad lineam 33. & pag. 341 linea 22 usq; ad lineam 32. Peto autem à te, optime Conringi, ut ad me mittas epistolam Papæ Pascalis de legatione Ebbonis ad septentrionalia regna, quam extare ais in eodem codice Academiae Juliae, in quo descriptum est Concilium Remense adversus Arnulphum.

Causa Ebbonis me admonet, ut adhuc opem tuam postulem, & in re quidem gravissimi momenti. Depositionis ejus meminit Rhabanus Archiepiscopus Moguntinus in epistola ad Heribaldum Episcopum Autisiodorensē: quæ, quia continet responsa Rhabani ad varias interrogationes Heribaldi, præcipuè circa pœnitentiam, sub titulo Pœnitentialis Rhabani edita est à Stevartio in tomo singulari insignium auctorum. In capite XXXIII. illius epistolæ suæ Pœnitentialis agitur de eucharistia. Nam Heribaldus consuluerat Rhabanum, ut ex eo sciret utrum eucharistia, postquam consumitur, & in secessum emittitur more aliorum ciborum, iterum redeat in naturam pristinam quam habuerat, ante quam in altari consecraretur. In responsione autem Rhabani, prout edita est, quædam leguntur, quæ videntur non esse Rhabani. Itaque si vetustum exemplar istius epistolæ suæ Pœnitentialis extaret apud vos, operæ pretium esset ad me quamprimum mitti varias lectiones præfationis saltem & duorum ultimarum capitum. Felices autem essemus omnes, si eodem tempore ad me mitteres epistolam Rhabani ad Eigilem Abbatem Prumiensem; de qua mentionem facit ipse Rhabanus in capite XXXIII epistolæ ad Heribaldum, tum etiam vetus auctor anonymus, qui tractatum de eucharistia edidit per illa tempora, quem verò publici juris fecit R. P. Cellotius in appendice historiæ Gottschalci.



*Nam epistolam illam ad Eigilem, tametsi diu quæstam, nondum vidimus.*

*Satis longam esse epistolam video. Sed tamen antequam manum de tabula tollam, paucis tecum agam de collectione Reginonis, cujus novæ editioni nunc incumbunt operæ typographicæ. Persvasum mihi omnino est Burchardum magnam partem suæ collectionis, & id quidem quod pulchrius ac nobilius est, accepisse ex Reginone, ut ostendam in mea præfatione. Adnotavi autem in margine numeros librorum & capitum Burchardi in quibus extant canones & alia decreta collecta à Reginone. Adnotavi præterea, quantum fieri potuit, ex quo quæq; Concilio & capitulari sumpta sunt. Tum aliquot in locis observationes meas assero, seu potius varias lectiones indico, ex vetustissimis libris Capitularium. Quod totum de industria suscepti faciendum, ut post editionem istam Reginonis nihil reliquum sit posteriori diligentia. Animus est addere in calce epistolam Rhabani ad Heribaldum, cujus varia fragmenta diversis in locis adfert Regino, ut in eodem volumine lector eruditus habeat simul cum fragmentis epistolam integram. Spero editionem illam absolutum iri ante initium anni sequentis. Pollicitus sum amplissimo Viro Joachimo Hildebrando missurum me ad eum exemplar unum illius editionis, si modo mihi personam indicaverit, cui committi tuto possit. Simul autem mittere curabo aliud exemplar pro te, Vir eruditissime, velut pignus meæ ad versus te reverentiæ.*

*Habes, Vir optime & eruditissime, longissimam epistolam, nec insuavem tamen, opinor, nec infcetam, cum tractet de rebus literariis & ad Dei religionem pertinentibus. Vides autem quàm familiariter intra verim in tuam familiaritatem, quàm liberè utar bonitate ac humanitate tua. Tu vicissim, si me amas, utere opera mea. Nihil enim erit quod in tui gratiam*



tiam facere recusem. Nam illud tibi sæpè dicendum est, Conringi Vir eruditissime, valdè cupere me ut certus esse possis de cultu erga te meo. Velim etiam ut, sicubi se occasio obtulerit, meo nomine salutes clarissimum Hildebrandum, simulque illum admoneas, exspectare me ab eo varias lectiones ex codicibus Moguntino & Viennensi, quas edidit post Reginonem emissum. Vale, Vir doctissime, rem literariam ornare perge, & me semper ama tui nominis studiosissimum. Lutetiæ Parisiorum VI. Idus Octobris MDCLXX.

## IV.

## STEPHANO BALUZIO

S. P. D.

**L**iteræ Tuæ, clarissime Baluzi, benevolentiaæ atque multæ eruditionis nomine, quarum sunt plenissima, supraquam dici potest, me exhilararunt. Serius tamen respondeo, quod in aulam ad consilium evocatum me iri conscius, ibi Augustam Bibliothecam, integro libro mihi laudatam, ac proinde nec Tibi fortè ignotam, super desideratis manuscriptis, priusquam responderem, consulere, operæ pretium duxi. Et verò factum illud est abs me cum cura, sed hebdomade demum præcedente & expectatione falsus. Interea verò & Hildebrandum compellavi, aliumque amicum super variis lectionibus operis Reginonii. Quas cum impetraverim die hesterno, statim mitto; quo anticipent fortassis manum ultimam novæ Tuæ editionis. Quam ipse etiam velim emendatissimam esse, quia nostra justo negligentius à typographo habita, & tamè liber iste est præclarus, & magnæ olim auctoritatis. Desidero sanè annotata Tua in opus utilissimum, etsi à cleri hodiernis moribus toto dissideat cœlo. Rhabani ad Heribaldum

baldum epistolam quod addere institueris, gaudeo. Quæsi etiam illius manuscriptum & in Augusta & in nostra bibliotheca : sed fui frustra. Perinde ac Epistola ad Eigilem, (qui videtur esse non Prumiensis, sed Fuldenfis aliquis Abbas, & quidem is, cui proximè Rhabanus succedit) non comparuit. Stevartianæ editionis cap. XXXIII. indubiè mendosum est : bona tamen parte videtur esse à manu Rhabani. Non à Stevartio autem primò Pœnitentialis nomen illi est Epistolæ inditum : sed ipse etiam Anton. Augustinus in notis illius Pœnitentialis, quod Rhabanus Otgaro Archiepiscopo inscripsit, videtur non distinxisse à Pœnitentiali. Ubi otium fuerit inspicere illas eruditissimas notas, dabitur fortè occasio ex Ivone & Gratiano nonnulla Epistolæ loca emendandi. Nec enim dubito ad manum esse Canones pœnitentiales cum A. Aug. notis Venetiis A. 1584. editos.

Ebbonis (ita enim rectius abs Te etiam appellatur, quàm Ebonis ut vulgo audit : quod nomen hodieque Frisii meis, ut alia veterum Germanorum nomina, per est familiare) apologeticus, cum Paschalis Papæ epistola, hoc ipso anno apud nos ex MS. Academico me hortante additus est novæ editioni Historiæ Adami Bremensis. Mittam proximo vere librum integrum. Quin addam tum & mea nonnulla, quorum partem jam pridem Illustris noster Capellanus possidet : si quide eorum lectione non indignum judicaveris. Et verò ipse etiam desidero censuram Tuam, saltem super iis, quæ libro de Origine Juris Germanici c. 14. 15. 16. disserui, de Civili & Ecclesiastico Jure, quale illud fuit Carolo M. & Ludovico Pio imperantibus. Poterunt autem sine sumptu & tutò ad Te omnia deferri, si Illustrissimus Colbertus curandi per mare negotium, Regio illi, quem

quem vocant Agenti & Factori qui Hamburgi est, demandaverit. Imò possit ille & literas nostras quamoptimè curare, si fuerit iustus.

Romanam illam à Joanne XII. contra Leonem IX. habitam Synodum conferam cum MSS. nostro. Utinam autem possem & qua alia parte Tuam Conciliorum collectionem adjuvare! Sed quantum hætenus quidem novi, apud nos ejus nihil est. Nisi fortè nondum edita sit Epistola Ludovici Pii ad Episcopum Salisburgensem, qua simul Aquisgranenses Canones pridem vulgatos transmisit. Hæc enim unà cum illius Synodi Canonibus in bibliotheca nostra latet MSS. Ipsi Aquisgranenses, ut & Moguntini ejusdem ævi Canones magnâ copiâ etiam apud vos supersunt. Nec vobis possunt deesse Basileensis Concilii acta omnia: quorum nonnulla habemus MSS. In illa Decretalium sequioris ævi immensa farragine, nonnullas reperiri meliori dignas sæculo, & ipse omninò agnosco, ut &, inter eos, qui Romanam cathedram tenuerunt, Innocentium III. fuisse tum doctissimum. Non ausim tamen dicere, Decretalium conditores ut plurimum fuisse *viros magnos*: si quidem eruditionem spectes, non dignitate. Institutum Tuum de nova eaque auctiore editione Epistolarum Innocentii III. perplacet: nec enim mihi hætenus visi sunt, nisi libri duo, typis quidem excusi. Visæ autem sunt & aliæ quam multæ ejusdem Innocentii ex Vaticano Codice descriptæ ab Illustrissimo Principe & Episcopo Paderbornensi, melioris omnis literaturæ peritiâ hodie illius ordinis longè maximo. Ex quo libro multa didici historiam rerum Imperii illustrantia: sed pridem desiit in usu meo esse. Fuere autem res Germanicæ, quod novisti, tum perturbatissimæ, Principum de Imperiali dignitate funestis disidiis, ab Innocen-



tio excitatis partim, certè fotis. Uſus illo Vatiſcāno Codice videtur in Annalibus ſuis concinnandis Odoricus Rinaldus, Epiſtolis aliquot Pontificiis inde promptis. Memini me hujus Innocentii Epiſtolas aliquot legere in Codice MSS. noſtræ Bibliothecæ Juliæ. Sed illæ fortasſis jam tum in lucem prodierunt Illuſtriſſimi Buſqueti cura (nec enim editionem ejus vidi) aut certè Tuos inter quatuor libros reperiuntur. Avidè ſanè deſidero novam Tuam editionem, ſaltim ad exactiorem parandam rerum Imperii notitiam: quanquam & alia quam multa hinc peti poterunt ſacræ monarchiæ monumenta.

Quod Gerberti Synodo Remenſi addere velis Epiſtolas ejusdem ad Wilderodum & Siguinum, ut & orationem in Concilio Moſomenſi habitam, perplacet. Mirum verò ni exſtet utraque illa Epiſtola in Codice MSS. Maſſoniano, unde reliquarum Epiſtolarum volumen Pariſiis prodiit. Videntur ſanè rejectæ omnes, Remenſe illud negotium Romanæ curiæ inviſum ſpectantes Epiſtolæ, ab editore, offenſæ metu: Et non niſi per imprudentiam eſt adjecta iis Ottonis III. Imperatoris, Sylveſtro facta donatio, quæ uſq; adeo pupugit Baronium, & quam ipſimet Sylveſtro, æquiſſimo Papalium rerum cenſori, tribuere equidem non dubito. Cum illa verò, quæ dixi, adjecturus ſis, non poſſum non ſperare additum iri quod haſtenus Synodo ad integritatem deſuit cap. LVI. quum & poſtulet idipſum libri argumentum, & citra juſtam Curia indignationem poſſit adjici, utpotè cum ſit depromptum ex ipſomet Codice Canonum Romano, tot ſeculis olim recepti uſus, & ab ipſimet Pontificibus Gallicanæ Eccleſiæ commendato, donec Pſeudo-Iſidoriana commenta præplacere cœperunt. Optimè verò judicas & candidè, circa illa Gerberti tempora, præ-



prævalentibus sensim aliis Pseudo-Isidorianis, exspirasse sanctissimæ Ecclesiæ Leges veteres, proque illis acre Legatorum imperium & sævam dominandi libidinem irrepsisse. Et verò ipsa memoria Codicis illius Canonum sæculis periisse videtur. Nec enim repertus temerè, qui ejus meminerit: & tandem non nisi rarissima exempla superfuerunt. Et vero illi qui Gregorii XV curâ Corpus Canonum recensuerunt, non nisi tria illius veteris Canonum Codicis Exempla in Bibliotheca Vaticana sibi reperta tradiderunt, viri utique diligentissimi pariter & doctissimi. Is etiam qui Moguntia anno sæculi superioris vigesimo quinto Codicem illum primus edidit, quid ederet nescivit, & non nisi tribus MSS. summâ curâ conquisitis usus est. Vix totidem vidit in Gallia vestra Justellus. Non mirum verò, excussum tandem manibus illum Codicem, ejusque omnem auctoritatem abolitam, cum illimitatæ Monarchiæ studium, quod ad summum fastigium est ab Hildebrando erectum, non possit ferre veterum Canonum cancellos, aut hætenus recepta legum jura: quorum utraque usque adeò à Monarchicis Curia institutis disident, ut, me quidem iudice nulla possit sacerdotii illius & Imperii concordia unquam vel expectari. Miror autem quàm maximè singularem providentiam divinam, quæ fecerit in ipsum Romanum Codicem Canonum recipi per Dionysium Africanum, illa etiam, quæ improbos Zosimi jam & successorum conatus aperte prodiderunt pariter & refrenarunt. Absq; sanè illâ Dionysii curâ fuisset, nec vola ejus rei amplius nec vestigium fortè superesset: perinde ac reliqua perierunt monumenta plerorumque alibi improbè item dominandi gratiâ actorum Romanæ sedis; vel certè ne in lucem prodirent prohibentur à supersticiosæ Curia cultoribus.

Ea res cum gaudio me revocat ad initium Epistolæ Tuæ, ordine retrogrado. Mirificè enim me affecere quæ scribis de contemptâ illâ Romæ adversum Te excitata tempestate & faventibus bonis omnibus Marcani operis non tantum nova editione, sed ejusdem etiam ab eruditissimo & candidissimo ingenio Tuo factis augmentis. Qui enim non complectar fortem adeo animum & studiosum veri rectique? Facit verò perspecta eruditio Tua, ut propè ardeam desiderio illius tertiæ editionis, cum primis autem Tuorum augmentorum. Nec enim dubito, responsura expectationi etiam illa, ut Tua, quæ hætenus vidi, cætera. Occasionem Vicariatui Thessalonicensi hætenus credidi equidem datam, partim à Sardicensi Concilii duobus istis notis Canonibus, partim quod non tantum Occidentalis Imperii sex diocesebus omnibus, sed etiam Orientalis duabus illis Macedoniæ & Daciæ, nullum Patriarcham, seu secundum, seu quartum Oecumenicum Concilium (in quibus primò omnium de Patriarchis aliquid est constitutum) dederit, quo Romana ambitio potuerit coerceri; Sardicensium Canonum improbo prætextu, jam tum olim Episcopaliū controversiarum judicium primū per Legatos, deinde per Vicarios sibi vindicans: cum primis ex quo primatum suum Juri divino non dubitavit tribuere, quod, nisi fallor, primū cœpit circa initia seculi quinti Christiani, Sardicensibus Canonibus nihil tale agnoscentibus. Hæc equidem credidi hætenus: sed jam Te audire vehementer desidero: eoque proximo vere *σὺν ἡμῶν* novam illam Tuam editionem adferri curabo. Legam tunc & Bonifacii quam memoras Epistolam: superbam indubiè & iniquam si non regno vestro saltim dignitati Imperii: ut tantum non omnia fuere Paparum à Gregorii Septimi ævo.

Si

Si non obruerer negotiis, possem facile justum volumen dare ex MSS. talium bullarum & brevium. Nunc hoc agere vetant infinitæ aliæ occupationes. Sed pecco in tempora etiam Tua, Clarissime Baluzi, melioribus dicata & impendenda, ista hac prolixitate mea. Agnosco culpam & deprecor. Veniam tamen, spero, peccanti dabis, quia detinuit me & pristinus harum literarum amor, & Tui studium juvandi: imo & ille erga me Tuus animus amicus planè, qualemque nec merui, nec exspectavi. Hunc uti porrò mihi serves, etiam atque etiam rogo. Habebis vicissim ad omnia amicitiae officia & prompta obsequia

Helmeſtadii in Acad. Julia  
19 Nov. ipſo natali  
die ſexageſimo quinto  
Anno 1670.

*etatem omnem paratiſſimum*

*T.*

*Hermannum Conringium.*

P. S. Qui hæc adfert juvenis, & genere apud nos natus est bono, ac insigni est, cum virtute, tum eruditione. Eoque rem & Te dignam, & mihi perquam gratam præstiteris, si quid illi benignè feceris. Poterimus illo, quamdiu Parisiis vixerit, fido uti internuncio & comodo. Illustriſſimo Colberto & publici & mei quoque privatim boni cauſſa vitam longam & firmam precor valetudinem. Ulli me & mea studia quæſo commendes.

Jam clauſeram, cum ex clauſtris Bibliothecæ Academicæ adferuntur Rabani MSS. duo: alterum est Pœnitentiale illud Othgario Moguntino inſcriptum, alterum audit ſumma doctrinæ Chriſtianæ. Prius idem est cum eo quod publicavit A. Auguſtinus: Poſterius num ſit Rabani dubi-

to, quia titulus est à manu recente, & habentur ipso libello quæ non sapiunt Rabani ævum. Maluisssem videre Epistolas ad Eigilem & Heribaldum, quas quæsieram.

## V.

*Clarissimo & eruditissimo Viro*

HERMANNO CONRINGIO  
STEPHANUS BALUZIUS

Tutelenfis

S. P. D

*I*ongissimas ad te nuper literas dedi VI Idus Octobris, ad quas cum responsum non sit à te Viro humanissimo, par est existimare illas tibi redditas non fuisse. Earum ergo exemplum ad te mitto.

Absoluta tandem Reginonis editione, nihil mihi jucundius accidere posset quàm si se aliqua favorabilis occasio daret ad te mittendi unum ejus operis exemplar. Spero autem reperi- tum iri posthac. Interim ad Te, Vir eruditissime, mitto præfationem meam, ut ex ea intelligas quid præstitum à me sit in hac editione. Simul videbis redditam aliquam gratiam tuæ in me benevolentiae, & datam in publicum meæ adversum te reverentiæ testificationem. Quod ita interpreteris velim, ut existimes omnino dictum ex animo esse. Plurimi enim facio ingentes virtutes tuas.

Pollicitus in hac præfatione sum novam Capitularium Regum nostrorum editionem emendatam ad vetustissima exemplaria, quorum aliqua laudo inter Notas. Si quid habes nondum vulgatum, quod huic collectioni addi debeat, possem id ad te petere meo jure, ut tuis verbis utar. Attamen illud, qualecunque erit, debere malo tuæ humanitati, quàm juri meo, quod alioqui ex eadem humanitate tua profectum est.

*Præ-*



*Præterea si veteres Capitularium libros manu scriptos habetis, operæ pretium erit variantes lectiones ad me mitti, ut etiam Germania vestra suam opem conferat ad donandas meliorem luce vetustas Francorum ac Germanorum leges. Verum quoniam istud plurimi tædii negotium est, nolui ut illud in te suscipias, Vir clarissime, sed eam curam derives in aliquem juvenem istarum rerum studiosum. Literas ad amplissimum Virum Joachimum Hildebrandum scripsi VI Kalend. Octobris. Nescio autem an ad illum pervenerint. Multam illi salutem ex me dicito, & simul vadem te ei pro me præsta missurum me adeum exemplar Reginonis quod pollicitus illi sum. Vale, Vir Clarissime & eruditissime, & semper memineris studii erga te mei. Lutetiæ Parisiorum XI Kalendarum Martii MDC LXXI.*

## VI.

## STEPHANO BALUZIO

Tutelenſi,

*Viro clarissimo & eruditissimo*

S. P. D.

**Q**Uum hodie traderentur, quas XI Kal. Mart. Lutetiæ exarasti, Clarissime, eruditissimeque Baluzi, nescio equidem dolore magis an lætitiâ affectus sim. Magno scilicet dolori fuit, non redditum Tibi responsum meum, adeas quas VI. Id. Octobris dedisti. Et verò longè prolixiores quàm fuerant illæ Tuæ, reddidi statim 19 Novembr. de omni Tuarum argumento disserens. Imò mihi, factâ à doctissimo amico diligente collatione MSS. nostri Reginonii Codicis cum Hildebrandina editione, quod hæc Typographicis operis iusto negligentius

us fuerit curata, numerosas varias lectiones. Sperans has in tempore aventuras, priusquam ultimam manum Tuæ editioni adhiberes, quod ante Calend. Januarias futurum credidi. Illa mea cum accepisset curanda Vir Amplissimus, mihiq; amicus, qui filio suo per illa aditum ad gratiam Tuam parari voluit, mihiq; significari iussisset, jam tum XXVI Decembr. Lutetiam omnia salva advenisse: equidem vixi ex illo securus, tantum Juvenis illius Lutetiæ degentis Epistolam unicè exspectans, tuæ longius indulgens tempus. Usque adeò igitur jam frustratus, plurimum sanè turbato sum animo. Nec tamen ineas iterum descriptas, ut nec Reginonias varias adhuc denuò mitto: quoniam spero nihil meorum periisse, sed hæere alicubi: brevi autem fore, uti rectè tradantur. Quod uti fiat quantocius, filii illius, quem dixi, Patrem urgebo. Ut hætenus autem dolorem mihi pepererunt literæ Tuæ, ita, Clarissime Baluzi, eadem grandi mihi sunt gaudio, luculentissimo non uno benevolentia testimonio. Præsertim, quod advenerint in comitatu priorum humanissimi adfectus & eruditionis plenissimarum, simulque præfationis in Novam Tuam Reginonis editionem; quam immerita mei laudatione utinam tamen non maculasses! Enimverò non in levi felicitatis parte colloco, Tibi Viro Eruditissimo placere: probe tamen tenuitatis meæ mihi conscius, scio illud, quo me affecisti, præconium non temere inventurum fidem. Quæ cætera præfatus es, illa verò ut sunt erudita, ita multum me delectant, & Reginonem ipsum, Tuasque notas faciunt me desiderare.

Capitularium Regiorum novam editionem qua parte potero, libentissime adjuvabo. Apud nos tamen collectio illorum, quam vel Ansegisus vel Benedictus instituit, MSS.

exem-

exemplar nullum reperitur. Utrum in Bibliotheca Augusta Principis supersit, inquiram. Unum & alterum Capitulare cum Caroli M. tum Ludovici Pii habemus MS. Nihil tamen ineditum. Quod si, quæ de his Capitularibus aliisque Ecclesiasticis Legibus magnorum illorum non minus nostræ Germaniæ, quàm Italiæ & Galliæ vestræ Regum libro de Origine Juris Germanici c. 14. 15. 16. aliisque disse-  
rui, tibi ad manum fuerint (nisi fallor autem mihi ea Capel-  
lano nostro) quid abs me fieri in usum tuum debeat, rectius indicabis. Addidi autem illi libro & Capitulare Caroli M. de Ecclesiasticis Saxoniarum rebus: quale illud accepi à literatissimo Germaniæ nostræ Episcopo ac Principe Paderbornense, ex vaticano Palatinæ Bibliothecæ codice suâ & Holstenii curâ editum Romæ. Quod omnino meretur reliquis Magni illius Regis Capitularibus adjungi. Mittam verò ejus Capitularis & Romanum exemplum, si eo careas. Imò mittam, quocunque poterò editionem illam tuam exornare: Tu modo audacter jube, quid abs me effectum velis. Hildebrando nūm quid Tuarum sit redditum, præter unam Epistolam, nescio. Salutem, quam nunciari jussisti, erit illi (scio) longè gratisima. Vale autem, & salve etiam Tu, doctissime Baluzi, pergeque benè velle

Helmeftadii 12. Martii

1671.

*Tui studiosissimo Cultori*

*Hermanno Conringio.*

Illustrissimi Colberti gratiam perpetuare mihi ne graveris, etiam atque etiam rogo.

D

*Cla-*

## VII.

*Clarissimo & eruditissimo Viro***HERMANNO CONRINGIO****STEPHANUS BALUZIUS**

Tutelenfis

S. P. D.

**P**ostremas tuas literas datas Helmeſtadii die 12 menſis Martii accepi XIX Kalend. Junii, plenâs humanitatis, ut ſunt tuæ omnes; quibus ante quàm reſpondeam, illud inprimis admonebo te, Vir clariffime, miſſiſſe me nuper ad te tum Regimonem, tum etiam reliquos libros à me editos, qui Hamburgo Helmeſtadium ad te deferentur meo nomine.

De Capitularibus gratias ago, ut debeo, quod polliceris te in bibliotheca Sereniſſimi Principis tui quaſiturum vetera illorum exemplaria. Duo illa quæ habes Caroli Magni & Ludovici Pii, ſi edita non ſunt ſeparatim à libris ſeptem Capitularium, valde velim ut ad me mittas, præſertim ſi annotatum eſt illic tempus, quo condita ſunt. At ſi jam vulgata ſunt in tomo ſecundo Conciliorum Sirmondi, qui plurima eorundem Principum Capitula dedit integra, ſatis erit ſi variantes lectiones ad me mitti curaveris. Nam præter ſeptem libros Capitularium, decrevi in unum volumen congerere quotquot Capitula Regum ſtirpis Carolinæ nanciſci potero. Vidi & cum ſumma voluptate perlegi, quæ ſcripta à te pridem ſunt de hoc argumento in libro de Origine Juris Germanici; iisque utar cum ſerio me accingam ad editionem Capitularium. In illo tamen libro tuo non inveni Capitulationem de partibus Saxonie, quam habeo ex editione Holſtenii. Vale vir optime & eruditiffime, & me ſemper ama Conringici nominis ſtudioſiſſimum. Lutetie Pa-riſiorum XIV Kal. Junii MDCLXXI.

IIX. STE-



## IIX.

## STEPHANO BALUZIO

*Viro longè eruditissimo*

HERMANNUS CONRINGIUS

S. P. D.

**S**imulac quas XI Kalend. Martii exarasti, in manus pervenerunt, statim respondi, meis aulæ nostræ concreditis : cui perpetuū est cum Agente Parisiensi commercium, ut proinde non dubitem illas rectè item curatas. Etsi autem Tuæ multum me turbassent, eò quod nec tūm accepißes fasciculum jam mense Novembri in commodum Reginionæ editionis transmissum : exhilaravit me tamen non multò post Capellanus noster literis vigesimo quarto ejusdem exaratis ; narrans, & traditum Tibi fasciculum illum ad Te curatum, id quod vigesimo septimo Martii repetiit. Ex eo accepi etiam, ex juvene, cujus curæ illum commiseram, quemque Tibi commendaveram, summâ sese abs Te humanitate exceptum non semel. Illa itaque curâ jam solutus, nihil perinde desidero, quam uti significes, num Residenti Regio Hamburgensi datum sit negotium, quicquid literarum miserim Tibi, probè curare. Habeo scilicet in tuos usus parata nonnulla ; statim illa Hamburgum missurus, si Illusterrissimi Colberti jussu via illa altera fuerit constituta. Absque hoc sanè fuerit, non licebit tutò quicquam mittere ; adeò sæpe jam deceptus sum. Et verò animus est imposterum etiam Bibliothecæ Colbertianæ consecrare quicquid edidero : cujusmodi sunt jam tum illa quæ nudius tertius absolvi de Re Piscinaria, quæve

mox subsequenter πολιτικώτερα. Vicissim saltem Reginonia tua integra exspecto. Vale Vir summe & perge favere

Helmestadii x1 Maji  
Ao. 1671.

Cultori tuo

H. Conringio.

IX.

Clarissimo & eruditissimo Viro

HERMANNO CONRINGIO  
STEPHANUS BALUZIUS

Tutēlensis

S. P. D.

*L*iteras ad te dedi III Non. præsentis mensis Aprilis, quarum mittendarum curam in se suscepit Arnoldus Engelbrechtus nobilis Germanus, is ipse nimirum quem tu, Vir clarissime, mihi commenda veras, & quo fido internuntio, ut ipsa tua verba ponam, & commodo uti nos posse scripsisti, quamdiu Parisiis esset. Itaque omnino confido fore ut ejus opera postrema illæ meæ literæ in manus tuas pervenerint. Pollicitus erat idem nobilis effecturum se, ut libri à me editi ad te perferrentur. Verum interim dum tempus illud exspecto, nactus sum opportunissimam occasionem eos mittendi, quam censui non esse prætereundam. Accipies itaque, Vir eruditissime & optime, primum secundam editionem dissertationum de concordia sacerdotii & imperii, secundam item editionem operum Salviani Massiliensis & Vincentii Lirinensis, opera Servati Lupi Abbatissæ Ferrariensis, opera Agobardi & Amulonis Archiepiscoporum Lugdunensium, Cesarii Arelatensis Episcopi homilias XIV nunc primum à me editas, Concilia Galliæ Narbonensis, denique dissertationes tres illustrissimi Viri Petri de Marca Archi-

*Archiepiscopi Parisiensis. Hos libros tibi volens lubensque offero, Vir clarissime, reponendos in tua bibliotheca, ut, qui ad te accedent, hinc intelligant quæ sit mea erga te reverentia. Simul autem adjunxi tria exemplaria Reginonis, unum pro te, alterum pro Hildebrando, tertium denique pro Madero; quos oro te ut meo nomine plurimum salvere jubeas.*

*De Reginone cum bene multa dixerim in præfatione mea, quæ nuper ad te missa est, nihil est quod nunc tibi respondeam, nisi quod ægrè admodum tuli variantes lectiones ex codicibus Helmsladiensi, Moguntino, & Viennensi ad me tardè pervenisse, nimirum post absolutam editionem. Servabo tamen folia illa, usui futura in altera editione, cum illam parari opus erit. Tum verò & tui in me amoris & diligentie Maderi memoria renovabitur cum laude utriusque.*

*Editio epistolarum Innocentii III intermissa est. Nam Romani spem mibi faciunt nonnullorum librorum qui editi hæcenus non fuere, qui verò extant in bibliotheca sedis apostolicæ. Simul autem ac eorum exemplum accepero, tum rursus operæ typographicæ redibunt ad officium suum. Si quas ergo Innocentii epistolas habes nondum vulgatas, ad me mitte. Erit his quoque suus locus. Vale, Vir clarissime, & me semper ama. Lutetiæ Parisiorum VIII Kal. Majas MDCLXXI.*

## X.

*Illustri & Reverendo plur. Domino*

STEPHANO BALUZIO

HERMANNUS CONRINGIUS

S. P. D.

**Q**Uas VIII. Kalend. Majas exarasti, jam X. Kal. Jun. rectè sunt traditæ. Nihil respondi tamen, quoniam hæcenus in per-



in perpetua vixi exspectatione accipiendi liberalissimæ manus tuæ dona, quorum Tuæ spem fecerant. Nec enim dubitavi rectè omnia curatum iri: quum literas tuas misisset Regius qui Hamburgi est Residens, seque simulac Tua advenirent, protinus facturum officium promississet. Sentiens verò frustrà me esse in illa spe, interea verò dilatione responsi in tuam benevolentiam me peccare, abrumpo silentium. Et verò jam tum pertæsum longioris moræ, invitant me ad scribendum quas hoc ipso momento accipio XIV Kal. Junii datæ, plenissimæ humanitatis, quales Tuæ sunt omnes. Significo ipitur, intra triduum hinc Hamburgum abs me ad Regium illum Residentem missum iri arcam libris meis aliquot instructam; in Tuum quidem usum plærisque, nonnullis verò Bibliothecæ Illustrissimi Colberti, paucis & Capellano nostro & Perraldo & Meneftrello destinatis. Illam spero majore diligentia curaturum virum; quoniam inscribetur arcæ, omnia Illustrissimi Colberti, Bibliothecæ deberi. Vellicabo autem & Tuo nomine Viri aures: additâ itidem Illustrissimi Mæcenatis auctoritate: nisi & Tibimetipsi idem agere placuerit. Urgendum enim est illud genus hominum, cæteroquin perquam negligens, sola Mercurialia si excipias.

De Innocentii III Epistolarum Vaticano Codice prope diem etiam ex me fortassis accipies certiora. Exspecto enim de iis responsum Illustrissimi Episcopi & Principis Paderbornensis; quem ab nostræ Clero Germaniæ inusitatâ eruditione, nisi fallor, jam tum Tibi laudavi, ipsemet verò etiam Tu maximi æstimabis, lecto ejus Poëmatum libro arcæ cum meis incluso. Manu ille sua (si rectè meministi) codicem illum Vaticanum integrum descripsit: eoque tuos in usus illum petii. Imo impetraturum me confido, nisi ipse edere maluerit, Non



Non displicuisse quæ de Capitularibus Carolinis libro de Origine Juris Germanici disserui, equidem gaudeo. Miror verò, non repertum Tibi, operi illi meo annexum Capitulare Caroli de Rebus Saxonicis: nisi forte non inciderit in manus editio tertia. Hanc autem dabit Tibi arca. Daret eadem & Romanam Capitularis illius editionem, nisi jam tum esset in Tuis manibus, quantum nunc intelligo.

Quæ nostra Academica Bibliotheca continet Capitularia, conferam diligenter cum Sirmondianis. In Augusta Bibliotheca illa quærere, hætenus impedierunt turbæ bellicæ. Quamprimum autem in aulam fuero evocatus, non deero promissis. Juvare enim tuos præclaros conatus mihi est acceptissimum. Deus Te, Vir summe, longum fospitet bono publico, &, si fas est addere, meo.

Helmstedii 19 Augusti

*Tui studiosissimus*

1671.

*H. Conringius.*

Et si non memineris literarum quas XI Maji dedi, non dubito tamen recte traditas. Est porro in vicinia Vir doctissimus in nova ad codices MSS. instituta emendatione operis Fl. Josephi Græco-Latini totus occupatus: jamque ex Cæsarea Bibliotheca & aliunde nactus est manuscripta optima. Quæso significes, num possit Vir Clar. & ex vestris thesauris adjuvari. Quod si denique advenerit patricius quidam Hamburgensis meoq; Te nomine salutaverit, fac, sodes, uti & ille intelligat me frui benevolentia Tua.

XI.

*Illustris & perquam Reverende Domine.*

**H**Æc epistola comitabitur arculam comprehendentem libros quosdam meos, quam literis ante hosce dies qua-

quatuor exaratis, & jam tum Lutetiam misis, Hamburgum ad Regium Residentem me curaturum promisi. Ac spero quidem maturatum iri hoc omne: quoniam tamen perendinationes mercatorias haud ignoro, toties scilicet eas expertus, incertus sum quandonam tandem & arcula & hæc epistola in manus tuas pervenient, etsi non dubitem Residentem Regium, saltem Illustrissimi Colberti respectu, facturum officium, præsertim à me rogatum. Accipe verò libros meos, Clarissime Baluzi, ea qua me hætenus es prosecutus benevolentia: non scilicet eos æstimans suo merito, sed benigno affectu. Nec enim diffiteor, rudia omnia esse, sive doctrinam videas, sive typographicas operas, eoque indigna limatissimo judicio tuo, sive conspectu elegantissimis Gallicis assveto. Mitto vero non omnia mea, sed ea duntaxat, quorum exempla conquirere potui, quorum numerus est exiguus. Tantum doleo autem, hæc inter deesse quæ scripsi: De Germanorum Imperio Romano, De Finibus Imperii Germanici, Animadversiones Politicas ad Machiavelli Principem Illustrissimo Lionæo consecratas, De Constitutione Episcoporum Germaniæ, ut & Cassandrinæ ac Wiceliani mea de Pace Ecclesiæ: non quod jactura eorum momenti sit ullius, sed quia in hisce omnibus abs Te optem erudiri.

Eorum porro quæ accipies, utinam saltim plæraque non omnino displiceant! Nec verò vel speraverim, omnia ut placeant. Agnosco scilicet, esse in iis quæ à sacris tuis sententiis haud parum dissident, ac proinde nec possis non improbare. Verum tamen spero, non minus benignè Te judicaturum de meis si qui fuerint erroribus, atque de Gothis Arianæ labe infectis olim vester Salvianus censuit: *errare nimirum me quidem, sed bono animo errare*, & si hæreticus

reticus sim *non tamen scientem esse talem*. Enimverò sancte tibi testor me sacræ doctrinæ operam plurimam impendisse, nulla lucri, nulla honorum expectatione, sed tranquillandæ duntaxat tot inter religiosa nostri temporis dissidia conscientiæ, & æternæ salutis causa; omni que partium seposito studio, id unice sectatum esse, *quod ubique quod semper quod ab omnibus creditum*, adeoque ex Vincentii etiam vestri sententia verè demum est καθολικόν: adhibita primò quidem *divinæ legis auctoritate*, tum deinde *Catholicæ Ecclesiæ*, aurei cum primis seculi, *traditione*, itidem ex vestri Vincentii consilio: *sectatumque proinde pacem, cum omnibus iis qui Dominum invocant ex puro corde*, procul omni in dissidentes aut segreges sævitiâ. Si nec ita ab erroribus mihi cavi, ut veniam tamen omnibus dedi, ita ab iisdem expecto, vel saltim *ab indulgentia Domini*. Quin Tu cespiti tanti velis ignoscere, & salutem meam precibus Deo commendare, non equidem dubito: idem caritatis Christianæ officium à me certò vicissim poteris tibi promittere. Quæ Illustrissimi Colberti Bibliothecæ, aut Cappellano nostro, Menestrello & Perraldo consecravi, illa suo loco tradi, ne graveris, quæso, curare. Illa inter observabis & Poëmatum libellum Episcopi nostri Paderbornensis: quem unicum habet hodie Germania in sacro illo ordine literarum non perfunctoriè peritum, & hoc nomine jam tum non semel tibi laudavi. Habeo jam nonnulla sub prælo: & si otium vitamque Deus concesserit, alia propediem sequentur. Quæ omnia mittam, si hæc intellexero haud fuisse ingrata. Ubi Tua advenerint, habebunt illa me diligentissimum lectorem. Vale Vir summe & perge favere

Helmstadii 24 Aug. 1671.

*Tuo obsequentissimo clienti*

*Hermannno Conringio.*

E

P. S.



P. S. Jam clausa erat arcula mea, & scripta hæc Epistola, cum pridem desideratus advenit fasciculus tuus librarius. Nondum licuit quidem illum excutere; jam tum tamen plurimum thesaurus ille me exhilarat: & ingentes tibi jubet gratias agere. Simul licuerit, nihil mihi prius erit omnium lectione. Quod si imago tua ære fuerit expressa, ejus fac me quæso participem per illum quem novissime tibi commendavi, quo & illa justum locum inveniat in opere Illustrium doctrina imaginum quod colligere soleo. Illustrissimi Archiepiscopi de Marca imaginem petere non audeo.

## XII.

*Clarissimo & eruditissimo Viro*

HERMANNO CONRINGIO

STEPHANUS BALUZIUS

Tutelenfis

S. P. D.

*Pro tribus ultimis epistolis tuis unicam accipies, Vir optime & eruditissime, ea nimirum de causa quod duæ posteriores ad me eodem fermè tempore pervenerint, superior non ita multò ante. Ago atque habeo tibi gratias pro eximio illo amore quo me pro tua humanitate honestas; faxoque ut intelligas, cum se occasio dederit, quantum pectori meo insederit sensus istius tuæ in me benevolentiae, quantumve cupio ut omnino persuasum habeas me totum tibi ex animo additum esse. Interea accipe hanc grati animi testificationem, & simul patere ut tecum pro amicitia nostra exposulem de injuria à te mihi facta. Vocas me identidem Virum summum. Scio, mi Conringi, id perfectum esse ex summo tuo erga me amore; eoque nomine gratias ago.*



ago. Attamen si me benè noſſes, laudares quidem hominem bonarum literarum ſtudioſum, ſed tamen agnoſceres me tantum abeſſe ab eo loco in quo conſtituti homines dici poſſunt ſummi, ut etiam vix merear conſiſtere in imis ſubſelliis, adeoque abſtinere ab epitheto illo quod verecundiam meam onerat. Si benè quid de te merui, fuit aut tibi quicquam dulce meum, relinque obſecro, externa illa & ambitioſa vocabula, meque tuum appella. Erit iſtud ſua vius quam ſi me ſexcenties virum ſumum vocaris, cum alioqui invidioſum vocabulum ſit in homine mea ætatis, & eruditionis perquam exigua. Amemus, mi Conringi, ſed ſimpliciter amemus. Honore invicem præveniamus, ſed quemadmodum Apoſtolus jubet, in caritate non ficta, hoc eſt, non fucata lenociniis verborum. Scio te amare ſine ſuoco ac fallaciis, more majorum. Sed tamen magna illa epitheta habent aliquid ex adulatione ultimarum temporum. Hæc apud te liberè, ut apud hominem quem & plurimi facio & mirificè colo ac diligo. Nunc ad alia. Deoſcutor ex animo Chriſtianum illud tuum pectus, cum video te ita rerum ſacrarum & eccleſiaſticarum ſtudiis temet impendiſſe, ut non aliqua lucri cupiditate, nulla honorum exſpectatione hoc faceres, tantum ut noſcere poſſes, quid inter tot bella de rebus ad religionem Dei pertinentibus ſtatuendum eſſet. Si iſto animo ad idem negotium acceſſiſſent quicunque de controverſiis fidei catholicæ diſputarunt, fortasſis Eccleſia pacem haberet, fortasſis unum eſſet ovile & unus paſtor. Sed plerique quærent quæ ſua ſunt, non quæ Jeſu Chriſti. Hinc tot diſidia, tot bella, quæ per univverſum orbem Chriſtianum graſſantur. Faxit Deus ut tota illa tempeſtas brevi conquieſcat. Nos interim, mi Conringi, qui unum ducem habemus Chriſtum, illi ſoli placere ſtudeamus, ejus imperata faciamus; ut vinculis demum hujus carnis ſoluti, ad regnum ejus per venire mereamur.

Gaudeo vehementer in manus tuas tandem pervenisse fasciculum librorum meorum. Quemadmodum autem non dubito quin statim eos evolueris, ita spero in legendo plurima indulgentia usum esse, cum in ea loca incidisti quæ censura tuæ obnoxia fuerunt. Ex eo tamen capite tibi placere posse lucubrationes meas certò scio, quod semper & ubique, quantum mihi per tenuitatem ingenii ac virium mearum licuit, veritatem sectatus sum, nullius addictus jurare in verba magistri, nullum sequens nisi qui idem simplex & apertus veritatis cultor esset ac fraudis inimicus. Avidè exspecto tuos, quos ad me mittis. His, statim ac in manus meas pervenerint, non solum oculos pascam, sed & animum quoque satiabo. Intelligo enim magnam studiis meis accessionem factum iri & eorum lectione quos nondum vidi. Præterea mihi gloriosum erit, habere libros tuos munere tuo. Faciam autem ut eodem tempore Viri clarissimi amici nostri babeant partem tui muneris illis destinatam. Jam verò illustrissimus Colbertus à me certior factus est de toto isto negotio. Exhilaravit me spes, quam mihi fecisti de epistolis Innocentii III Romani Pontificis. Nam nihil hactenus à Romanis extorquere potui, adeò ut etiam aliquando propter tarditatem moramque rerum spem omnem abjecerim. Sed nunc aliquis bonæ auræ radius hinc rursus mihi affulget. Nihil tamen certi mihi polliceri ausim, toties spe mea frustratus. Itaque finis imponeretur huic diuturnæ petitioni, si epistolarum illarum exemplar ad me perveniret beneficio illustrissimi Episcopi Paderbornensis, qui codicem Vaticanum integrum, ut tu mones, sua manu descripsit. Statim operæ typographicæ redirent ad editionem Innocentianarum epistolarum. Istud tu cura diligenter, & meo nomine sponde doctissimo antistiti effectum me ne illum pœniteat beneficii sui, si exemplar earum epistolarum ex suo descriptum mecum communicaverit. De nova Capitula-

rium

rium Regum nostrorum editione illud te monitum velim, Vir clarissime, Basilium Joannem Heroldum, qui primus in lucem emisit codicem legum antiquarum, in quo editi sunt priores quatuor libri Capitularium, testari in præfatione sua, se earundem legum exemplaria antiqua reperisse in bibliotheca monasterii Fuldensis, easque postea cum aliis quatuordecim aut amplius manuscriptis codicibus contulisse. Unde colligi certò debet, Fulde & in vicinia repertos tum fuisse varios codices MSS. earundem legum & Capitularium. Fieri autem potest, ut iidem adhuc supersint in suis locis. Eos tu, Vir optime, reperire in meam gratiam stude. Et si repereris, cura ut libri Capitularium conferantur cum editionibus Heroldi aut Lindembrogii. Et si quæ præterea Capitula inedita in codicibus illis descripta fuerint, operæ pretium erit exemplar eorum ad me mitti.

Doctissimum illum virum vestratem, qui de nova operum Flavii Josephi editione cogitat, lubenter adjuvabo quantum in me erit. Heic in bibliotheca Regia habemus vetustissima & optima exemplaria Græca ipsius auctoris. Verum quoniam illa mitti non possunt in Germaniam, operæ pretium esset ut vir ille doctus adnotaret loca difficiliora quæ conlata vellet cum vetustis codicibus, & nos illa conferremus summa fide & diligentia. Sed tamen illum moneas velim esse in Anglia virum doctum qui eidem operi incumbit, ut mihi nuper narravit juvenis quidam Anglus bonarum literarum studiosus.

Patricium Hamburgensem, quem mihi commendas, intelliges ita à me exceptum esse ut imperasti, si ad me venerit.

Ego, Vir clarissime, tanti non sum, ut imago vultus mei æri incidenda fuerit. Hæc gloria non debetur nisi summis viris & qui rebus præclare gestis immortalitatem meruerunt,



*hoc est, tui similibus. Itaque desiderio tuo satisfacere non possum in hac parte. Mittam autem data occasione imaginem illustrissimi Viri Petri de Marca, quam valde miror missam non fuisse simul cum libro de concordia. Vale vir clarissime & eruditissime, meque semper ama. Lutetiae Parisiorum VII Kal. Octobr. MDC LXXI.*

*Post hæc scripta, cum certior esse vellem de antiquitate & auctoritate veterum exemplarium Josephi quæ exstant in bibliotheca regia, ea examinare curavi, & animadverti his quadringentis annis scripta esse. Sunt autem numero octo. Hæc te monere volui.*

## XIII.

STEPHANO BALUZIO

*Viro Illustri*

HERMANNUS CONRINGIUS

*S. P. D.*

**Q**uarto vicesimo die Augusti mensis hinc Hamburgum curavi arculam libris nonnullis meis referatam. Eam pridem navigio aliquo in Galliam esse missam spero equidem, quoniam Residens Regius id se facturum mihi sanctè promisit. Gaudebo tamen demum, ubi ex te intellexero, rectè omnia unà cum meis ad Te literis esse tradita. Ex eo prodierunt nonnulla mea quæ tum sub prælo erant. Mittam verò etiam illa, ut & quæ jam tum alia affecta habeo, simulac voti me compotem sensero, & mare responderit desiderio. Nunc terrestri itinere accipe profutura Tuæ Capitularium novæ editioni: tempestivius quantum spero adventura, atque Reginonia. In hisce  
ope-



operam suam commodavit mihi tibiq; diligentissimus Ma-  
derus meus : quam deprehendi relegens omni vacare cul-  
pa, ut possis tutò illi credere. Sensi me exspectatione fal-  
sum, de Regulis Vitæ Canonicae & Monasticae Ludovicianis, siue Aquisgranensibus ; quasi & illæ in nostris mem-  
branis habeantur. Pro illis itaque mitto nunc duntaxat E-  
pistolam ad Saltzburgensem Archiepiscopum, & Indiculum Capitulorum Regulæ Monasticae : quorum utrumque  
pridem tibi indubiè est in manibus. Et verò nisi memoria  
decipit, Epistolam Binius jam edidit, & Aubertus Miræus  
inferuit suo Codici Donationum Piarum, sed mendosam.  
Variæ Capitularis Carolini non inacceptæ erunt, quantum  
arbitror : quoniam notatæ sunt ex codice perantiquo ac no-  
tæ optimæ. Quod si posthac præclaros tuos conatus adju-  
vare poterimus, faxo ne quid desit tuæ exspectationi. Ad-  
do hac vice exemplum Privilegii quod Lindaviensi ad la-  
cum Bodamicum monasterio creditur Ludovicus Impera-  
tor concessisse : in id tamen duntaxat, ut paucis me doce-  
as, num te iudice genuinum sit nec ne. Ego confictum  
arbitror, longo post Ludovicum aut Carolinæ familiæ Re-  
ges tempore, ad compescendos Advocatos cœnobio illi se-  
culari Sanctimonialium graves. Tua sententia si meâ ac-  
cesserit, omnis dubitatio cessabit. Scio enim quantâ in hi-  
sce valeas iudicii acrimoniâ, longo usu subactus, neque  
mihi vacat in iis cum curâ versari. Avidè sanè censuram  
tuam desidero. Quos mihi destinasti libros, illos tandem  
rectè curatos, jam tum significavi. Sunt verò illi non tam  
libri quam thesauri : quantum diligente eorum lectione  
deprehendi. Plurimum sanè superasti exspectationem me-  
am Eruditissime Baluzi, cum pereximiis tuis ad tam mul-  
tos scriptores Annotatis, tum auro contra æstimandis  
Mar-

Marcani operis supplementis : quorum nihil hætenus vel fando acceperam. Admirantur mecum omnes doctiores quique inusitaram doctrinæ vim, & generosum recti verique studium professionemque. Macte illa virtute, Optime Baluzi, & perge ita benè mereri de Ecclesia & Republica. Ego Tibi æternas debeo gratias pro donis usque adeò illustribus. Idem per me, juxta officiosissimam salutem, nunciari Tibi volunt Hildebrandus pariter & Maderus: uterque tuo dono beatus, & adstrictus ad præstantium tuorum laborum auxilia etiam in futurum. Utinam liceat saltem mihi aliquid commodum tibi præstare ! Non patiar sanè in me quidquam jure desiderari. Tu verò perge favere

Helmestadii 20 Octobr.

Anno 1671.

*Virtutis ac doctrinæ Tuæ  
cultori*

*H. Conringio.*

*Vir longè celeberrime*

**E**T si Epistola Ludovici Imperatoris non pertineat ad res Gallicas, videtur tamen jungenda illi, quam habet Sirmondus Tom II. p. 427. ad Sicharium Archiepiscopum Burdigalensem, ut & alteri ad Magnum Archiepiscopum Senonensem quæ ab eodem Sirmondo exhibetur pag. 675. Sunt enim omnes ejusdem argumenti. Capitula vitæ Monasticæ feci ex nostro codice integra describi, quoniam ab iis quæ habet Sirmondus, plurimum discrepant. Quod si placuerit addere reliquis Capitularibus illa Carolina de rebus Saxonis, quæ non adeò pridem Romæ ex codice Palatino seorsim sunt edita, & libro meo de Origine Juris Germanici

manici adjecta, fortassis ex re fuerit, eruti illius libelligloriam Ferdinando Paderbornensi Episcopo & Principi cum grato aliquo encomio vindicare, perinde atque à me est factum cum Præfatione illius mei libri, tum pag. 54. Qui illi opusculo subjungitur Indiculus superstitionum & paganiarum, creditus est quidem illi doctissimo Episcopo ad res Saxonicas itidem pertinere, eoque à me postulata est ejus quædam illustratio. Ostendi verò, illa antiquiora esse primis Christianismi in Saxonia rudimentis: atque pertinere illum indiculum ad caput V Synodi Liptinensis celebratæ anno 743. Id quod indubiè etiam Tu probabis: mecumq; corriges illam Sirmondianæ editionis voculam *Nedfrutres* in *Nodfyr*, quorum fit mentio in Indiculo: cum hodieq; Germanis nobis *Nodfyr* appelletur ignis magna violentia excitatus, confictu lignorum, quo vulgus agrestium superstitiosè abutitur adversus creditas pecudum fascinationes. Dum Salvianum video, veteres delitias meas, & Cæsarii homilias, non possum non significare, inter MSS. nostræ Juliæ reperiri S. Eucherii libros ad Veranum F. de mysticis verborum significationibus, & Cæsarii admonitiones: Orosio item adscriptum librum super Canticum Canticorum, Alterumque Quæstionum cum responsionibus S. Augustini, nec non Sulpitii Severi de Vita S. Martini librum primæ inter codices MSS. antiquitatis, aliaque illius ævi non aspernanda, etsi subbarbara. Sed quò me abripit harum rerum studium! Ignosce & longum vale, simulque Illustrissimi Colberti favorem patrociniumque mihi conservare ne desinas.

## XIV.

*Clarissimo & eruditissimo Viro***HERMANNO CONRINGIO****STEPHANUS BALUZIIUS***Tutelenfis***S. P. D**

**P**Ræterito mense Novembri, cum gravi & periculoso oculorum morbo affectus essem, accepi postremas literas tuas; quas cum legere per me ipse non possem; per amicum quendam doctum effeci ut mihi legerentur. Tantus erat ardor sciendi quid in eis contineretur. Respondissem autem jamdiu, si mihi licuisset per malam valetudinem, cum qua constitatus sum per totam hyemem. Nunc demum redit animus, simulq; redeunt intermissa tantisper studia doctrinæ. Itaque nunc ad literas tuas respondeo, vir doctissime & humanissime.

Nondum accepi libros quos ad me scripsisti missos à te esse Hamburgum exeunte mense Augusto. Simul ac pervenerint in manus meas, evolvam illos a vide ac diligenter, præsertim eum in quo tractas de origine juris Germanici, quem scio plurimum lucis allaturum editioni quam paro Capitularium Regum Francorum. Recordabor autem consilium tuum, cum edam Capitularia Saxonica Caroli Magni, ut omnes intelligant ea à tenebris vindicata esse studio & diligentia Illustrissimi ac doctissimi Principis Ferdinandi Episcopi Paderbornensis. Scio enim, tum ex literis tuis, tum ex sermonibus multorum, magnum virum esse & nostrorum studiorum fautorem. Velim porro, vir clarissime, ut ei meo nomine amplissimas gratias agas ob singulare benevolentia ejus erga me testimonium, qui exemplar versuum à se compositorum in Regiam Luparam, sanè perquam ele-



elegantium & doctorum, mihi cum laudibus, quas non merui donari iussit ab eo, cui illorum editio commissa est.

Multa sunt in privilegio monasterii Linda viensis quæ illius falsitatem adstruunt. Nam præter textum diplomatis, in quo bene multa sunt aliena à stylo cancellariæ Principum illius ævi; non solebant tum apponere diplomatibus annos Incarnationis dominicæ. Deinde annus imperii Ludovici II. non congruit cum anno Incarnationis dominicæ illic annotato, si ve initia ejus referas ad annum DCCCL. quo in consortium imperii adscitus à Patre Lotbario est, si ve annos imperii ejus numeres ab excessu patris. Denique Indictio secunda non convenit cum anno illo Domini. Neque Ludovicus tenuit imperium per annos viginti sex. Itaque omnino accedo tuæ opinioni, donec probabiliora hujus privilegii exemplaria adferantur.

Auctor fui Domino Jacobo de Anten, qui has literas tibi traditurus est, ut novam editionem Marculfi ne emeret, quoniam nihil in eâ novi adjectum est. Præterea ego eundem auctorem multò emendatiorem daturus sum in nova editione Capitularium, formulas etiam veteres Marculfo adjectas daturus & emendatiores & multò plures. Nam quæ hætenus prodierunt, quia in veteri libro Solæcismis fœdatæ erant, emendatæ sunt ante editionem ad regulas Grammaticæ. Ego suos illis nêvos restituiam ex vetustissimo codice MS. ex quo editæ sunt.

Typographus meus nunc incumbit novæ editioni dialogorum viri celeberrimi Antonii Augustini Archiepiscopi Tarraconensis de emendatione Gratiani. Addam autem & ego aliquot Notas & Emendationes, tum etiam præfationem de Origine novi juris Canonici. Spero editionem illam absolutum iri proximomense Aprili. Valde autem necessarium esset, uti mihi certam aliquam viam indicares, quâ ad te pervenire

cito posset unum illius libri exemplar. *Saluta plurimum Hildebrandum & Maderum, & isti meo nomine gratias age ob operam mihi præstitam in decretis Concilii Aquisgranensis sub Ludovico Pio celebrati.*

*Vale Vir clarissime & eruditissime, & me semper ama tui nominis studiosissimum cultorem. Lutetia Parisiorum XI Kal. Aprilis MDCLXXII.*

## XV.

*Illustris & Reverendissime*  
BALUZI

**E**X literis Capellani nostri, magno cum gaudio, red-  
ditas tibi varias illas quas petiisti, cum dolore au-  
tem summo, nondum advenisse arcam illam librari-  
am, quam curæ Residentis Regii Hamburgensis commisi,  
intellexi. Maxime omnium in mœrorem me conjecit si-  
nistra de valetudine tua sparsa fama: etsi Capellanus me  
optima quæque sperare jusserit. Cruciat profecto, mi Ba-  
luzi, animum illa sollicitudo, supra quam verbis possum ex-  
primere. Eoque rogavi Nobiliss. Juvenem de Anten il-  
lum, quem antehac tibi laudavi, adeat & inviset Te, etiamsi  
adhuc fortè (quod non speraverim) nondum cum sanitate  
redieris in gratiam, meoque te nomine saluter. Ex illo me-  
liora omnia spero propediem me accepturum: pergam in-  
terea precibus Deo salutem tuam commendare. Quin sal-  
tim nunc advenerint libri mei, haud dubito: præsertim  
quia Residens ille Hamburgensis recte abs se curata omnia  
asseverat. Ab Illustrissimo Episcopo & Principe Paderbor-  
nensi de Innocentii Epistolico volumine ac variis Capitula-  
rium,

rium, nihil accipio responsi. Videntur aures illius obsidere Jesuitæ. Nec forte illi ignota, quæ Romæ gesta sunt Alexandro VII. Pontifice in causâ operis de Concordia Sacerdotii & Imperii. Fuit enim inter primos sacro cubiculo & familiaris Lucæ Holstenio intimus, cujus proinde postuma de Regulis Monasticis, de Actis Martyrii S. S. Perpetuæ ac Felicitatis, ut & Monumentorum Romanorum collectionem, publicavit. Sed quid ego tibi hisce nunc molestus sum, priusquam certo mihi constiterit recuperatam valetudinem? Valere itaque Te potius opto, optime Baluzi, idque cum primis hoc quem ingressi sumus anno

Helmstadii, 12. Januarii  
1672.

*Tui studiosiss. Cultor*  
*Hermannus Conringius.*

XVI.

*Illustri*

D. BALUZIO

S. P. D.

HERMAN. CONRINGIUS.

**M**Ultum pridem me sollicitum habuit valetudo tua, eruditissime Baluzi. Eoque amici penè indies conquirentem me heu audierunt: nec tibi meriti ipsi sollicitudinem istam dissimulavi jam tum anni hujus initio. Cum literæ autem illæ, quantum ex Antenio reduce intelligo, cum aliis interciderint, mitto nunc demum earum apographum. Cæterum ille quem dixi Antenius significavit mihi quidem jam dudum meliora, literas tamen tuas denique redux heic reddidit nudius-quartus. Iis visis au-

tem præ gaudio ( fateor ) pene exilui. Deum obsecro etiamnum, uti illum morbum jubeat esse longæ valetudinis redintegrationem.

Librariam arculam ne tunc quidem, cum Tuas exarares, esse redditam, perquam doleo. Nunc tamen iterum spem mihi facit optimam Regius quem sæpius dixi Residens: pridem scilicet illam nactum nobilem Parisiensem mercatorem Pierre Fromond. An credere homini debeam nec ne, fateor me etiamnum ambiguum esse: quoniam mercatoris illius fides & sedulitas, reverentia item erga Illustriss. Colbertum laudatur. Quæso, viro illi cures indicari quid Hamburgo mihi non semel significaverit Du Pre; & si me hic non fefellit, tandem aliquando facias arculam illam tibi tradi. Si fefellit me homo (nec enim fido Mercurialibus illis ingeniis) placeat quæso, illum Illustrissimi Colberti nomine acriter increpari, & ab illo exigere arculæ restitutionem. Nec enim video aliam rationem recuperandi perfidè adeò curata. Simul verò homo ille saltem impofterum jubebitur fidelius sibi concredita administrare. Et verò habeo iterum, quæ cupiam Bibliothecæ Colbertinæ Tuæque consecrata: nec dubito posse illa Hamburgensi navigio, utut Oceani omnia infestis hodie armis turbentur, Rotomagum deferri per Regium illum ministrum, modò ille jussus fuerit Illustrissimi Colberti causam agere justâ fide ac diligentia.

Eodem, quo Tuas accepi momento, magno me gaudio affecit quoque Illustrissimus Paderbornensium Princeps, significans, per Regium Legatum Verjusium missas tibi jam tum Innocentianas Epistolas. Non enim dubito illas rectè curatas. Misi incomparabili illi Episcopo (qui solus inter nostros & doctus est & literas curat, reliqui quum toti sint seculares, nonnulli sanguinem humanum fundere, & omnia  
five



sive armis sive voluptatibus perdere, habeant in delitiis) partem literarum Tuarum. Rectè feceris, si meo exemplo laudaveris illius Principis industriam in promendis Capitularibus Saxonis. Illorum exempla aliquot misit Princeps mihi ultrò ante annos aliquot in auctoramentum suæ erga me gratiæ, hætenus mihi ignoratæ. Ut suaves illius mores cognoscas, mitto literarum quas ad me primas dedit, apographum: imò mittam & exemplum ipsorummet Capitularium Romanæ editionis, si fortè desideres.

Diplomatis Lindaviensis falsitatem tibi quoque probari, equidem gaudeo. Invitatus, argumentum hoc integro libro trado, cujus jam tum triginta quatuor plagulæ excusæ sunt. Quoniam verò simul Carolovingici ævi res Sacræ ac Profanæ illustrandæ veniunt, faxo, ut in tempore habeas omnia, quò possis oportune obelo configere minus rectè dicta. Nam & tuæ ad Agobardum & Lupum notæ mihi non semel sunt laudatæ. Institutum Tuum de Marculphi Formulis perplacet. Usus est locupletiore codice etiam Lindenbrogius. Mihi videtur opus illud variis sensim argumentis crevisse, Marculpho pridem jam defuncto. Illustrare fortassis Marculphum non nihil aptæ sunt, præter Diplomata vetera, chartæ Fuldenfes & S. Gallenses à Pistorio & Goldasto editæ: quæ haud dubiè tibi ad manus sunt. Inter manuscriptos nostros nihil superat quo possis adjuvari. Novam editionem Emendationum Gratiani avidè desidero: cum primis Notarum Tuarum & Præfationis gratia. Quâ me donare cum velis jam tum ago gratias maximas. Si Hamburgi, quo dixi modo, constitutum fuerit commercii negotium, per Hamburgensem nautam æque securè librum illum ego accipiam atque reddam mea. Sin, de alia via cogitandum fuerit.

Vale

Vale optime Baluzi in multos annos, & mihi favere perge.

*Helmstadii IX. Kal. Jun.*

1672.

Responsum ( si quod reddere volueris ) quæso mittas Coloniam Agrippinam ad Regium Legatum Verjusium. Nolimenim incidere in manus infidas , quales hodie sunt plurimæ.

XVII.

*Clarissimo & eruditissimo Viro*

HERMANNO CONRINGIO

STEPHANUS BALUZIUS

*Tutelenfis*

S. P. D.

*T*Andem aliquando libros accepi quos ad me misisti, Conringi Vir clarissime; pro quo tam magnifico munere gratias tibi ago quas debeo. Evolvi omnes diligenter, aliquos perlegi satis accuratè, præsertim epistolas Leonis III. & librum de origine juris Germanici. Cetera per otium, si Deus dederit. Affirmare interim possum me bene multa legisse docta & utilia in libro illo de origine juris Germanici & in Notis ad epistolas Leonis. Vellem tamen ut alicubi stilum temperasses pro tua modestia, neq; ad quamlibet occasionem insultasses Episcopis Romanæ Ecclesiæ. Fieri potest ut inter illos nonnulli mali fuerint. Scis tamen, cum doctus sis, præclaram illam Leonis magni sententiam: Et si diversa interdum sint merita Præfulum, jura tamen permanent sedium. Non nego quin nostra quoque ætate superesse possint aliqua quæ emendatione fortassis indigent. Sed sunt interdum aliqua toleranda pro bono pacis; mo-  
dò ne

dò ne interim sacrosancta fides violetur, neve scandalum in Ecclesia generetur. Tenes illud Tertulliani in libro de virginibus velandis : Sola fidei regula irreformabili & immutabili manente, cetera conversationis & disciplinæ admittunt novitatem correctionis. Scimus omnes sanctam Ecclesiam puriorem quodammodo fuisse antiquitus, cum pauper erat. An ideo culpanda, quia Deus pro immensa sua bonitate eam locupletavit amplis latifundiis & agris ? Non existimabat Salvianus divitias per se malas esse, etiam in Ecclesia, sed prævum earum usum damnabat. Non enim ipsæ divitiæ per se noxiæ, inquit, sed mentes malè utentium criminosæ. Itaque studium divitiarum damnatur, non ipsæ divitiæ. Vellem itaque, vir optime & eruditissime, ut Notas tuas ad eam regulam omnes direxisses, primum quia sic te decebat hominem sapientem, deinde quia evitasses gravem Philippi Labbei Presbyteri è societate Jesu censuram, qui in notissima & maxima collectione Conciliorum, cum ederet epistolæ illas Leonis, hæc in margine adnotavit: Hanc & novem sequentes edidit an, 1655. Helmstadii Hermannus Conringius. Sed pro solenni hæreticorum more fœdissimis adversus Ecclesiam catholicam ejusque supremos Pontifices criminationibus atq; calumniis conspurcatis. Vides audaciam meam, Vir clarissime, & quam familiariter te moneam. Ultere deinceps, obsecro obtestorque te, bonitate naturæ tuæ & ingenii tui, & istas acres exulceratarum mentium reprehensiones cave; simulque mihi condona hanc velut prolapsionem reverentiæ erga te meæ.

Significavi Illustrissimo Patrono meo Domino Colberto misisse te ad eum aliquos libros à te editos, ut in Bibliotheca ejus reponerentur. Eam rem ipse valde gratam habuit, jussit porro, ut gratias tibi suo nomine agerem.



*Ceteros quos ad amicos nostros misisti, omnes acceperunt. Perraldus nosler hoc epistolium ad te scribit pro gratiarum actione.*

*Dum ista scribuntur, reddita mihi est postrema epistola tua data LX. Kal. Junii, ad quam breviter respondeo.*

*Primum gratias ago quod ita me amas, ut etiam valde commotus fueris incommodo valetudinis meae, postquam ex Clarissimi Capellani literis audiisti afflictam illam ac miseram esse. Sane in eo tum statu erant res meae, ut parum abfuerit quin oculos amiserim, id est, potiore ac jucundiore vitae meae partem, ut ad te jamdieu scripsi. Melius nunc me habeo. Nondum tamen depulsa est penitus aegritudo illa, Et adhuc quasi caligant oculi mei. Quo sit, ut intermittere cogar studia mea, Et propter hoc ipsum deesse editioni dialogorum Antonii Augustini de Emendatione Gratiani, quae perfecta jam diu esset, si ex superioris anni morbo convaluisssem. Exhibet tamen, ut spero, mense Julio; Et statim data occasione, mittam ad te, Vir Clarissime, exemplar quod tibi pollicitus sum Et nunc quoque polliceor.*

*Quantum debeam humanitati Celsissimi Principis Episcopi Paderbornensis, non est hujus loci dicere. Alibi commodior erit locus. Illud tamen apud te silere non possum, captum esse me admiratione virtutum ejus, sed imprimis singularis humanitatis Et amoris erga literas Et literarum studiosos. Legi illius versus, homo alioqui minimè Poëta, Et lubens legi, Et cum maxima voluptate. Neque dissimulaui inter amicos meos viros doctos. Deus illi tribuat longam vitam, qui tam benè de Ecclesia Et de literis meretur.*

*Vale Vir optime Et eruditissime; Et quod te facere certo scio, semper ama Baluzium tuum. Lutetiae Parisiorum III. Kal. Jul. MDCLXXII.*



## XVIII.

*Illustris Domine.*

**Q**Uas 3. Kal. Julii exarasti, rectè quidem sed tamen pridie demum Kal. Septembr. redditæ sunt ; curam Illustris. Dom. Legati Regii Verjusii morantibus negotiis cum alibi tum in castris infelicibus ad Groningam Monasteriensis militis. Adventantem huc vicinæ in aulam Verjusium non licuit convenire præ nephriticis doloribus ; non literas tamen duntaxat ad illum dedi , sed etiam fasciculum comprehendentem quatuor ultimæ , ut ita loquar, sæturæ meæ libros , in usum Illustris. Mecænatis Colberti, & Tui, & nostri optimi Capellani bibliothecarum ; si fas fuerit illic reponi. Ad Te tamen literas addere, prohibuerunt dolores, & sperato velocior Verjusii discessus. Quoniam verò ille promisit, sese propediem Lutetiam curaturum libros acceptos , vix dubito illos pridem jam esse traditos. Cæterum literæ Tuæ cum aliis nominibus quàm multis tum statim initio suo perquam fuerunt acceptæ ; nunciantes scilicet , tandem aliquando ea quæ superioris anni æstate misi, adventasse , nec hætenus displicuisse levitense munus. In Notis ad Leonis III. Papæ epistolas si justo fui acrior interdum, veniam tamen, nisi fallor, mihi conciliabunt multorum veteris & optimi quoque ævi exempla, cleri ambitionem & φιλαργυρίαν acerrimè insectantium , etsi illa utraque longè abesset tum à moribus ævi Carolovingici. Ex eo sanè Clerus noster, omnis ferè, tantum non undequaque factus est secularis, seposito mandato sibi à Salvatore sanctissimo munere. Forte vix poterit satis exprimi verbis rei impiæ indignitas. *Jura Romanæ sedis* absit ut ego sollicitem. Quæ autem abs me reprehensa sunt , nec

Tu, scio, *jura* appellaveris. Mussitanda multa, quæ egent emendatione, omnino tecum sentio. Nulla Ecclesia universi orbis à copiosis zizaniis libera est : eorum exstirpatio divinæ messi reservanda est : interim nefas fuerit zizania eodem atque triticum benigno oculo aspicere. Quæ *conversations & disciplinæ* sunt, admittere debent *correctionem* ; multò ergo magis severam increpationem , utpote hæc si absit, nec correctio admitti potest. Non *culpanda est Ecclesia ob divitias* : sed *usus divitiarum* istarum præposterus imo improbus, quî mereatur excusationem , haud equidem video. Perplacet igitur optimi Salviani sancta sententia ; *mentes verò utentium* opibus & mundana potentia Pontificum , juxta mecum indubie fuisset criminatus Presbyter ille, si in seculum Carolovingicum seculamque ætatem incidisset. Quanto *studio* ex eo usque divitias & potentiam Clerus affectaverit, nemo te minus ignorat : eoque nec tu, scio, non *studium* illud damnabis. Labbei voculas iniquas non moror : est enim ille ex more suæ sodalitatis, neminis nisi suorum benignus censor. Quanta calumnia est , *me criminatum Ecclesiam Catholicam* ! quum in eam nec verbum mihi exciderit. Non in omnes etiam *Pontifices supremos* aliquid acerbum dixi, sed in illos istius ævi mundanos terrarum piscatores eorumque sectatores. Sancti mores veteris Ecclesiæ mihi, fateor, usque sunt adeo pridem probati , ut Labbeana convitia commiseratione potius prosequar quam indignatione. Ad illius Ecclesiæ omnia jam tum juvenis animum composui : quæ dissident, improbo, nullo partium habito respectu, etsi utrinque vapulem. Quoniam etiam Te, optime Baluzi, illius aurei ævi indole imbutum præclara tua scripta produnt, ne dubites *monita* tua fuisse mihi quovis melle dulciora : sed &, quantum fas fuerit,

rit, temperaturum me calamum, ne quod asperius dictum exulceratas mentes irriter impofterum, præsertim si emendatio sperari à me nequeat. Quod si perrexeris monitis me tuis amicè instruere, æternum de me bene mereberis. Longè sane pluris mihi est talis monitor quam laudator. Si & alia libera judicia tua, pro eo quo vales acumine, communicaveris, rem facies longe gratissimam. Non dubito autem passim abs Te animadverti quæ justam reprehensionem mereantur. In iis quæ nuperrimè misi, non semel offendes nomen etiam tuum: cum primis in Lindavianis p. 186. 188. 190. 200. 214. 396. Quin ultimo loco reperies partem literarum tuarum publici juris factam. Id quod ne feras ægrè, rogo. Quæ in Lampadianis pag. 240. habentur, ante complures jam annos fuerunt scripta; sola illa paginæ 295 novæ sunt. Utinam se tibi probent! Certe unus cum hac parte valeas, uno te approbatore possum esse contentus. Tantum ne inideas mihi tuam censuram. Quæ nuperrimè Colbertinæ Bibliothecæ consecravi, spero non minus futura accepta atque priora. Sequentur forte brevi alia quorum pars jam tum sub prælo est. Eorum exemplum & Perraldo mittam: quia video priora isthæc haud displicuisse. Illustrissimi Mecænatis consilium prudens veneror. Meditor nunc adeo scripti aliquid non minus utile: quod brevi curabo ubi tutum fuerit. Doctissimus Episcoporum & Principum nostrorum Paderbornensis in omnibus ad me literis mentionem Tui facit honorificam: duarum quoque epistolarum tuarum mihi fecit copiam: ut proinde jam totus ille tuus sit. Auctor ipsi fui, ut participem te faciat Monumentorum Paderbornensium, scripti perquam eximii. Id factum jam esse, haud equidem dubito. Misi epistolam Cossutii Soc. Jes. Presbyteri ad



Christianissimum Regem in novam Conciliorum editionem : doctam sanè & elegantem , forte tamen habentem plusculum adulationis, atque ita minus & sacro argumento & Presbytero dignam, nisi à seculi moribus facilis sit culpæ excusatio. Oculorum tuorum vitium nondum omni ex parte curatum, equidem plurimum doleo. Spero autem non obstitisse, quo minus jam prodierit Antonii Augustini promissum opus. Superfunt in Bibliotheca Academica nostra, præter exempla Cresconianæ Canonum collectionis, tres quatuorve aliæ MSS. De iis scribam aliquid proximè, si tanti esse videatur. Vale bono publico & perge favere Tibi

*Illustris Domine*

Helmestadii, 19. Octobr.

1672.

*devoto acratem amico*

Illustrissimo Colberto perpetuam  
precor felicitatem.

*Hermanno Conringio.*

XIX.

*Clarissimo & eruditissimo Viro*

HERMANNO CONRINGIO

STEPHANUS BALUZIUS

Tutelenfis

S. P. D.

*A* Ccepi his diebus epistolam tuam datam die XIX. Octobris, Conringi Vir Clarissime, cum jam parata esset arcu-  
la ad Illustrissimum & Celsissimum Principem Ferdinandum  
Episcopum Paderbornensem ferenda, in qua reposui unum  
exemplar dialogorum Antonii Augustini de emendatione Gra-  
tiani, quod ad te spero missum iri ab eodem illustrissimo Præ-  
sule.



*sule. Habebis eodem tempore imaginem Petri de Marca Archiepiscopi Parisiensis, quam tibi jamdiu pollicitus sum.*

*Præfatio mea ad Antonium Augustinum beic Lutetie multis viris doctis satis arrisit, cum ob dignitatem materiam, tum quia libere decurrit oratio. Sanè argumentum istud nondum ea methodo tractatum erat quam secutus sum. Cum illam legeris, oro te, Vir eruditissime, ut ad me perscribere velis tuum de eâ judicium, quod plurimi fecero. Scis enim excimiam esse meam erga te reverentiam, magnam de te tuaque eruditione opinionem.*

*Libertatem meam à te in bonam partem esse acceptam vehementer gaudeo ac tibi gratulor. Quanquam omninò persuasum habebam rem aliter non casuram, quod multum virtuti ac bonitati humanitatiq; tuæ considerem. Concedo autem tibi nonnullos veterum exclamasse olim aduersus nimiam cleri ambitionem & amorem diuitiarum. Neque ego nunc eos absolvere à culpa velim quibus rebus nimium student. Illud tantum contendo, utendum nunc esse lenioribus verbis, quantum suscepti argumenti ratio patitur; præsertim ubi nihil profici potest à superiori oratione, cum eò ventum sit, ut necesse nunc sit ista tolerari. Quod ita te intelligere atque existimare certò scio.*

*Eadem libertate qua tecum egi occasione Notarum tuarum ad epistolas Leonis III. Romani Pontificis, agam etiam in lectione librorum quos ad me mittis per Verjusum, laudaturus quæ benedicta fuerint, liberè moniturus si quid occurrat quod me moveat. Quanquam vides nihil à me reprehensum esse in his Notis tuis præter verba quædam nimis dura & aspera, cæterum rem ipsam salvam esse, in quam non intendi accusationem ullam. Multa, mi Conringi, eaque præclara disco in lucubrationibus tuis, in plerisque tecum sentio. Et si interdum*  
dis-

*diffentire cogor, imputandum istud est amanti religionis, qui me non patitur ea omnia dogmata profiteri, quæ vos forsitan putatis esse optima & Christianissima. Deus, qui cordium & cogitationum scrutator est, quemque pro suis meritis judicabit. Interim amemus, mi Conringi; & tametsi diversas opiniones tuemur in causa religionis, moribus tamen diversi non sumus, qui eadem literarum studia sectamur.*

*Quod Illustrissimus Princeps Paderbornensis, doctissimus, ut tu rectè vocas, Episcoporum & Principum Germaniæ vestra, de me bonorificè semper loquitur in literis quas ad te scribit, facit ille quidem pro more suo, cum singularis ejus sit humanitas sua visissimique mores, sed tamen etiam, audeo dicere, facit pro meritis meis. Si enim benè meremur de his quos amamus, suspicimus, veneramur, baud dubiè Princeps ille me benevolentiae suæ testimoniis ornare debet, qui me captum & incensum profiteor admiratione virtutum ejus. Nondum se obtulit occasio inserendi nomen ejus in libris à me editis. Spero autem amplam occasionem ejus laudandi fore in editione epistolarum Innocentii III. & in Notis meis ad Capitula Regum Francorum, ubi magno mihi usui erunt Monumenta Paderbornensia. Quoties ergo in literis ad illum tuis incidet mentio de me, memineris, quæso, commendare apud illum reverentiam & observantiam meam, vademque te pro me constitue.*

*Vale, Vir optime & eruditissime, & me semper ama, tui semper nominis ex animo studiosissimum. Lutetiæ Parisiorum XIII. Kalendas Januarias MDCLXXIII.*

*Exspecto ut ad me aliquid scribas de collectionibus canonum quæ manuscriptæ extant in Bibliotheca Academiæ Juliæ,*

## XX.

*Illustris Domine*

**V**Ltimas meas 19 Octobris exaravi: spero autem rectè pridem esse curatas, quoniam Illustris. Verjusio sunt missæ & quantum intelligo, traditæ. Ex eo aliquid dare vetuerunt turbæ bellicæ: quæ simul dubium me reddunt utrum vel has sis accepturus, eoque vel liberioris commercii literarii ergo pacem meanxiè desiderare adigunt. Et verò si itinera essent tuta, dudum non tantum perpetuæ observantiæ testandæ causa, sed etiam uti abs te in nonnullis erudirer, non unas ad te exarassem. Horis scilicet succisivis dum recenséo librum meum de Antiquitatibus Academicis, eique integrum librum addo supplementorum de scholis omnium gentium vetustis, hæreoque in scholis Monasticis & Episcopaliū Collegiorum, videtur discedendum in quam multis mihi esse à vulgaribus mihiq; ipsi antehac placitis sententiis, nisi Tu, quem ego unum harum rerum intelligentem novi, me adjuves. Recenséo item Exercitationes meas pristinas de Republica Imperii Germanici: ubi multa differui de Republ. antiqua Francorum Carolovingici cum primis ævi, quorum censorem optimum Te itidem agnosco. Utrumque opus prælo commisi, desperans de Tua aliqua opera. Simul verò prodierint & hæc & alia quædam mea in lucem, quod spero vere proximo futurum, mittam omnia, etiam tunc paratus censuram tuam subire. Quæ Illustrissimo Mecænati promisi, expectant duntaxat commodam transmittendi occasionem & non nihil compositas magis Imperii res. Id quod bona fide cum obsequii mei promptitudine potes polliceri. Utrum in hunc quoque annum Palladem benigno oculo respicere

H



spicere Christianissimo Regi fuerit constitutum necne, indubiè novisti. Me adversa quæque metuere faciunt sanè haud pauca. Rem proinde gratissimam præstiteris, si quidquam docueris certi : saltim quo rectius componi possint mea. Nec enim de valetudine Tua sequius quidquam suspicor, multo minus de pristino in me favore. Perinde atque ego sum maneboque ætatem

*Optime & Illustris Baluzi*

Helmstadii, 13. Febr.,  
Anno 1673.

*Tuus  
perpetuus cultor  
H. Conringius*

XXI.

*Illustris Domine.*

**A**Nte hosce dies decem, exaravi ad Te literas. Ut hæc iterum dem, efficit ingens mihi hodie excitatum desiderium, ex Te aliquid certi cognoscendi de ea quæ in Regno Franciæ hodie perhibetur agitari inter dissidentes partes Religionis concordia. Mihi sane nihil magis est in votis ; nec displicent quæ de hoc argumento in chartam conjecta circumferuntur. Fortassis etiam Tibi, Optime Baluzi, idem est animus. Vix enim persuaderi mihi patior, seriò agi hoc negotium, saltim à Clero, aut à quoquam apud quem Jesuitica sodalitas est in pretio : nec enim illa quidem societas solet sapere quidquam moderatum. Mirum etiam, media inter sæva arma Christianissimo Regi concordiam Ecclesiasticam cordi esse : etsi is animus fuerit Cæsaribus nostris, Ferdinando primo ejusque sapientissimo filio Maximiliano, qui in id usi fuerunt Cassan-  
dri &



dri & Wicellii consiliis abs me editis. Quicquid sit, avide equidem desidero ex te intelligere. Nec vero speraverim grave futurum me docere. Vale ac salve plurimum

*Illustris atq; optime Baluzi*

Helmeftadii 24 Febr.

1673.

*Cuius me perpetuum fore  
cultorem profiteor*

*Hermannus Conringius.*

XXII.

*Illustris Domine.*

**T**uas XIII. Kal. Januarii exaratas quarto Martii mihi quidem destinavit Illustris. Verjusius, accepi tamen denique die mensis illius tricesimo. Usque adeo innocentissima Palladis commercia vicinæ nostræ Mars turbavit aliquamdiu. Etsi verò tunc & Tuæ & Verjusianæ mihi sint redditæ, nunc tamen demum respondeo: quia serium responsum dare hæctenus præ metu interceptionis non fuerim ausus, & præter omnem expectationem nunc mihi sese offerat commoditas aliquid ad Verjusium mittendi. Dedi enim quidem aliquid ad Te etiam & vicesimo tertio Februarii pariter & Martii quinto, aulâ nostra invitante, jamque spero recte tradita, ad Tuas tamen literas illorum nihil facit. Quantumvis autem justo tardius Tuæ advenerint, fuerunt tamen longè acceptissimæ compluribus nominibus; cum primis quod & valetudinem, cuius cura pridem me habuit sollicitum, restitutam, & animum verè Christianum cum pristinâ benevolentia etiam mihi integrum patere, abunde significaverint. Non enim lætius quidquam Lutetia expectavi: eoque DEUM veneror,

ut utrumque & Tibi, Vir optime, & mihi sit diuturnum. De me vicissim, rogo, Tibi persvadeas, & justas increpationes & sententiarum dissidium ferre me animo æquissimo, jamque dudum Ecclesiæ pacis fuisse studiosissimum, quamvis à zelotis fuerim durè propterea exceptus. Nisi grave fuerit, lege sodes Epistolici operis octavam ante hosce triginta sex annos scriptam, ut & sexagesimam quintam; nisi velis operam perdere in legenda etiam tricesima prima & quinquagesima septima aliisque nonnullis argumenti sacri. Simulatque dabitur commoditas mittendi, habebis & Casandriana & alia mea, quorum exempla nunc demum recuperavi: ut eo rectius tibi probetur meum à factionibus & schismate alienum ingenium; salvo tamen integroque veritatis studio, quod in omnibus tuis etiam scriptis amplector equidem & exosculor, quoties illorum cunque in manus meas aliquid incidit, id quod fit frequentissimè. Hinc eruditissime Baluzi, jam tum avidè desidero quam pollice- ris censuram eorum quæ nuperrimè per Verjusium curavi: quoniam præsertim illa jam rectè esse tradita, accepi ex literis Capellani nostri scriptis 30. Januarii: imo eapropter desidero etiam responsum Tuum ad meas quinto Martii datas, de iis quæ in Germaniâ pasim circumferuntur chartis, tantum non Christianissimi Regis nomine publicatis, de sopiendis Regni Ecclesiasticis controversiis. Tuam in Antonii Augustini librum præfationem ubi accepero, quâ soleo Tua omnia sedulitate legam protinus. Non enim dubito, Te justa ~~κατηγορία~~ persecutum Canonici juris historiam, quantumve illud jam Gratiani ævo à pristino deflexerit. In Bibliotheca nostra Academica tres antiquissimi codices membranacei supersunt, præter Crisconianam, Collectionis Canonum. Uni inscripsit Flacius: *Decreta Pon-*

*Pontificum: Alteri, Diversa Decreta Pontificum: Tertio: Anacleti Papæ Decreta: omnes enim quondam possedit Flacius. Primus continet tumultuariam variorum Canonum collectionem, videturque conscriptus Ottone M. Imperante præterpropter. Sub finem enim ita legitur: Nomina Pontificum, qui ab ipso Principe Apostolorum S. R. E. præfuerunt usque ad miserum Benedictum exilio relegatum in Oceani littore. Continentur etiam hic acta Synodi Romanæ Joannis XII adversus Leonem Papam. Ut non obscure pateat, collectorem Joannis illius & Benedicti partibus fuisse deditum. Habentur ibidem & Acta Stephani Papæ Synodi Romanæ contra Constantinum Antipapam, ut & Relatio missorum Adriani Papæ in Angliam anno 786. Reliqua sunt exigui momenti. Alter multo est recentior, seculi forte duodecimi fœtus, sed itidem anonymus. Constat autem duplici Collectione Canonum, alterâ ex Epistolis Pontificum Isidorianæ sæcis aliisque usque ad Urbanum II. desumptâ, alterâ ex Canonibus Conciliorum primò Generalium mox & Provincialium, quorum ultimum est Hispalense adeoque itidem ab Isidoro accepta. Illum locum hisce verbis claudit Auctor: *Hætenus de Corpore Canonum: ea quæ sequuntur aut sententiæ sunt Orthodoxorum Patrum, aut leges Catholicorum Regum, aut Synodica sententiæ Gallicanorum aut Germanorum Pontificum.* Sequuntur deinceps sententiæ illæ, per multos titulos, quorum ultimus inscribitur *de causis laicorum*, digestæ. Earum nonnullæ autem desumptæ sunt ex Institutis, Pandectis, Codice & Novellis Justinianeis: atque ita Lotharii Cæsaris ævum produunt. Tertius Codex constat libris octo Decretorum. Estque fortassis Panomia, quæ Ivonis nomine audit: non enim contuli. Ultimus tamen liber octavus habet duntaxat undecim*

decim capitula : nec occurrunt nomina Pontificum recentiora Paschalis secundi. Habemus præterea Epitomen Canonum Græcam Harmenopuli, *κτῆμα* olim Leonclavii: adeoque illud ipsum exemplar, unde in Tomum I. Juris Græco-Romani libellus ille transit. Utinam ex horum aliquo possit quidquam, Eruditissime Baluzi, cedere in usus tuos ac proinde & publicos!

De Paderbornensis Principis Episcopi virtute, doctrinæque inusitatâ, rectè judicas : ideoque quo magis illum tibi conciliem, propediem partem istam epistolæ illi mittam. Aliquamdiu ditionem ejus, ut tantum non omnem Westphaliâ, miles pessimè habuit : sed jam omnia paulatim redeunt ad pristinam tranquillitatem. Vellem posse illud abs me dici de omnibus armis, quæ hodie infestant Christianum orbem ! Ut sanè pax redeat, Deum calidis precibus veneror. Ejusdem tutelæ Te commendo, Optime Baluzi,

Helmstadii 24. April.

1673.

*Tuus atque officiosissimus  
cultor*

*H. Conringius.*

P. S. Nisi grave fuerit, quæso attente expendas quæ disserui ad Lampadium à pag. 21. ad 34. Scio enim multis videri *ωρῶδιστα* : forte tamen æquis & doctis iudicibus haud improbabuntur : quorum in censu Tu mihi es unus instar omnium. Brevi accipies iudicanda, quæ jam sub prælo sudant. Vale,



XXIII.

*Illustri Domino*

STEPHANO BALUZIO

Tutelenſi

HERMANNUS CONRINGIUS

S. P. D.

**V**icesimo quarto Aprilis respondi ad Tuas, Illustris Baluzi, quas XIII Kalend. Januarii Tu exarasti, curâ autem Verjusii ego tricesimo Martii nactus fui. Illud responsum meum misi eidem Illi Verjusio; Hæc mittam Paderbornam, & curæ Eximii illius Principis committam, quoniam Verjusii tantum non perpetua itinera sæpè longius justo morantur nostrum utriusque expectationes: quia etiam commoda sese offert occasio libellorum aliquid Paderbornam curandi nunc, & nudius tertius inde Antonium Augustinum tuum à Principe accipi. Etsi enim nihil habeam ad manum quod jam perfectum, attamen existimatio ejus quo polles judicii compellit me quasi, etiam intempestivè Tuæ censuræ subicere mea: saltem uti in tempore fiat si opus fuerit eorum emendatio. Mitto igitur hac vice quicquid est typis excusum mearum cum Academicarum Antiquitatum, tum Exercitationum de Republica Imperii Germanici, reliqua imposterum additurus. Obnixè autem rogo, ne graveris non legere duntaxat illa quâ soles judicii acrimonia, sed etiam liberæ tuæ censuræ participem me quam ocisimè facere. Annos amplius viginti est quum utrumque librum edidi prima vice: etsi igitur mihi non sit integrum, nunc omnia perficere justis numeris, recensionem tamen ita instituire est animus, ne quid enormiter exorbitet. Quam  
in

in rem Tu, doctissime Baluzi, mihi poteris esse usui præ mille aliis lectoribus: quandoquidem rari sint Antiquitatum, Reipublicæ atque Ecclesiæ gnari, imo paucis soleant esse illæ alicui curæ, quarum tamen pericia multum mihi laboris peperit. Si meam operam Tu probaveris, fortassis possit illa aliquando esse commodo restituendis Imperiis rebus, si quis Caroli Magni æmulus velit iis manum admove-  
 re. Augustinus Tuus, etsi illum non nisi quasi per transennam atque errante oculo hætenus lustrare fuerit concessum, perplacet, ut hætenus Tua omnia. Quin igitur Tu, optime Baluzi, jam pergas consimilem diligentiam Capitularibus expoliendis impendere. Quænam sit ratio earum, quæ in Bibliotheca Juliæ delitescent, antiquarum Collectionum Canoniarum, nisi fallor, jam accepisti. Si quid earum desideraveris, faxo uti nanciscaris. Vale & me favori magni Mecænatis, Illustrissimi inquam Colberti, perge commendare, nisi forte Martis cura omnem Palladis existimationem exstinxit.

*Tui Illustris Domine*

Helmstadii, 13. Junii 1673.

*devotissimus cultor*

*H. Conringius.*

XXIV.

*Illustri Domino*

STEPHANO BALUZIO

Tutelenfi

HERMANNUS CONRINGIUS

S. P. D.

Post eas quas XIII Kal. Januar. proximi anni exarasti, nihil tuarum accepi, optime Baluzi. Nactus ego illas tuas fui quidem demum 30. Martii: à me tamen iis responsum est

est jam tum vicesimo quarto Aprilis. Jam antehac verò cum 23. Febr. tum 5. Martii aliquid ad te dederam. Illas autem tres, nisi fallit memoria, Coloniam misi à Legato Verjusio curandas : cujus frater Abbas coram quia retulit mihi pridem illas Lutetiam pervenisse, spero equidem rectè tibi esse traditas. Tertio decimo Junii iterum non literas duntaxat, sed etiam partem cum mearum Exercitationum Academicarum de Republica Imperii Germanici, tum operis de Antiquitatibus Academicis accurato tuo judicio tempestivè censendam, misi Paderbornam, ad literatissimum Principem : qui Nonis Juliis respondit, propediem se destinaturum ad te missum sibi fasciculum. Ea propter haud dubiè etiam hæc jam venerunt in tuas manus. Recenseo autem hæc non exprobrandi tibi silentium animo, sed tantum ut intelligas, post tantum intervallum avidè me vicissim tuas desiderare. Et verò cum primis tenet me expectatio promissæ pridem censuræ tuæ eorum librorum, quos anno superiore per Verjusium curavi, rectèque non tu minus quam Capellanus noster jam mense Januario accepisti. Exopto verò jam mihi & ultimorum, quæ dixi celsissimo Principi Paderbornensi commissa, doctum judicium tuum. Utinam tandem aliquando voti fiam compos! Nec enim obstare arbitror valetudinem, quo minus more solito promptè respondeas : quia Capellani nostri postremæ & recentes satis nihil sinister memoraverunt. De constantia quoque affectus erga me tui dubitare nefas arbitror. Causam diuturnioris silentii existimo esse viarum incerta, omnia turbantibus infestis armis. Etiam verò mihi jam intercepta est commoditas aliquid mittendi per Verjusium, ex quo ille Coloniâ relictâ Berolinum commigravit, in aula Brandenburgici Electo-



ris imposterum, donec pax omnino fuerit composita, jussu Regio commoraturus. Eoque hæc nunc mittet aula nostra Brunsvicensis postæ, quam vocant, ministerio: quâsi & tu velis uti, rectè omninò curabit Beckius Principum meorum Luræ degens Agens perpetuus, Capellano nostro haud ignotus, modò literis haud prolixis res possit expediri. Fortè tamen haud deest tibi Colonia, etiamsi Verjusius discesserit, in comitatu Regionum Legatorum qui utrique nostrum literis curandis rem velit gratam facere. Sed & utrique nostrum libentissime beneficium sese præbebit Paderbornensis Princeps. Huic partem Epistolæ tuæ quam XIII. Kalend. Jan. exarasti, cum misissem, simulque aurem vellicissem quasi de illustrissimi Marca imagine, dono tuo, & monumentis Paderbornensibus tibi mittendis, hisce verbis mihi responsum est. *Legi cum voluptate transmissas paginas Antiquitatum Academicarum, & per eum qui binas mihi epistolas tuas reddidit, mitto ad te imaginem Archiepiscopi de Marca à Baluzio promissam, ad quem etiam fasciculum tuum propediem destinabo. Is Monumenta mea jam possidet, & pluris merito mea videtur æstimare. De ejus Epistolæ parte mecum communicata gratias tibi habeo, optod, ut porro ejus viri amicitiam ac memoriam mihi conserves atque custodias.* Cum acceperim itaque jam desideratam pridem Marcæ imaginem, gratias tibi pro dono habeo; etsi scripta Marcæ longè mihi potiora sint, ceu imaginem animi virtute atque doctrinâ excultissimi, reverentia. Peccem verò in te, optime Baluzi, si studeam conservare apud te Principum nostrorum longè doctissimi memoriam: præsertim quia illam Monumenta etiam Paderbornensia æternam effecerunt, jamque etiam ab aliis apud vos colitur ille, ex quo innotuit; quod sane Epinicius Ludovico Regi dictum



dictum nostrique inscriptum nomini Caroli de la Rue, eximii sanè poëtæ, luculentè testatur. *Quin tu potius memoriam mei conserves atque custodias in animo Illustrissimi Mæcenatis Colberti, quanquam Regiæ munificentiae in me aliosque fontes videantur jam exarescere. Si intellexero haud ægrè acceptum iri, scribam illi nonnulla quæ forte usibus Regiis haud sint incommoda. Tu verò clarissime Baluzi vale & perge favere*

Helmstadii 10. August.  
1673.

*Tibi deditissimo*

*Conringio*

---

XXV.

*Clarissimo doctissimoque Viro*

HERMANNO CONRINGIO

STEPHANUS BALUZII

Tutelenfis

S. P. D.

*IN summa literarum tuarum expectatione, Conringi Vir clarissime, redditæ mihi sunt nuper quas ad me dedisti VI Kal. Februarii & III Nonas Martii, novissimè autem eæ quas scripseras VIII Kal. Maji; ad quas antequam respondeam, oportet primùm me tibi gratias agere pro libris tuis ad me missis, quos verò Vir illustris Verjusius ad me bona fide & ea maxima quâ fieri inter tumultus bellicos potuit diligentia perferri curavit, unaque illos quos bibliothecæ Colbertinæ destinaveras. Majores tamen tibi gratias debeo pro honorifica mei mentione facta in Annotatis ad Lampadium & in censura diplomatis Lindaviensis; ubi me eo etiam honore dignatus es, ut meam de hoc argumento ad te scriptam epistolam illic edideris*

deris, tanquam isto testimonio confirmatam putares sententiam tuam de falsitate diplomatis. Legi tuum illud opus summa cum voluptate, propter multiplicem eruditionis copiam, & quia semper & ubique præ te fers studium veritatis aduersus fraudes & technas mali ævi. Gavisus autem magnopere sum, cum legi testimonium à te in pagina XII. redditum ingentibus Ferdinandi Episcopi & Principis Paderbornensis virtutibus, quem jure meritoque vocas summum seculi nostri ornamentum, præcipuè autem Germaniæ vestræ. Vellem sanè ut omnes Episcopi Ferdinando similes essent, otiumque suum, quod imprimis debent curando gregi, bonis etiam literis concederent, hoc est, meminissent se Episcopos esse. Sed quandoquidem aliis occupationibus se tribuere malunt quam studiis literarum, utantur libero arbitrio suo; nos Ferdinandum admiremur, colamus, imitemur pro virium nostrarum modulo. Accidit & illud gloriæ excellentissimi Viri, quod illustrissimus Colbertus imaginem ejus, quam is ad me miserat anno superiore, in bibliotheca sua reponi voluit in conspicuo loco, & quidem nulla socia imagine adbibita. Nullæ enim virorum illustrium imagines in ista bibliotheca habentur præter illam de qua nunc agitur. Ut vel hinc intelligant vestri Germani, Gallos non detrectare virtutes hominum Germanorum.

In pag. 190. ais tibi non probari sententiam meam de Archicapellano, quem in notis ad Agobardum monueram dictum olim sacri palatii Archiepiscopum, aisque tibi istud nondum esse persuasum si Archicapellanus non nisi Episcopus esset. Ego, mi Conringi, simpliciter scripseram quod in præfatione Concilii Moguntiaci scriptum videram de Hildebaldo Colonienfi Archiepiscopo, ubi ipse se vocat sacri palatii Archiepiscopum iu omnibus quæ hactenus prodierunt istius Concilii editionibus. Quod sufficere mihi potest ad firmandam scriptionem banc meam.

Neq.

*Neque enim satisfacit quod ais videri mendosum id esse, reponendumque ita ut legatur Hildebaldus Archiepiscopus Coloniensis & sacri palatii Capellanus. Nam præterquam quod huic tuæ conjecturæ omnes editiones repugnant, & quod tu nullum veterem librum manuscriptum laudas tuæ emendationis auctorem, patet ex præfatione illa Concilii Moguntiaci Episcopos qui ei interfuerunt, non fecisse mentionem sedium suarum, nominaque tantum sua posuisse, nota videlicet Principi ad quem scribebant. Sed præterea notissimum est Angilramnum Episcopum Metensem, qui sacri palatii Archicapellanus fuit ante Hildebaldum, vocari Archiepiscopum in capite LV Concilii Francofordiensis, & apud Alcuinum in epistola LXXIX. ad Ussualdum. Hæc sunt verba Alcuini: Nam olim per Angilramnum Archiepiscopum & Sanctæ Capellæ Primicerium me ipsum vestræ commendavi Sanctitati. Quin & in veteribus chartis monasterii Sancti Arnulphi Metensis, ut in historia Episcoporum Metensium narrat Episcopus Madaurensis, diserte nominatur Angelramus Archiepiscopus & Palatii Capellanus. Denique Drogo Metensis Episcopus, qui post Angilramnum in ea cathedra sedit, frequenter vocatur Archiepiscopus in annalibus & actis illorum temporum, quod nullo negotio posset ostendi. Idem in apologetico Ebbonis Archiepiscopi Remensis dicitur Archipalatinus Præsul in tomo septimo Spicilegii Dacheriani pag. 179. id est, Archipræsul palatinus. Denique veteres chartæ Gonzienfis monasterii à Chiffletio relatæ in vindictis Hispanicis pag. 16. eum vocant Archiepiscopum & sacri palatii Capellanum; seu veræ illæ sint, seu falsæ. Nam David Blondellus contendit illas esse supposititias. Attamen Cbrodegangus Episcopus Metensis, qui sub Pippino Rege floruit, vocatur etiam Archiepiscopus, tametsi nullibi legatur fuisse sacri palatii Archica-*



*chicapellanus. Atque hunc titulum ei tributum fuisse à Stephano III. Romano Pontifice, cum ei Pallium traderet, docet manifestissimis verbis Anastasius Bibliothecarius, qui dignitatem illam cum concessione Pallii conjunctam fuisse satis innuit. Dum in Francia esset positus, inquit, Rodigango sanctissimo Viro Episcopo Pallium tribuit & Archiepiscopum ordinavit. Quod confirmari posse videtur ex fragmento Chronici sancti Crudonis edito in Historia Episcoporum Metensium pag. 276. ubi occasione Pallii concessi à Walone Episcopo Metensi à Joanne VIII. auctor ait: Ex cujus rei enarratione liquet ex qua causa præfati Metenses Episcopi (id est, Urbitius, Chrodegangus, Angilramnus & Drogo, qui Pallio ornati fuerant à Romanis Pontificibus) nomine Archiepiscoporum intitulati leguntur. Quod etiam notatum est ab Auberto Miræo in Chronico Belgico ad annum DCCCXLIV. Eandem ob causam Theodulfus Aurelianensis Episcopus vocatur Archiepiscopus in Præcepto Ludovici Pii pro Ecclesia Aurelianensi, ut observatum à me est in præfatione ad dialogos Antonii Augustini de emendatione Gratiani. Unde colligi posse videtur Episcopos qui fuere sacri palatii Archicapellani, quique eodem tempore vocati sunt etiam Archiepiscopi, non ideo Archiepiscopos dictos quod essent Archicapellani, sed quia Archiepiscopi titulo & nomine donati fuerunt à Romanis Pontificibus cum traditione Pallii; præsertim cum videamus Ebroinum Episcopum Pictaviensem, qui sub Carolo Calvo Archicapellanus fuit sacri palatii, qui, in Concilio Verrensi præsedet supra Wenionem Archiepiscopum Senonensem, simpliciter Episcopum vocari ubique, nunquam Archiepiscopum.*

*Vides, eruditissime Vir, non dissimulare me argumenta quæ adferri possunt ad versus id quod à me scriptum est, adeoque*



oque agere me bona fide. Hæc tamen omnia nullatenus præjudicant adversus scriptionem meam. Tametsi enim videam Hildebaldum se vocare sacri palatii Archiepiscopum, Drogonem verò Archipalatinum Præsulem sive Archipræsulem Palatinum, non disputo tamen an ea appellatio illis obvenit ob dignitatem palatinam, an verò ab externa quadam potentia. Mibi satis est quod, dum munere illo ornabantur, sacri palatii Archiepiscopi, & quod idem est, Archipræsules dicebantur. Neque enim dixi id constanter ac perpetuo observatum esse ut Archicapellanus vocaretur Archiepiscopus. Hæc ad te, Vir clarissime, scribenda esse putavi, ut apertior tibi esset mea mens, neque amplius tenearis suspensus. Redeo nunc ad epistolas tuas. Ac primum quidem ut ad id respondeam quod pertinet, ad gloriam invidiosissimi Regis nostri literarum ac literatorum patroni, dona quæ ille tribuere consuevit hominibus eruditissimis, etiam inter immensos gravissimi belli sumptus largietur, quæ pro anno præterito destinaverat, ut antea solebat; jamque perscripta ea de re sunt diplomata; inter quæ & tuum vidi, Vir eruditissime. Itaque certus esse potes de munificentia regia. Dubium nulli esse potest quin is, pro sua in Deum pietate & in Ecclesiam amore, operam suam lubenter conlaturus sit ad sarcinendam Ecclesiæ concordiam, si sese occasio favorabilis offerat. Scripta tamen illa quæ apud vos circumferuntur, non arbitror profecta ab auctoritate ejus. Utinam hinc Viri principes & magnates excitentur ad integrandas scissæ religionis res!

Legi, prout optaveras, epistolas quas de eo ferme argumento scripsisti, octavam nimirum, XXXI. LVII & LXI. in quibus deprehendi sanè plurima laude digna & consilium pacis studiosissimum. Sed homines sumus, mi Conringi. Itaque mirum non est si interdum nimio pacis studio bellum facis.

facis. Dandum est aliquid affectibus humanis. Etiam viri sanctissimi & sapientissimi peccaverunt aliquando in hac parte, bono quidem animo, ut existimandum est, sed parum felici successu. Ita nunc omnia exasperata sunt, ut vix agi possit de controversiis religionis, quin statim ab utraque prosiliatur ad contentiones & jurgia. Dabit Deus his quoque finem. Nam si hic descendere possemus ut amica collatione & quod est in hac causa præcipuum, bona fide res istæ tractarentur, non dubito quin facile res ad concordiam adduci possent.

Moderatiora tamen sunt quæ adnotas ad Lampadium à pag. 21. usque ad 34. Neque est quod heic mihi displiceat præter paucas opiniones vestras, quæ nobis Catholicis placere non possunt. Si Deus hunc tibi ardorem aliquando inspiraverit, ut fidei majorum tuorum te reddas, spero sanctam Ecclesiam plurimum utilitatis capturam ex lucubrationibus tuis, quæ plurimum habent boni saporis.

Puto te jamdiu habere dialogos Antonii Augustini de emendatione Gratiani, quos ad illustrissimum Episcopum Paderbornensem misi tibi tradendos cum imagine optimi Patroni mei Petri de Marca Archiepiscopi Parisiensis, ille vero ad me rescripsit cuncta ad te missa esse. Audio præfationem meam non admodum probari Romanis ingeniis. Ego tamen verè dicere possum nihil heic à me scriptum esse malo animo aut libidine detrahendi, ut illic admonui. Utor jure quod publicum esse voluerunt ultima secula. Neque enim ea arrogantia imbutus sum ut me sapientiorem putem his qui ante me fuerunt. Istud tamen non vetat quin pro studio veritatis inquirere possim in historiam veterum temporum; præsertim ubi id sit citra contentionem, & servata reverentia quæ debetur summis potestatibus. Si quid adversum me tempestatis excitatum propterea fuerit, silentio tegam quæ infecta vellem, uti jam à me factum

factum est occasione sententiæ quæ lata est adversus primam editionem meam librorum de concordia sacerdotii & imperii.

Intelligo veteres codices bibliothecæ vestræ, in quibus collectiones canonum ac decretorum continentur, posse esse optimos. Verum his uti me impossibile est, quia fieri non potest ut ego illos evolvam oculis meis. Aliter autem nihil fieri potest: Abundat Gallia nostra collectionibus hujusmodi, quarum aliæ ex aliis ut plurimum desumptæ sunt, præcipuè verò ex Juone Carnotensi. Rectè porro judicas tertium illum codicem bibliothecæ vestræ, qui dividitur in octo libros, esse panormiam ejusdem Juonis.

Vale Vir optime & eruditissime, & me semper ama Conringici nominis studiosissimum. Lutetiæ Parisiorum VII Kal. Augusti MDC LXXIII.

XXVI.

*Illustri Domino*

STEPHANO BALUZIO

Tutelenfi

HERMANNUS CONRINGIUS

S. P. D.

**T**Andem à tuâ manu aliquid accepi Illustris Baluzi; quod nempe VII Kal. Augusti dedisti, rectè curavit Illustr. Verjusius. Non tamen iis respondisti quidquam ad illa, quæ XIII Junii & X Augusti à me sunt exarata: quorum prius cum adjunctis chartis Celsissimus Paderbornensium Princeps, posterius aula nostra curandum suscepit, ac proinde saltim nunc utrumque esse redditum, haud equidem dubito. In tuis nihil non fuit pergratum; nihil autem acceptius docta censura meorum libellorum.

K

Nec



Nec vero non potest mihi svavissimum esse, tuo accurato & candido judicio saltim plæraque mea sese probasse. Sed & illa, quæ observasti de Archiepiscopi cognomento attributo etiam illis Palatinis qui duntaxat Episcopalis fuerunt ordinis, ingenuè fateris, haud evincere, datum illud olim ratione Palatinæ dignitatis, sed forte respectu pallii, Palatinorum illorum Episcoporum uni atque alteri à Papis concessi extra ordinem. Et verò in omnibus quæ adfers accuratè semper Palatinus Capellanus seorsim notatur ab Archiepiscopali nomine. Plus satis verò mihi est etiam, saltim animum pacis Ecclesiasticæ cupidum tibi placere, etsi sententias omnes meas haud admittas. Et enim nec ab ipso O. M. DEO aliud mihi expeto, conscius humanæ tenuitatis meæ ab erroribus neutiquam immunis, quorum veniam tamen ab indulgentiâ dominicâ, fretus sanctissimis promissis, non dubito mihi polliceri. *Majorum* apud me magna est reverentia: sed per πατροπαράδοσις infidum esse ad veritatem & DEO placentem religionem iter, tibi etiam, optime Baluzi, est notissimum. Ego me tuis precibus commendo apud DEUM: idem amicitiae officium tibi optima fide vicissim præstiturus. Pro imagine Illustrissimi doctissimique Archiepiscopi de Marca, ut & Antonii Augustini libro, habeo iterum gratias maximas. Imagini locum dedi suum inter eas, quas virtutis & doctrinæ nomine facio maximi: præsertim quia simul insignem præ se fert animi integritatem καὶ πρωτοτύπη. Quæ ad Augustinum sive præfatus es sive annotasti, illa non mihi duntaxat, sed & aliis hujus loci eruditissimis quibusque, supra quam credideris, placent. *Romanis ingeniis non admodum probari*, haud miror. Veritas odium parit. Bene verò est quod pridem assveveris spernere



nere non voculas duntaxat illorum hominum, sed *excitatas* etiam ab iis *tempestates* in Tarpeja arce, sat DEO felix amico. Quam mihi laudem tribuisti in Notis, haud equidem mereor: agnosco tamen & amo propensum in me affectum. Justo autem abs Te pretio æstimari, imò & ab Illustrissimo Colberto, Paderbornensem nostrum, id verò etiam atque etiam gaudeo. Mittam primâ occasione Celsissimo illi Principi verba tua, perinde atque novissimis meis inserui ad Te illa, quibus Nostræ illud Germaniæ sacrum decus te est profecutum. Ludovicum Maximum etiam inter arma non desinere munificentiam pristinam exercere erga Palladios alumnos, superat sanè ut expectationem ita & laudationem meam. Et verò ut plurima alia, ita etiam hoc est sine exemplo. Quod mihi à sanctâ illâ & forti manu est destinatum, optarim equidem adungi iis quæ Illustr. Verjusio mittentur: quia & in vicina vivit ille, & de Reipubl. negociis frequentissimum mihi cum illo literarium commercium est. Ut proinde & meas ille res curare possit citra invidiam malevolorum, secureque. Rem sanè feceris gratissimam si Illustrissimo Mecœnati Colberto hoc persvaseris. Si porrò jam tum nactus fueris mearum de Rep. Imperii Germanici Exercitationum, ut & libri de Antiquitatibus Academicis, quas Celsissimus Paderbornensis noster sese curaturum suscepit, chartas, iterum rogo, ne graveris iis horas aliquas vacuas impendere. Cumprimis tamen desidero, abste cum cura aliqua legi & expendi, quæ jam eduntur de constitutione Episcoporum: sed video in manus illa tuas haud perventura prius quam libro ultima fuerit manus imposita. Id quod cum futurum sit propediem, frustra etiam fortè expecto censuram tuam eorum quæ jam tum misi, etsi

nullam magis mihi exoptaverim. Sed ferendum est, quod mutari non potest. DEUM obsecro, uti & publico & meo bono te, optime Baluzi, diu sopitet.

XI. Septembr. 1673.

XVII.

*Illustri Viro*

STEPHANO BALUZIO

Tutelenfi

HERMAN. CONRINGIUS.

S. P. D.

**Q**Uas ad tuas VII. Kalend. Aug. exaratas ego XI. Sept. reposui, spero pridem rectè esse traditas, per Ducum nostrorum Parisiensem quem vocant Residentem Beckium. Silentium tuum non animi quidem mutati vel levissimam suspicionem movet, metum tamen aliquem incutit minus benignæ valetudinis. Fortassis autem ad scribendum tardior te etiam facit illa proximo autumnno adversus Christianissimum Regem ex Germania nostra Belgioque Hispanico insperatò exorta plena periculi tempestas: nam & mihi illa subinde calamum manu excutit, & optatam studiorum quietem perturbat. Nec vero dubito etiam te mecum sentire; pacem cum Batavis potuisse æternâ cum maximi Regis laude pariter & commodo statim post tot urbium inusitatæ felicitatis occupationem componi, nunc autem periculum esse, ne sine ullo operæ pretio non illa duntaxat sed alia quoque quam multa pereant. Pro solatio mihi est, quod annus proximus pacem sit redditurus. Id sanè polliceri me facit illa, quæ partis omnes urget,

urget, quantum arbitror, pecuniæ in bellicos usus necessariæ penuria. Nec enim nos fugit, cessantibus potissimis etiam Galliæ commerciis, quæ ærarii sit ratio, populo vestro penitus tributis & delectibus exhausto. Ea equidem de causa conjicio, & decollare spem quam feceras Regiæ hoc etiam anno in literatorium ordinem, atque adeo & me, per rectoræ munificentia: non enim vel obulus advenit saltem hactenus. Quicquid hujus sit, equidem DEUM pergam calidis precibus venerari, uti reddere Europæ velit pristinam tranquillitatem, turbatis omnibus belli improbis solique dominantium ambitioni velificantibus consiliis. Utrum nactus sis per Paderbornensem nostrum Principem chartas meas cum libri de Rep. Imperii Germ. tum Academicarum Antiquitatum, etiamnum ignoro. Priori operi jam manum ultimam admoveo, tuasque animadversiones unice desidero, eoque circumspicio exspectoque commodam mittendi occasionem. Propediem & alterum denuo aggrediar. Rogo autem, saltem ulterius ne me crucies silentio. Sufficiens sane si significaveris, & Illustrissimum Colbertum & Te cum valetudine tum erga me benevolentia esse integra. Deus te servet, Optime Baluzi, in annos plurimos: sicut mihi concedit jam agere annum ætatis sexagesimum octavum.

XIV Decembr. 1673.

XXIIX.

*Clarissimo doctissimoque Viro*

HERMANNO CONRINGIO  
STEPHANUS BALUZIUS

Tutelenfis

S. P. D.

*Accepi binas literas tuas datas XI mensis Septembris & XIV. Decembris, quas mihi Beckius vester tradi curavit.*

K<sub>3</sub>

vlt.



vit. Rectè autem existimas, vir optime, silentium erga te meum non ex animi mei mutatione profectum esse, cum non veris me tibi pollicitum esse observantiam in te meam æternam fore. Sed partim occasione istius gravissimi belli, tum propter occupationes meas, factum est, ut negligentior paulò fuerim quam oportuit. Inter occupationes porro meas numero inprimis editionem, quam paro, Capitularium Regum Francorum; ut vidisse te scio ex brevi præfatione mea ad eruditos, cujus exemplum tibi tradendum missum est ad Verjusum, is vero tibi traditum fuisse ad me rescripsit. Tot enim undique ad me veniunt eorum vetera exemplaria manuscripta, ut vix mihi ipse sufficiam. Certè tempus non sufficit. Spero autem editionem cœptum iri mense Junio proximo. Cum primum absoluta ea fuerit, unum ejus exemplar ad Te perferri curabo; in quo videbis me tuis lucubrationibus frequenter usum fuisse.

Delectavit me admodum illa literarum tuarum pars, in qua me doces præfationem & Notas meas ad Antonium Augustinum & Gratianum placuisse vestris hominibus, hominibus inquam, eruditissimis Academiæ vestræ. Faxit Deus ut præter aliquam voluptatem quam ex his percipere possunt lectores, etiam bonos fructus colligant. Quanquam audio reprobam fuisse præfationem ab iis qui Romæ curam gerunt consigendorum librorum, & in numerum prohibitorum relatum, repugnantibus licet Eminentissimis Cardinalibus Bona & Estræo, qui per vicerunt, ne nomen meum publicè ederetur in Decreto Sacræ Congregationis per typographos vulgato. Hæc mihi merces tribuitur in vestigatæ veritatis.

Nondum accepi quos ad me mittis libros de Republica Imperii Germanici & de Antiquitatibus Academicis. Præterquam quod autem omnia tua amo, tum inprimis cuperem videre exercitationem de Republica Imperii Germanici, in quâ



quâ haud dubiè multa occurrent quæ faciant ad institutum meum. Si ea mitteretur ad Simonem Pauli Bibliopolam Argentoratensem, is ad me perferri curaret cum aliis libris quos illum rogavi ut mihi emeret.

*Illustrissimus & Celsissimus Princeps Episcopus Paderbornensis* ad me misit numisma aureum in consecratione sua cusum, quod ego pro magno munere accepi; non quia aureum est, sed quia propensum Celsissimi Principis erga me animum ostendit, & aliquo me apud eum in pretio esse. Volui autem etiam hanc partem felicitatis meæ tecum communicare.

Honorarium quo te singulis annis prosequi solet Rex noster, Vir eruditissime, tibi non deerit. Perscriptum ea de re est diploma, ut ad te jamdiu scripsi, & ei traditum qui pecuniam numeraturus est. Is verò ad te primo quoque tempore perferri curabit. Neque tarditas illius accusanda est, tametsi enim diplomata jampridem confecta & subscripta sint, serò tamen de numeranda pecunia imperatum est. Vale Vir eruditissime & optime, & me semper ama. Lutetiæ Parisiorum Idibus Februarii MDCLXXIV.

## XXIX.

*Illustris Domine.*

**P**Lurimum me exhilaravit cistridium Illustr. Verjusius, misis literis quas Eid. Febr. dedisti: ultimæ enim Tuæ scriptæ fuerant VII. Kal. Augusti, nec à Tua manu ex illo usq; tempore quidquam ad me pervenit præter illam plagulam unicam, quæ editionem Capitularium Francicorum orbi, adeoque seorsim & mihi, promisisti. Perjucundæ porrò fuerunt mihi ipsæmet hæ literæ tuæ, idque cum aliis plurimis nominibus, tum quod certum me red-

me reddiderint de constantia Tuæ erga me benevolentia : quam ut perpetuam esse velis, etiam atque etiam rogo. Illud tamen dolet, quod ne hæcenus quidem acceperis fasciculum quem XIII Junii Paderbornam misi, ut nec literas X Augusti isthuc missas : quorum citò curandorum spem fecerat Princeps : indubiè autem fuit impeditus hoc agere Optimus Princeps molestis reipublicæ negotiis, & Cæsarei militis in terris illius gravi hospitiatione hyberna, quâ tantum non omnia ibi miserè exhauriuntur & rediguntur ad incitas. Benè verò est, quod illas saltim quas ego XI Septembr. & XIV Decembr. Aulæ nostræ curandas commiseram, rectè acceperis. Et sanè ex responso Tuo non sine singulari lætitia vicissim cognovi, feliciter Te nunc versari in recensione Capitularium : præsertim quia novæ editionis Tuæ jam tum accensum mihi erat desiderium, cum alias gnaro inusitata tuæ diligentia, tum edocto per eam quam publicasti plagulam, raræ in conquirendis multis exemplaribus Tuæ felicitatis. Ego cum non habeam quo Te adjuvem aliud, saltim Deum oro, ut largiatur Tibi ad utilissimum opus perficiendum, firmam valetudinem & fortem animum. Utroq; enim Tibi opus fore arbitror; & posteriore quidem, quia præfagit animus, etiam hanc operam Tuam Censuræ illi iniquæ Romanæ futuram obnoxiam. Laudanda nimirum Tibi veniet Carolovingicorum Regum circa res Ecclesiasticas impensa curatio : quæ hodie Romanæ sacræ monarchiæ summè est invisa & improbata. Dicenda Tibi multa venient de Ecclesiæ Regimine, quale tunc fuit, multis modis ab hodiernis placitis Romanis diversum, Et verò alia facile ferat curia; quæ monarchiam verò tangunt, in iis est inexorabilis erga eos quos non metuit, etsi dissimulet iram si præpotentes ad-

versen-

versentur. Eoque nonnihil meliora & clementiora etiam speraverim, si Tuis illis Capitularibus Privilegium aliquod Christianissimi Regis addideris, ut jam tum Tuæ illi plagulæ sacrosancta lilia præfixisti. Non minus sanè hæc valebunt mitigandæ Curia, atque solet dæmonum sævitiam frangere crucis signaculum. Utcunque verò res ceciderit, non est quod illa Te cura mordeat. Quin Tu *contra audentior ito*, conscius bonæ mentis, & certus præmii divini ob vindicatam veritatem. Hæc sacra aliter non constant. Cæterum, quamvis velim, ad hoc opus Tuum, ceu jam tum sæpius significavi, conferre, nihil equidem hætenus valeo. Video etiam illo non esse opus, cum jam tum adminiculis sis instructissimus. Siquid tamen re adhuc integra incidere in manus, non equidem invidebo.

Romanum fulmen in Præfationem Tuam haud dubito abs te sperni; quum & prævisum fuerit, & jam tum spernere bruta illa assueveris. Pridem magni æstimavi Cardinalem Bonam, lectis cum curâ ejus Liturgicis, inque iis justo de Epistolis Pseudo-Isidorianis judicio; nec ignarus, hodie in omni illo Purpuratorum cœtu illum unum edito in publicum scripto aliquo laudem commeritum. Nunc longè majoris facio virum; quod enim à nomine Tuo averruncaverit ignominiosam notam, indicium mihi est eximiæ bonitatis & φιλαληθείας. Ne quid diffimulem, gratulor Tibi, quod jam secunda vice Confessor veritatis in solemni theatro orbis fueris declaratus, idque indubiè intelligentium quorumcunque Tuæ etiam gentis applausu. Longè duriora fuerunt præmia sanctorum martyrum. Erit autem & tua cum illis merces magna in cœlis.

Liber meus Exercitationum Academicarum jam demum integrè in lucem prodiit. In eo plurima continentur



de republica veteri Francorum ætatis Carolinæ, sacrâ pariter ac seculari : quæ vulgò hodie ignorantur quidem & contemnuntur, abs Te autem sciuntur indubiè accuratè, & suo pretio æstimantur. Eoque avidè desidero Te & lectorem & censorem. Mittam librum illum igitur propediem, & quidem eâ quam indicasti ratione, per Simonem Paulum, simulac haud defuerit commoditas ad illum quidquam curandi, quia longè à terris hisce nostris abest Argentoratus. Ab illo missâ pridem tibi arbitror Monumenta antiquæ lectionis ibi edita, inque iis deprehensam abs Te partem Ansegisi versam Germanicè, cujus memini libro de Origine Juris Germanici pag. 246.

Sui memoriam aureo aliquo nummo Tibi commendasse Paderbornensem nostrum Principem, etiam ipse gaudeo. Nec verò dubites ab illo magni Te æstimari. Misi illi 8. Novembr. illam literarum tuarum, quas mense Julio dederas, partem, qua significaveras, quanto ipse sit in pretio in ipsa Colbertina Bibliotheca. Iis meis reddidit hæc Nonis Decembribus : *Jam diu nihil literarum è Galliis à Baluzio nostro ad me est allatum. præsentis belli metu infestis itineribus : expecto tamen cistam inde insigni librorum supellectile refertam, quam Parisiis emi jussi. Ultinam tandem pax redeat optima rerum & Musis nostris amica!* Hæc tunc ille. Ex eo nihil ab illo accepi, armis & calamitatibus omnia turbantibus. Ego verò idem & sentio & opto cum Eximio illo Principe: eoque quantum potui laboravi sedulò, ne & mei Domini Batavorum aut Cæsareorum hortatu & propositis præmiis inducti nomen itidem darent illis partibus, sed pristinam amplecterentur tranquillitatem, et si numerofo satis instructi milite. Id quod hætenus feliciter successit : non tamen sine nominis mei obtrectatione & odio. Nunc magis



gis solito etiam pacem desidero : dum expendo Vertumni Britannici inconstantiam, & vereor longè majus malum.

De Honorario Regio consequendo jam, fateor, desperavi: haud ignarus videlicet, quantum Marti debeatur. Si præter expectationem tamen obtingat mihi bonum illud, feram bona ex parte id Tuæ benevolentiae acceptum. Pridem enim & Capellanus noster spem omnem deponere jusserrat. Illum optimum meum Patronum accepi apoplexia correptum, mox in lethalem morbum incidisse, & fortassis jam defunctum. Quod si adhuc superstes fuerit, quæso cures illi tradi brevem hanc epistolam. Nunquam sanè excidet animo grata Viri illius memoria. Deus Te in feram senectutem servet publico literarum bono. Ego maneo

*Illustris Domine*

Helmstadii, 3. Martii

1674.

dum vixero

*Tuus omni obsequio*

*Hermannus Conringius.*

P. S.

Dum non adeò pridem inspicio mappas Chorographicas, ejus tractus qui est circa Moguntiam & Oppenheimium Germaniæ quondam secundæ, forte fortuna deprehendi luculenta vestigia nominum, Bodeheim, Windelheim, & Saleheim; in quibus locis fertur olim condita Lex Salicæ. Et verò illas terras primus Francici juris fecit Pharamundus REX. Ideoque muto sententiam de Legis Salicæ primis natalibus TransRhenanis: præsertim cum & antiqua monumenta doceant, conditam Legem illam in Germania, quo nomine *κατ' ἑξοχήν* audivit Cisirhenana in solo Gallico, sequioribus Romani Imperii ætatibus,

## XXX.

*Illustris Domine*

**A**D ea quæ Eidib. Februarii dedisti, Baluzi fautorum optime, responsum meum 3. Martii misi Illustri Verjusio. Jam Francofurtum mitto bina exempla mearum de Rep. Imperii Germanici Academicarum Exercitationum, alterum Illustrissimi Colberti, alterum tuæ Bibliothecæ, si fas videatur, inferendum. Francofurti autem Simonem Paulum rectè fasciculum hunc nacturum & porò curaturum Lutetiam proximis nundinis, equidem haud dubito. Utinam isthoc in libro deprehendas nonnihil quod placeat! Equidem pridem credidi, ut ad notitiam plenam cujuslibet singularis reipublicæ pertinet ab omni retro memoria quævis repetere: ita etiam nostrâ interesse rerum Germanicarum statum ab antiquissimis quibusque monumentis ad hæc tempora deducere. Eoque dedi operam, quæ Cæsar Tacitus alique veterum de Germaniæ populorum republica tradiderunt, cum primis verò quæ de statu regiminis Francorum à sequioris ævi scriptoribus sunt prodita, cum aliqua cura ad res Imperii nostras transferre. Etsi enim multa mutaverint, multa tamen superant quoque institutorum veterum: ex re autem est, etiam quæ mutata sunt haud ignorare, ut appareant causæ mutationum, utque num illa in melius aut deterius verterint, possis dijudicare. Observabis igitur in omni Exercitationum illarum argumentò adducta etiam illa, quæ olim in Francorum Republica Carolinæ præcipue tempestatis obtinuerunt; quia scilicet Imperium nostrum illius Francici Carolini nobilissimam atque amplissimam partem continet. Non omnia pro dignitate me exsecutum ultrò agnosco:

sco: jamdudum autem cepi consilium, singulari libro rempublicam illam Francorum veterem majore cum cura illustrare. Imo pridem hoc egissem, nisi offensam veritus eorum, qui sua omnia, quamvis heri aut nudius tertius instituta, credi volunt antiquissima, abstinuissem manus. Perinde scilicet atque Roma hodie non fert, quæ tu doces de mutato Ecclesiæ regimine per mentitas Pseudosidorianas epistolas; credi volens id quod hodie obtinet, ab ipsomet S. Petro profectum esse. Ubi prodierint tamen tua Capitularia, & valetudo atque otium permiserint, fortassis operam illam subibo: si præsertim Tu judicaveris etiam in illis Exercitationibus me Francica isthæc non omnino male aut inutiliter docuisse. Nec verò dubito, novam illam tuam Capitularium editionem hætenus ignorata haud pauca illustraturam. Cum primis verò lætabor, si calculo tuo saltem plæraque probaveris abs me de Constitutione Episcoporum disputata, ut & ea quæ præmisi isti tractationi Exercitatione septima à §. 9. ad 19. aliquantulum *ωρδοξίῃ*. Avide sanè exspecto censuram Tuam: quippe quæ una mihi erit pro multis: ac proinde ne illam mihi deneges rogo.

Proximè elaboranda mihi erunt, quæ de Antiquitatibus Academicis jam sub prælo versantur. Etsi enim pridem illorum bonam partem mihi curâ Principis Paderbornensis ad Te curandam, atque ita hætenus & illorum censuram Tuam me nacturum speravi, quia tamen decollare spem illam video, dum omnia Westphaliæ milite sunt infesta, cogor in edendo pergere rectè monitis tuis etiam hoc in argumento destitutus. Urinam pace constituta liceat literis operari! Vale eruditissime Baluzi & perge favere

Helmstadii, 13 Martii 1674.

*Tuo Cultori*

*Hermanno Conringio.*

P. S.



P. S.

Non dubito Capitularibus tuis accessurum illud quod ex spoliis Heidelbergensibus eruit Romæ optimus Princeps Furstenbergius, atque ex Romanis chartis expressum libro meo de Origine Juris Germanici continetur. Utrum operæ fuerit pretium addidisse & illud, quod nomine *Capitularis Carolini de Villis suis* edidi cum Epistolis Leonis III. Pape, nec ipse dixerim: quia & argumentum est tenue & in MSto nostro abest Caroli nomen, tantumque inscribitur *Capitulare de Villis Imperatoris*. Quid me tamen suspicari fecerit de Carolo auctore, indicavi jam tum pag. 103.

## XXXI.

*Illustris Domine.*

**Q**uas ad Tuas Eidibus Febr. datas ego III. Martii exaravi, haud dubiè rectè curavit Berolino Verjusius. Decimo post die Francofurtum, cum aliis meis ad Te literis, misi exempla bina mearum de Republ. Imperii Germanici Exercitationum, alterum *Illustris*. Colberti, alterum Tuæ Bibliothecæ consecratum: spe ductus, in nundinis solemnibus etiam Simonem Paulum Argentoratensem bibliopolam, cui mea isthæc comittere iussisti, compariturum, ad quem proinde aliquid etiam dedi literarum. Si illa spes haud fefellerit, non dubito etiam illos meos libros rectè curatum iri. Vereor tamen, ne quid dissimulem, saltim moram aliquam injecturas illas, quæ nunc demum præter omnem expectationem in Palatinis terris ad Rhenum moventur turbæ: nec enim crediderim frustra omnino fore meum illud consilium. Tertias hæc ad te dare



dare jubet benevolentia qua prosequor Nobilissimum Juvenem Greiffenkrantzium : quippe cum cujus patre, dum viveret, summa mihi intercesserit amicitia, quemque ipsum aliquamdiu domesticum habuerim convictoremque omnigenæ virtutis nomine longè carissimum. Cum propter magni parentis præclara merita cum alibi tum in Ducatu Bremensi, ubi amplissima dignitate Cancellarii functus est, primoribus Regni Sueonum esset acceptus, in comitatum receptus est illorum Illustriss. Legatorum, quibus componendæ Pacis negotium à Rege commissum est. Illi verò tractatus quia (proh dolor!) lentè procedunt & vix spiritum ducunt, in Galliam vestram proficisci, eamque, dum adhuc ibi omnia sunt tranquilla, perlustrare, juveni ex re futurum suâ persuasum est. Ut ipsemet ego institutum illud adjuvem, etiam Te atque etiam rogo, ne graveris amicum hunc meum excipere illo quo me prosequeris favore, atque adeò reapse etiam huic ostendere, non in nullo apud te esse pretio preces meas & laudationes. Absque dubio autem faciliè tibi est hospiti aditum quoque parare ad Magnates aliquot, & qui nunc est instar omnium, Illustrissimum Colbertum, ut & quos in ordine eruditorum venerari duxeris fore commodum. De vita Capellani nostri dubius, nihil ad illum nunc dedi : si tamen *vitali adhuc vescitur aura*, quæso efficias, ut quoque Virum illum Illustrē invisere liceat. Quicquid sanè juveni præstiteris, annumerabo ego reliquis tuis beneficiis. Si amisi porrò Capellanium, fac amabo, ut in ejus locum alius mihi amicus succedat, & quidem illa instructus doctrina, cujus me studio duci novisti. Eripit scilicet mihi passim terrarum mors quamplures, quibuscum hætenus dulce per literas de re literaria fuit commercium : quos brevi fortassis sequar & ego,

ego, gravetamen fuerit amicis destitutum mori. Vale Illustris Domine & porro fave

*Nomini Tuo devoto*

*Hermanno Conringio,*

Inciderunt in manus proximis hisce diebus plagulae aliquot libri, quem Danus nonnemo, Borrichius appellatus, Illustrissimo Colberto ausus fuit inscribere in id, ut Hermeticis meis detrahat suam existimationem. Quae hactenus vidi, non merentur refutationem, malignitate tamen apta sunt provocare indignationem. Si vacaverit, saltem unum alterumque eorum, quae homo ille de Chemiae vetustate & Hermetis Aegyptiorumque prae Graecis eruditione disputavit, cum meis quaeso contende; & procul amore judica. Quod si perdere tempus ipse nolis, cura amabo, uti alius quis ingenio & doctrina praestans, qualis est Aegidius Menagius, hoc agat. Nec verò dubito omne hoc Tibi Tuque similibus forensi ritu submittere, certus vestro iudicio stare vel cadere. Idem animus est de Chemicis dissertationibus meis; quas idem Zoilus admordet: Si fortè repertus fuerit Lutetiae qui cum peritia Graecorum medicinae conjunxerit Chémica: quod nisi fallor fecit G. Patinus.

*Helmeſtadii, 28. Martii*

1074.

## XXXII.

*Illustris Domine.*

**C**um praeter omnem expectationem hae transiens Illustr. Verjusius facultatem dederit aliquid ad Te curandi; quoniam ipse scilicet recta in Galliam redire constituit; ecce mitto duo exempla operosi indicis

nu-

nuperrimè confecti, eorum quæ continentur voluminibus  
 Exercitationum Academicarum de Republica Imperii Ger-  
 manici, utrumque addendum Colbertino pariter & Tuo  
 libro. Non enim dubito, per Simonem Paulum, cui pro-  
 ximis vernalibus nundinis Francofurtensibus, ceu iusseras,  
 & libros illos & literas meas ad Te exaratas commisi, omnia  
 rectè jam pridem esse tradita. Utrum curaverit etiam  
 Celsissimus Princeps Paderbornensis plagulas jam superio-  
 re anno excusas operis de Antiquitatibus Academicis, ad-  
 huc ignoro, perquam verò desiderio intelligere. Integrum  
 constitui proximis autumnalibus Nundinis per Simonem  
 Paulum transmittere : modo Tibi non displiceat. Si in-  
 terea abs Te aliquid responsi accepero, erit mihi id longè  
 gratissimum. Poterit autem haud incommode fieri, per  
 Beckium Serenissimæ Domus Brunsvico-Luneburgicæ  
 Parisiensem Agentem quem vocant; nec enim credide-  
 rim tacturum Te reipublicæ ulcera, sed solam innoxiam  
 rem literariam. Vale autem, & favere perge

*Eruditissime Baluzi*

Helmestadii 23. Augusti 1674.

*Tuo cultori*

*Hermanno Conringio.*

### XXXIII.

*Illustris Domine.*

**I**S qui hæc adfert Illustrissimi & Celsissimi Comitis  
 Konigsmarkii ephorus Lutetiæ nihil mihi gratius re-  
 tulit, quam & vivere Te ac valere. Multum enim me-  
 tui aliquamdiu valetudini Tuæ, quia integer annus sine li-  
 teris tuis periit mihi; ut ne quidem ad epistolam illam, quam  
 vicesimo tertio Augusti Illustris Verjusius heic loci susce-  
 pit

M

pit



pit curandam adeoque haud dubie rectè est curata , quidquam responsi acceperim. Nunc suspicor, silentii tui causam fuisse tempestatem hanc bellicam, & simul incerta viarum : dum inter ipsos nostros Dominos non bene convenit. Mutasse enim & animum erga me tuum , absit ut suspicer. Saltim Martii furores Minervæ sacra , quibus constat amicitia nostra, nihil attinent. Cæterum ex hoc amico & familiari meo rem omnem spero me intellecturum ; num scilicet liceat vel placeat tibi etiam impofterum uti pristino literarum commercio , quemadmodum item sese habeant Capitularia Tua aliaque magni ingenii tui monumenta, & denique numi ausis aut possis aliquid meorum scriptorum recentissimæ facturæ à manu mea accipere. Rogo verò etiam atque etiam, uti Illustrissimo illi Comiti Juvenci, ejusque ephoro, reapse ostendere ne dedigneris , non in nullo hæctenus apud Te pretio me fuisse, nostræque amicitiae saltem memoriam ingratham ne nunc quidem esse. Vale & plurimum salve.

Helmeftadii, Kal. Martiis  
Anno 1675.

*Tui cultor dum  
vixero*

*H. Conringius.*

# XXXIV.

*Illustris Domine.*

**Q**Uamvis iniquæ belligerantium suspiciones vetuerint me literarum aliquid ad Te, Illustris Domine, aliquamdiu dare , rumpere tamen illud silentium me jam facit affectus ille animi & cultus, qui numquam non memoriæ obversatur. Urget quoque desiderium , intelligendi & valetudinem tuam , & fructus ingenii præclarâ doctrinâ eruditi , adeoque numquam non Ecclesiæ & rei publicæ



publicæ bono laborantis. Nec verò dubito, pridem lucem vidisse Capitularia; & in aliis æque utilibus vel jam occupatum fuisse Te veletiamnum occupari. Sed & ita perspecta mihi est Tua erga me benevolentia, ut quamvis ultimæ tuæ literæ fuerint Idibus Februarii ante biennium exaratae, nequeam mihi finistri quidquam de mutato animo persuadere. Ac proinde existimo, etiam Te velle, nihil eorum quæ Tibi evenerunt aut quæ gessisti, abs me ignorari. Ea fiducia fretus rogo, uti ne graveris per hunc eximium juvenem atque amicum meum (si quidem id Tibi liceat) facere me rerum tuarum, ut & num meas de Republica Imperii Germanici Exercitationes & librum de Antiquitatibus Academicis rectè per Simonem Paulum acceperis, certiore. Spero redituram brevi auream pacem, & restitutum iri commerciorum libertatem inter gentes. Tunc sanè illico transmittam quæ inter hæc bellicas turbas ego potui elaborare: nec minus dabo operam ut Tua quibus careo mihi comparentur. Vale Baluzi optime & perge favere

Helmstadii 27 Martii  
1676.

*Tua eruditionis justo  
æstimatori*

*H. Conringio.*

XXXV.

*Illustris Domine*

**V**icesimo septimo Martii ultimas meas dedi, Illustris Domine; Cum autem nec ille, qui curandas suscepit, nec Tu quidquam responderis, vereor periisse. Itaque mitto nunc earum apographum, saltem ut intelligas, quam ego & de tua sim valetudine sollicitus,

M 2

& lite-

& literarium commercium nostrum pristinum cupidè desiderem redintegrari. Et vero quæ tunc significavi omnia etiam nunc me sollicitum habent : quin imò tanto magis jam detestor hoc ferale bellum , quanto Pacis negotia præter expectationem procrastinantur , atque ita turbantur studiorum sacra. Nec tamen interea te feriari sum certus ; & ego pergo subinde aliquid elaborare , & quidem nunc adeo conscribo , sive potius recenseo augeoque quem ante viginti annos conscripsi librum de Pace perpetua conservanda inter Imperii ordines religione quamvis dissidentes ; huic subjuncturus alterum De Pace Ecclesiæ : quia mihi nihil magis est in animo & voto quam Pax , ut brevi forte hinc discessurum dimittat me Dominus vitæ arbiter in Pace. Quid Tu rerum agas aut moliaris , quæso , saltim huic eximio ac docto juveni amico meo non è multis , indicare ne graveris. Est ille gente Ostfrisius , popularis meus , peritia cum primis legum civilium excellens , & reliqua eruditione simul tinctus , eoque jam Doctoris titulo ornatus , imò etiam mihi arcta junctus necessitudine. Quapropter rogo , ita illum velis excipere , ut ipsemet reapse intelligere possit , non vanè me gloriari tua benevolentia , & eum te esse , qualem te omnibus bonis soleo commendare , pari scilicet cum eccellente doctrina humanitate. Id quod meus ille in eo deprehendet , si tuo ductu lustrare ipsi liceat Colbertinam Bibliothecam si non & Regiam aliasq; Vale Vir optime & favere perge

In Academia Julia xi. Aug.  
1676.

*Tua doctrina & virtutis  
cultori*

*Hermanno Conringio.*

*Mecænati nostro opto omnia felicia.*

XXXVI.

## XXXVI.

*Illustris Domine*

**E**T vicefimo feptimo Martii & Augufti undecimo literas ad Te exaravi, Illustris Baluzi. Spero utraſque tibi redditas, etſi certioſem me ne illi quidem fecerint, qui curandas ſuſceperunt. Jam addo tertias; quia non dubito ſaltem hunc juvenem probe curaturum, quod ſibi eſt demandatum, præſertim cum ambiat per me benevolentiam tuam ſibi comparare. Et vero is quidem illam meretur ſaltem ſtudio eximiæ ſibi ſacrarum rerum peritiæ nanciſcendæ, quâ in re præ aliis tu poteris ejus deſiderio ſatiſfacere, cum inſigni quâ vales eruditione tum benè de bonis merendi compertâ cupiditate. Non etiam dubito, ultro te hoc acturum: ſimul tamen etiam atque etiam rogo, ut ita hoc agere ne graveris, quo & hic intelligat tuum erga me affectum, atque adeo in mei quoque gratiam aliquid ſibi beneficii contigiſſe. Id quod inter alia abunde præſtabis, ſi aditum ipſi conceſſeris ad Bibliothecam Colbertinam, docuerisq; nonnulla ad Eccleſiæ Gallicanæ hodiernum ſtatum & rem literariam, cum primis tuas operas, pertinentia. Meas curas jam tum ſignificavi prioribus literis & narrabit eas plenius hic juvenis, eoque quidem non eſt neceſſum illas vel verbulo indicare. Utinam tandem aliquando, pace reddita, liceat non frequentiores duntaxat literas mutuo dare, ſed etiam libros noviffime elaboratos mittere! Unicè equidem hoc opto, hoc ſpero, hoc DEUM precor. Tu verò valè, &, quod facis, perge favere

Helmſtedii xix. Septembr.

1676.

*Illustris eruditionis ac virtutis**Tuæ iuſto cultori**Hermannò Conringio.*

XXXVII.

## XXXVII.

*Illustris Domine*

**C**onstans in me favor hunc quoque juvenem benignitati Tuæ commendare, audacem me facit. Est ille Eloquentiæ apud nos Professoris, viri longe eruditissimi, filius, & doctrina pariter & virtute eximius; post peregrinationem Italicam ultimum illius sui curriculi complementum, ut ita loquar, apud vos consequi cupidus. Non dubito hunc non minus atque alios à me laudatos experturum perpetuam Tui erga me animi vim propensionemque. Potèris vero huic & narrare omnia & committere, quæ & sciri à me & agi desideras: quoniam spero brevi huc rediturum. Ego sanè jam tum videor me audire; narrantem juvenem res tuas, bono literario vel jam tum proximo biennio impensas vel propediem impendendas, cum primis verò bonam valetudinem. Deum autem obsecro uti non hunc duntaxat annum, sed multos secuturos alios felices tibi præster

Helmstadii 4 Jan.

1677.

Tui

*observantissimus**Hermannus Conringius.*

## XXXIIX.

*Perillustis Domine*

**Q**uia bene atque ex voto successerunt meæ commendationes, quas hætenus institui, audeo & hocce tres genere ac doctrina eximios Juvenes patrocinio tuo committere. Eorum unus, quod mirere, natus est



est Moscoviæ, patre Archiatro magni Russorum Czaris: qui etsi ad juris disciplinam animum quam maxime applicuerit, fortassis tamen & in historia omni superabit expectationem tuam. Quicquid beneficii trigæ illi induleris, mihi illud datum esse existimabo. Poterunt illi, si ne hoc nescire velis, narrare senectutis meæ bona malaque, quodq; pergam etiam nunc in studio bene de publico merendi calamo indefesso. Alterum operum est sacri argumenti, & adhuc versatur sub prælo brevitamen visurum lucem, quod mihi expressit Capucinus quidam pro novo quodam Antonii Patavini Novenistico, quem appellant, cultu laborans. Alterum est Paci Civili Germaniæ consecratum, quod mitto, & quidem ut simul illud censuræ Tuæ submittam. Capitularia intelligo tuâ operâ jam tum esse perfecta, & parari jam omnia ad editionem supplementi Conciliorum. Si hisce hospitibus omnia Tua isthæc narraveris, poteris per illos & ego rerum tuarum fieri certior: quanquam ne quid diffitear, malim ex te ipso isthæc addiscere. Vale Perillustri Domine & perge favere.

Helmstadii Anno 1677.

Prid. Kal. Maji

Tuo

*Hermannno Conringio.*

## XXXIX.

*Perillustri Domine*

**A**Nnusest, Perillustri Domine, quum & literas & libellum eximiis tribus juvenibus committerem ad te deferenda. Illos ex Britannia Lutetiam commigrasse certus quidem sum: curaverint verò commissa necne, nondum intellexi. Multo minus aliquid rerum tuarum

rum accepi. Quod postremum quam maxime dolet: quia pridem nihil vidi à manu tua profectum, & tamen de favore tuo quidquam sinistri suspicari vetat qua te colo pietas. Ut proinde tuum silentium cogar imputare minus benignæ valetudini, quæ meæ quoque senectuti est gravis, vel saltim omne commercium literarium turbantibus bellicis hisce turbis. Simul verò & vivere Te & valere docueris, mittendique aliquid occasio sese obtulerit, confestim cum responso meo mittam unum alterumque libellum recentissimæ fœturæ. Quæso autem simul significes aliquid certi de Capitularium & Conciliorum nova tua editione. Vale & perge favere

Helmestadii 1678. prid.  
Ascens. Domini.

*Tuo cultori*

*Hermanno Conringio.*

XL.

*Clarissimo doctissimoque Viro*

HERMANNO CONRINGIO

STEPHANUS BALUZIUS

Tutelenfis

S. P. D.

*T*ædet me durissimi istius belli, multis de causis, sed ob illam etiam quod illud interrumpit jucundissimum commercium literarum quod inter nos intercesserat. Antea quidem sepe ad te scribebam, tu vicissim frequenter ad me literas dabas, Vir clarissime. Nunc in diversum omnia mutata sunt, & omnino bellum istud fuit pestiferum & exitiale huic nostro vitæ instituto. Accepi tamen aliquot tua epistolia, ad quæ respondere tandem juvat. Ac primum quidem gratias tibi ago quod

quod nobilissimorum Germanorum amicitias mihi semper concilias. Possunt autem & illi fidem tibi facere humanitatis, quam illis exhibeo, qui tuas ad me literas perferunt. Deinde agam tecum paulisper de Capitularium editione, quæ exeunte anno præterito absoluta est & in publicum emissa. Habebis unum illius exemplar cum primum se occasio offeret mittendi libros ad Celsissimum Principem & Illustrissimum Episcopum Paderbornensem. Hac enim via uti decrevi, ut exemplar tibi destinatum facilius ac tutius veniat in manus tuas. Omnino hæc collectio continet quæcunque pollicitus sum in foliis illis excusis ante editionem, quorum exempla habuisti. Sed multa sunt in appendice actorum veterum adjecta tomo secundo, quæ tua curiositate indigna non sunt, & magnæ utilitatis esse possunt. Videbis usum esse me interdum auctoritate nominis tui, tum etiam humanitatem amicitiamque erga me tuam prædicasse. In hoc nunc sum, ut propediem typographo tradam novam collectionem Conciliorum quam paro, in tria ut minimum volumina divisam. Si quid istiusmodi habes non editum, vel alicubi noveris extare apud amicos tuos, plurimam à me gratiam inibis, si mecum aut communicaveris aut communicari procuraveris. Interim verò dabo aliquid temporis absolvendæ editioni epistolarum Innocentii III. quæ jamdiu sub prælo sunt, & emendandis novæque editione donandis epistolis sancti Gregorii Papæ Romani, quæ mirum est quantis ac quam enormibus erroribus scateant etiam in emendatissimis editionibus. Accedent notæ nostræ ad loca difficiliora, tum ut emendationum nostrarum rationem reddamus, tum etiam ut sanctissimam beatissimi seculi disciplinam ostendamus nostris hominibus, ut hinc admoniti mutant, quod à recta vivendi ratione deflexit. Magna enim documenta habemus in epistolis doctissimi & optimi Pontificis, magnum sanctitatis exemplar in vita ejus. Vale



*Vir clarissime & eruditissime, & me semper ama. Lutetia  
Parisiſorum VI. Idus Majas MDCLXXVII.*

## XLI.

*Clarissimo doctissimoque Viro*

HERMANNO CONRINGIO  
STEPHANUS BALUZIUS

Tutelenſis

S. P. D.

**C**um Deus Opt. Max. pacem populo suo tandem dederit post tot turbida tempeſtatis procellas, ſpero, mi Conringi, literarum inter nos commercium, quod nescio quo fato quieverat, rediturum, adeoq; fruiturum me eximia eruditionis tuæ bonis. Audio interim non admodum lubens, nondum ad te perveſiſſe duo volumina Capitularium quæ pridem ad te miſi, ſimul cum illis quæ ad Illuſtriſſimum & Celiſſimum Principem Ferdinandum Furſtenbergium Paderbornenſem tunc, nunc verò etiam Monaſterienſem Epiſcopum miſi; quæ non dubito quin ille, quâ eſt in literas & earum Profeſſores inclinatione, cum ſit præterea amantiſſimus utriuſq; noſtrum, quamprimum ſe dabit occasio, ad te mittat. Ab eo etiam accipies primum Miſcellaneorum meorum librum, qui ſine ſuperioris anni emiſſus eſt in publicum. Secundus nunc abſolvitur & ante medium Aprilem exhibit. Volo autem te beare, mi Conringi, ut vel hinc intelligas perpetuam in te obſervantiam meam. In hoc ſecundo Miſcellaneorum meorum libro primum locum occupat liber Firmiani Laſtantii de perſecutione, cujus mentionem facit Hieronymus, quædam docti omnes putabant periſſe, repertus in vetuſtiſſimo codice MS. bibliothecæ Colbertinæ. Ne putes autem, vir doctiſſime, ludere me aut



aut joculari voluisse, quum dixi velle me te beare, ecce tibi Synopsin rarissimi operis. Lactantii institutum fuit in eo libro referre miserabiles eorum Imperatorum exitus qui persecuti sunt Ecclesiam Dei, veluti Neronis, Domitiani, Decii, Valeriani, Diocletiani, & ceterorum usque ad felicissima tempora magni Constantini. Et eorum quidem historiam leviter perstringit, qui Diocletiani ævum antecesserunt. Totus autem est in describendo principatu istius successorumque, ejus usque ad annum Christi CCCXIII. quo post victum fugatumque Maximinum pax Ecclesie data est à Constantino & Licinio. Docet nos hic liber diem, quo Diocletianus fuit levatus Imperator, quo tempore Constantius Chlorus & Galerius Maximianus facti sint Cæsares, initium persecutionis, tempus vicennalium & triumphum quem Diocletianus egit de Persis, morbum Diocletiani, annum quo ille & Maximianus Herculus imperium deposuerunt & Severum ac Maximinum cognomento Dariam Cæsares creaverunt.

Hæc enim admodum incerta erant. Initia magni Constantini, in quibus constituendis adeo gravia sunt certamina inter viros doctos, isthic certissima & apertissima sunt. Jam de crucis signo, quod ostensum est Constantino, quum id nonnulli in Italia evenisse velint, alii circa Danubium, alii circa Rhenum, quidam etiam in Gallia, jam dubitare non licebit, cum ex ista Lactantii historia certò colligatur ostensum ei fuisse in castris prope Romam pridie quam Maxentius victus est, hoc est VII. Kal. Nov. Insuper esset omnia persequi. Hæc tantum in antecessum ad te scribere volui, ut accendam desiderium, quo statim ardebis videndi librum ipsum. Tu vide, vir clarissime, an per Argentoratū possem illum ad te mittere, ut quamprimum accipias. Avidè expecto responsum tuum. Interim vale & me semper ama, Lutetie Parisiorum IV. Kal. Aprilis M. DC. LXXIX.

*Illustris Domine.*

**Q**Uum hesterno die Tuæ mihi traderentur à Mehl-  
bomio nostro, languebam à pridiano animi de-  
liquio: visus autem sum mihi convalescere  
haud parum ex primo statim Tuarum conspectu, multò  
magis ex lectione. Et verò ultimam epistolam Idibus Fe-  
bruarii anno septuagesimo quarto exaraveras: ac proinde  
a manu Tua, Illustris Domine, ultra integrum quinquen-  
nium ego nihil acceperam. Quod pertinax silentium per-  
quam me sollicitum habuit; non quod de animo Tuo be-  
nevolo sequius quid fuerim suspicatus, sed quod metue-  
rim Tuæ valetudini; præsertim, quoniam interea tem-  
poris etiam ego non semel graviter decubuerim, morbum  
morbo frequenter excipiente, imò hæctico (ut ita loquar)  
laborem perpetuo affectu, sola morte avellendo, jam agens  
annum tertium septuagesimum: etsi Tu, nisi fallor, mul-  
tò sis junior.

Quandoquidem verò in literis nulla fit morbi mentio,  
aliique Lutetiâ reduces complures sanitatem tuam inte-  
gram narraverunt, commercium nostrum literarium sola  
haud dubie turbaverunt quinquennalia arma Dominorum  
nostrorum. Cum plurimis igitur aliis nominibus tum  
hoc quoque Pax publica me exhilarat, quod impofterum  
liceat iterum & literis & libris tuis doctissimis frui, adeo-  
que hoc etiam impensorum abs me plurimorum laborum  
paci constituendæ longè acceptissimo fructu. Et verò  
dum auro cariora mihi scripta promittis, jam tum pri-  
mum pristinae felicitatis gradum vicissim attigi. Nec enim  
vel suspicatus sum, quidquam hoc quinquennio abs te  
esse

esse elaboratum præter Capitularium editionem: etiam hæc verò hætenus heic locorum non comparuit, perinde ut Gallicum nihil bibliopolæ tanti temporis intervallo huc attulerunt. Princeps Furstenbergius postquam bellatori Episcopo in Monasteriensi quoque Principatu successit, minus solito potest studiis vacare: itaque vereor tardè me accepturum etiam ea quæ per illum mihi destinasti. Neque Argentorato, nisi ægerrime, huc pòterit quidquam a Simone Paulio curari: ita infesta adhuc sunt Germaniæ nostræ itinera omnia. Expeditissima fuerit utrinque ratio mittendi, per Hamburgum & Rotomagum: si quidem Christianissimi Regis Hamburgensis Residens hanc curam suscipiat. Id quod, nisi fallor, facile ab ipso impetraverit Illustrissimus Colbertus. Si sanè hoc ita fuerit constitutum, etiam ego utar hac commoda ratione, mittamque & Illustrisf. Colberto & Tibi nonnulla cum meo aliorum recentissimæ faturæ, Tua aurea dona saltim æneis compensaturus, in signum observantiæ & gratitudinis. Quæ de Lactantii libello narras, magnum mihi incenderunt desiderium secundi Tui Miscellaneorum voluminis: nec enim ejus. vel nomen memoratum forte est nisi ab uno S. Hieronymo, nec iis quæ indicas Chronologicis disidiis componendis, aut stabiliendæ fidei conspectæ à Constantino crucis, (quæ traditio multis est suspecta hætenus) quidquam magis est idoneum. Ubi nactus fuero volumen illud Tuum, habebit me avidissimum lectorem. In uno meorum videbis Notarum Tuarum ad Agobardum justum encomium. Ubi valetudo faverit, edam hac æstate Politici argumenti libellos duos, alterum de summæ potestatis civilis jure & officio circa religionem, alterum de Notitia singularis Reipublicæ. Posterior haud



fortassis indignus fuerit, qui consecratur nomini Delphini Regii: num liceat autem mihi tantum fastigium adorare, rogo me doceas. Avide sane desidero ad hæc omnia mea Tuum responsum. Quod poterit quam commodissime curari Hamburgum ad Regium Residentem. Utinam haud grave etiam fuerit tunc nonnihil narrare, de Moralis Jesuitarum Theologiæ Parisiis instituta censura, ut & de bulla Pontificis contra Molinistas: quia utriusque facta est mentio in Novellis hebdomadariis Lutetiæ exaratis. Vale & perge favere Tuo

Helmstadii 25. Maji.  
1679.

*Illustris Domine  
cultori*

*H. Conringio.*

XLIII.

*Clarissimo doctissimoq; Viro*

HERMANNO CONRINGIO

STEPHANUS BALUZIVS

S. P. D

*A*ccepi ante hos dies epistolam tuam datam Helmstadii die 25. Maji, in cujus statim initio ais, nihil Te literarum à me accepisse post Idus Februarias anni septuagesimi quarti: Sane bellum illud multum interrupit commercium nostrum literarium. Reperio tamen me ad Te scripsisse III. Idus Martias anni MDCLXXV. & VI. Id. Martias MDCLXXVII. Valde a. doleo, mi Conringi, has epistolas Tibi non fuisse red-ditas, seu propter varios morbos tuos, sive fortassis occasione pestilentissimi belli, quod etiam concordiam literatorum aliquo modo conscidit. Sed nunc beneficio Regis nostri verè magni datâ ac stabilita pace suavissima per omnem Europam, tuti jam sumus libereq; possumus resumere quod intermissum est.

*De*



*De Tomis Capitalarium quos Tibi nondum traditos esse scribis interrogavi his diebus R. P. Verjusium Jesuitam, qui eos meo nomine misit ad Illustrissimum Episcopum Monasteriensem an ad eum pervenissent. Ille vero respondit existimare se pervenisse, sed nihil certi habere. Itaque tum, cum illos accipies simul uti reor, habebis priores duos Miscellaneorum meorum libros, nam illos quoque curavit idem Verjusius. De lucubrationibus quarum editionem moliris, quod ad me scripsisti, mihi gratum fuit audire: sed vellem magis ut ad me rescripsisses confirmatam esse bonam valetudinem, sine qua studia literarum constare vix possunt. Cum se occasio offerret, interrogabo, an Serenissimo Delphino dicare Tibi fas fuerit notitiam Reipublicæ quam ei destinasti: Interim cura valetudinem tuam diligenter.*

*Ego, ut etiam aliquid de meis admisceam, nunc in hoc totus sum ut proximo mense Septembri inchoare possim editionem Tomi primi meorum Conciliorum; in quo inter cætera gravissima editurus sum commonitorium à Cælestino Papa Legatis Apostolicæ Sedis in Orientem proficiscentibus adversus Nestorium nondum in lucem emissum, & in quo maxime elucet auctoritas Romani Pontificis in conciliis Ocumenicis. Dabo etiam nonnulla scitu dignissima, in causa Vigilii Papæ quæ nondum prodierunt. Hæc ad Te Vir doctissime. Vale & me semper ama Tui studiosissimum. Lutetiæ Parisiorum XIV. Kal. Septembris MDC LXXIX.*

## XLIV.

*Illustri Domino*

STEPHANO BALUZIO

Tutelenſi

S. P. D.

HERMANNUS CONRINGIUS.

**S** Ummi illius gaudii, quo me beavit ſolſtitii brumalis dies, non poſſum Te Vir optime non participem facere. Naſtus nempe illo die ſum theſaurum pridem mihi deſtinatum, hoc eſt duo volumina Capitularium & primum Miſcellaneorum tomum. Et vero ſuperarunt illa longe ipſam meam exſpectationem multis modis.

In Tomo primo Capitularium tamen quam maxime aſfecit me Tua ad Lectorem Præſatio, cum ob variam eruditionem tum cum primis propter intrepidam veritatis iſt hoc etiam loco factam profeſſionem. Quæ ſi Romæ admiſſa eſt æquo animo, bene ſperandum fuerit impoſterum de ſepticollis Curia emendatione. Fortaſſis tamen diſſimulare cenſuram fecerunt Tria illa Chriſtianiſſima lilia: quippe quæ ipſimet Tarpejæ arcis non minus terrori eſſe ſoleant quam Satanæ tria S. crucis ſignacula. Euge viro- rum cordatiſſime! Perge ita bene de republica & Eccleſia mereri. Deus Tibi erit merces magna. Ante annos triginta ſex libro de Germanorum Imperio Romano etiam ego ſic ſatis prolixè de Francorum Imperatorum in Papas priſca auctoritate diſputavi: jamque Tuis videor me excitari ad libri recenſionem pridem meditatam, quoniam exempla libri dudum ſunt divendita, ringentibus Curia Tiberina adoratoribus, ſimul tamen muſitantibus. In Tomo primo Miſcellaneorum nihil itidem non placuit.

Præ

Præ aliis tamen me affecere Acta contra miseros Franciscanos, quorum ultra centum flamma sacra perierunt. Historiam illam omnem ex optimis illius ævi scriptoribus in hac Julia nostra Georgius Calixtus Vir magnæ eruditionis simul & moderationis, late est persecutus: quam proinde velim etiam Tibi lectam. Cæterum pro illis Tuis donis amplissimis gratias ago maximas. Proximo vere σὺν τῷ mittam Hamburgo aliquot etiam mea scripta novissimi temporis: non in ἀντίδοτον tamen sed tantum in signum aliquod venerationis qua Te prosequor. Curabo interea mihi ex Gallia adferri Tuas ἐκδόσεις, epistolarum Gregorii M. & Innocentii III. quia hætenus in Germaniam nostram haud pervenerunt. Num licuerit Christianissimo Delphino aliquid Politici argumenti consecrare nec ne; num item fas sit sperare renovationem Regiæ munificentiae pristinae, scire ex Te cupidè desidero. Non dubito etiam utrumq; abs te ingenuè significatum iri. Quæso hoc etiam expiscari ne graveris mihiq; indicare. Nec enim quidquam hujus agere Te inconsulto, mihi constitutum est. Ut proximus annus cum aliis secuturis plurimis feliciter Tibi fluat Deum precor, mansurus quoad vixero, Perillustis Domine, Tuo nomini devotissimus.

Helmeftadii proprid. Kal. Jan.

Anno 1679.

#### XLV.

#### *Perillustis Domine.*

**S** Imulae splendidum donum tuum nactus sum, quas debeo, gratias egi per literas, cum aliter non liceat. Verum ista epistola num recte sit curata, & non potius



tius malâ fide intercepta, haud parum vereor. Itaque nunc denuò mitto ejus apographum: simul omnium eorum quæ tum scripsi quasi iterata repetitione. Et verò nunc majores tibi gratias agere me adigit, ex eo tempore è libris tuis major accepta instructio: quia ab iis nunquam nisi doctior discessi hætenus, ut & à quotquot hic vivunt doctis felix censeor tam præclaris donis, quæ in Germaniam nostram hætenus non pervenerunt. Deum veneror, uti possis integrâ valetudine, Ecclesiæ ac Reipublicæ bono, non duntaxat secundum Miscellaneorum volumen, sed etiam Conciliorum *αἰνέδοις* in lucem producere. Mitto tandem aliquando etiam ego nonnulla mea, proximis hisce aliquot annis, inter bellicos strepitus & improspere valetudinis fortunæq; incommoda, elaborata. Non in *αἰτίδωρος* tamen, sed in signum, quamvis leve, ejus quâte, & illustrissimum Mæcenatem Colbertum inprimis, prosequor devotæ venerationis. Nisi memoria me fallit, jam tum pridem misi duo exempla mearum de Republica Imperii Exercitationum per Simonem Paulum, item cura Episcoporum nostrorum doctissimi librum de Antiquitatibus Academicis, nec non per juvenem quendam librum de Pace civili: num horum autem aliquid recte fuerit traditum, hætenus ignoro. Itaq; nunc iterum eadem mitto, tuo arbitrio relicta: num scilicet illa tibi velis retinere an Mæcenatis Bibliothecæ inferere. Invenies vero & alia fortassis hætenus non visa: quæ si & in usum Bibliothecæ illius, & in Tuum suscipere dignatus fueris, multum equidem mihi gratulabor. Recensui novissimè quos ante hosce annos viginti sex edidi duos de Finibus Imperii Germanici libros: non mitto tamen, cum quia ad manum mihi nullum est plenum exemplum, tum quia pro-



propediem accedet liber Tertius supplementorum. Mit-  
tam igitur simulac licuerit opus integrum dare, Rogo  
autem etiam atque etiam, interea temporis saltem illa quæ  
nunc mitto & Tute æquo animo admittas, & meo nomi-  
ne in signum humilis simul & grati obsequii Mecænati no-  
stro offeras, etsi non sint, perinde ac tua dona, aurata  
pelle contexta, sed pro more hujus terræ rudia atque im-  
polita. Si in pristinum Regiæ gratiæ locum receptus fue-  
ro, & jubeam sententiam dicere de nonnullis Christianis-  
simæ Majestatis commodis, fortassis mittam propediem  
quæ ex usu sint publico: quæ nunc tangere nefas fuerit.  
Magno interim beneficio clientem tuum affeceris, si re-  
sponso me dignatus fueris. Id quod tutissime fieri pote-  
rit misso epistolio ad Residentem Regium qui Hamburgi  
degit. Quamvis hac vice utar ego curâ Consiliarii Hol-  
satici viri optimi pariter & doctissimi; qui inter Regios  
ministros petit recipi, saltem titulotenus, quo sit tutus à  
Danicis insidiis. Illustrissimo Colberto fratri innotuit  
pridem Neomagi Principis sui legatione fungens: itaque  
nunc patronum illum suis literis adit, per me etiam no-  
stri Mecænatis favorem sibi parari etiam atque etiam ro-  
gans. Quem Tu, Perillustris Domine, huic conciliare  
quæso ne dedigneris, commerente hoc ipsum viri præcla-  
ra virtute pariter atque eruditione.

Præter illum verò, nullâ commodi expectatione, Te  
hic locorum tuo merito maximi faciunt omnes eruditi,  
quotquot me monstratore tua legerunt. Quos inter re-  
periuntur haud pauci inter longius diffitos quoque, quibus  
ex mea Bibliotheca Tua communicavi: cum alias eorum  
nihil fere hic compareat. Et vero præ aliis æstimat Te in  
Wittebergensi etiam Academiâ Zieglerus, Juris utriusque;

longe consultissimus, Ecclesiastici cumprimis antiquissime pari eruditissimus, sua quædam tibi propediem missurus, ubi intellexerit haud id ipsum ingratum futurum. Epistolam Cœlestini quam fortassis jam edidisti, legere equidem desidero (ut hoc etiam hisce addam.) Quamvis enim haud dubitem censeri abs te genuinam, neque ego temerè sim refragaturus: novisti tamen Papam illum multa fuisse conatum periniqua, ac proinde ex illius monumentis tantum colligi posse quid fuerit molitus, non autem, quid ipsi reapse facere licuerit. Totum certamen Africanum Tibi abunde est cognitum; ut &, a nonnullis confictas esse Theodosii Imperatoris nomine de Concilio isthoc Ephesino per Cœlestinum Papam convocando literas, quæ in media Italia nuper plurimas turbas dederunt Henrico Norisio, Antiquitatum Ecclesiasticarum illic loci omnium & peritissimo & candidissimo judici. Ignosce, rogo, multa adeo nunc proponenti: præsertim quia non pecco nisi fiducia Tuæ mihi pridem perspectæ benevolentiae ut & optimæ mentis. Faxit Deus, uti cum prospera valetudine tuum patrocinium perduret in multos annos. Ita foveo

Tuo

*Perillustri Domine*

*Nomini*

*semper devotus*

*Hermannus Conringius.*

Helmstadii Saxonum,  
25 Junii 1680.

P. S. In Discussionem contra Capucinum p. 360. ubi agitur de adorando uno Deo, verba tua esse adducta confido Te haud improbante. Inprimis desidero sententiam tuam de iis quæ p. 335. disserui de Epistola quæ fertur Gregorii ad Secundinum.

XLV.

## XLVI.

*Perillustris Domine*

**A**Nni præcedentis die vicesimo quinto Junii mensis non duntaxat prolixas ad Te literas exaravi, sed simul Hamburgum misi cistulam plenam variis libellis meis. Omnia probe curanda suscepit Sam. Racheus Serenissimi Holsatiæ Ducis Consiliarius, magnus Tui æstimator & meus amicus. Quin ille fecerit officium, non equidem dubito. Quoniam verò abs Te nihil responsi redditur, imò de vita aut valetudine Tua ne quidem per alios hætenus quidquam licuit resciscere, tristis ego & plenus sollicitudinum hæc scribo. Si vivis adhuc & mihi faves, quæso tandem aliquando facias me tanti gaudii participem. Ego quamvis senex, quamdiu vixero, manebo

*Perillustris Domine*

Helmeftadii xi. April.  
Anno 1681.

*Tua virtutis & doctrina  
observantissimus*

*H. Conringius.*

## STEPHANI BALUZII EPISTOLA

*Ad*

Ferdinand. Episc. & Principem Paderbornensem,  
ne pagellæ vacarent, adjecta.

**I**am antea, Illustrissime Prasul & Celsissime Princeps, cum ex pluribus viri doctissimi Hermanni Conringii epistolis, tum ex aliorum sermonibus & fama vulgari acceperam, literas & literarum studiosos tibi valde cordi esse, & non tam principem locum inter tuos tenere te privilegio sedis ac generis tui quam propter eximias animi dotes & summam eruditionem ac humanitatem prope incredibilem. Sed nunc tuo maximo beneficio ornatus, intelligo cuncta infra famam fuisse & humanitatem tuam majorem esse quam ut percipi cogitatione possit. Quid enim illud est, Ferdinande Principum decus & virtutum ac literarum antistes, quod nullo hætenus aut officio aut obsequio in



te meo provocatus non solum non rogatus, tantum quia à Conringio audiveras me dare operam novæ editioni epistolarum Innocentii III. Romani Pontificis, regestum ejus de negotio electionis Imperatorie ad me misisti ex tua Bibliotheca, sed etiam literas omni bonitate refertas primus ad me dedisti vir tantus, prior inter nos aperuisti commercium literarum? Profecto cum mecum repaso quo modo te adversum me gesseris in hac occasione, cum hinc colligo, quantus sit tuus erga bonas literas amor, quantus ardor ad promovenda studia nostra, gratulor Ecclesia Catholica, quæ talem ac tantum habet Episcopum, gratulor seculo nostro, gratulor & mihi, cuius ea est felicitas, ut ante benevolentiam susceperim summi viri quam quaesierim. Pro ista interim optima tua in me voluntate immortales tibi, Celsissime Princeps, gratias ago, enitarg, posthac pro virium mearum modulo ut quam gratissimus erga te cognoscar, & ut omnes intelligant apud me memoriam beneficii tui sempiternam fore. Superest, doctissime Prasul, ut tecum paucis agam de editione epistolarum Innocentianarum. Octo sunt anni, nisi fallor, ex quo ea incepta est fieri, sed intermittere eam frequenter oportuit, partim propter occupationes meas, partim quia sperabam, Romanos mecum communicaturos aliquot earundem epistolarum libros qui nondum editi sunt, atq, hic satisfactum mihi fuisset si res stetisset in arbitrio nonnullorum Cardinalium qui & meo nomini studiisq, meis bene volunt. Nunc tandem fatigatus diuturna & inani expectatione, spem omnem abiect, omninoq, constitui absolvere ceptum opus, quantum mihi licebit per malam valetudinem oculorum meorum & occupationes quibus distineor. Post priores duos libros qui & Roma & Colonia & Venetiis olim editi sunt, addam quæ tertii libri vicem tenebit, primam collectionem Decretalium ejusdem Innocentii, ex tribus primis regestorum ejus libris compositam à Rainerio Diacono & monacho Pomposiano, quam inveni in vetustissimo codice MS. Theodorici Remensis. Deinde sequetur quintus liber, qui ad me pervenit ex urbe Divionensi. Tum decimus, undecimus & duodecimus ex Bibliotheca illustrissimi & eruditissimi Viri Francisci Bosqueti Episcopi Monspelienfis. Superiorum librorum, quorum copiam mihi facere noluerunt ii in quorum potestate sunt, locum unicuiq, supplebit collectio Decretalium quam tertiam vulgo vocant, ex duodecim prioribus regestorum Innocentii libris confecta. Tum liber tuus, illustrissime Antistes, quandoquidem illum publici juris esse sinis. Deinde libri quatuor editi Tolosa anno 1635. ab eo quem paulo ante nominavi Francisco Bosqueto Episcopo Monspelienfi. Idem tunc edidit gesta Innocentii III, ex vetusto codice MS. Col.



Collegii Junensis. Sed editio illa tot mendis laborat, tot erroribus scatet, ut dici vix possit. Itaq; opus illud visum est recudi debere inter prolegomena tom. primi, emendatum ex fide duorum vetustissimorum librorum, quorum unus extat in bibliotheca illustrissimi Archiepiscopi Remensis Caroli Mauricii Tellierii, alter in Regia. Addam autem fortassis aliquot notas huic novae editioni necessarias & utiles. Patere vir doctissime & humanissime, ut quandoquidem obtulit sese occasio disserendi de studiis meis, tecum adhuc paucis agam de nova, quam paro, collectione Conciliorum & de nova item editione Capitularium Regum Francorum. Quod duplici de causa facio, illustrissime Praesul. Primum ut tibi reddam rationem aliquam studiorum meorum, tibi, inquam, quem scio istis rebus mirum in modum delectari. Deinde ut admonitus à me quid mediter, symbolam tuam pro tua singulari humanitate conferas ad commentum suscepti consilii, remq; publicam ecclesiasticam, pro tua pietate, eruditione, & auctoritate, quibus plurimum vales, promoveas. Quod attinet ad collectionem Conciliorum, in hoc sum ut propediem praelo committam tria magna volumina, in quibus continebuntur mille ferme Concilia provincialia ex omnibus aetatibus, & ex utraq; Ecclesia Occidentali & Orientali quae nondum edita fuere in collectionibus Conciliorum quae usq; ad hanc diem prodierunt, neq; etiam in illa omnium amplissima quam his diebus in publicum irefecit vir clarissimus Gabriel Cossartius Presbyter è societ. Jesu. Addam ingentem numerum epistolarum Pontificiarum, & tractatus quosdam ineditos veterum scriptorum de auctoritate Concilii generalis. Initio autem operis dabitur magni illius Petri de Marca Archiepiscopi Parisiensis dissertatio de veteribus Canonum collectionibus, quae nusquam hactenus edita est. Hanc sequetur tractatus Guillelmi Durandi Episcopi Mimatensis de modo celebrandi Concilii generalis, emendatus ex fide vetustissimi codicis manuscripti. Colligam deinde in alio opere, ut dixi, Capitularia Regum Francorum secundae stirpis, id est, ab anno 741. usq; ad annum 880. aut circiter. Opus erit divisum in partes tres. In prima locabuntur Capitularia ipsa integra, prout edita fuere à Principibus nostris, sive ea quae jam typis nostris vulgata sunt, sive quae adhuc habentur in vetustis codicibus. Sequentur postea libri septem Capitularium, non quales editi sunt à clarissimis viris Joanne Tilio & Petro Pithæo, mutili & truncati, sed juxta veteres eosq; optimos codices, & secundum numeros capitum à vetustis scriptoribus & in antiquis synodis Gallicanis & Germanicis laudatos. Tertium locum obtinebunt Capita Caroli Calvi, olim quidem à doctissimo viro Jacobo Sirmondo edita, sed

*sed nunc in multis locis emendata & aucta ope veterum codicum ex Gallia & Hispania Tarraconensi. Et quia vir celeberrimus Hieronymus Bignonius existimavit, Marculsi & aliorum veteres formulasungi debere cum libris Capitularium, quod illi plurimum lucis inde accipere possint, dabo novam istius auctoris editionem suo nitore, seu potius, ut dicam id quod res est, suae barbariei restitutionem ex codice veneranda antiquitatis qui nunc extat in Bibliotheca Regia. Deniq; addam notas meas, quarum hic unicuique ferme scopus erit, ut vetera & obsoleta mediæ ævi vocabula explicem quæ in libris Capitularium & apud Marculfum aliosque veteres formularum editores occurrunt. Si quid ergo habes, Celsissime Princeps, quo me juvare possis, nullus dubito quin libenter more tuo mittas, qui etiam non rogatus beneficia tribuere soles. Habebunt autem tibi propterea gratias quotquot in hac urbe & alibi bonas literas amant. Ad me quod attinet, æternum ero devotissimus ingentium virtutum tuarum cultor, & sin minus exsolvero potero beneficia in me tua, certe animus meus eorum semper erit memor. Jusseras, illustrissime Praesul, ut nomine tuo salutarem optimum patronum meum Joannem Baptistam Colbertum. Feci, simulq; ei & epistolam tuam ostendi, & beneficentiam tuam ea qua debui gratæ animi testificatione apud eum predicavi. Voluit ille venire in partem beneficii mihi præstiti, jussitq; ut etiam suo nomine tibi gratias agerem maximas. Cum autem ostendissem etiam imaginem vultus tui, quam ad me misisti, Celsissime Princeps, admiratus est formam viro Principe dignam, mandavitq; in illustri loco reponi in celeberrima & elegantissima Bibliotheca sua. Deus se per multos annos servet incolumem. Illustrissime Praesul & Celsissime Princeps, & me tua benevolentia perge porro honestare. Dab. Parisi. III. Kalend. Maji M. DC. LXXII.*

P. S.

*Paulo post quam ad R. P. Verjussum Jesuitam miseram literas quas ad te dedi III. Kalendas, Illustrissime Praesul, & Celsissime Princeps, redditus est mihi liber poematum tuorum, hinc magis estimandus quod munere tuo ad me pervenit. Confestim illum evolvi, avide legi, & miratus sum felicitatem ingenii tui, & facilitatem in versibus faciendis. Sed tamen istud in te mirandum non est, vir illustrissime, cum domesticum & familiare sit, ut qui summos in Furstenbergica familia Poetas ante habeas, Theodorum Episcopum & Principem Paderbornensem, & Casparum Westphalia atq; Angaria summo cum imperio olim Praefectum. Unde colligi posset verissimum esse vetus illud*  
di-

*dictum*: Nascuntur Poëtae, fiunt Oratores. *Multum autem voluptatis acceperex* lectione versuum, quos inscripsisti *Monumenta Paderbornensia*, ea imprimis de causa, quod, praterquam quod elegantissimi sunt, continent memoriam rerum olim in ea parte Romani Imperii fortiter ac praclare gestarum à magnis viris. Unum, ne quid dissimulem, egre tuli, quod mihi ad manum eodem tempore non fuerit commentarius tuus, eruditissime praesul, ad monumenta illa tua, in quo non dubito quin multa reperturus fuerim qua animum meum pascere sua quissima pulcherrimarum rerum cognitione. Efficiam autem, si per bellum istud licuerit, ut liber ille ad me quamprimum deferatur ex Hollandia, ubi intelligo secundam editionem donatum fuisse. Ago interim tibi atque habeo gratias quam possim maximas pro isto tuo munere, quod diligentissimè, quamdiu vita suppetet, servabo velut testimonium tua in me benevolentiae. Legi totam integram praefationem nobilissimi cognati tui Christiani Theodori Plettenbergii Canonici Hildesheimensis, Celsissime Princeps, doctam sane & elegantem ac plurimam bonam latinam manantem. Nescio quibus ille se studiis applicet. Sed persuasum habeo cuncta illi facilia esse qui & tam ornate scribit & eruditè. Gaudeor interim Germania, ubi video vestra omnium ope reflorescere studia literarum.

Dum hanc epistolam scribo, unus amicorum meorum, idemque Poeta optimus, Joan. Bapt. Santolius Canonicus regularis Sancti Victoris Parisiensis, qui jam audiverat te, Celsissime Princeps, in hac arte excellere, meum auxilium imploravit, ut tibi notus esse posset. Non recusavi hanc provinciam. Itaque mitto & selecta ejus carmina & epistolam quam is ad te scribit ut in tuam familiaritatem admitti posset. Vale Princeps Optime & eruditissime, & memor esse semper velis mea erga te reverentia.

## INDEX RERVM PRÆCIPUARVM.

A.

*Acta contra Franciscanos.*

105

*Antiquitatum Academicarum editio nova.*

57. 85

*Antonii Augustini dialogorum nova editio Baluziana. 43. &c.*

*vid. Emend. Gratiani.*

P

Ar-



# INDEX.

*Archicapellanus an dici etiam soleat Archiepiscopus, & cujus respectu.* 68. seqq. 74  
*Arnulphus Aurelianensis qualis babeatur à Romanis.* 7

## B.

*Baluzii fata propter edita quædam scripta Ecclesiastica.* 4. 9.  
78. 81. Ej. modestia. 34. seqq. *Valetudo oculorum.* 42. 50.  
*Censura in notas ad Leonis III. epistolas.* 48. seqq. 55. *ad*  
*eam Conringii responsio.* 51. seqq.  
*Baluzii longum silentium.* 89. seqq. 95. seq. 109. *æstimatio apud*  
*eruditos.* 2. 107  
*Baluziani editi quidam libri.* 28  
*Bonæ Cardinalis laus.* 81  
*Bonifacii epistola.* 20  
*Borrichius scriptorum quorundam Conringii censor.* 88  
*Breve Paschalis Papæ.* 8. 13

## C.

*Canonum Africanorum autoritas.* 11  
*Capitularium Regum Francorum nova ed. Baluziana.* 22.  
seqq. 36. 78. 80. 97. *De ea prolixè differitur.* 111. seqq.  
*quid & cur ob eam à Romana censura metuendum.* 80. *De*  
*tomi I præfatione Conringii iudicium.* 104  
*Capitularia quædam Caroli M & Ludovici Pii.* 25. seqq. 40.  
*Caroli Saxonica à quo sint eruta.* 40. 43  
*Codex Canonum Romanus.* 18. seqq.  
*Cælestini Papæ commonitorium edit Baluzius.* 103. *de ejus actis*  
*& scriptis quibusdam iudicium Conringii.* 108  
*Collectiones Canonum antiquæ Bibliothecæ Julicæ.* 60. seqq.

Com-



# INDEX.

*Commendationes Conringianæ variorum ad Baluzium.* 21. 87.

90. 92. seqq.

*Conciliorum à Labbeo prætervisorum collectio Baluziana.* 2.

3. III.

*Concordia Ecclesiastica in Gallia agitari perhibetur.* 58. 71

*Concordia Ecclesiastica an sperari possit.* 71. seqq.

*Concordia sacerdotii & Imperii apud Romanenses cur expectari non possit.* 19

*Conciliorum alia collectio Baluzii.* 97

*Conringii studium rerum sacrarum.* 32. seqq. pacis ecclesiasticæ.

60. 71. seqq. civilis 82. 92. ejus valetudo, 51 100

*Cosutii epistola ad Regem Gallie q̄valis.* 53. seqq.

*Crucis signum ubi ostensum Constantino.* 29

*Curia Romana non potest ferre Baluziana quædam.* 81. 85

*Curialium libellus.* 6

## D.

*Decretales epistolæ.* 11. seqq. 17

*Dionysii cura in edendis Africanis.* 19

*Dionysii Werlensis refutatio.* 25

*Diplomatis Lindauiensis falsitas.* 39. 43

*Duchefnii editio Synodi Remensis.* 5. II

## E.

*Ebborectius dicitur quàm Ebo.* 16. *Ej. apologeticus.* 8. 12. 16.

*de ej. depositione epistola Rhabani.* 13

*Egiles ubi Abbas fuerit* 16

*Emendationum Gratiani nova ed. Baluz. 43. 47. 55. earum præ-*  
*fationis fata diversa.* 72. 74. 81

*Epistolarum Pontificiarum autoritas.* II

*Exercitationum Academicarum nova ed. 81. seqq. 84. seqq.*

# INDEX.

## F.

<b>F</b> erdinandi Fürstenbergii laudes. 17. 30. 33. 46. seq. 68.	<i>Ej.</i>
erga Baluzium humanitas &c.	109. seq.
de Finibus Imperii Germanici librorum nova ed.	106. seq.
Flacii fides in edendis synodi Remensis actis.	5
Francorum remp. veterem illustrare statuit Conringius.	85.

## G.

<b>G</b> allici Bataviae belliratio.	76. seq.
Gerbertus num interpolavit acta synodi Remensis. 3. quid de eo sentiant Romani.	7
Gerbertiana quaedam scripta.	7
de Germanorum Imperio Romano libri ed. nova.	104.
Gregorii M. epistolarum nova ed. Baluziana.	97.
Greiffenkrantzii commendatio ad Baluzium,	87.

## H.

<b>H</b> elmstadiensis juvenis commendatio ad Baluzium.	94.
Heribaldi quaestio ad Rhabanum.	13.
Hildebrandi operam Baluzius expetit,	1. 2. 5.
Holsatici Consiliarii commendatio.	107.

## I.

<b>I</b> maginem Baluzii impetrare non potest Conringius. 34. 37. seq.	
Imago Furstenbergii à Colberto magni fit.	112
Indiculi Capitularibus Carolinis subiecti etas & emendatio. 41.	
Innocentii III. laus. 12. <i>Ej.</i> epistolarum ed. nova Baluziana.	
12. 97. Editionis bujus libri recensentur.	110.
Josephi editio nova. 31. 37. exemplaria vetera,	38.
Juonis panormia.	61. 73
Juvenum tria commendatio ad Baluzium,	49. seq.

# INDEX.

## K.

**K**öh-smarcki Comitis ejusq; Ephori commendatio ad Baluzium. 90

## L.

**L** Abbei grævis censura Conringii. 49. ad versus eam Conringii defensio. 52

**L**abantii liber de morte persecutorum editur à Baluzio. 98. 101.  
Ejus synopsis. 98. seq.

**L**udovici Imp. epistolæ quædam. 17. 40

**L**udovici Regis munificentia. 71. 75

## M.

**M**anuscripta quædam bibliothecæ Julicæ. 21. 41. 60. seq.  
de Marca (Petri) in Baluzium amor, merita, & ad hunc supremum morientis mandatum. 2. 9. in ejus operis altera editione quid addiderit Baluzius. 9. 10

**M**arculfi formularum editio nova Baluziana. 43. 112.

**M**iscellaneorum libri duo Baluziani. 98

**M**oscovii juvenis commendatio ad Baluzium. 42. seq.

## N.

**N**obilis Germani commendatio ad Baluzium. 21

**N**odfyr quid significet. 41

**N**orissii encomium. 108

## O.

**O**stfrisi juvenis commendatio ad Baluzium. 92

**O**ttonis III. donatio. 18

## P.

**P**ace civili librum denuo editi Conringius. 92

**P**ax publica redintegrat literarum commercium. 98. 100. 102

Re-



# INDEX.

## R.

- R**eginonis ed. nova Baluzii. 14. 21  
 Reip. Germanicæ plena notitia. 84  
 Reip. singularis notitiam edere statuit Conringius. 101 seqq.  
 Rhabani epistola pœnitentialis 13. *à quo hoc ei non ineditum* 16  
 Ej. epistola ad Eigilem. 13. 16. it. ad Heodaldum. 14  
 Rhabani Mj. duo bibliothecæ Julæ. 2  
 Romana censura in quosdam libros Baluzii. 81. v. Baluzii fata

## S.

- S**aliciæ legis primi natales. 8  
 Salviani judicium de Gotbis Arianis. 31  
 Summi titulum recusat Baluzius. 34. seqq.  
 Synodi Remensis ad versus Arnulphum acta num sint interpolata. 3. Ej. editiones quantopere *discrepent.* 5. 6. Ej. codex vetus bibliothecæ Julæ cujus sit ævi *nota.* ib. *varie* ej. synodi editiones. 10. seqq.  
 Synodus Romana Joannis XII. contra Leonem. 8. 12

## V.

- V**ariantes lectiones ex variis codicibus mitti sibi petit Baluzius. 1. seqq. 12. *seq.* 15. 23. 26. 37. 38  
 Vaticanus codex epistolarum Innocentii III. 17. 30  
 Vicariatus Thessalonicensis occasio. 20  
 Vincentii verè καθολικόν. 31

## W.


- W**echeliana editio Synodi Remensis ad Arnulphum. 5. 6


## Z.

- Z**iegleri encomium. 107. seqq.


# F I N I S.













UNIVERSITY OF MICHIGAN



3 9015 06376 3463

A 505203

